

## M541H: Herbart von Fritzlar: 'Liet von Troye' (H)

0,1 swer sîner kunst meister ist  
0,2 der hât gewalt an sîner list  
0,3 der kan sie bekêren  
0,4 minneren und mîren  
0,5 wîten und engen  
0,6 kürzen und lengen  
0,7 des ist der tihtære  
0,8 wîse und gewâre  
0,9 der sich sô hât behuot  
0,10 daz er âne übermuot  
0,11 sîner kunst hât gewalt  
0,12 wenne der ungelérte ist balt  
0,13 unt wænet von der wârheit  
0,14 daz er habe wîsheit  
0,15 doch ist er unbereitet  
0,16 swenne in sîn kunst leitet  
0,17 unt er sich niht bewaren kan  
0,18 daz ziuhe ich an den blinden man  
0,19 er en grîfe dâ er wec habe  
0,20 ich denke des daz er besnabe  
0,21 der blinde sihet des wegues niht  
0,22 der gesehende dâr ane sihet  
0,23 beide schaden und vrumen  
0,24 dâ er mit sorgen muoz überkommen  
0,25 ich heize die ungelérten blint  
0,26 die schenden die gelêret sint  
0,27 von dem blinden spræche ich mî  
0,28 wen daz ich selbe muoz êr  
0,29 daz stüppé ûz den ougen lesen  
0,30 wende wâ ich jungere solte wesen  
0,31 wil ich dâ ander lêren  
0,32 sô muoz man mir ez verkêren  
0,33 doch lêre ich daz ich gelerne  
0,34 sie wonent ensament gerne  
0,35 unt des vile ungelîch  
0,36 swenne ich lêre sô lerne och ich  
0,37 getihetes des wil ich nû pflegen  
0,38 alsô hân ich selten ganzen regen

0,39 ez muoz mir einzeln tropfen in  
0,40 daz mir weichen sol den sin  
0,41 von vlîze wirdet der man gelârt  
0,42 der tropfe ist weich der stein ist hart  
0,43 doch erholet der tropfe den stein  
0,44 von anders sîner krefte dechein  
0,45 gewalt er an im stellet  
0,46 wen daz er dicke vellet  
0,47 diz buoch ist franzois unt walhisch  
0,48 sîn vuoge ist ganz unt âne valsch  
0,49 zuo Kriechen was sîn êrste stam  
0,50 in latîn ez dannen quam  
0,51 hinnen ist ez an daz welhische komen  
0,52 daz hân ich alsô vernomen  
0,53 Tares der allerbezzeste  
0,54 den sturm von Trôjen weste  
0,55 wende er dâ mite was gewesen  
0,56 der schreip in unt liez in lesen  
0,57 Cornelius den strît las  
0,58 als er in kriechisch geschriben was  
0,59 als hât er in in daz latîn gekârt  
0,60 sint ist er diutischen zungen gelârt  
0,61 nâch der sol ich wirken  
0,62 wil ich die formen merken  
0,63 sô muoz ich drîsinnic sîn  
0,64 eine ist kriechisch ein latîn  
0,65 unt des welhischen buoches ein  
0,66 zwischen den lezzesten sinnen zwein  
0,67 nime ich nû den dritten  
0,68 unt volge im sô mite  
0,69 daz er mîn rehte geleite ist  
0,70 an des diutischen buoches list  
0,71 nû hânt ez ander liute  
0,72 gemachet mî ze diute  
0,73 den ist ez vile wole gelungen  
0,74 sint ez aber von drîn zungen  
0,75 mit eineme sinne ist her geschriben  
0,76 des bin ich dâr zuo beschiben  
0,77 daz ich sî daz vierde rat  
0,78 daz ist rehte sus bestatet  
0,79 sint ich von den drîn quam  
0,80 daz man mich zuo dem vierden nam  
0,81 hât ez ein ander vollenbrâht  
0,82 als ich zuo dem vierden wart gedâht  
0,83 sô zele man mich zuo dem vünften rade  
0,84 unt vrume ich niht ich bin niht schade  
0,85 ich bûwe doch die strâzen  
0,86 die sie hânt gelâzen

0,87 manigen rade âne bane  
0,88 unt baneke mînen sin dâr ane  
0,89 daz ich in bekêre deste baz  
0,90 wende der ist herte und laz  
0,91 ich wil in biegen ob ich kan  
0,92 daz hiez der vürste Herman  
0,93 der lantgrâve von Duringenlant  
0,94 diz buoch hât im her gesant  
0,95 der grâve von Lîningen  
0,96 sol mir dâr ane gelingen  
0,97 sô lenge ich ez mit willen niht  
0,98 ich spreche von Trôje daz liet  
0,99 von Kriechenlanden wîlen was  
0,100 ein küninc der hiez Peleas  
0,101 edel unt rîche  
0,102 der lebete hêrlîche  
0,103 in bürgen unt in landen  
0,104 von spîse unt von gewanden  
0,105 was die vûlle in sîneme hove  
0,106 daz welhische buoch von des hêrren lobe  
0,107 harte vile geschriben hât  
0,108 daz mînem herzen widerstât  
0,109 wären alle tugende in ein  
0,110 die die sunne ie beschein  
0,111 oder die mennische ie gewan  
0,112 unt hette sie alle ein man  
0,113 der niht triuwen hette  
0,114 der dûhte mich unstæte  
0,115 des en lobe ich sîn niht  
0,116 wen mit untriuwen pflift  
0,117 dirre untriuwen was gewon  
0,118 umbe sînes bruoder sun  
0,119 dem vrumen ritter sîneme neven  
0,120 dem er von rehte solte geben  
0,121 beide bürge und lant  
0,122 im næher erbe niht was bekant  
0,123 er hette selbe decheine kint  
0,124 als ir wole gehoeret sint  
0,125 der selbe küninc Peleas  
0,126 der als ungetriuwe was  
0,127 hette einen bruoder hiez Esôn  
0,128 der hette einen sun der hiez Jâsôn  
0,129 der was junc und hette tugent  
0,130 wär daz ieman in der jugent  
0,131 von tugenden mohte wesen wîse  
0,132 sô was er grâ unt grîs  
0,133 in sîneme herzen binnen  
0,134 er was vrum von sinnen

0,135 er was zuo gute reine  
0,136 dem volke gar gemeine  
0,137 den armen zuo gebenne  
0,138 sînen gelîchen ebene  
0,139 sînen undertânen ôtmüetic  
0,140 sînen übertragenden hôchmüetic  
0,141 kindisch den kinden  
0,142 grimme den swinden  
0,143 âne wort vrume zuo der tât  
0,144 und mit den worten rât  
0,145 herte zuo ungeräte  
0,146 zuo dem gelübede stâte  
0,147 zuo rehter gebe milte  
0,148 gevüege zuo dem schild  
0,149 sînen vianden offenbâr  
0,150 sînen vriunden âne vâr  
0,151 gruozsam in der strâze  
0,152 und von guotem gelâze  
0,153 einvaltic an der gebâre  
0,154 manicvaltic an der lêre  
0,155 künstic an dem sinne  
0,156 redelich an dem gewinne  
0,157 gebogen zuo der wîsheit  
0,158 starc zuo der arbeit  
0,159 in vertruoc dechein sîn schoenheit  
0,160 im was sîn leit niht zuo leit  
0,161 noch sîn liep zuo liep niht  
0,162 daz doch vile selten geschiet  
0,163 mit zühten zuo tjoste unt zuo spile  
0,164 ob ich in kurzlîchen wil  
0,165 loben sô hâete im got gegeben  
0,166 von allen tugenden ein edel leben  
0,167 dâ dechein laster inne was  
0,168 daz hazzete sîn vater Peleas  
0,169 dem küninge was vile leit  
0,170 daz Jâsônes lop was breit  
0,171 von lande zuo landen  
0,172 und daz man erkante  
0,173 überal sînen namen  
0,174 ouch begonde er sich schamen  
0,175 daz man in lobete mère  
0,176 denne in der des rîches êre  
0,177 hette gepflogen manigen tac  
0,178 unt er es nie niht gepflac  
0,179 ouch vorhte er daz er quæme  
0,180 daz er im schiere næme  
0,181 harte schedelîche  
0,182 sînen gewalt unt sîn rîche

0,183 her umbe was sîn gedanc  
0,184 manigen kurzen tac vile lanc  
0,185 wie er daz erdæhte  
0,186 daz er in zuo deme tôde bræhte  
0,187 Peleas gedâhte ouch mère  
0,188 wie ein lant wäre  
0,189 in eineme velse ûf dem mer  
0,190 harte veste von gewer  
0,191 ez was ein wole bewart lant  
0,192 Kolchos was ez genant  
0,193 dâ was ein stere inne  
0,194 êr gebræche mir der sinne  
0,195 êr ich wole gesagen kunde  
0,196 wie ez umbe den steren stüende  
0,197 sîn schæpær was von golde  
0,198 swer es gewinnen wolte  
0,199 er hette nie sô vesten muot  
0,200 sô wole was ez behuot  
0,201 von slangen unt von würmen  
0,202 daz er ez kunde erstürmen  
0,203 swelich tugenthalter man  
0,204 anderswâ den prîs gewan  
0,205 quam er dar er lac dâr nider  
0,206 unt quam niemer mî wider  
0,207 hie dâhte er daz er sînen neven  
0,208 verrâten wolte daz junge leben  
0,209 nâch disen tagen in kurzer zît  
0,210 der küninc gebôt ein hôchzît  
0,211 zuo Pelopene in sîner stat  
0,212 Jâsônen er dar komen bat  
0,213 Ercules mit im dar quam  
0,214 küene unt dâr zuo vreissam  
0,215 von alsô grôzer vrümicheit  
0,216 als ich iu dâ vore hân geseit  
0,217 dâ ich von Jâsône gesprochen hân  
0,218 daz müget ir alhier verstân  
0,219 sô was er verre baz bekant  
0,220 er hette gevarn durch die lant  
0,221 unt hette in sînen zîten  
0,222 vile getân in strîten  
0,223 unt von grôzer manheit  
0,224 daz im nieman widerstreit  
0,225 die vürsten dar quâmen  
0,226 die die hôchzît vernâmen  
0,227 die ich genennen niht en kan  
0,228 vrouwen unt die dienestman  
0,229 quâmen alle sament dar  
0,230 wole bereitet unt gar

- 0,231 zuo bûhurte unt zuo strîten  
 0,232 dar quâmen bî der zîten  
 0,233 siben hundert unt och mî  
 0,234 âne die mit Jâsônen  
 0,235 unt mit Ercule dem vrumen  
 0,236 zuo der hôchzît wâren komen  
 0,237 sie hetten liute vile brâht  
 0,238 in was bereitet siben naht  
 0,239 harte vile von spîse  
 0,240 in aller hande wîse  
 0,241 sô ez dem küninge wole gezam  
 0,242 dô man die tische abe nam  
 0,243 unt daz volc gestillet was  
 0,244 dô sprach der küninc Peleas  
 0,245 "ich hoere sagen ez sî ein lant  
 0,246 daz ist Kolchos genant  
 0,247 verre in einer müren lît  
 0,248 wole gevestenet an alle sît  
 0,249 dâ ist wunder inne  
 0,250 von aller hande gewinne  
 0,251 unt och ein dinc des ich ger  
 0,252 daz ist ein wunderlicher stere  
 0,253 sîn schæpær güldîn ist  
 0,254 wole behuot mit maniger list  
 0,255 von maniger hande sachan  
 0,256 von slangen unt von trachen  
 0,257 swâ ich mir den vünde  
 0,258 der in gewinnen kunde  
 0,259 dem gæbe ich von golde  
 0,260 swaz er des haben wolte"  
 0,261 zuohant nâch disen worten  
 0,262 dô Jâsôn diz gehörte  
 0,263 alsus antwurte er des  
 0,264 "hoert ir diz hîrre Ercules  
 0,265 dise nôt die ist mîn  
 0,266 wollet ir mîn geselle sîn  
 0,267 sô ist ez unser arbeit"  
 0,268 Ercules sprach "ich bin bereit  
 0,269 wir sulen ensament hinnen varn  
 0,270 got der müeze uns bewarn  
 0,271 unt solten wir den tôt dolen  
 0,272 wir sulen im den steren holen"  
 0,273 dô sante der küninc Peleas  
 0,274 zuo Gari dâ Argus was  
 0,275 unt hiez daz man in ime gewan  
 0,276 der was ein quot zimberman  
 0,277 er was och der bezziste  
 0,278 den man zuo Kriechen weste

0,279 Argus sâñ zuo hove quam  
0,280 als er die boteschaft vernam  
0,281 er gienc vüre den küninc stân  
0,282 der küninc entvienc in gruozsam  
0,283 er sprach "sint dû nû bist kommen  
0,284 dû muost mir mîner bete vrumen  
0,285 dû muost dich arbeiten  
0,286 unt ein schif bereiten  
0,287 sô dû allerschierste maht  
0,288 daz ez sî vollenbrâht  
0,289 mîneme neven Jâsônê  
0,290 in eineme mânde oder êr"  
0,291 dô antwurte im Argus  
0,292 "wie gebet ir mir den tac sus  
0,293 er ist zuo kurze ûf geleit  
0,294 doch sol ez werden iu bereit  
0,295 sint ir ez hât gesprochen  
0,296 innwendic vier wochen"  
0,297 îlen er begonde  
0,298 sô er meist konde  
0,299 daz er ez geworhte in zît  
0,300 er machete ez lanc unt wît  
0,301 starc an den enden  
0,302 mit vuogen unt mit benden  
0,303 allenhalben harte vast  
0,304 daz im nihtesniht brast  
0,305 dô daz schif bereit wart  
0,306 dô hette sich Jâsôn zuo der vart  
0,307 unt Ercules der helt gemeit  
0,308 mit guoter geselleschaft bereit  
0,309 sô sie sie beste vunden  
0,310 unt erkiesen kunden  
0,311 daz sie wâren decheine zagen  
0,312 dô hiezen sie zuo schiffe tragen  
0,313 mastboume unt zugeseil  
0,314 dâr zuo alles des ein teil  
0,315 daz in schiffen solte sîn  
0,316 vrisch wazzer unt wîn  
0,317 beide vleisch unt brôt  
0,318 unt swaz in zuo solicher nôt  
0,319 ieman kunde gewisen  
0,320 sie nâmen ire îser unt îsen  
0,321 harte guote sarewerc  
0,322 banier helm und halsberc  
0,323 sper pfîle und swert  
0,324 des die ritterschaft noch gert  
0,325 des hetten sie gevüeget ire schar  
0,326 sie wâren wole zuo strîte gar

- 0,327 unt wole bereitet zuo der wer  
0,328 Jâsôn der gienc an daz mer  
0,329 sie volgeten im alle an den stat  
0,330 balde er in daz schif trat  
0,331 mit den jungelingen  
0,332 die mit im dar giengen  
0,333 Erculî sêre lieben began  
0,334 daz dem kindischen man  
0,335 sîn muot was sô herte  
0,336 zuo sus getâner verte  
0,337 sie riefen den schifmannen  
0,338 unt hiezen sie kêren dannen  
0,339 sie nâmnen die ruoder in die hant  
0,340 unt kârten hine zuo Trôjenlande  
0,341 in was zuo der verte gâch  
0,342 in quam ein süeze wint nâch  
0,343 iren schiffen harte guot  
0,344 der warf sie durch des meres vluot  
0,345 harte schnellche  
0,346 zuo Trôje in daz rîche  
0,347 dâ saz der küninc Laomedon  
0,348 dô hiez Ercules unt Jâsôn  
0,349 ire segele strîchen abe  
0,350 sie hetten vunden eine habe  
0,351 bî eineme wazzer kleine  
0,352 lûter und vile reine  
0,353 vrisch unt guot in allen wîs  
0,354 ez was geheizen Symoîs  
0,355 dô quâmen sie zuo lande  
0,356 unt hiezen ûf deme sande  
0,357 breiten über al daz velt  
0,358 ire pavelûn unt ire gezelt  
0,359 unt ruoweten aldâ ûf dem stade  
0,360 âne des lantvolkes schaden  
0,361 sunder nôt unt klage  
0,362 volliclîche zwêne tage  
0,363 mit vröuweden unt mit joie  
0,364 dô wunderte die von Trôje  
0,365 waz volkes daz wäre  
0,366 dô quam in daz mære  
0,367 ez ist Ercules unt Jâsôn  
0,368 dô dâhte der küninc Laomedon  
0,369 daz sie wären dar kumen  
0,370 mér zuo schaden denne zuo vrumen  
0,371 als er es gedâht hâte  
0,372 dô gienc er zuo râte  
0,373 mit sînen wîsen mannen  
0,374 wie er sie brâhte dannen

- 0,375 unt sprach zuo den er suochete rât  
 0,376 "nû sêt wie diz dinc gât  
 0,377 die Kriechen varnt mit listen  
 0,378 sie wænent daz wir iht wisten  
 0,379 unt sint mit râte her gesant  
 0,380 daz sie verrâten unser lant  
 0,381 in wes geleite sint sie hier  
 0,382 wir gesâhen diz unbilede nie  
 0,383 noch sô grôze kündicheit  
 0,384 daz die hêrren âne geleite  
 0,385 alsus vrevellîchen  
 0,386 varent in diz rîche"  
 0,387 "heizet sie balde hinnen varn  
 0,388 und daz si ez anderswâ bewarn"  
 0,389 der küninc was des râtes vrô  
 0,390 er dâhte dem dinge wär alsô  
 0,391 einen ritter er dô nam  
 0,392 der im zuo boten wole gezam  
 0,393 gespräche unt mit guoten siten  
 0,394 und gap im siben knappen  
 0,395 er sprach balde unt gerade  
 0,396 "rîtet hine zuo des meres stade  
 0,397 unt saget den kriechischen liuten  
 0,398 daz ich in entbiuten  
 0,399 daz sie hinnen kêren  
 0,400 mohte ich ez getuon mit êren  
 0,401 oder vore hövischheite  
 0,402 sint sie âne geleite  
 0,403 komen sint in diz lant  
 0,404 des mohten werden sie geschant  
 0,405 und quæmen es in grôze nôt"  
 0,406 der bote tet als er gebôt  
 0,407 er reit hine ûf den stat  
 0,408 die hêrren er alle sament bat  
 0,409 daz sie vernæmen sîne wort  
 0,410 unt sagete in als er hette gehôrt  
 0,411 von sînes hêrren munde  
 0,412 sô er beste kunde  
 0,413 dô Ercules die rede vernam  
 0,414 der zorn im an sîn herze kam  
 0,415 alsô ûzer mâzen grôz  
 0,416 daz im über sîne ougen vlôz  
 0,417 von dem zorne der sweiz  
 0,418 sîne zene er zuosamene beiz  
 0,419 sîne ougen er verkârte  
 0,420 dô rampf sich sîn swarte  
 0,421 sîn stirne sich zuosamene las  
 0,422 die wîle im zuo zorne was

- 0,423 dô sprach er mit einer stimme  
0,424 harte heizgrimme  
0,425 "bin ich der wîlen bestuont  
0,426 Cerberum den hellehunt  
0,427 den ich in der helle vant  
0,428 sint ich in dô überwant  
0,429 daz wil ich mîneme gote klagen  
0,430 daz ich von sus getânen zagen  
0,431 hoere dise mære  
0,432 ich wolte  
0,433 mit mir ûf dem velde  
0,434 ez quæme wole zuo gelte  
0,435 gesendet mich got wider  
0,436 ich gesetze in alsô nider  
0,437 in sîn selbes lande  
0,438 daz er es gewinnet schande  
0,439 ez kumet vilelîhte noch der tac  
0,440 daz er es gelougenen niht en mac  
0,441 sô er ez gerne tæte  
0,442 sô wirdet ez harte späte  
0,443 daz swere ich im bî mîneme gote  
0,444 sus saget iuwerme hîrren hîrre bote"  
0,445 der bote reit von dannen  
0,446 sie riefen den schifmannen  
0,447 unt huoben sich aber ûf den sê  
0,448 Ercules mit Jâsônê  
0,449 unt ander ire gesinde  
0,450 sie wurden von eineme winde  
0,451 getriben hine in daz lant  
0,452 dâ sie hine wâren gesant  
0,453 sint sie nû vernâmen  
0,454 daz sie zuo dem lande quâmen  
0,455 sie begunden deste mîr gâhen  
0,456 dô sâhen sie eine stat stân  
0,457 dâ wonete der küninc Oertes  
0,458 die stat hiez Iaconites  
0,459 veste und wole behuot  
0,460 tiefe mit des meres vluot  
0,461 alumbe bevlozzen  
0,462 mit mûren beslozzen  
0,463 gezieret mit gezinne  
0,464 dâ stuonden drîzic inne  
0,465 türme hôch unt wît  
0,466 wole veste in alle sît  
0,467 sâhen sie ein palas  
0,468 dâ der küninc ûfe was  
0,469 schoene unt reine  
0,470 von edeln mermelsteine

- 0,471 guote kemenâten  
0,472 ûz den schiffen sie dô trâten  
0,473 balde sie sich bereitten  
0,474 die hêrren sich kleitten  
0,475 von solichem gewande  
0,476 sô sie in Kriechenlande  
0,477 vunden daz bezziste  
0,478 dô tâten an die geste  
0,479 pfellel und zindât  
0,480 mit golde harte wole genât  
0,481 samît unt blâlt  
0,482 mit gesteine wole bestalt  
0,483 alumbe die næte  
0,484 güldîne drâte  
0,485 mit dem silber underbriten  
0,486 die kleider wâren sô gesniten  
0,487 sô daz iegelîcheme snite  
0,488 volgete daz golt mite  
0,489 als man an deme schrâte  
0,490 daz wâpen gesniten hâte  
0,491 alsô gienc der borte umbe den rant  
0,492 des was daz wâpen wole bekant  
0,493 solich wâren ire kleit  
0,494 dô giengen die hêrren wole bereit  
0,495 hine gegen dem burctore  
0,496 die junchêrren giengen vüre  
0,497 die in truogen ire swert  
0,498 dô giengen sie zuo der stat wert  
0,499 zuohant dô quâmen mære  
0,500 daz dâ kommen wäre  
0,501 ein volc harte wolegetân  
0,502 daz mære breitte sich sâñ  
0,503 über al daz lant quam dô der schal  
0,504 sie liefen ûz überal  
0,505 ensament unt sunder  
0,506 sie nam grôz wunder  
0,507 wer die hêrren wâren  
0,508 die mit solichen êren  
0,509 wâren kommen in daz lant  
0,510 sie en gesâhen nie solich gewant  
0,511 weder an varwe noch an snite  
0,512 des sô volgeten sie in mite  
0,513 durch ire grôze schoenheit  
0,514 ire glast unt ire kleit  
0,515 was allez in lobe  
0,516 dô kâmen sie zuo des küninges hove  
0,517 die ritter gegen in giengen  
0,518 wole sie sie entviengen

- 0,519 hêren unt die knehte  
0,520 iegelîchen nâch sîneme rehte  
0,521 dem küninge kâmen mære  
0,522 daz Jásôn komen wäre  
0,523 dâ er an dem râte saz  
0,524 sînes râtes er vergaz  
0,525 unt spranc balde her viire  
0,526 unt engegenete im in der türe  
0,527 unt entvienc sie minniclîche  
0,528 unt leitte sie hövischlîche  
0,529 ûf sîn schoene palas  
0,530 dâr nâch daz ire wirde was  
0,531 er satzte sie ûf die benke  
0,532 unt hiez den hêren schenken  
0,533 nâch sînes landes site  
0,534 und trôste sie unt vrâgete dâ mite  
0,535 waz ire gewerf wäre  
0,536 unt sagete in sîne mære  
0,537 beide übel und guot  
0,538 als man vremeden liuten tuot  
0,539 daz tet der hêrre umbe daz  
0,540 daz ir iegelich deste baz  
0,541 des ezzenes erbeitte  
0,542 biz man ez im bereitte  
0,543 der küninc eine tohter hâte  
0,544 harte wîse an râte  
0,545 als mir daz buoch saget  
0,546 sie was ein harte wîse maget  
0,547 wende sie wole wiste  
0,548 aller hande liste  
0,549 die ûf der erden  
0,550 iemer mohte werden  
0,551 sie kunde arzedîen  
0,552 unt von nigromanzîen  
0,553 daz man heizet swarze buoch  
0,554 dâ man ane vindet vluoch  
0,555 unt beswernisse  
0,556 wie man in übelnisse  
0,557 die übeln geiste beswert  
0,558 daz man an in ervert  
0,559 allez daz dâ ist geschehen  
0,560 unt wie man vore kan besehen  
0,561 manic dinc daz künftic ist  
0,562 noch sô lernet man die list  
0,563 in einer stat zuo Tolêt  
0,564 die in Ispanien stêt  
0,565 die maget hiez Medea  
0,566 iz wäre verre oder nâch

- 0,567 in dem lande überal  
 0,568 swaz von mennischen wizzen sal  
 0,569 daz mohte sie wole wizzen  
 0,570 sie hette sich es sô gevlijzen  
 0,571 sie beswuor daz wazzer daz iz gienc  
 0,572 wider an sîn ursprinc  
 0,573 unt zuo berge wert schôz  
 0,574 daz iz wîlen nider vlôz  
 0,575 des nahtes sie den mânen beswuor  
 0,576 daz er hinderwert vuor  
 0,577 als er solte vüre gân  
 0,578 des was niht man hette es wân  
 0,579 daz iz alsô wäre  
 0,580 daz kunnen zouberære  
 0,581 und zouberærinnen  
 0,582 von sus getânen sinnen  
 0,583 kunde die vrouwe vile  
 0,584 beide zuo erneste unt zuo spile  
 0,585 dô Medea vernam  
 0,586 daz hêrre Jâsôn dar quam  
 0,587 sie was es vrô unt gemeit  
 0,588 ir was von sîner hövischheit  
 0,589 harte vile dâ vore gesaget  
 0,590 des hette er ir vile wole behaget  
 0,591 êr sie in ie gesæhe  
 0,592 des was ir harte gæhe  
 0,593 sie gienc in ein schoene gadem  
 0,594 unt nam ire helfenbeinîn laden  
 0,595 dâ ire zierde inne was  
 0,596 unt streichete ire schoenen vahs  
 0,597 ire scheiteln sie berihte  
 0,598 die zöpfie sie slihte  
 0,599 sîdenvar was ire hâr  
 0,600 ire ougen lûter unt klâr  
 0,601 under ireme antlitze gar  
 0,602 was ire varwe wîzrôtvar  
 0,603 noch rehte wîz noch rehte rôt  
 0,604 wen als zuo der mâze was nôt  
 0,605 noch wîz noch rôt dâr inne schein  
 0,606 daz man zwischen disen zwein  
 0,607 rehte dâ mite abe nam  
 0,608 zuo einer gemischten varwe ez quam  
 0,609 zuo rechter lenge zuo vuoge smal  
 0,610 als ein maget wesen sal  
 0,611 die zuo den bezzisten ist genant  
 0,612 sie satzte ûf ein hârbant  
 0,613 dâ der karfunkelstein  
 0,614 ûz dem rôten golde schein

- 0,615 mit anderme gesteine  
0,616 sie tet an ein hemedē kleine  
0,617 daz was wole gezieret  
0,618 gelesen unt geridieret  
0,619 gebleichet unt geblichen  
0,620 ermel gestrichen  
0,621 mit der sîden ane genât  
0,622 dâr über eine pfellîne wât  
0,623 mit dem golde geweben  
0,624 sollte ich tûsent jâr leben  
0,625 unt wären mîner viere  
0,626 wir en kunden von der gezierde  
0,627 nimmer gesagen vollen genuoc  
0,628 die die vrouwe ane truoc  
0,629 Medea her vüre gienc  
0,630 Jâsônen sie wole entvienc  
0,631 vile gezogenlîche  
0,632 dâr nâch iren iegelîchen  
0,633 dô Jâsôn sie ane gesach  
0,634 ire varwe in in daz ouge stach  
0,635 ich wæne in des dûhte  
0,636 daz die sunne lûhte  
0,637 mit ir ûf daz palas  
0,638 wende sie sô schoene was  
0,639 ouch dûhte die vrouwen  
0,640 dô si begunde schouwen  
0,641 daz dâ wäre ein sunnenschîn  
0,642 dâ sîn varwe solte sîn  
0,643 von disen zwein gedunken  
0,644 kâmen zwêne vunkens  
0,645 ireme ietwederme an sînen muot  
0,646 daz dâ heizet minnegluot  
0,647 daz quam sie beide ensament an  
0,648 zuo dem êrsten ez kleine bran  
0,649 sint bran iz sêre  
0,650 daz ist niht anders mîre  
0,651 dô sie die minne ane geswanc  
0,652 nochdan was sie sô kranc  
0,653 sint quam sie in in die sinne  
0,654 dô sterkete sich die minne  
0,655 als ir wole gehoert her nâch  
0,656 dô setzete sich Medea  
0,657 Jâsôn bî sie nider gesaz  
0,658 er merkete daz  
0,659 daz sie hette sô schoene kleit  
0,660 ne hette an ander schoenheit  
0,661 er muoste sie wole liep hân  
0,662 sô wole was ire gewant getân

0,663 sie was och sô schoene  
0,664 en hette sie an giften noch an lône  
0,665 niergen eines pfenninges wert  
0,666 er hette ir gerne gegert  
0,667 en hette sie schoene noch kleit  
0,668 sô was si solicher wîsheit  
0,669 unt von solichen sinnen  
0,670 er hette gerne ire minne  
0,671 en hette sie niht under disen drîn  
0,672 noch schoene noch kleit noch den sin  
0,673 solich was ire gebärde  
0,674 daz si im liep wäre  
0,675 en hette sie dirre niergen niet  
0,676 der ich iezunt iuch beschiet  
0,677 sie was von solichem geslehte  
0,678 daz sie im quæme rehte  
0,679 dô er disses gedâhete  
0,680 sîn gedanc in brâhte  
0,681 sô verre in ire minne  
0,682 daz er sîne sinne  
0,683 zuo der êrsten gift ir sante  
0,684 dô er baz genante  
0,685 er sante ir zuo der andern gift mite  
0,686 sîne gelæze unt sîne site  
0,687 zuo dem dritten sîne witze  
0,688 zuo dem vierden sîn antlitze  
0,689 zuo der vünften herze unt muot  
0,690 die sehste gift die was guot  
0,691 beide lîp und leben  
0,692 daz hette er ir allez gegeben  
0,693 umbe ire stæten minne  
0,694 dô gienc die küninginne  
0,695 unt der küninc râten  
0,696 in eine kemenâten  
0,697 mit wie getâner wîse  
0,698 sie getæten umbe die spîse  
0,699 wie sie zuo hove quæmen  
0,700 daz iz wole gezæme  
0,701 Jâsôn vüegete sich dô  
0,702 der juncvrouwen baz zuo  
0,703 unt versuochete sie mit gruoze  
0,704 und als er die muoze  
0,705 unt die state an ir vant  
0,706 er greif ir an ire gewant  
0,707 den stoup er ir abe las  
0,708 dâ gestüppes nie niht was  
0,709 dâ hette er die gebärde  
0,710 als dâ stoup wäre

0,711 daz tet der hêrre umbe daz  
 0,712 daz er griffe vürebaz  
 0,713 er greif ir under daz kleit  
 0,714 daz was der juncvrouwen leit  
 0,715 sie sprach "tuot hine daz durch got  
 0,716 iz ist erneste oder spot  
 0,717 ir sît in grôzen unbaten  
 0,718 decheines grîfenes ich iuch staten  
 0,719 redet daz iuch zuo redene geschiet  
 0,720 ich en kêre mich an daz grîfen niht"  
 0,721 sus gewan er antwürte  
 0,722 daz ich die rede kürze  
 0,723 dâ wart rede wider rede gegeben  
 0,724 sie begunden in beider sît swaben  
 0,725 in der minne süezicheit  
 0,726 ire herze in ûf unt nider reit  
 0,727 die vrouwe begunde sich schamen  
 0,728 doch vertreip sie iz mit gamen  
 0,729 unt wart och dicke vile rôt  
 0,730 dem hêrren was zuo sprechene nôt  
 0,731 die minne twanc in daz er sprach  
 0,732 "hêrre got wole mich ach  
 0,733 waz ist liep unt leit  
 0,734 hânt sie dechein underscheit  
 0,735 ich wæne sie beide sîn ein  
 0,736 sint sie zwei sô ne weiz ich under zwein  
 0,737 decheine underscheide  
 0,738 alsô hân ich sie beide  
 0,739 wie ist mir armen sô  
 0,740 ich bin trûric unt bin vrô  
 0,741 iedoch entsebe ich wîlen daz  
 0,742 daz mîn vröuwede wirdet laz  
 0,743 unt mîn leit vüre stebet  
 0,744 sô kumet daz mîn herze swebet  
 0,745 in einer unsenften senfticheit  
 0,746 bîwîlen lazzet mir daz leit  
 0,747 unt wirdet mir der vröuweden mî  
 0,748 sô ist mir harte sanfte wê  
 0,749 wîlen sint sie ûf der wâge  
 0,750 gelîche snel unt trâge  
 0,751 sô ist mir sanfte unsanfte  
 0,752 unt unsanfte sanfte  
 0,753 waz ist daz ich geredet hân  
 0,754 kan daz ieman verstân  
 0,755 daz ist harte wunderlich  
 0,756 ich wæne die elber triegent mich  
 0,757 machet minne daz ich reben  
 0,758 nein mir ist zouber gegeben

0,759 ez en ist doch dechein zouber niet  
 0,760 von minnen ez mir geschiet  
 0,761 daz entsebe ich dâ bî wole  
 0,762 mir ist daz herze alsam ein kole  
 0,763 der minne viur ist sô starc  
 0,764 daz mir siudet mîn marc  
 0,765 unt brinnet mîn gebeine  
 0,766 ich hân dechein âdern sô kleine  
 0,767 sie en sî warm unt heiz  
 0,768 daz geziehe ich an den sweiz  
 0,769 der mir rinnet in die schôz  
 0,770 mir ist die hitze alsô grôz  
 0,771 ûzen unde innen  
 0,772 daz ich gar verbrinnen  
 0,773 mir kome denne kelte nâch  
 0,774 hoeret iz vrouwe Medea  
 0,775 sâlige maget nû gebet mir rât  
 0,776 ich weiz wole daz ir kunst hât  
 0,777 des mir werrende ist  
 0,778 mir en helfe dâr abe iuwer list  
 0,779 mich en kan nieman ernern"  
 0,780 die vrouwe in ire stillen gewer  
 0,781 truoc die selben swære  
 0,782 sie sprach "wie liep mir wäre  
 0,783 daz ich des iht kunde  
 0,784 daz iu zuo staten stüende  
 0,785 unt tâtet ir es niht durch kündicheit"  
 0,786 die wile was der tisch bereit  
 0,787 die vrouwe zuo tische gienc  
 0,788 alsô tet der jungelinc  
 0,789 dô man dô vüre si truoc  
 0,790 von spîse mî danne genuoc  
 0,791 vrouwe Medea ledic saz  
 0,792 si en tranc noch en az  
 0,793 von gedanken wart si manicgevar  
 0,794 Jâsôn wart des gewar  
 0,795 daz sie in gedanken wäre  
 0,796 des entweich im sîn herzeswære  
 0,797 unt entliez sich sîn leit  
 0,798 er weich an eine senfticheit  
 0,799 die vrouwe saz in huote  
 0,800 sie sach in mit dem muote  
 0,801 den daz ouge nie gesach  
 0,802 ire munt sweic ire herze sprach  
 0,803 "ouwê kunst ouwê list  
 0,804 hette ich kunst ich gewünne vrist  
 0,805 daz ich belibe in lîbe  
 0,806 nû ich niendern belîbe

0,807 nû var hine armer geist  
0,808 dâ dû Jâsônen weist  
0,809 dû salt iemer umbe in swaben  
0,810 die wîle er hât daz leben  
0,811 swenne er hinnen scheide  
0,812 sô varet ensament beide  
0,813 dar iuch got gewîse  
0,814 daz sunnenparadîse  
0,815 daz ir dâ iemer ensament sît  
0,816 wie hân ich verloren mîne zît  
0,817 daz ich ie in vlîze was  
0,818 unt von arzedien las  
0,819 unt sô wole was gelârt  
0,820 daz nieman sô siech mî en wart  
0,821 er genese mîner lîre  
0,822 swie siech er wäre  
0,823 an lîbe unt an der hût  
0,824 ich erkante salben unt alle krût  
0,825 alle wurze unt iren smac  
0,826 sint daz ich arme nû niht mac  
0,827 helfe mir gebieten  
0,828 noch arzedie genieten  
0,829 ouch was ich über manige lant  
0,830 von einer andern list bekant  
0,831 an dem gestirne ich sach  
0,832 waz von alter her geschach  
0,833 unt kunde wole vore sehen  
0,834 waz an daz ende solte geschehen  
0,835 iezunt alhier en weiz ich niht  
0,836 waz mir armen iht geschiet  
0,837 ander kunst ich kunde  
0,838 ûz dem hellegrunde  
0,839 die tiuvel ich alle beswuor  
0,840 daz ich an in ervuor  
0,841 allz daz ûf der erden was  
0,842 pfu dich unreinez getwâs  
0,843 nû möhte ich harte lange sweren  
0,844 êr dû mich kundes generen  
0,845 ander kunst ich wiste  
0,846 daz wâren zouberliste  
0,847 die kunst ich alsô lange treip  
0,848 unz mir der name bekleip  
0,849 ich wäre ein zouberærinne  
0,850 man wart es ouch wole inne  
0,851 swaz ich wolte trîben  
0,852 zwischen mannen unt wîben  
0,853 des vollenquam ich an dirre list  
0,854 nû en weiz ich waz zouber ist

0,855 wie ist mir armen geschên  
 0,856 man mac wunder an mir sehen  
 0,857 mich dunket daz ich Jâsôn sî  
 0,858 unt eines andern dâ bî  
 0,859 daz Jâsôn sî ich  
 0,860 daz ist ouch wunderlich  
 0,861 wende er ist hie ich bin dâ  
 0,862 bin ich Medea  
 0,863 und hât Jâsôn mînen sin  
 0,864 sô weiz ich wole daz ich zwei bin  
 0,865 daz en geschuof got nie  
 0,866 bin ich dâ unt er hie  
 0,867 wie sollte ich danne genesen  
 0,868 des muoz ich iedoch Jâsôn wesen  
 0,869 bin ich Jâsôn sô bin ich ein man  
 0,870 wâr umbe quele ich arme danne  
 0,871 daz ich selbe werde mîn  
 0,872 die rede mac riuwic sîn  
 0,873 wie ist mir armer sus  
 0,874 weste ich wâ vrouwe Vênum  
 0,875 der minnen vrouwe wäre  
 0,876 ich klagete ir mîne swære  
 0,877 ich bin es worden innen  
 0,878 ez kumet mir von minnen  
 0,879 Jâsôn mir daz leit tuot  
 0,880 ein ritter hövisch und guot  
 0,881 ich bin im inniclichen holt  
 0,882 daz ist doch âne mîne schult  
 0,883 ich hân in selbe niht erkoren  
 0,884 ich wæne iz mich an ist geboren  
 0,885 von dem êrsten wîbe  
 0,886 die ie quam zuo lîbe  
 0,887 sint iz got geschaffen hât  
 0,888 waz solte mir danne ander rât  
 0,889 wen«ne» got râte mir dâr zuo  
 0,890 swenne ich sînen willen tuo  
 0,891 daz mir ez armen wole ergê  
 0,892 zuo guoter minne zuo rehter ê”  
 0,893 von diseme willen  
 0,894 begunde ire leit stillen  
 0,895 ire herze eine senfte gewan  
 0,896 dô huop man den tisch danne  
 0,897 die truhtsæzen âzen  
 0,898 die ritter zuo den vrouwen sâzen  
 0,899 unt underredeten sich  
 0,900 mit maniger rede gemelich  
 0,901 unt von disses hêrren manheit  
 0,902 unt von jener vrouwen hövischheit

- 0,903 unt ander rede manicvalt  
 0,904 Jâsôn hette guoten gewalt  
 0,905 zuo reden daz er kunde  
 0,906 die vrouwe in vrâgen begunde  
 0,907 waz sîn gewerf wäre  
 0,908 dannoch vrâgete sie mère  
 0,909 waz er wolte in daz lant  
 0,910 "vrouwe ich bin her gesant  
 0,911 umbe einen güldînen sterren  
 0,912 got der müeze mich geweren  
 0,913 daz mîn wille dâr ane ergê"  
 0,914 "hêrre Jâsôn nû sprechet niht mêt  
 0,915 ir sît gewislîche tôt  
 0,916 der iuch sante in dise nôt  
 0,917 swie die rede dâr zuo quam  
 0,918 er ist iu tôtlichen gram  
 0,919 ir en kunnet niemer genesen"  
 0,920 "vrouwe daz muoz alsô wesen  
 0,921 ez en belîbet unversuochet niht  
 0,922 swaz ouch mir dâ von geschiet  
 0,923 die wîle mir got des lîbes gan"  
 0,924 "eiâ kindischer man  
 0,925 ich behielte iu gerne daz leben  
 0,926 unt wil es iuch mînen rât geben  
 0,927 als ich iuch bescheiden  
 0,928 gevellet er uns beiden  
 0,929 daz wir ensament belîben  
 0,930 sô müezet ir verschrîben  
 0,931 alle wîp iemer mêt  
 0,932 unt haltet mich zuo iuwerre ê  
 0,933 daz müezet ir mir bî gote swern  
 0,934 sô wil ich iu den lîp nern  
 0,935 unt helfen daz iuwer wille ergât"  
 0,936 "vrouwe als ir gesprochen hât  
 0,937 ich bin zuo swerne bereit  
 0,938 swar mir von iu wirdet bescheit  
 0,939 beide stat unt zît"  
 0,940 dâ wart niht lenger gebît  
 0,941 die beide sie im underschiet  
 0,942 dô hette sie des tages niet  
 0,943 des muosten sie ire rede lân  
 0,944 man hiez die geste slâfen gân  
 0,945 dô ruoweten die geste  
 0,946 als Jâsôn die zît weste  
 0,947 die ime bescheiden was  
 0,948 dô sleich er durch daz palas  
 0,949 unt quam hine an die stat  
 0,950 die vrouwe gegen ime trat

0,951 von der stat dâ sie sîn beitte  
 0,952 in daz betehûs sie in leite  
 0,953 dâ sie iren got inne vant  
 0,954 unt hiez in ûf legen die hant  
 0,955 als er ûf hette gelegit  
 0,956 sie stabete selbe im den eit  
 0,957 "ich swere dir Medea"  
 0,958 Jâsôn sprach ir allez nâch  
 0,959 "ich wil dich iemer zuo wîbe hân"  
 0,960 die selben wort sprach er sân  
 0,961 "unt dechein ander wîp hinnen vort"  
 0,962 dô sprach er och die selben wort  
 0,963 "daz swere ich bî dir Jupite"  
 0,964 daz selbe swuor och er  
 0,965 "unt swere bî dir Junô"  
 0,966 dannoch swuor er alsô  
 0,967 "unt swere bî dir Vênum"  
 0,968 och sô swuor er alsus  
 0,969 "unt swere bî dir Pallas"  
 0,970 die selbe rede och sîn was  
 0,971 dô der eit was getân  
 0,972 sie begunden dannen gân  
 0,973 die vrouwe dô zuo dem bette gienc  
 0,974 alsô tet der jungelinc  
 0,975 hie en spreche ich niht mère  
 0,976 wie in ensament wäre  
 0,977 daz en sage ich deme niht  
 0,978 der sich es selbe hât geniet  
 0,979 swer sich es niht genietet hât  
 0,980 wil er ez wizzen âne tât  
 0,981 der habe tûsent jâr vryst  
 0,982 dannoch en weiz er waz iz ist  
 0,983 dô ez hine vüre den tac quam  
 0,984 zuo sîneme wîbe er rât nam  
 0,985 wie er sîn dinc erwürbe  
 0,986 sô daz er niht verdürbe  
 0,987 sie gap im guoten rât  
 0,988 nû merket wie daz dinc stât  
 0,989 Mars der got der des wîges pflît  
 0,990 der en wil zuo decheiner zît  
 0,991 bî dem güldînen sterren  
 0,992 zweier starken ohsen entberen  
 0,993 den gêt daz viur ûz dem munde  
 0,994 nie dechein man en kunde  
 0,995 sich des behüeten  
 0,996 er muoste von den glüeten  
 0,997 gar verbrinnen an den tôt  
 0,998 dâ ist von würmen michel nôt

- 0,999 dâ vert umbe ein trache  
0,1000 man saget daz er wache  
0,1001 beide tac unt naht  
0,1002 von den goten hât er die maht  
0,1003 die hânt in gesant dare  
0,1004 daz er den steren wole beware  
0,1005 unt anderz daz dâ bî ist  
0,1006 hier bedurfet ir wole guoter list  
0,1007 wider vergift unt den stanc  
0,1008 unt daz iuch daz eiter niht kranc  
0,1009 mache mit deme viure  
0,1010 nû ist die arzâtie tiure  
0,1011 die dâr zuo wesen sol  
0,1012 iedoch wirdet sie uns wole  
0,1013 zuohant sie dô genante  
0,1014 ein lieht sie entbrante  
0,1015 ein biledie sie her vüre tete  
0,1016 besungen mit ireme gebete  
0,1017 bezoubert unt besworen  
0,1018 ez was guot wider den zorn  
0,1019 unt wider ander grimmicheit  
0,1020 sie gap ez im er wart gemeit  
0,1021 sie gap im eine salben  
0,1022 unt hiez daz er sich allenthalben  
0,1023 gar mite bestriche  
0,1024 swâ in daz viur ane bliche  
0,1025 sô en künde ez im niht geschaden  
0,1026 dô gap sie im ûz ire laden  
0,1027 ein güldîn vingerlîn  
0,1028 daz wider den zouborn solte sîn  
0,1029 unt wider eiter unt vergift guot  
0,1030 wider den worm unt wider des viures gluot  
0,1031 eine tugent er dâr ane vant  
0,1032 swenne er ez beslôz in der hant  
0,1033 sô daz des vingerlînes stein  
0,1034 deheinez lieht beschein  
0,1035 daz zeichen im geschach  
0,1036 daz in nieman en sach  
0,1037 ouch gap sie im einen brief  
0,1038 swer in sach der hette in liep  
0,1039 die wîle er den brief las  
0,1040 die vünfte gift ein kliuwen was  
0,1041 unt von beche einen klôz  
0,1042 der dem wurme beslôz  
0,1043 beide den âtem unt den geist  
0,1044 dâ er es bedorfte allermeist  
0,1045 dô dise gâbe dâ geschach  
0,1046 unt Jâsôn daz gesach

- 0,1047 daz der tac ûf gienc  
0,1048 die vrouwen er umbevienc  
0,1049 unt kuste sie an iren munt  
0,1050 eines zwire drî stunt  
0,1051 er hette sie gekust vile baz  
0,1052 wen daz ir der munt was naz  
0,1053 dô weinte sie vore leiden  
0,1054 wende er dannen solte scheiden  
0,1055 dâr umbe sûmete er sich niht  
0,1056 von der vrouwen er schiet  
0,1057 sîne dinc er dô ahte  
0,1058 sîne gesellen er wahte  
0,1059 ûf stuont dô Hercules  
0,1060 dâr quam der küninc Oertes  
0,1061 unt sprach "Jâsôn mir ist leit  
0,1062 daz ir durch iuwer kintheit  
0,1063 soliche dinc ane gât  
0,1064 daz ir den lîp verloren hât  
0,1065 hier in disen landen  
0,1066 ouch hân ich es schande  
0,1067 ir sulet es iuch mâzen"  
0,1068 er sprach "sô sî ich verwâzen  
0,1069 vore gotes ougen iemer mê  
0,1070 ich wolle daz mîn wille ergê"  
0,1071 er wâpenete sich wole  
0,1072 op ich rehte sagen sol  
0,1073 daz nie ritter gemeit  
0,1074 zuo strîte baz was bereit  
0,1075 er was wole zuo vehten gar  
0,1076 dô volgete im ein michel schar  
0,1077 vüre die stat sie in leitten  
0,1078 sîne gesellen hiez er beiten  
0,1079 dâ bî in einer næhen  
0,1080 daz sie hörten unt sâhen  
0,1081 op sie sîne nôt vernæmen  
0,1082 daz sie im zuo helfen quæmen  
0,1083 dô hêr Jâsôn hine quam  
0,1084 an die lerzen er den schilt nam  
0,1085 in die rehten hant daz swert  
0,1086 mit dem lerzen vuoze hinderwert  
0,1087 mit dem rehten trat er vort  
0,1088 daz swert bî des schildes ort  
0,1089 zuo stiche er ez kârte  
0,1090 unt stuont unt warte  
0,1091 wâ er wolte strîten  
0,1092 dô en konde er niht erbîten  
0,1093 balde er hin vüre trat  
0,1094 unt quam ûf die stat

0,1095 dâ der starke trache lac  
0,1096 er gap im slac über slac  
0,1097 beide stiche unt stôz  
0,1098 daz viur im ûz dem munde schôz  
0,1099 obene an des schildes rande  
0,1100 der hêrre was nâch verbrant  
0,1101 von dem viure wart er swarzvar  
0,1102 dô streich er sîne salben dar  
0,1103 sînen brief er ouch las  
0,1104 sîn bileda ouch dâr mite was  
0,1105 unt sîn güldîn vingerlîn  
0,1106 daz kliuwen muoste dâ mite sîn  
0,1107 mit dem swerte daz er truoc  
0,1108 den worm er in daz houbet sluoc  
0,1109 sô daz iz gar besouf  
0,1110 von dem orte biz an den knouf  
0,1111 der worm sich sâñ ûf huop  
0,1112 durch den schilt er in sluoc  
0,1113 mit sîner starken klâwen  
0,1114 als er in nider wolte slân  
0,1115 Jâsôñ ime widerstuont  
0,1116 er stach im daz swert in den munt  
0,1117 daz im daz gehilze vore der hant  
0,1118 an den zenen widerwant  
0,1119 von des trachen vunken  
0,1120 sîne nagel im stunken  
0,1121 sîn hût sich von der hitze rampf  
0,1122 waz solte iemer herter kampf  
0,1123 zwischen wurme unt man  
0,1124 die wîl im daz hâr bran  
0,1125 dannoch en schônete er sîn niht  
0,1126 den worm er allen zuoschriet  
0,1127 unt sluoc die ohsen dâr nider  
0,1128 unt nam den steren unt kîrte wider  
0,1129 balde sunder reste  
0,1130 dâ er die sînen weste  
0,1131 dô begegeneten sie im alle  
0,1132 unt vuorten in mit schalle  
0,1133 hin wider in die stat  
0,1134 er hette sîn erbeit wole bestattet  
0,1135 ez was âbentstunde  
0,1136 betten man in begunde  
0,1137 im unt sînen gesellen al  
0,1138 sie giengen släfen in den sal  
0,1139 vrouwe Medea dar quam  
0,1140 Jâsônen sie an den arm nam  
0,1141 dô lâgen sie âne leide  
0,1142 des entsliefen sie beide

- 0,1143 vore tage er entwachete  
0,1144 balde er sich ûf machete  
0,1145 er unt sîne manne  
0,1146 unt huoben sich stille danne  
0,1147 die vrouwen er mit im nam  
0,1148 die schoene wîse Medeam  
0,1149 unt huoben sich ûf daz mer  
0,1150 der hêrre die vrouwe unt ire her  
0,1151 unt als iz quam zuo dem tage  
0,1152 dô was harte grôze klage  
0,1153 süeze rede unt schelwort  
0,1154 daz in die vrouwe was entvuort  
0,1155 sumelîchen liep sumelîchen leit  
0,1156 die selben gewonheit  
0,1157 in disen landen noch hât  
0,1158 swenne ein sulich dinc ergât  
0,1159 Jâsôn îlte harte  
0,1160 zuo lande er wider kârte  
0,1161 dô wart dem küninge gesaget  
0,1162 daz Jâsôn unverzaget  
0,1163 wär zuo lande wider kumen  
0,1164 mit grôzen êren unt mit vrumen  
0,1165 sie wâren es alle gemeit  
0,1166 âne der küninc dem was ez leit  
0,1167 iedoch vuorte er in in die stat  
0,1168 unt hiez im machen ein bat  
0,1169 unt hiez in baden unt scheren  
0,1170 unt hiez des güldinen steren  
0,1171 nemen harte guote ware  
0,1172 daz lantvolc quam durch wunder dare  
0,1173 ritter unt vrouwen  
0,1174 quâmen dar durch schouwen  
0,1175 des quam Jâsôn zuo grôzeme lobe  
0,1176 in sînes vetern des küninges hove  
0,1177 hier en saget nû niht mî  
0,1178 daz welhische buoch von Jâsône  
0,1179 noch von sînem wîbe  
0,1180 mîn rede alhier ouch belîbe  
0,1181 als sie dâ ist beliben  
0,1182 von Erculen stât geschriben  
0,1183 wie leide im wäre  
0,1184 unt wie getâne swære  
0,1185 im zuo Trôje geschach  
0,1186 dô er mit Jâsône lac  
0,1187 den Kriechen er daz klagete  
0,1188 daz im sîn lant versagete  
0,1189 alsô smæhelîche  
0,1190 der küninc von Trôjenrîche

0,1191 daz was im inniclîchen leit  
0,1192 dô saz er ûf unt reit  
0,1193 unt îlte vile harte  
0,1194 dô quam er hin zuo Parthe  
0,1195 dâ saz Pollux unt Castor  
0,1196 den leite er dise rede vüre  
0,1197 daz in der Trôjære  
0,1198 mit grôzer ungebære  
0,1199 wîsete ûz sîneme lande  
0,1200 "ir hât es alle schande  
0,1201 ir n helfet mir anden mîn leit  
0,1202 mîn dienest was iu ie bereit  
0,1203 nû lâzet mich iuwer helfe sehen"  
0,1204 sie sprâchen "ez sol geschehen  
0,1205 swenne iu selber ist liebe  
0,1206 sô sendet boten unt brieve  
0,1207 wir kumen mit der êrsten schara"  
0,1208 er genâdete in unt neic dare  
0,1209 unt saz ûf unt reit  
0,1210 beide vrô unt gemeit  
0,1211 zuo Salemîne vürebaz  
0,1212 dâ hêrre Thelamon saz  
0,1213 waz sal umbe rede gesaget  
0,1214 daz er dort hette geklaget  
0,1215 des en vergaz er hier niht  
0,1216 unt als er von jenen schiet  
0,1217 alsô schiet er hinnen  
0,1218 beidersît mit minnen  
0,1219 dô reit er wider in sîn lant  
0,1220 dâ er Peliam vant  
0,1221 von den schiet er vile vrô  
0,1222 dannen quam er zuo Pilô  
0,1223 dâ gelobete im Nestor  
0,1224 als die andern dâ vore  
0,1225 alsô lange er klagete  
0,1226 unz daz lant allez wagete  
0,1227 dô samenete sich ûf daz mer  
0,1228 ein vile kreftigez her  
0,1229 starker helde bereitet wole  
0,1230 vünvzehen kiele vol  
0,1231 vürsten vrîen dienestmanne  
0,1232 dô bunden sie die segele an  
0,1233 als iz quam an die zît  
0,1234 daz die kelte gelît  
0,1235 unt die werme zuo gât  
0,1236 sô daz jâr die süeze hât  
0,1237 noch zuo heiz noch zuo kalt  
0,1238 swenne safft der walt

- 0,1239 unt entspringet daz gras  
0,1240 unt der wint guot was  
0,1241 dô schiffeten ûz dem lande  
0,1242 die kriechischen wîgande  
0,1243 sie vuoren ire hervart  
0,1244 daz in ruowe niht en wart  
0,1245 innewendic siben nahten  
0,1246 dô ez quam an den ahtoden  
0,1247 tac umbe vesperzît  
0,1248 daz sie sâhen in alle sît  
0,1249 zuo Trôje in die geine  
0,1250 dô rieten sie alle gemeine  
0,1251 daz sie die segel abe nâmnen  
0,1252 unt zuo stade quâmen  
0,1253 ein teil hôhe ûf die naht  
0,1254 als dâ was vore gedâht  
0,1255 alsô vollenquam der rât  
0,1256 sie ankerten vore der hanekrât  
0,1257 zuo Trôje in dem lande  
0,1258 der küninc Peleus erkante  
0,1259 lant unt legerstat  
0,1260 die hêrren er des alle bat  
0,1261 daz sie stille wâren  
0,1262 vore den Trôjären  
0,1263 "wir sulen rechen unser leit  
0,1264 iegelich ritter sî gereit  
0,1265 op ez zuo strîte kume  
0,1266 daz ez im selben sî vrume  
0,1267 swer nû uns læzet in der nôt  
0,1268 der liget vore unsern handen tôt  
0,1269 wellen wir ensament bestân  
0,1270 sô müezen wir daz dâ bî hân  
0,1271 daz wir ensament vallen"  
0,1272 die rede behagete in allen  
0,1273 Hercules lobete den rât  
0,1274 als der küninc gesprochen hât  
0,1275 alsô muoste iz geschên  
0,1276 "daz müezen wir vore sehen  
0,1277 wie wir mit listen gevarn  
0,1278 wir sulen uns in vier scharn  
0,1279 Peleus belîbe in dem mer  
0,1280 Pollux dâ bî mit sîneme her  
0,1281 in daz gebirge kêre Castor  
0,1282 zuo walde der alte Nestor  
0,1283 ich wil mit Telamône  
0,1284 slîchen harte schône  
0,1285 bî die burc in den hagen  
0,1286 als sie danne beginnent jagen

- 0,1287 ûz der burc zuo unser schare  
0,1288 sô nemen alle samet ware  
0,1289 wie wir sie umberingen  
0,1290 sô müezen sie dingen  
0,1291 under unser baniere"  
0,1292 der scharen wurden viere  
0,1293 ir iegelich an sîner vart  
0,1294 als sie Ercules hette gelârt  
0,1295 des morgenes dô ez tagete  
0,1296 der wahtær mære sagete  
0,1297 er rief von der zinnen  
0,1298 "ich sihe daz lant brinnen  
0,1299 unt blîchende schilde  
0,1300 über daz gevilde  
0,1301 helm unt halsberc  
0,1302 über tal unt über berc"  
0,1303 die vergulten zoume brunnen  
0,1304 gelîche der sunnen  
0,1305 der spore engegen der sunnen schein  
0,1306 als sie beide wären ein  
0,1307 daz swert unt daz schoene sper  
0,1308 als der sterre Luzifer  
0,1309 mit anderme geziere  
0,1310 schein die baniere  
0,1311 geprîset unt gezieret  
0,1312 underschackieret  
0,1313 mit rôten unt mit wîzen  
0,1314 man sach dâ gele glîzen  
0,1315 daz grüene unt daz blâvare  
0,1316 dô wart der wahtær gewar  
0,1317 daz iz vremede volc wäre  
0,1318 dem küninge quam daz mære  
0,1319 balde er sich kleitte  
0,1320 daz mære sich breitte  
0,1321 êr er wäre vollen gekleit  
0,1322 dô was daz mære harte breit  
0,1323 sie dôzeten unt riefen  
0,1324 an die were sie liefen  
0,1325 der küninc quam ouch zuo gewer  
0,1326 dô sach er under dem her  
0,1327 obene von der mûre  
0,1328 einen schilt von lasûre  
0,1329 dâr inne einen lewen glîzen  
0,1330 von rôten unt von wîzen  
0,1331 unt eine baniere dâ mite  
0,1332 harte gelîch an dem snite  
0,1333 an dem zindâte  
0,1334 als der schilt in varwe hâte

- 0,1335 hier bî er erkante  
 0,1336 daz sie wâren von Kriechlande  
 0,1337 ouch sô merkete er daz  
 0,1338 daz durch râche unt durch haz  
 0,1339 Ercules sie dar hette brâht  
 0,1340 dô dûhte in daz ire maht  
 0,1341 harte kleine wäre  
 0,1342 er sprach "mir ist harte unmære  
 0,1343 daz diz volc hier lît  
 0,1344 sie sint kumen durch strît  
 0,1345 wir wellen ez in bringen ûf daz velt  
 0,1346 mitten under ire gezelt"  
 0,1347 diz dinc alsô geschach  
 0,1348 als der küninc vore sprach  
 0,1349 sie ranten hin zuo dem stade  
 0,1350 den Kriechen geschach der êrste schade  
 0,1351 sie sluogen unt stâchen  
 0,1352 ire schar sie durchbrâchen  
 0,1353 dô was in allenthalben nôt  
 0,1354 der Kriechen beleip dâ vile tôt  
 0,1355 Nestor quam zuo gerant  
 0,1356 die Kriechen er in noeten vant  
 0,1357 dô sluoc er sporen zuo sîten  
 0,1358 unt begunde hin rîten  
 0,1359 wenne der selbe alter degen  
 0,1360 die Kriechen waren gar erlegen  
 0,1361 dâ wart gejustieret  
 0,1362 unt sô gepunieret  
 0,1363 daz die schefte zuosprungen  
 0,1364 die scharpfen swert erklingen  
 0,1365 sie schrieten schilde unt helm  
 0,1366 dâ v louc stoup unt melm  
 0,1367 dâ was harte grôz strît  
 0,1368 Pollux quam in eine sît  
 0,1369 in ander sît quam Castor  
 0,1370 die von Trôje wichen vore  
 0,1371 iedoch sie wole beharten  
 0,1372 die wîle sie sich werten  
 0,1373 ire kraft begunde mîren  
 0,1374 der küninc hiez sie kêren  
 0,1375 an eine hoehe zuo der burc wert  
 0,1376 dô teilten sich die swert  
 0,1377 daz man allenthalben wuot  
 0,1378 dâ unt hier durch daz bluot  
 0,1379 dâ was noch ungestritten  
 0,1380 Nestor quam dô zuo geriten  
 0,1381 grôz alsam ein hiune  
 0,1382 mit starkem geliune

- 0,1383 alt unt vile ernesthaft  
 0,1384 er vuorte einen schaft  
 0,1385 grôz alsam ein runge  
 0,1386 sîn ros gienc in sprunge  
 0,1387 er warf iz her unt dar  
 0,1388 er rief lûte in die schar  
 0,1389 "wie nû ir Trôjær  
 0,1390 ist hier dechein tjosttiure  
 0,1391 der mich turre bestân"  
 0,1392 der küninc von Trôje rante sân  
 0,1393 aldâ er in weste  
 0,1394 er sprach "ire lieben geste  
 0,1395 lâzet iuch niht versmâhen  
 0,1396 daz wir iuch nû entvâhen  
 0,1397 als undâre  
 0,1398 êr der widerkâre  
 0,1399 ir werdet baz entvangen"  
 0,1400 des huop er ûf die stangen  
 0,1401 die sîn sper solte sîn  
 0,1402 unt stach in durch den schilt sîn  
 0,1403 des schildes buckel zuobrach  
 0,1404 durch den halsberc er in stach  
 0,1405 engein der brust ûf die platen  
 0,1406 die quam im zuo solichen staten  
 0,1407 wen sie dâ engegen was  
 0,1408 daz er des stiches genas  
 0,1409 die plate bestuont den sper vore  
 0,1410 dô erholete sich Nestor  
 0,1411 under den arm sluoc er den schaft  
 0,1412 er vazzete in solicher kraft  
 0,1413 daz er sô sêre hurte  
 0,1414 daz sich daz ros entgurte  
 0,1415 er stach wole über drî schrite  
 0,1416 den hêrren unt den satel mite  
 0,1417 der küninc lac gar dâr nider  
 0,1418 dô spranc er ûf zuo vuozzen wider  
 0,1419 unt gap im starker slege drî  
 0,1420 dâ hielt von Trôje ein ritter bî  
 0,1421 ein vile kindischer man  
 0,1422 zuo Nestor er geran  
 0,1423 er was geheizen Cedâr  
 0,1424 ez was kûme ein jâr  
 0,1425 daz er geleit hette swert  
 0,1426 er rante vaste vürewert  
 0,1427 sînen hêrren küninc er rach  
 0,1428 den alten er dâr nider stach  
 0,1429 sie ranten zuo in beider sît  
 0,1430 dâ wart harte grôz strît

- 0,1431 der disen überwant  
 0,1432 der verlös sîne hant  
 0,1433 dirre daz houbet der den arm  
 0,1434 jenen zotete der darm  
 0,1435 die erde wart von bluote rôt  
 0,1436 der Kriechen lac dâ vile tôt  
 0,1437 als ich daz buoch hoere sagen  
 0,1438 ire wurden sehs unt drîzic erslagen  
 0,1439 leide gedâhte im Castor  
 0,1440 daz ervallen was Nestor  
 0,1441 von jeneme jungelinge  
 0,1442 dô kârte er ûz dem ringe  
 0,1443 unt gurte sîneme rosse baz  
 0,1444 anderwerbe er ûf saz  
 0,1445 unt leisierte in den rinc  
 0,1446 dô widervuor im ein jungelinc  
 0,1447 Segudaris geheizen  
 0,1448 sie begunden sich underreizen  
 0,1449 von êrst mit den worten  
 0,1450 mit den scheften die sie vuorten  
 0,1451 beidersît sie sô stâchen  
 0,1452 daz die schefte brâchen  
 0,1453 Castor nam die überhant  
 0,1454 Cedâr quam zuo gerant  
 0,1455 Segudaris hette sich ergeben  
 0,1456 dô behielt im daz leben  
 0,1457 Cedâr der sîn mâc was  
 0,1458 der half im daz er genas  
 0,1459 Castoren er ûf hielt  
 0,1460 sînen schilt er im zuospielt  
 0,1461 dô en schônete er sîn niht  
 0,1462 mit dem swerte er im schriet  
 0,1463 durch des halsberges rinc  
 0,1464 daz swert im an die hût gienc  
 0,1465 er wolte sînen neven anden  
 0,1466 er warf in mit den handen  
 0,1467 under daz ros an daz gras  
 0,1468 daz er kûme genas  
 0,1469 an dem valle er in begreif  
 0,1470 daz er ûf die erden sleif  
 0,1471 er sprach "ir sît gevangen"  
 0,1472 er begunde wider rangen  
 0,1473 dô zuogienc im der wer  
 0,1474 er vuorte in under sîn her  
 0,1475 Pollux rief die Kriechen an  
 0,1476 daz sie lösten den man  
 0,1477 er nam sîne baniere an die hant  
 0,1478 sîne gesellen quâmen nâch gerant

0,1479 sehs hundert ritter wole bereit  
 0,1480 mit den von Trôje er streit  
 0,1481 dô wart ûf der walstat  
 0,1482 manic ritter ertrat  
 0,1483 dâ was die slahte sô grôz  
 0,1484 daz daz bluot als verre vlôz  
 0,1485 swelichen man von dem rosse dranc  
 0,1486 daz er in dem bluote ertranc  
 0,1487 dâ wart grôze nôt gestalt  
 0,1488 sie nâmen Castoren mit gewalt  
 0,1489 die von Trôje hetten nôt  
 0,1490 dâ lac Eliacus tôt  
 0,1491 von Kartagine des küninges sun  
 0,1492 dô weinte Laomedum  
 0,1493 unt klagete sînen neven  
 0,1494 "ich wil verliesen daz leben  
 0,1495 unt allez daz ich ie gewan  
 0,1496 ich en gereche disen man  
 0,1497 ouch haben wir es schande  
 0,1498 sint man ûz vremedem lande  
 0,1499 uns den strît her treit  
 0,1500 daz lâzet iuch allen wesen leit"  
 0,1501 er huop sich aber in den strît  
 0,1502 noch sint noch bî dirre zît  
 0,1503 geschach grôzer strît nie mî  
 0,1504 die Kriechen vluhen dô in den sê  
 0,1505 dô gesigete Laomedon  
 0,1506 Ercules unt Thelamon  
 0,1507 ranten in zuo Trôje  
 0,1508 Laomedon wânte mit schoie  
 0,1509 mit sige unt mit êren  
 0,1510 zuo Trôje wider kêren  
 0,1511 dô begeinete im ein bote  
 0,1512 weinende unt klagende gote  
 0,1513 bluotic unt sêre wunt  
 0,1514 daz hâr im zuo berge stuont  
 0,1515 als ein tôte alsô bleich  
 0,1516 daz houbet im ûf die ahseln weich  
 0,1517 zuosamene er sîne hende sluoc  
 0,1518 zuorizzen die er ane truoc  
 0,1519 wâren sîne kleider  
 0,1520 er sprach "ouwê leider  
 0,1521 waz solte ich armer ie geboren  
 0,1522 wir hân Trôjam verloren  
 0,1523 türme unt kemenâten  
 0,1524 die sîn uns verrâten"  
 0,1525 dô der küninc die rede vernam  
 0,1526 vile grôze leide in ane quam

- 0,1527 im was der sin entgangen  
 0,1528 im verblichen sîne wangen  
 0,1529 sîn ougen begunden im rôten  
 0,1530 sîn herze im vertôten  
 0,1531 sîn nase begunde ouch bleichen  
 0,1532 maniger hande zeichen  
 0,1533 undergienc im sîn bluot  
 0,1534 bîwîlen hette er unmuot  
 0,1535 leit unt swære  
 0,1536 ungedult unt ungebære  
 0,1537 ougen krimpf  
 0,1538 nasen rimpf  
 0,1539 im was allenthalben wê  
 0,1540 jene ranten ûz dem sê  
 0,1541 unt dise ranten ûz der stat  
 0,1542 unt beranten in âf der walstat  
 0,1543 iedoch satzte er sich zuo wer  
 0,1544 Ercules reit under dem her  
 0,1545 er sluoc unt tratte  
 0,1546 in dem bluote er watete  
 0,1547 zuo jungest quam er gerant  
 0,1548 dâ er Laomedonen vant  
 0,1549 leidic unt in ungehabe  
 0,1550 daz houbet sluoc er im abe  
 0,1551 er sprach "diz sî dîn zol  
 0,1552 den ich dir geben sol  
 0,1553 dô ich durch dîn lant reit  
 0,1554 sunder schaden unt âne leit  
 0,1555 daz dû mir dô entbüte  
 0,1556 des gedenke ich dir hiute  
 0,1557 mit zornigem muote  
 0,1558 des liges dû in dem bluote"  
 0,1559 er warf daz ros umbe  
 0,1560 durch rihte unt durch krümbe  
 0,1561 reit er unde rante  
 0,1562 unz er sîn leit volante  
 0,1563 er sluoc ir alsô vile nider  
 0,1564 daz er vore tôtē kûme hin wider  
 0,1565 gerîten mohte in die stat  
 0,1566 die er âf der walstat  
 0,1567 niet mohte hân erslagen  
 0,1568 die wâren gesloffen in die hagene  
 0,1569 dô der strît was gestritten  
 0,1570 die Kriechen alle sament riten  
 0,1571 unt stapfeten in zuo Trôje  
 0,1572 mit schalle unt mit schoie  
 0,1573 wenne in nie lieber geschach  
 0,1574 dô schuofen sie ire gemach

- 0,1575 sie quâmen mit gelfe unt mit gamen  
 0,1576 dô vunden sie niht wen wîbes namen  
 0,1577 unt arme gesindelâhe  
 0,1578 unvlætic unt unwæhe  
 0,1579 von krankem geslehte  
 0,1580 unt boesen küchenknehte  
 0,1581 die vrouwen gevlohen wâren  
 0,1582 wie solten sie gebâren  
 0,1583 sie en wisten wie gelâzen  
 0,1584 in dem betehûse sie sâzen  
 0,1585 dâ heime in ellende  
 0,1586 sie leneten zuo der wende  
 0,1587 ire wangen neigeten sie úz der hant  
 0,1588 zuovallen was in ire gewant  
 0,1589 ire gebende beroubet  
 0,1590 ire houbet zuostroubet  
 0,1591 unberihtet ire hâr  
 0,1592 sie sprâchen "ouwê unsælic jâr  
 0,1593 unt ouwê unsælic slac  
 0,1594 ouwê unsælic tac  
 0,1595 ouwê unsælige zît  
 0,1596 wir hân verloren in alle sît  
 0,1597 unse vriunde sîn uns erslagen  
 0,1598 mohten wir uns des entsagen  
 0,1599 daz dechein unreht gewalt  
 0,1600 mit uns hier würde gestalt  
 0,1601 wir en klageten niht mî  
 0,1602 nû ist uns allenthalben wé"  
 0,1603 die hêrren dô quâmen  
 0,1604 mit gewalt si sie nâmen  
 0,1605 dô en was ir dechein des erlân  
 0,1606 ir en würde gewalt getân  
 0,1607 Thelamon mit im nam  
 0,1608 des küninges tohter Esionam  
 0,1609 eine juncvrouwen schoene  
 0,1610 die wart im zuo lône  
 0,1611 wende er zuo vorderst ran  
 0,1612 dô man die burc gewan  
 0,1613 er was ir harte gemeit  
 0,1614 dâ quam abe sîn grôz leit  
 0,1615 er wolte sie zuo kebese hân  
 0,1616 daz begunde iren mâgen sint versmâhen  
 0,1617 Dares hât alsus geschriben  
 0,1618 einen mânde sie sint beliben  
 0,1619 zuo Trôje die geste  
 0,1620 dô brâchen sie die veste  
 0,1621 sie zuovuorten die burc al  
 0,1622 kemenâten unt sal

- 0,1623 hûs unt palas  
0,1624 allez daz dâr inne was  
0,1625 grôz unt kleine  
0,1626 dâ en beleip niht stein ûf steine  
0,1627 die graben wurden gevolt  
0,1628 sie nâmén silber unt golt  
0,1629 guot gesteine schoene gewant  
0,1630 unt kârten wider in ire lant  
0,1631 mit grôzeme rîchtuome  
0,1632 mit gufte unt mit ruome  
0,1633 mit schalle unt mit wünne  
0,1634 sie macheten allez ire künne  
0,1635 rîche unt mære  
0,1636 zuo Kriechen erschal daz mære  
0,1637 daz sie wären wider kumen  
0,1638 mit êren unt mit vrumen  
0,1639 unz her hân ich iuch gelârt  
0,1640 wie Trôje zuovuort wart  
0,1641 op ich vollenwirken wil  
0,1642 sô ist es ûz der mâze vile  
0,1643 daz dâ hoeret an mîn werc  
0,1644 hier gên ich érst an den berc  
0,1645 wil man daz ich vollensage  
0,1646 von der Trôiere klage  
0,1647 unt von ireme geslehte  
0,1648 unt ouch von ireme vehte  
0,1649 unt von ireme gebiuwe  
0,1650 alt unt niuwe  
0,1651 beide gemach unt ungemach  
0,1652 wie in her nâch geschach  
0,1653 sô muoz ich guot gelücke hân  
0,1654 sol ich den berc übergân  
0,1655 daz ich niht en sîge  
0,1656 swenne ich in überstîge  
0,1657 iedoch en sûme ich es niet  
0,1658 ich grîfe her wider an daz liet  
0,1659 man saget daz Laomedon  
0,1660 hette einen einigen sun  
0,1661 der was Priamus genant  
0,1662 er hette im bürge unt lant  
0,1663 gelâzen von dem lande vrî  
0,1664 der hette vünf süne unt tohter drî  
0,1665 der süne hiezen drî alsus  
0,1666 Ector Parîs Elenus  
0,1667 der vierde hiez Deiphebus  
0,1668 unt der vünfte Troilus  
0,1669 si wâren alle tugenthaft  
0,1670 Ector hette die kraft

- 0,1671 die schoene hette Parîs  
 0,1672 Elenus der was wîs  
 0,1673 Deiphebus den rîctuom  
 0,1674 Troilus den werltruom  
 0,1675 Ectores lop was gebreit  
 0,1676 von sterke unt von manheit  
 0,1677 dô kérte hîrre Parîs  
 0,1678 an minne allen sînen prîs  
 0,1679 Elenus was ein wîse man  
 0,1680 der liez sich wîssagen an  
 0,1681 Deiphebus viel an daz gemach  
 0,1682 dem der rîctuom geschach  
 0,1683 Troilus sich ane liez  
 0,1684 daz er ein guot turnierær hiez  
 0,1685 dirre tugent was decheine  
 0,1686 sie kunden sie alle gemeine  
 0,1687 ireme iegelîcheme doch der name beleip  
 0,1688 an der er sich allermeist getreip  
 0,1689 Priamus wîp hiez Ecuba  
 0,1690 sîn grôzer tohter Kreusa  
 0,1691 Polixena die andere  
 0,1692 die dritte hiez Kassandra  
 0,1693 Kreusa hette einen man  
 0,1694 Kassandra liez sich wîzigen an  
 0,1695 sie was ein wunderschoene maget  
 0,1696 unt hât harte vile gesaget  
 0,1697 wenne sie vile wiste  
 0,1698 von unserme hîrren Kriste  
 0,1699 von sîner kunft von sîner geburt  
 0,1700 als ir dicke habet gehört  
 0,1701 von sîner goteheit  
 0,1702 unt von sîner mennischheit  
 0,1703 aller slahte güete  
 0,1704 unt mit sîneme bluote  
 0,1705 sîne getriuwen solte erloesen  
 0,1706 unt verdampnen die boesen  
 0,1707 unt von dem jungensten tage  
 0,1708 beide vröuwede unt klage  
 0,1709 nû kêren wir zuo der strâzen  
 0,1710 dâ wir ez hân verläzen  
 0,1711 Polixena was einvalt  
 0,1712 senfte kiusch wole gestalt  
 0,1713 op ich ez rehte vernam  
 0,1714 dennoch hette Priam  
 0,1715 rehte drîzic kint  
 0,1716 op die wort wâr sint  
 0,1717 die mir daz buoch hât gesaget  
 0,1718 sie wâren helde unverzaget

- 0,1719 unt hetten alle swert genomen  
 0,1720 sie wârn zuo iren jâren kumen  
 0,1721 unt starc an ireme lîbe  
 0,1722 sie en wârn von eineme wîbe  
 0,1723 im alle geboren niht  
 0,1724 alsus saget uns daz liet  
 0,1725 Priamô quâmen dô mære  
 0,1726 daz Trôje zuovueret wäre  
 0,1727 unt sîn vater wär erslagen  
 0,1728 dô begonde er siufzen unt klagen  
 0,1729 er en wiste wie gebâren  
 0,1730 er vluochete sînen jâren  
 0,1731 er weinete sêre unt sprach  
 0,1732 "ouwê waz ich nû klagen mac  
 0,1733 ouwê leit über leit  
 0,1734 ouwê unsælichkeit  
 0,1735 ouwê unrechter zorn  
 0,1736 daz ich die mâge hân verloren  
 0,1737 ouwê schoene geine  
 0,1738 ouwê burc reine  
 0,1739 daz dâ wahsen sol daz gras  
 0,1740 dâ die schoene Trôje was  
 0,1741 busche unt heide  
 0,1742 ich solte vore leide  
 0,1743 unt von grôzer swærden  
 0,1744 gên under die erden  
 0,1745 ich en bin des nû niht wert  
 0,1746 daz ich iemer gevüere swert  
 0,1747 ich en gereche daz unreht"  
 0,1748 dô sante er kneht über kneht  
 0,1749 mit leide unt mit triurede  
 0,1750 über alle die gebiurede  
 0,1751 daz im ritter quæmen  
 0,1752 unt dâ von im vernæmen  
 0,1753 sîne nôt unt sîn ungemach  
 0,1754 daz er gebôt daz geschach  
 0,1755 Priamus reit gegen dem her  
 0,1756 hin zuo Trôje bî daz mer  
 0,1757 mit wîben unt mit kinden  
 0,1758 unt ouch mit sîneme gesinde  
 0,1759 unt mit den lantliuten  
 0,1760 unt hiez abe riuten  
 0,1761 mos unt gestriuche  
 0,1762 buschæhe unt ungebrûche  
 0,1763 unt hiez die gazzen reinen  
 0,1764 von boumen unt von steinen  
 0,1765 die hovestete von brenden  
 0,1766 in der stat allen enden

- 0,1767 umbe rûmen unt vegen  
0,1768 unt hiez bûwen unt stegen  
0,1769 ûf die hoehe unt in den grunt  
0,1770 unt hiez legen den vullemunt  
0,1771 zuo einer mûren niuwe  
0,1772 von starkeme gebiuwe  
0,1773 sie wart wît unt grôz  
0,1774 daz sie innen ir beslôz  
0,1775 an wîte unt an breite  
0,1776 reht unt bereite  
0,1777 zwô grôze tagevarте  
0,1778 dô die mûre bereit wart  
0,1779 sie macheten kemenâten  
0,1780 dô sie daz getâten  
0,1781 sie hiezen graben iren graben  
0,1782 als iz ûf was erhaben  
0,1783 unt dô vollenquam die graft  
0,1784 zehant wart ire kraft  
0,1785 sô starc unt ire gebiuwe  
0,1786 ez en wäre denne untriuwe  
0,1787 unt grôz verrættensse  
0,1788 sô sâzen sie gewisse  
0,1789 dô sie gewisse sâzen  
0,1790 Priamus hiez mâzen  
0,1791 im besundern ein werc  
0,1792 ûf einen stein an einen berc  
0,1793 ûf einen velsehthen schoren  
0,1794 dâr ûf leget er einen turn  
0,1795 unt hiez den turm Ilion  
0,1796 den worhte einer der hiez Donion  
0,1797 wirken er begunde  
0,1798 von dem vullemunde  
0,1799 unz obene an daz ende  
0,1800 ecken unt wende  
0,1801 allenthalben harte vast  
0,1802 daz im nihtes gebrast  
0,1803 dô er vollenkommen was  
0,1804 der wercman kûme genas  
0,1805 er hette in geworht sô hôh  
0,1806 daz er den wolken kûme entvlôch  
0,1807 dô er geworht was überal  
0,1808 dô hiez er einen schoenen sal  
0,1809 bî dem turme wirken  
0,1810 dô begunde er merken  
0,1811 wie er im getæte sîn reht  
0,1812 er machete die steine sleht  
0,1813 die venster grôz unt wît  
0,1814 dâr inne sûle in alle sît

- 0,1815 grüene rôt wîz blâ  
0,1816 brûn gel swarz grâ  
0,1817 daz gewürhte was reine  
0,1818 mit dem helfenbeine  
0,1819 underworht unt ouch gevolltet  
0,1820 beide silber unt golt  
0,1821 dâ bî harte schoene glas  
0,1822 dô der sal geworht was  
0,1823 mit gezierde unt mit gezinne  
0,1824 ûzen unt inne  
0,1825 mit dem kalke man in bant  
0,1826 sô man in schoenest vant  
0,1827 rehte wîz als der snê  
0,1828 daz gewürhte schein über sê  
0,1829 als iz ein himel wäre  
0,1830 daz werc was gewære  
0,1831 dô die burc vollenquam  
0,1832 dô was sie harte lobesam  
0,1833 sie macheten dâr ûf ire dach  
0,1834 von blîwe daz man ez glîzen sach  
0,1835 vünvzic mîle ûf daz mer  
0,1836 dô triben sie ûzer gewer  
0,1837 türme michel unt grôz  
0,1838 die mûre in ir beslôz  
0,1839 alumbe die stat  
0,1840 der hêrre im wirken bat  
0,1841 sehs houbetporten dâr in  
0,1842 als ich es gelärt bin  
0,1843 Dardanides die eine was  
0,1844 die ander Andenoridas  
0,1845 Timbrê die dâr nâch  
0,1846 die vierde was Ilia  
0,1847 dannoch wâren ir zwô  
0,1848 sie schuofen ire huote dô  
0,1849 dise stat was schoene  
0,1850 die andern an dem lône  
0,1851 wider dise niht en mohten  
0,1852 die hier niht en tohte  
0,1853 die krankeste veste  
0,1854 die wære dort die bezziste  
0,1855 alle tage unt alle naht  
0,1856 an geebene unt an der maht  
0,1857 ouch was des hêrren êre  
0,1858 wole zehenstunt mère  
0,1859 denne sînen vorvarn  
0,1860 in wâren ire acker gearn  
0,1861 verwunden hette ire lant  
0,1862 beide roup unt brant

- 0,1863 sie wâren kumen zuo gelde  
 0,1864 an walde unt an gevelde  
 0,1865 drîzic tûsent marke wert  
 0,1866 was ire gelt unt ire wert  
 0,1867 tûsent burgære  
 0,1868 küene unt gewære  
 0,1869 unt alsô manic koufmanne  
 0,1870 daz ich ir niht gezelen kan  
 0,1871 die in kurzen jâren  
 0,1872 zuo gereche kumen wâren  
 0,1873 beide an dem guote  
 0,1874 an velde unt an huote  
 0,1875 dô gedâhte Priamus alle tage  
 0,1876 der alten vêhede unt klage  
 0,1877 von sînen mâgen  
 0,1878 daz sie erslagen lâgen  
 0,1879 unt der unrechter gewalt  
 0,1880 der mit sîner swester was gestalt  
 0,1881 dirre gedanc wart vile breit  
 0,1882 des wart erniuwet sîn leit  
 0,1883 er konde es vergezzen niht  
 0,1884 des gienc er zuo râte unt riet  
 0,1885 mit kinden unt mit vriunden  
 0,1886 op sie im gerâten kunden  
 0,1887 umbe daz alte ungemach  
 0,1888 "allez daz mir ie geschach  
 0,1889 als ich iu sagen sol  
 0,1890 des vergezze ich allez wole  
 0,1891 âne daz aleine  
 0,1892 daz Esiona die reine  
 0,1893 die vile liebe swester mîn  
 0,1894 ein kebeswîp sol sîn  
 0,1895 hêrren Thelamône  
 0,1896 waz solte mir die krône  
 0,1897 unt des rîches êre  
 0,1898 op mir ez niht leit wäre  
 0,1899 hette er sie zuo reht ê  
 0,1900 dannoch tæte ez mir wê  
 0,1901 ich wil zuo Kriechen senden  
 0,1902 swie ich ez bewenden  
 0,1903 unt wil den küninc lâzen biten  
 0,1904 daz er gunne unt mit siten  
 0,1905 mîne swester heize wider geben  
 0,1906 ich wil iemer mîr leben  
 0,1907 mit leide unt mit swerde  
 0,1908 ez en sî daz sie mir werde  
 0,1909 her zuo gebet mir iuwern rât"  
 0,1910 Ector sprach "daz ir hât

- 0,1911 gerâten vater daz ist guot  
 0,1912 ez ist uns liep daz ir ez tuot  
 0,1913 under dem râte"  
 0,1914 der küninc gedâhte drâte  
 0,1915 wer im zuo der boteschaft gezam  
 0,1916 ez was ein grâve lobesam  
 0,1917 in sîneme lande wolegelobet  
 0,1918 wîse unt wole gehovet  
 0,1919 Andenor was er genant  
 0,1920 den sante er zuo Kriechenlant  
 0,1921 unt bevalch im dise arbeit  
 0,1922 dô sîn schif was bereit  
 0,1923 er begunde ïlen unt jagen  
 0,1924 dô quam er in siben tagen  
 0,1925 andersît an daz mere  
 0,1926 dô wîsete in der vere  
 0,1927 rehte ûf die vart  
 0,1928 als er dô gewîset wart  
 0,1929 alsô reit Andenor  
 0,1930 mit sînen gesellen ûf daz spor  
 0,1931 gegen der stat dâr inne was  
 0,1932 ire erbevîant Pelias  
 0,1933 drî tage er dâ lac  
 0,1934 sînes gemaches er pflac  
 0,1935 an dem vierden er zuo hove reit  
 0,1936 dô entvienc man in nâch der gewonheit  
 0,1937 als des landes site was  
 0,1938 dô dranc er ûf daz palas  
 0,1939 unt gienc vüre den küninc stân  
 0,1940 unt warp sîne boteschaft sân  
 0,1941 "mich hât der küninc von Trôjenlant  
 0,1942 Priamus zuo dir gesant  
 0,1943 unt hiez dir hîrre daz sagen  
 0,1944 daz er niht lenger wil vertragen  
 0,1945 daz Thelamon Esionam  
 0,1946 sîne swester mit gewalt nam  
 0,1947 ez muoz im wole versmâhen  
 0,1948 daz er sie zuo kebese wil hân  
 0,1949 in diseme ellende  
 0,1950 daz man sie im wider sende  
 0,1951 âne gezoc unt âne strît  
 0,1952 daz dunket mich guot wende des ist zît"  
 0,1953 der küninc begunde unsiten  
 0,1954 umbe sîn vlêhen unt umbe sîn biten  
 0,1955 umbe sîne klage unt umbe sîn leit  
 0,1956 "hân ich tages niht geleit  
 0,1957 ich en kêre mich an die rede niet  
 0,1958 nû mir zuo zürnenne geschiet

- 0,1959 ûz mînen ougen balde  
 0,1960 daz iuwer der tiuel walte  
 0,1961 rûmet balde mîn lant"  
 0,1962 er huop sich dannen zuohant  
 0,1963 er gesach sich hinder nie  
 0,1964 unt sprach "ich bin übel hier  
 0,1965 ich leiste gerne diz gebot  
 0,1966 wäre ich hinnen hêrre got"  
 0,1967 er rief den schifmannen  
 0,1968 dô vuorten sie in dannen  
 0,1969 zuo Salemîne in daz lant  
 0,1970 dâ er Thelamonen vant  
 0,1971 Andenor sich wîsen bat  
 0,1972 von dem stade in die stat  
 0,1973 dâ er Thelamonen vünde  
 0,1974 durch eine unkünde  
 0,1975 der hêrre dô gewîset wart  
 0,1976 sehs grôze tagevarте  
 0,1977 die saz er ûf unt reit  
 0,1978 unt quam an ein gevilde breit  
 0,1979 in ein gertæhe  
 0,1980 schoene unt wæhe  
 0,1981 nâhen bî der strâzen  
 0,1982 dâ hette der küninc gelâzen  
 0,1983 dô hörte Andenor sagen  
 0,1984 daz im die âder wäre geslagen  
 0,1985 dô hafte er zuo eineme boume  
 0,1986 sîn ros mit dem zoume  
 0,1987 unt gieng vüre den küninc stân  
 0,1988 sîne boteschaft tet er sân  
 0,1989 waz mac ich hier sprechen vort  
 0,1990 die er gesprochen hette dort  
 0,1991 die selben wort er hier sprach  
 0,1992 ouch geschach im hier daz ungemach  
 0,1993 daz im dort geschehen was  
 0,1994 vile kûme er genas  
 0,1995 wär er dannen niht entrant  
 0,1996 er hette in heizen geblant  
 0,1997 er begunde dannen rinnen  
 0,1998 "ouwê wär ich hinnen  
 0,1999 ich wânte dort in noeten wesen  
 0,2000 mohte ich hier nû genesen  
 0,2001 ich kæme dâ nâch her niht mî"  
 0,2002 dô kérte er wider ûf den sê  
 0,2003 balde vuor er vürebaz  
 0,2004 dô quam er dâ Pollux saz  
 0,2005 unt sîn bruoder Castor  
 0,2006 hier geschach im als dâ vore

- 0,2007 êr er diz mære hette gesaget  
0,2008 sô wart er dannen verjaget  
0,2009 an sîne alte gewer  
0,2010 wider ûf daz mer  
0,2011 er sprach "ouwê unsælic man  
0,2012 daz ich niergen en kan  
0,2013 gesagen mîne mære  
0,2014 ez kume mir zuo swære  
0,2015 solte ich nû lîden den tôt  
0,2016 daz wil ich werben vürebaz"  
0,2017 dô quam er dâ Nestor saz  
0,2018 unt sagete im die selben wort  
0,2019 die ir dâ vore hât gehört  
0,2020 als er sie vollenbrâhte  
0,2021 Nestor sweic unt dâhte  
0,2022 sîn zorn ûz sîneme herzen dranc  
0,2023 er nam den brant an die hant  
0,2024 "sô mir dirre mîn bart  
0,2025 ir muotersun von schalkes art  
0,2026 unsæliger Trôiere  
0,2027 dû en kères hinnen schiere  
0,2028 ich zuovüere dich als ein wurmmel  
0,2029 weder munt noch kel  
0,2030 gesprichtet dir niemer wort mî  
0,2031 varet ir her über  
0,2032 daz ir geklaget iuwer nôt"  
0,2033 Andenor wânte wesen tôt  
0,2034 iedoch er hinderwert trat  
0,2035 biz daz er quam an die stat  
0,2036 dâ er den sprunc mohte hân  
0,2037 dô liez vaste hine gân  
0,2038 "ich mac in disen zîten  
0,2039 hier niht gestrîten  
0,2040 ich wil ein guot kempfe wesen  
0,2041 mac ich mit vlühten hier genesen"  
0,2042 Andenor hiez die schifman  
0,2043 daz sie balde bunden an  
0,2044 die segele an die mastboume  
0,2045 sie vuorten in durch des meres strôm  
0,2046 harte balde er dannen vlôch  
0,2047 unt als er wânde wesen vrô  
0,2048 unt sîner grôzen swære  
0,2049 gar entvlohen wäre  
0,2050 er îlte im was gâch  
0,2051 dô quam im ein weter nâch  
0,2052 starc unt swinde  
0,2053 von regene unt von winde  
0,2054 grôz unt dicke

0,2055 von regene unt von blicke  
0,2056 dô hette er nôt in alle sít  
0,2057 in treip in kurzer zít  
0,2058 daz er in langer stunde  
0,2059 sich niht erholen kunde  
0,2060 doch erholete er sich  
0,2061 er vuor allertagelîche  
0,2062 unz er sîn nôt überwant  
0,2063 dô quam er wider in sîn lant  
0,2064 in daz betehûs er gâhete  
0,2065 sîn opfer er dar brâhte  
0,2066 wende er wole genesen was  
0,2067 dô gienc er ûf daz palas  
0,2068 sint er quam ûf den sal  
0,2069 er sagete den hêrren überal  
0,2070 wie ez im was ergangen  
0,2071 "daz ich ungevangen  
0,2072 kumen bin unt ungeblant  
0,2073 von Kriechen dar ich was gesant  
0,2074 des wil ich iemer sîn gemeit"  
0,2075 dô sagete er daz êrste leit  
0,2076 unt daz ander ungemach  
0,2077 waz im zuo dem dritten geschach  
0,2078 unt zuo dem vierden dâ mite  
0,2079 er sprach "Peleas hette unsite  
0,2080 er hiez mich ûz sînen ougen schaben  
0,2081 Thelamon wolte mit ûz graben  
0,2082 mîne ougen dem entvlöch ich vore  
0,2083 Pollux unt Castor  
0,2084 hiezen mich dannen verjagen  
0,2085 dô ich diz mære begunde sagen  
0,2086 in daz mer ich kûme entran  
0,2087 Nestor der alte man  
0,2088 grein mich an unt schutte sîn bart  
0,2089 wen daz mir der sprunc wart  
0,2090 unt daz ich versuohte  
0,2091 op ich entvlihen mochte  
0,2092 ich hette den lîp dâ verloren"  
0,2093 Priamô wart die rede zorn  
0,2094 er sprach zornlîche  
0,2095 "ich sage iuch wærlîche  
0,2096 ich gedenke mir leide  
0,2097 hêr Andenor beide  
0,2098 ump daz iuwer leit  
0,2099 unt umbe mîne smâchheit  
0,2100 unt umbe die alten vêhe  
0,2101 nû ist ez alsô wâhe  
0,2102 daz ich mich bereite

0,2103 als ich lenger beite  
0,2104 nahtvrist jârvrist  
0,2105 daz mir nû geschehen ist  
0,2106 daz klage ich mînen kinden  
0,2107 mit den wil ich ez verwinden  
0,2108 mannen unt vriunden  
0,2109 ez kume denne von sünden  
0,2110 ez wirdet noch gerochen  
0,2111 als ich hân gesprochen  
0,2112 beide man unt kint  
0,2113 unt die mîne vriunt sint  
0,2114 die grîfen alle dâr zuo  
0,2115 daz ich den Kriechen leit getuo  
0,2116 mîner süne der hêrste  
0,2117 Ector der sî der êrste  
0,2118 an der helfe unt an der schar  
0,2119 unt ander mîne kint gar  
0,2120 sie sulen mit heldes handen  
0,2121 mir helfen anden  
0,2122 irere vorevarn tôt"  
0,2123 als der küninc dâ gebôt  
0,2124 unt von im geboten wart  
0,2125 alsô gelobeten sie die vart  
0,2126 Ector sprach "nû werde al schîn  
0,2127 nû ich der êrste sol sîn  
0,2128 ich wil ez sô erheben  
0,2129 daz man ez sehe unt entsebe  
0,2130 hier en wirdet niht vore gespart  
0,2131 swelich ritter gâbe gert  
0,2132 der kume albalde ûfe solt  
0,2133 beide silber unt golt  
0,2134 unt daz eigen daz ich hân  
0,2135 die varnde habe wil ich lân  
0,2136 unt allez guot iemer mère  
0,2137 ez en kume an unser êre  
0,2138 dô wil ich uns innen  
0,2139 daz wir ez beginnen  
0,2140 als wir ez mügen geenden  
0,2141 unt unreht gewenden  
0,2142 nû habet decheine gewisheit  
0,2143 wir sîn hier heime denne wole bereit  
0,2144 sulen wir aber úz varn  
0,2145 wir mohten ez uns vile baz bewarn  
0,2146 als ich iuch bewisen  
0,2147 wir haben noch ïsen  
0,2148 noch geschütze noch gewer  
0,2149 noch die schif in dem mer  
0,2150 noch die spîse dâr inne

0,2151 ez ist zît daz man sie gewinne  
0,2152 den Kriechen gebristet niht  
0,2153 ez ist ein harte rîche diet  
0,2154 sie hân gelücke unt heil  
0,2155 in dienet der werlte daz dritteil  
0,2156 Europa die rîche  
0,2157 sie varent rîliche  
0,2158 unt wole zuo gereche  
0,2159 ir wænet daz ich ez spreche  
0,2160 durch mîne zageheit  
0,2161 nein ich ze wâre ich bin gereit  
0,2162 swenne ir anders wollet varn  
0,2163 daz ich mich dâ vore niht sparn"  
0,2164 Parîs hier nâch sprach  
0,2165 nû hoeret wie mir geschach  
0,2166 gemelich geschihte  
0,2167 êr ich ez iuch berichte  
0,2168 sô sulet ir daz verstân dâ bî  
0,2169 daz ez uns zuo heile kumen sî  
0,2170 ich was bereit unt solte jagen  
0,2171 gein sumerzît in heizen tagen  
0,2172 ich huop mich ûz harte vruo  
0,2173 dô quam mir ein hirz zuo  
0,2174 her ûz von Môrlande  
0,2175 sîne art ich erkante  
0,2176 ich hetzete mîne hunde  
0,2177 ervolgen ich in niht kunde  
0,2178 daz weter was vile heiz  
0,2179 dô treip mich hitze unt sweiz  
0,2180 under einen kalten boum  
0,2181 der kleinen wezzerlîne stroum  
0,2182 hette in umbegangen  
0,2183 er hette breit bevangen  
0,2184 sîn schatwe gunde langen  
0,2185 über der wezzerlîne ganc  
0,2186 ein brunne dâ mitten entspranc  
0,2187 beide klâr unt kalt  
0,2188 über allen den walt  
0,2189 sîne âdern klungen  
0,2190 dâ kuolte ich mîne zungen  
0,2191 mîne ougen ich bespræjete  
0,2192 den wint ich mir zuo wæjete  
0,2193 als ich mich kuolte alsus  
0,2194 dô quam vrouwe Vêrus  
0,2195 Pallas unt Junô  
0,2196 der zierde schein alsô  
0,2197 ich wânte in dem brunnen  
0,2198 schinen drî sunnen

- 0,2199 sie wâren zuo mir gesant  
 0,2200 sie truogen einen apfel an der hant  
 0,2201 der was von golde alrôt  
 0,2202 ir iegelîche mir sîne gift bôt  
 0,2203 daz ich wolte schouwen  
 0,2204 weliche under den vrouwen  
 0,2205 die allerschoeneste wäre  
 0,2206 Junô bôt dise êre  
 0,2207 "ich mache daz dû iemer rîche bist"  
 0,2208 Pallas kunst unt list  
 0,2209 Vênuſ bôt zuo lône  
 0,2210 ein wîp alsô schoene  
 0,2211 daz niergen wäre decheine  
 0,2212 sô schoene noch sô reine  
 0,2213 zweier hulde ich verlôs  
 0,2214 wende ich die dritten erkôs  
 0,2215 die mir daz wîp geben sol  
 0,2216 nû wizzet hêren alle wole  
 0,2217 sie ist in Kriechenlande  
 0,2218 von spîse unt von gewande  
 0,2219 heizet balde schif laden  
 0,2220 ich getuon dâ grôzen schaden  
 0,2221 gewinnet mir gesellen  
 0,2222 die mit mir varen wellen  
 0,2223 Deiphebus der bruoder ein  
 0,2224 antwurte hier engein  
 0,2225 "ich en bin leider nû niht wîs  
 0,2226 iedoch daz mîn bruoder Parîs  
 0,2227 iezunt gesprochen hât  
 0,2228 des volgen wir daz ist mîn rât"  
 0,2229 dâ volgeten si es alle gemeine  
 0,2230 dô widerredete ez eine  
 0,2231 Elenus der vierde  
 0,2232 "ouwê unserre zierde  
 0,2233 ouwê unserme gebûwe  
 0,2234 ouwê dirre riuwe  
 0,2235 der uns armen sol geschên  
 0,2236 ich hân ez langes vore gesehen  
 0,2237 wir müezen uns ie scheiden  
 0,2238 ez kumet von leiden  
 0,2239 daz wir niht wizzen wâ belîben  
 0,2240 kinden unt wîben  
 0,2241 geschiet noch von Parîse  
 0,2242 manic leit unt mî  
 0,2243 denne loubes sî an boume  
 0,2244 unt mî danne in dem stroume  
 0,2245 von sande oder von grieze  
 0,2246 decheines dinges vlieze

- 0,2247 mîn houbet setze ich zuo pfande  
 0,2248 vart ir úz diseme lande  
 0,2249 ez en kume als ich gesprochen hân  
 0,2250 ich spreche gar âne wân  
 0,2251 eine rehten wârheit  
 0,2252 swem iz sî liep oder leit  
 0,2253 unt als ir ez hier hât gehôrt"  
 0,2254 zehant dô dise wort  
 0,2255 von im gesprochen wâren  
 0,2256 sie en wisten wie gebâren  
 0,2257 iegelicher den andern ane sach  
 0,2258 Troilus aleine sprach  
 0,2259 der vünfte der kinde  
 0,2260 sîne wort wâren swinde  
 0,2261 "eiâ bruoder küene degen  
 0,2262 daz iuwer der tiuvel müeze pflegen  
 0,2263 waz woltet ir zuo strîte  
 0,2264 ir soltet iuwer gezîte  
 0,2265 dâ heime singen alle tage  
 0,2266 armer bleiche wîssage  
 0,2267 unsæliger kappellân  
 0,2268 ir soltet zuo dem betehûse gân  
 0,2269 wê iuwern buochen  
 0,2270 sô mir got ich en ruochen  
 0,2271 sint iuwer buoch hât gelogen  
 0,2272 wie sêre ich mit iuch unhogen  
 0,2273 ir werdet mir niemer mîr liep  
 0,2274 arm man zetebrieve  
 0,2275 ir hât den rehten brief verzatt  
 0,2276 schrîbet an ein ander blat"  
 0,2277 die hêrren lacheten alle  
 0,2278 von ruofe unt von schalle  
 0,2279 was die burc alle vol  
 0,2280 in behagete der spot wole  
 0,2281 sie griffen an daz alte  
 0,2282 Priamus hiez balde  
 0,2283 daz lantvolc zuosamene komen  
 0,2284 unt sagete in als ir hât vernomen  
 0,2285 mit wie getâner swære  
 0,2286 Andenor kumen wäre  
 0,2287 den rât unt disen rât  
 0,2288 als ir wole vernomen hât  
 0,2289 dô behagete in daz geræte  
 0,2290 daz Parîs getân hette  
 0,2291 zuo êren unt zuo gevüere  
 0,2292 sie rieten daz er vüere  
 0,2293 Panthus sprach dô zuo Priamô  
 0,2294 "wie tuot ir edel küninc sô

- 0,2295 daz ir des sulet staten  
0,2296 daz Troilus mit unbaten  
0,2297 ūf Elenô tr̄ibet s̄inen spot  
0,2298 weiz got ez gerichet noch got  
0,2299 Enforbius m̄n meister was  
0,2300 vore vünvzic jären er ez las  
0,2301 got genâde im er ist tôt  
0,2302 er sprach daz Trôje in grôze nôt  
0,2303 quâme noch von Paridê  
0,2304 got wolle daz ez wole ergê"  
0,2305 hier geschach Panthô  
0,2306 als dâ vore Elenô  
0,2307 grôze unmâze  
0,2308 an worten unt an gelâze  
0,2309 ire alte rede vollengienc  
0,2310 Parîs der jungelinc  
0,2311 bereitte sich vaste an die vart  
0,2312 Cassandren zuo wizzen wart  
0,2313 waz die rede wäre  
0,2314 dô erschrac sie von dem mære  
0,2315 dise maget konde wîssagen  
0,2316 sie begunde weinen unt klagen  
0,2317 "waz sol ich arme Cassandra  
0,2318 ich bin von leide iezunt grâ  
0,2319 ouwê val über val  
0,2320 wir sîn verloren überal  
0,2321 lant burc kint man  
0,2322 unt die dise gehoerent an  
0,2323 der en geniset dechein  
0,2324 der die sunne ie beschein  
0,2325 swaz zuo Trôje in dem rîche  
0,2326 daz zegêt ez allez gelîche  
0,2327 mich betrouc mîn buoch nie  
0,2328 belîbe noch mîn bruoder hier  
0,2329 sô wär mîn gedinge  
0,2330 daz ez uns baz ergienge"  
0,2331 dô riefen sie alle als êr  
0,2332 er solte varen über sê  
0,2333 iezunt hette Parîs  
0,2334 sîn dinc geschaffet alle wîs  
0,2335 als er zuo vart was bereit  
0,2336 er hette guote gewisheit  
0,2337 an dem geræte  
0,2338 geselleschaft stâte  
0,2339 schatz gewant spîse  
0,2340 daz liebete Parîse  
0,2341 daz im solte leiden  
0,2342 als dâ was bescheiden

- 0,2343 von den drîn wîssagen  
0,2344 dô hiez er zuo den schiffen tragen  
0,2345 alle sîne gereitschaft  
0,2346 dô volgete im sîne geselleschaft  
0,2347 vater bruoder dienestman  
0,2348 dô bunden sie ire segel an  
0,2349 senfte weter liehter tac  
0,2350 bluomen schîn wurze smac  
0,2351 der vogel sanc daz grüene rîs  
0,2352 geschuofen daz Parîs  
0,2353 gein sumerzît gereche wole  
0,2354 vünf unt zweinzig schiffe vol  
0,2355 harte lieber vriunde  
0,2356 vuorte in unkünde  
0,2357 als die zît leidet  
0,2358 swenne der sumer scheidet  
0,2359 alsô scheidet daz leit  
0,2360 gegen der zîte süezicheit  
0,2361 disen hêrren alsô geschach  
0,2362 ire jámer unt ire ungemach  
0,2363 dâr zuo ellendes klage  
0,2364 vergâzen sie durch die süezen tage  
0,2365 dô wâren mit Parîdê  
0,2366 vier vürsten über sê  
0,2367 Deiphebus Polidamas  
0,2368 Andenor unt Eneas  
0,2369 die vuorten hin über mer  
0,2370 drî tûsent ritter  
0,2371 zuo strîte gar unmâzen wole  
0,2372 nû ich ez iuch sagen sol  
0,2373 sie wâren alle wole bereit  
0,2374 unt wole erkant an manheit  
0,2375 die hêrren nâmnen urloup  
0,2376 über allen den hof  
0,2377 Priamus bevalch Parîsen  
0,2378 den hêrren küenen unt wîsen  
0,2379 den viern die ich hân genant  
0,2380 dô vuoren sie gein Kriechenlant  
0,2381 mit liebe unt mit leide  
0,2382 schieden sich dô beide  
0,2383 vater bruoder unt kint  
0,2384 als sie dâ vore genant sint  
0,2385 die edeln Trôiere  
0,2386 die quâmen vile schiere  
0,2387 zuo Kriechen in die geine  
0,2388 dô zwîveleten sie alle gemeine  
0,2389 wâ sie mit êren  
0,2390 zuo stade mohten kêren

- 0,2391 under des sie sâhen  
0,2392 ein michel volc in nâhen  
0,2393 sie erkanten ir dechein  
0,2394 in vuor ein rîcher küninc engein  
0,2395 Menelaus was er genant  
0,2396 Nestor hette nâch im gesant  
0,2397 daz er zuo Pirô quæme  
0,2398 unt von im vernæme  
0,2399 ein vile guot mære  
0,2400 ich en weiz waz daz wäre  
0,2401 dem küninge was zuo Pirô gâch  
0,2402 sîn wîp hiez Elenâ  
0,2403 daz was daz wîp schoene  
0,2404 die Parîse zuo lône  
0,2405 Vênum gelobet hette  
0,2406 ump daz geræte  
0,2407 wande er ir des apfels jach  
0,2408 als über dem brunnen geschach  
0,2409 dô begeinete mit sîneme her  
0,2410 Parîs Menelaô ûf dem mer  
0,2411 ir ietweder vuor sîne vart  
0,2412 ir deweder gewar wart  
0,2413 wer der ander wäre  
0,2414 sie îlten beide sêre  
0,2415 ir ietweder ein ander gap  
0,2416 guoten morgen guoten tac  
0,2417 sie îlten vaste beidersît  
0,2418 Castor in der selben zît  
0,2419 unt Pollux wâren úz gevarn  
0,2420 die daz lant solten bewarn  
0,2421 ireme hêrren Menelaô  
0,2422 Parîs ankerte dô  
0,2423 nâhe bî Kriechenlant  
0,2424 gegen eineme berge den er vant  
0,2425 der berc hiez Citherus  
0,2426 dâ hette vrouwe Vênum  
0,2427 ein betehûs reine  
0,2428 von edelme mermelsteine  
0,2429 in den selben stunden  
0,2430 die hêrren hier vunden  
0,2431 daz volc maniger hande  
0,2432 wîten in den landen  
0,2433 daz volc zuo dem betehûse quam  
0,2434 dâ was ein hôchzít lobesam  
0,2435 bî den gezîten  
0,2436 sie sâhen dâr zuo rîten  
0,2437 ritter unt vrouwen  
0,2438 sie mohten wunder schouwen

- 0,2439 die vremede Trôiere  
 0,2440 maniger slahte ziere  
 0,2441 an gewande unt an gelâze  
 0,2442 sie wunderte ûzer mâze  
 0,2443 dise unt jene beide  
 0,2444 durch daz unbescheide  
 0,2445 daz jene von den gesten  
 0,2446 diz noch daz westen  
 0,2447 noch dise von dirre hôchzît  
 0,2448 dô quam in och beidersît  
 0,2449 hier unt dâ mære  
 0,2450 waz diz unt daz wäre  
 0,2451 dar quâmen alle gelîche  
 0,2452 arm unt rîche  
 0,2453 beide zuo bete unt zuo klage  
 0,2454 an dem andern tage  
 0,2455 ire opfer sie bereitten  
 0,2456 in ire betehûs sie leitten  
 0,2457 hêrrn Parîsen  
 0,2458 sie begunden im wîsen  
 0,2459 ire opfer unt ire schoenheit  
 0,2460 zehant was daz mære bereit  
 0,2461 in dem lande überal  
 0,2462 von Parîse ez ûz schal  
 0,2463 daz er mit michelme her  
 0,2464 unt mit zierde über mer  
 0,2465 zuo hôchzît kumen wäre  
 0,2466 Elena vernam die mære  
 0,2467 sie en sûmete sich niet  
 0,2468 mit iren juncvrouwen sie riet  
 0,2469 wie sie dar quæme  
 0,2470 daz iz wole gezæme  
 0,2471 hin zuo dem berge Citherô  
 0,2472 ire man was zuo Pirô  
 0,2473 als gesaget ist dâ vore  
 0,2474 ire bruoder Castor  
 0,2475 unt Pollux wâren ûz geriten  
 0,2476 sie begunden ire juncvrouwen biten  
 0,2477 daz sie sich erbeiten  
 0,2478 unt wole bereitten  
 0,2479 ire gewant unt ire kleit  
 0,2480 "ez ist allez bereit  
 0,2481 iuwer zierde unt iuwer wât  
 0,2482 wollet ir varen ir hât  
 0,2483 ritter unt vrouwen  
 0,2484 man mac uns wole schouwen  
 0,2485 mit sô grôzen êren  
 0,2486 wâ wir hine kêren"

- 0,2487 die vrouwen ûf sâzen  
0,2488 unt vuoren ire strâze  
0,2489 Helena gar schoene was  
0,2490 als ich ez an dem buoche las  
0,2491 ire stirne was offenbâr  
0,2492 ire ougen lûter unt klâr  
0,2493 rôsige wangen rôter munt  
0,2494 süeze âteme zene gesunt  
0,2495 blîchende kel arme blanc  
0,2496 schoene hende vinger lanc  
0,2497 glander negel sleht hût glat  
0,2498 rein wîz als ein liljen blat  
0,2499 wærliche über al iren lîp  
0,2500 von wîbe quam nie schoener wîp  
0,2501 man saget von der schoenen  
0,2502 sie vuorte ûfe eine krônen  
0,2503 von golde gar durchslagen  
0,2504 waz mac ich mîr von ir sagen  
0,2505 beide ire lîp unt ire kleit  
0,2506 was von solichere zierheit  
0,2507 daz hîerre Parîs selbe jach  
0,2508 dô sie quam unt er sie sach  
0,2509 daz nie wîp decheine  
0,2510 sô schoene noch sô reine  
0,2511 müge gewerden  
0,2512 niemer mîr ûf erden  
0,2513 ouch nam die vrouwe des hêrren war  
0,2514 dô was er alsô schône gevar  
0,2515 daz er úz den andern schein  
0,2516 als ein lieht karfunkelstein  
0,2517 under anderme gesteine  
0,2518 ouch was er sô reine  
0,2519 an den gebære  
0,2520 als er ein juncvrouwe wäre  
0,2521 ir deweder sach den andern an  
0,2522 er daz wîp sie den man  
0,2523 lange sie sich undersâhen  
0,2524 dô begonden sie sich nâhen  
0,2525 ie baz unt baz  
0,2526 ir deweder sinnes vergaz  
0,2527 al nâch der muoze  
0,2528 grüeze gein gruoze  
0,2529 sie unt er sie  
0,2530 beide dâ unt hier  
0,2531 was die süeze minne  
0,2532 ie mitten rehte dâr inne  
0,2533 sie hetten beidersît nôt  
0,2534 wîlen bleich wîlen rôt

- 0,2535 wîlen trûric wîlen vrô  
 0,2536 beide sus unt sô  
 0,2537 nâch der wandelunge  
 0,2538 daz die minne vert in sprunge  
 0,2539 gegen der âbentstunde  
 0,2540 daz volc sich abe begunde  
 0,2541 rîten unt machen  
 0,2542 sie wolten die naht wachen  
 0,2543 unt in dem betehûse wesen  
 0,2544 beide singen unt lesen  
 0,2545 als man in der zît pflac  
 0,2546 Parîs hette al den tac  
 0,2547 gedâht ump sîne nôt  
 0,2548 sînen liuten er gebôt  
 0,2549 daz sie zuosamene quæmen  
 0,2550 unt sîne rede vernæmen  
 0,2551 sîn gebot dâ geschach  
 0,2552 als er selbe vore sprach  
 0,2553 dar quam Deiphebus unt Polidamas  
 0,2554 Andenor unt Eneas  
 0,2555 dise houbetvürsten viere  
 0,2556 unt ander Trôiere  
 0,2557 grâven vrîen dienestman  
 0,2558 dô Parîs huop sîne rede an  
 0,2559 er sprach "ir hât alle wole vernomen  
 0,2560 wir sîn durch schaden ûz kommen  
 0,2561 uns hât mîn vater ûz gesant  
 0,2562 die Kriechen zuovuorten unser lant  
 0,2563 mit roube unt mit brande  
 0,2564 in unserme lande  
 0,2565 ich en weiz waz sie râchen  
 0,2566 unser betehûs sie brâchen  
 0,2567 Thelamon Esionam  
 0,2568 mîne wasen mit gewalt nam  
 0,2569 ouch wart unreht gewalt  
 0,2570 mit unsern mâgen gestalt  
 0,2571 ich en weiz waz sprechen  
 0,2572 woltet ir ez rechen  
 0,2573 sô geschê in hier daz ungemach  
 0,2574 daz unsern vordern dort geschach  
 0,2575 saget mir alle iuwern muot  
 0,2576 ich wil op ez iuch dunket guot  
 0,2577 dise küninginnen  
 0,2578 mit mir vüeren hinnen  
 0,2579 des en ahte ich niht mî  
 0,2580 wie ez den andern ergê  
 0,2581 nû saget ir hêrren alle  
 0,2582 wie iuch der rât gevalle"

- 0,2583 sâñ mit disen worten  
0,2584 dô sie diz gehörten  
0,2585 dô quâmen sie alle an den rât  
0,2586 nâch der dritten hanekrât  
0,2587 dô daz volc begunde stillen  
0,2588 dô tâten sie iren willen  
0,2589 als sie dô gerten  
0,2590 mit den blôzen swerten  
0,2591 mit armbrusten ûf gezogen  
0,2592 mit pfîlen unt mit bogen  
0,2593 sie hetten och ire sarwerc  
0,2594 panzier helm halsberc  
0,2595 in daz betehûs sie liefen  
0,2596 sie dôzeten unt riefen  
0,2597 sie begriffen mit dem hâre  
0,2598 die hêrren die dâ wâren  
0,2599 sie rizzen unt brâchen  
0,2600 sie sluogen unt stâchen  
0,2601 unt zuovuorten swaz dâ was  
0,2602 Elena kûme genas  
0,2603 unt ire juncvrouwen  
0,2604 sie giengen sô houwen  
0,2605 daz vleisch unt bein  
0,2606 der manne der genas dechein  
0,2607 och lac der wîbe vile tôt  
0,2608 dâ was allenthalben nôt  
0,2609 dâ was grôz ungedult  
0,2610 sie nâmén silber unt golt  
0,2611 zindât pfellel samît  
0,2612 unt ander gezierde dâr mite  
0,2613 die vrouwen sie nâmén  
0,2614 swâ sie in zuo quâmen  
0,2615 Parîs zuo im nam  
0,2616 die schoenen vrouwen Elenam  
0,2617 unt huop sich balde dannen  
0,2618 mit vriunden unt mit mannen  
0,2619 unt kârte gegen Eleê  
0,2620 daz was ein burc ûf dem sê  
0,2621 die wîle daz sie kârten dar  
0,2622 dô wurden sie ir ûf der burc gewar  
0,2623 sie vrâgeten wer der hêrre  
0,2624 wäre unt och die mære  
0,2625 unt also sie selben sâhen  
0,2626 dô begunde gâhen  
0,2627 unt schutten an ire ïsen  
0,2628 die tumben mit den wîsen  
0,2629 tâten in micheln schaden  
0,2630 des roubes des dâ was geladen

0,2631 des wart harte vile gerat  
0,2632 sie wichen wider in die stat  
0,2633 úz dem kreftigen here  
0,2634 París besach die gewer  
0,2635 unt als er daz weste  
0,2636 daz sie was sô veste  
0,2637 als in selben dûhte  
0,2638 daz er sie niht mohte  
0,2639 decheinen wîs gewinnen  
0,2640 er sprach "wir kêren hinnen  
0,2641 waz sol lenger leger hier  
0,2642 ich gesach sô veste burc nie"  
0,2643 daz volc en beitte niht mî  
0,2644 sie kârten von Eleê  
0,2645 sie begunden ïlen unt jagen  
0,2646 dô quâmen sie in siben tagen  
0,2647 zuo einer burc in ire lant  
0,2648 Tenedon was sie genant  
0,2649 von Trôje siben mîle  
0,2650 dâ ruoweten sie eine wîle  
0,2651 danne sante er boten Priamô  
0,2652 sîn vater wart harte vrô  
0,2653 als er rehte vernam  
0,2654 mit welicher vuore er wider quam  
0,2655 Helena in unkünden  
0,2656 weinte nâch iren vriunden  
0,2657 nâch den kinden nâch dem man  
0,2658 "daz ich den lîp ie gewan  
0,2659 got ez erbarme  
0,2660 waz sol ich vile arme  
0,2661 ouwê unsælic wîp  
0,2662 alhier hânt sie mînen lîp  
0,2663 mîn herze ist iemer mî dort  
0,2664 wê wie bin ich sus gevuoert  
0,2665 dâr mîn erbevîande sint  
0,2666 ouwê man ouwê kint  
0,2667 ouwê mîn künne  
0,2668 ouwê mîn liebe wünne  
0,2669 ouwê rîche ouwê lant  
0,2670 ir sît alle an mir geschant  
0,2671 iedoch âne mîne schult  
0,2672 ich en wirde in niemer mîr holt  
0,2673 die mir diz leit hânt getân  
0,2674 man mac an mir wole begân  
0,2675 beide gewalt unt unreht  
0,2676 ez ist mir leit nû sehet  
0,2677 ez belîbet ungerochen niht  
0,2678 swaz mir leides hier geschiet"

- 0,2679 süeze wort sprach Parîs  
 0,2680 "ir sît zuo hübisch unt zuo wîs  
 0,2681 daz ir des soltet jehen  
 0,2682 daz iu gewalt sî geschehen  
 0,2683 ez ist vrouwe sô niet  
 0,2684 iedoch iu niemer niht geschiet  
 0,2685 hier in disen landen  
 0,2686 laster noch schande  
 0,2687 herzevrouwe küningîn  
 0,2688 kundet ir gehaben sin  
 0,2689 iu geschæhe hier noch êre  
 0,2690 tûsent stunt mère  
 0,2691 denne mit Menelaô  
 0,2692 gehabet iuch wole unt weset vrô  
 0,2693 ir unt iuwer liute  
 0,2694 ich gebe iu noch hiute  
 0,2695 allez daz ich ie gewan  
 0,2696 lant bürge dienestman  
 0,2697 ez kumet allez wole zuo baten  
 0,2698 iuwer juncvrouwen wil ich bestaten  
 0,2699 baz danne nâch ireme rehte  
 0,2700 ouch wirdet iuwer geslehte  
 0,2701 an mir niemer geschant  
 0,2702 ich hân bürge unt lant  
 0,2703 ich wil iuch zuo kebese niht hân  
 0,2704 ich en sol ouch iu niht versmâhen  
 0,2705 wollet ir iuch versinnen  
 0,2706 ich bin iuwer minne  
 0,2707 alle tage wole wert  
 0,2708 mîn hât manic vrouwe gegert  
 0,2709 edeler denne ich sî  
 0,2710 ich hân noch schoener swester drî  
 0,2711 der en ist decheine  
 0,2712 sô snoede noch sô kleine  
 0,2713 sie sî ein küniginne  
 0,2714 ich bite es iuch ûf minne  
 0,2715 unt ûf rehte hövischheit  
 0,2716 daz ir verlâzet iuwer leit"  
 0,2717 die vrouwe ires leides vergaz  
 0,2718 von zîte ie baz unt baz  
 0,2719 an dem andern tage  
 0,2720 was geminneret ire klage  
 0,2721 rehte dâr nâch in siben tagen  
 0,2722 hörte sie nieman niht klagen  
 0,2723 bî eineme halben jâre  
 0,2724 minnete sie in offenbâre  
 0,2725 dô daz jâr umbe quam  
 0,2726 dô was sie Menelaô gram

- 0,2727 Priamus der küninc gemeit  
 0,2728 saz ûf unt reit  
 0,2729 gegen der bürge zuo Thenedon  
 0,2730 dô begeinete im sîn sun  
 0,2731 París unt Elena  
 0,2732 sie undergruozen sich dâ  
 0,2733 mit sôgetânen worten  
 0,2734 die dâr zuo gehörten  
 0,2735 iegelich sîne wîse  
 0,2736 sie danketen Parîse  
 0,2737 als man danne pflichtet  
 0,2738 swenne ein man sîne zît  
 0,2739 in vremedeme lande wole bestatet  
 0,2740 sie vuorten die vrouwen in die stat  
 0,2741 mit micheler wünne  
 0,2742 der Trôiere künne  
 0,2743 liefen ir engeine  
 0,2744 unt entviengen sie alle gemeine  
 0,2745 "willekome nû lône iu got"  
 0,2746 der in erneste der in spotte  
 0,2747 als ez danne ganc hât  
 0,2748 swenne ein solich dinc ergât  
 0,2749 unt dô daz was ergangen  
 0,2750 daz sie was entvangen  
 0,2751 unt nider gesâzen  
 0,2752 getrunken unt gâzen  
 0,2753 beide vrouwen unt ritterschaft  
 0,2754 der küninc gebôt ein ritterschaft  
 0,2755 die wirtschaft werte siben tage  
 0,2756 Cassandra huop ire alten klage  
 0,2757 "ouwê nû waz sulen wir  
 0,2758 mîn altez leit daz wirret mir"  
 0,2759 ire geschreie was alsô grôz  
 0,2760 daz ez allez daz volc verdrôz  
 0,2761 beide verre unt bî  
 0,2762 "ouwê unt ouwî  
 0,2763 ouwî unt ouwê  
 0,2764 waz kumet noch von Parîdê  
 0,2765 unt von dirre vrouwen  
 0,2766 wir sulen beschouwen  
 0,2767 in vile kurzen jâren  
 0,2768 daz iz geriuwet unsen hâren"  
 0,2769 sie schrei über al die stat  
 0,2770 ire muoter sie swîgen bat  
 0,2771 swie vile sie es bâte  
 0,2772 Cassandra iren willen hæte  
 0,2773 sie schrei als si hette geschrît  
 0,2774 dô zuogienc die hôchzît

0,2775 alsô tet daz geschreie  
0,2776 unt klage maniger leie  
0,2777 biz an den selben tac  
0,2778 daz der val unt der slac  
0,2779 unt daz leit alsô geschach  
0,2780 als die vrouwe vore sprach  
0,2781 under des dô diz was  
0,2782 als ich ez an dem buoche las  
0,2783 quâmen Menelaô mære  
0,2784 wie ez kumen wäre  
0,2785 daz im daz wîp was entvuort  
0,2786 als ir ez dâ vore hât gehôrt  
0,2787 unt unz her ist kumen  
0,2788 alsô hette er ez vernomen  
0,2789 er sprach "ez ist zuo spâte  
0,2790 swie gerne ich tæte  
0,2791 daz ich geræche den übermuot  
0,2792 waz hilfet daz man rede tuot  
0,2793 unt wort âne tât  
0,2794 her zuo hoeret vriunde rât"  
0,2795 von Pirô er dô kârte  
0,2796 zuo sîner stat zuo Parte  
0,2797 Nestor mit im dô reit  
0,2798 dem was sîn ungemach leit  
0,2799 sîneme bruoder sante er einen kneht  
0,2800 unt hiez im klagen diz unreht  
0,2801 Agomennon sîn bruoder hiez  
0,2802 dem er ez klagen liez  
0,2803 er bat in daz er quæme  
0,2804 unt sîn leit vernæme  
0,2805 daz geschach sîn bruoder quam  
0,2806 unt als er rehte vernam  
0,2807 sîn leit unt sîn ungemach  
0,2808 er erschrac unt sprach  
0,2809 "edel küninc gehabet iuch wole  
0,2810 dechein biderbe man sol  
0,2811 sîn leit im zuo leit lâzen  
0,2812 swer sich kan gemâzen  
0,2813 an liebe unt an leide  
0,2814 unt die wege beide  
0,2815 nâch ireme rehte gegân kan  
0,2816 der ist ein vollenkumen man  
0,2817 hier sulet ir nemen biledē bî  
0,2818 gehabet iuch wole swie iuch ouch sî  
0,2819 ez belîbet ungerochen niet  
0,2820 der diz laster geriet  
0,2821 unt jener der ez hât getân  
0,2822 sie müezen es zuo buoze stân

- 0,2823 mîn herze wirdet niemer vrô  
0,2824 ez en kume noch alsô  
0,2825 daz der selbe Parîs  
0,2826 erhangen werde ûf ein rîs  
0,2827 sô daz er gerichte  
0,2828 zuo unser angesihte  
0,2829 an einer wit erworge  
0,2830 mîn leit unt mîn sorge  
0,2831 die zuogênt niemer mî  
0,2832 ez en sî daz ez alsô ergê"  
0,2833 sie hiezen diz leit künden  
0,2834 mannen unt vriunden  
0,2835 in diz lant unt in jenez lant  
0,2836 dâ man den unt disen vant  
0,2837 zuo den küninge sie quâmen  
0,2838 die ouch ire leit vernâmen  
0,2839 Patroclus unt Achilles  
0,2840 unt der starke Diomedes  
0,2841 unt der küninc Euriolus  
0,2842 unt der küninc Neptolomus  
0,2843 zuo râte sie giengen  
0,2844 wie sie ez ane geviengen  
0,2845 als sie es zuo ende mohten komen  
0,2846 beide zuo êren unt zuo vrumen  
0,2847 die hêrren dô gerieten  
0,2848 sie wolten gebieten  
0,2849 überal in ireme rîche  
0,2850 dem volke allme gelîche  
0,2851 daz sie swuoren hervart  
0,2852 als dâ gerâten wart  
0,2853 sie santen nâch den bezzisten  
0,2854 die sie in den landen westen  
0,2855 der quam dâ vile zuo geriten  
0,2856 die sie niht mohten vollenbiten  
0,2857 den hiezen sie dröuwen  
0,2858 in muoste wole gezouwen  
0,2859 wende man vile durch si tete  
0,2860 durch dröuve unt durch bete  
0,2861 unt dô sie diz getâten  
0,2862 Agomennon sie bâten  
0,2863 daz er des hers gewielte  
0,2864 unt diz volc an in gehielte  
0,2865 daz er ire houbetman wäre  
0,2866 unt dâr zuo ire rihtære  
0,2867 wente daz ir iegelîcher riet  
0,2868 dô en mohte ez widerreden niet  
0,2869 er hiez daz sie sich reitten  
0,2870 kûme sie erbeitten

0,2871 biz sie wâren gereit  
0,2872 dâ geschach in daz êrste leit  
0,2873 an Pollux unt an Castorê  
0,2874 wende sie die êrsten wârn ûf den sê  
0,2875 Pollux unt Castor  
0,2876 die zwêne wolten varen vore  
0,2877 ire swester was Elenâ  
0,2878 dô quam in ein weter nâch  
0,2879 als vinster als ein naht  
0,2880 ez bestuont sie mit grôzer maht  
0,2881 ez was starc unt grôz  
0,2882 sô sêre ez in daz mer schôz  
0,2883 daz im niht vore bestuont  
0,2884 ez warf daz schif an den grunt  
0,2885 daz ir nie decheiner genas  
0,2886 aller der dâr inne was  
0,2887 sie gesach niemer man mî  
0,2888 ûf der erden noch ûf dem sê  
0,2889 nû sollte ich sprechen vürebaz  
0,2890 wen daz ir merken sulet daz  
0,2891 êr sie quæmen in den strît  
0,2892 wer sie wâren beidersît  
0,2893 die Kriechen unt die Trôiere  
0,2894 mit wie getâner gezierde  
0,2895 unt mit wie getâner gebære  
0,2896 ir iegelich zuo strîte wäre  
0,2897 ouch sulen wir sie nennen  
0,2898 daz ir sie kunnet erkennen  
0,2899 an sterke unt an manheit  
0,2900 wie der unt dirre streit  
0,2901 sol ich iuch nû berichten des  
0,2902 sô hoeret wie mich Dares  
0,2903 an sînen buoche hât gelârt  
0,2904 zuo Trôje ein vride gegeben wart  
0,2905 zuo eineme halben jâre  
0,2906 bî hiute unt bî hâre  
0,2907 unt dâr zuo bî der wide  
0,2908 Dares under dem vride  
0,2909 umbereit aller der ritter schar  
0,2910 dâr umbe daz er næme war  
0,2911 wie ir iegelîcher wäre getân  
0,2912 als ich von im gelernt hân  
0,2913 alsô vlîze ich mich dâr zuo  
0,2914 daz ich ez iuch verstân tuo  
0,2915 die dâ verdurben in dem mer  
0,2916 die beliben niewen überscher  
0,2917 ich en sage niet von irere zierheit  
0,2918 sie hetten dehein underscheit

- 0,2919 weder an der māze  
 0,2920 noch an dem gelāze  
 0,2921 weder an dicke noch an lenge  
 0,2922 sie wāren starc unt strenge  
 0,2923 ire antlitze offenbār  
 0,2924 lanc sīdenvar hār  
 0,2925 harte gelīche in stuont  
 0,2926 ougen nase unt munt  
 0,2927 unt dār zuo wange unt kinne  
 0,2928 sie en schieden danne die sinne  
 0,2929 unt der muot ir iegelich  
 0,2930 was dem andern gar gelīch  
 0,2931 hier solte ich ire swester Elenam  
 0,2932 loben eine vrouwen lobesam  
 0,2933 iren līp ich vore gelobet hān  
 0,2934 nū wil ich an die tugent gān  
 0,2935 die dā hoeret zuo dem lībe  
 0,2936 ez gezimet wole wībe  
 0,2937 wīplīche zuht unt êre  
 0,2938 Elena was gewāre  
 0,2939 süeze senfte reine vruot  
 0,2940 kiusche schoene milte guot  
 0,2941 edel einvalt êrsam  
 0,2942 hövisch wīse lustsam  
 0,2943 âne nīt unt ân haz  
 0,2944 waz sol ich sprechen vürebaz  
 0,2945 ander tugent sie hāte  
 0,2946 sie was getriuwe unt stāte  
 0,2947 Agomennon was ein helet  
 0,2948 den daz her hette erwelt  
 0,2949 zuo eineme rihtāre  
 0,2950 man saget daz er wāre  
 0,2951 stille unt ernesthaft  
 0,2952 er hāte es mēr ander kraft  
 0,2953 denne er gespræche  
 0,2954 er was lancræche  
 0,2955 als daz wole schīn wart  
 0,2956 an der langen hervart  
 0,2957 wīzhiutic unt lidegrōz  
 0,2958 er hette decheinen genōz  
 0,2959 an kost unt an spīse  
 0,2960 wole gewahsen unt wīse  
 0,2961 an sinne unt an witze  
 0,2962 ein guotlich antlitze  
 0,2963 minniclīche grüeze  
 0,2964 kurze rede süeze  
 0,2965 hetten den hērren geleitt  
 0,2966 an ein reine hövischheit

- 0,2967 Menelaus sîn bruoder hâte  
0,2968 sterke unt stâte  
0,2969 dem daz wîp was entvuort  
0,2970 der hette harte guot wort  
0,2971 er liez sich manige tugent an  
0,2972 unt was ein ebenwahsen man  
0,2973 zuo grôz noch zuo kleine  
0,2974 sîn spîse was gemeine  
0,2975 hövisch milte schoene guot  
0,2976 blîde vrô wole gemuot  
0,2977 Anchilles gelîchen nie gewan  
0,2978 er was ein alsô biderbe man  
0,2979 im gezæme wole die krône  
0,2980 starc küene schoene  
0,2981 gar ein zerære  
0,2982 im was daz guot unmære  
0,2983 harte liep die geste  
0,2984 grôze lide veste  
0,2985 ûzer mâze wole gelidet  
0,2986 im hette sîn wâfen gesmidet  
0,2987 Volka der getriuwe smit  
0,2988 dâ begienc er wunders genuoc mit  
0,2989 swenne in sîn zorn ane quam  
0,2990 als ein grimmer ber er bram  
0,2991 sô en konde sînen willen  
0,2992 nieman gestillen  
0,2993 Patroclus hette quote site  
0,2994 küene unt vrô dâ mite  
0,2995 wole bekant unt ernesthaft  
0,2996 er hette zuht unt kraft  
0,2997 volwahsen unt reine  
0,2998 ân daz aleine  
0,2999 daz er was hônsam  
0,3000 anders was er lobesam  
0,3001 Ajax als ich hân gehôrt  
0,3002 hette süeze rede schoene wort  
0,3003 âne haz unt âne nît  
0,3004 wole gekleidet alle zît  
0,3005 an manigen enden swinde  
0,3006 gemelich mit dem gesinde  
0,3007 harte michel im schein  
0,3008 arm rippe unt bein  
0,3009 ein ander Ajax was  
0,3010 der hette vile swarze vahs  
0,3011 wîze hût schoene  
0,3012 er was von Thelamône  
0,3013 dem küenen degene geboren  
0,3014 er was auch selbe wole erkoren

- 0,3015 ûze guoter ritterschaft  
0,3016 der hette guote geselleschaft  
0,3017 er was grôz unt lanc  
0,3018 als er durch kurzewile sanc  
0,3019 sîn stimme alsô gelster erschal  
0,3020 daz sie in gerne hörten al  
0,3021 Ulixes was kleine  
0,3022 doch was ir decheine  
0,3023 alsô gevüege in allen wîs  
0,3024 er was ûzer mâzen wîs  
0,3025 wole gehovet wole erkant  
0,3026 manige nôt er überwant  
0,3027 unt grôze arbeit  
0,3028 mit sîner wîsheit  
0,3029 er hette sinnes harte vile  
0,3030 beide zuo erneste unt zuo spile  
0,3031 kunde er wole gebâren  
0,3032 dâ tûsent ritter wâren  
0,3033 dâ hette er aleine den hof  
0,3034 ouch gap man im guot lop  
0,3035 an der zerunge  
0,3036 ouch was sîn zunge  
0,3037 wole gespræche unt gerade  
0,3038 daz en was niemannes schade  
0,3039 er sprach gerne an daz reht  
0,3040 des libes was er ein guot knecht  
0,3041 Diomedes was wole gestalt  
0,3042 an den worten was er balt  
0,3043 an dem willen gæhe  
0,3044 hövisch unt smæhe  
0,3045 harte gerne lügenlich  
0,3046 an den gelübeden mislich  
0,3047 irre unt wilde  
0,3048 küene unt milte  
0,3049 guot unt süeze minnære  
0,3050 in en kunde dechein swære  
0,3051 übergên noch leit  
0,3052 er en wäre alle zît gemeit  
0,3053 ouch was er starc unt grôz  
0,3054 sîner sterke er genôz  
0,3055 daz man der erge vergaz  
0,3056 ez gezimet vile baz  
0,3057 erge unt manheit  
0,3058 denne güete unt zageheit  
0,3059 Nestor was dicke unt breit  
0,3060 unt hette grôze wîsheit  
0,3061 guote hülfe guoten rât  
0,3062 an den worten unt an der tât

- 0,3063 schoene gesichte hâr wîz  
 0,3064 unt kârte allen sînen vlîz  
 0,3065 wie er getæte daz bezziste  
 0,3066 unt en was des doch niht veste  
 0,3067 sînen vriunden er leide sprach  
 0,3068 swenne im dechein zorn geschach  
 0,3069 man saget von Prothesilaô  
 0,3070 daz er gerne wäre vrô  
 0,3071 wole gewahsen vollenkommen  
 0,3072 beide zuo hülfe unt zuo vrumen  
 0,3073 getriuwe unt gewære  
 0,3074 unt guot süeze minnære  
 0,3075 Neptolomus was sô wole gelârt  
 0,3076 daz nie dechein pfaffe wart  
 0,3077 von bezzerre lêre  
 0,3078 man saget daz er wäre  
 0,3079 von edelme geslehte  
 0,3080 unt küene an der vehte  
 0,3081 in vertiurete nie dechein kleit  
 0,3082 im wâren die buoch vile bereit  
 0,3083 ûzer mâze swarz sîn hâr  
 0,3084 anders was sîn hût klâr  
 0,3085 Polimedes was smal  
 0,3086 wole gelidet überal  
 0,3087 dem volke gemeine  
 0,3088 küene hövisch reine  
 0,3089 die hende wîz unt blanc  
 0,3090 vinger nâch ireme rehte lanc  
 0,3091 Polidarius sô veizet was  
 0,3092 daz er kûme genas  
 0,3093 vore veizetheite  
 0,3094 doch was er zuo arbeite  
 0,3095 unt zuo ritterschaft guot  
 0,3096 unt hette grôzen übermuot  
 0,3097 ouch stuont im sîn muot alsô  
 0,3098 daz er selten was vrô  
 0,3099 Machaon was rîche  
 0,3100 unt lebete wunderliche  
 0,3101 er en pflac decheiner hövischheit  
 0,3102 im was grôz gesinde leit  
 0,3103 gewahsen an der mâze  
 0,3104 er was gerne in vrâze  
 0,3105 unt hette zuo den sînen alle zît  
 0,3106 beide haz unt nît  
 0,3107 dô was vrouwe Brisîs  
 0,3108 beide gespräcke unt wîs  
 0,3109 kiusch reine einvalt  
 0,3110 milte unt wole gestalt

- 0,3111 zuo êren unt zuo ruome  
 0,3112 als ein niuwe bluome  
 0,3113 die den alten vüre schein  
 0,3114 sie vant iren gelîchen dechein  
 0,3115 wîten in dem lande  
 0,3116 swâ man sie erkante  
 0,3117 unz her hân ich genant  
 0,3118 als ich geschriven vant  
 0,3119 die Kriechen unt ire zierde  
 0,3120 wer die Trôiere  
 0,3121 wären unt wie getân  
 0,3122 daz lêre ich als ich gelernet hân  
 0,3123 von dem ir dicke hât gehôrt  
 0,3124 von Priamô spriche ich vort  
 0,3125 wen daz iuch des dûhte  
 0,3126 daz ich dem tage lûhte  
 0,3127 op ich den loben wolte  
 0,3128 der dem geluterteme golde  
 0,3129 sô gelîche begât  
 0,3130 daz er valsches niht en hât  
 0,3131 sîn tugend was undersniten  
 0,3132 mit guoten tugenden mit guoten siten  
 0,3133 unt dâ mitten inne  
 0,3134 list unt sinne  
 0,3135 unt dâr über gebreit  
 0,3136 milte unt wîsheit  
 0,3137 andersît dâ engein  
 0,3138 guot rât dâr inne schein  
 0,3139 des was er lûter golt  
 0,3140 daz er den vrouwen was holt  
 0,3141 sîn genâde unt sîn hulde  
 0,3142 der andern übergülte  
 0,3143 an disen dingan was schîn  
 0,3144 er mochte wole ein küninc sîn  
 0,3145 guot an dem gerihte  
 0,3146 schoene gesichte  
 0,3147 grôze gelide wîze hût  
 0,3148 süeze stimme niet lût  
 0,3149 vile gerade unt snel  
 0,3150 fabeln zale unt spel  
 0,3151 hövische buoch minnebriev  
 0,3152 was im ûzer mâze liep  
 0,3153 den rittern gehülfic zuo aller zît  
 0,3154 ouch was er zuo êrst an den strîte  
 0,3155 Ector hette sich gekârt  
 0,3156 vaste an sînes vateres art  
 0,3157 die tugent die ich hân dâ vore  
 0,3158 gesaget die hette Ector

0,3159 ân daz eine  
0,3160 er schilwete ein kleine  
0,3161 daz missestuont im niet  
0,3162 alsô saget von im daz liet  
0,3163 ouch saget uns die schrift  
0,3164 er gap gift über gift  
0,3165 ros gewant silber golt  
0,3166 er hette zuo Trôje daz verschuldet  
0,3167 swaz der hêrre vore sprach  
0,3168 nâch sîneme willen ez geschach  
0,3169 er hette der liute decheinen vâr  
0,3170 brûn krûs lanc was im daz hâr  
0,3171 ûf sînen schuldern ez im lac  
0,3172 als man es zuo den gezîten pflac  
0,3173 under sînen ougen gar  
0,3174 ein schoene ritter brûnvar  
0,3175 alsus was hêrre Elenus  
0,3176 unt sîn bruoder Deiphebus  
0,3177 dirre was ir iegelich  
0,3178 dem andern alsô gelîch  
0,3179 an lîbe unt an antlitze  
0,3180 doch schiet sie daz gewitze  
0,3181 ambaht alter unt sin  
0,3182 von disen dingen drîn  
0,3183 hetten sie underscheide  
0,3184 der êrste unt dise beide  
0,3185 Troilus sich ane liez  
0,3186 daz er ein guot ritter hiez  
0,3187 als ich dâ vore gesaget hân  
0,3188 doch sulet ir daz wole verstân  
0,3189 er konde manigen guoten slac  
0,3190 der man zuo turneie pflac  
0,3191 dâr zuo stich unt stôz  
0,3192 beide gewâpenet unt blôz  
0,3193 minnelîche grüeze  
0,3194 guote rede süeze  
0,3195 gesiht harte vroelich  
0,3196 sînen vianden angstlich  
0,3197 kinne munt nase wange  
0,3198 ougen hâr zöpfen lange  
0,3199 lide bein âdern bluot  
0,3200 daz was allez sament guot  
0,3201 man saget daz hêrre Parîs  
0,3202 vore den andern hette prîs  
0,3203 an minne unt an schoenheit  
0,3204 als ir dâ vore sît bereitet  
0,3205 waz sol nû des mère  
0,3206 wen daz er schoene wäre

- 0,3207 alsô rehte wole getân  
0,3208 als ich dâ vore gesaget hân  
0,3209 man saget daz Eneas  
0,3210 ein kurzer dicke man was  
0,3211 milte unt lustsam  
0,3212 küene unt gruozsam  
0,3213 wole gespräche unt wole gelârt  
0,3214 einen valvehsen bart  
0,3215 rôten munt dicke granen  
0,3216 wole gesunt an den zanen  
0,3217 waz mac ich von im sprechen mî  
0,3218 er kunde sîn reht unt sîne ê  
0,3219 vile wole unt nieman baz  
0,3220 der zuo Trôje inne saz  
0,3221 Andenor der was harte lanc  
0,3222 smal unt doch niht kranc  
0,3223 wole gelidet wole gestalt  
0,3224 er konde sprâche manicvalt  
0,3225 er was ouch an sîn alter komen  
0,3226 ir hât ouch daz wole vernomen  
0,3227 zuo boteshaft er guot was  
0,3228 sîn sun Polidamas  
0,3229 was wole gelêret  
0,3230 unt dâr zuo wole geêret  
0,3231 ouch sô trat er an daz spor  
0,3232 die der hêrre Andenor  
0,3233 der vater begienc in der jugent  
0,3234 des wuohs sîn kunst unt sîn tugent  
0,3235 der küninc Mennon der lezziste  
0,3236 der was wole der bezziste  
0,3237 er hette ir iegelîches ein teil  
0,3238 jenes gelücke disses heil  
0,3239 disses zuht jenes stæte  
0,3240 waz der unt dirre hæte  
0,3241 ich mac alsô vile zuosamene lesen  
0,3242 daz er der bezziste mochte wesen  
0,3243 Dares sagete her nâch  
0,3244 daz die vrouwe Ecubâ  
0,3245 des küninges Priames wîp  
0,3246 hette einen grôzen lîp  
0,3247 manlîche gebære  
0,3248 man saget daz sie wäre  
0,3249 von vile grôzer wîsheit  
0,3250 ir was unreht vile leit  
0,3251 Creusa ire tohter eine  
0,3252 was lanc smal unt kleine  
0,3253 wîz unt klâre hût  
0,3254 die stimme gelster unt lût

- 0,3255 lanc strûp gel hâr  
 0,3256 ire gesihte lieht unt klâr  
 0,3257 rôter munt wîze zane  
 0,3258 ouch truoc sie guote kleider ane  
 0,3259 beide die vrouwe unt ire kleit  
 0,3260 wâren von guoter zierheit  
 0,3261 Cassandra die dritte was  
 0,3262 die an den buochen daz las  
 0,3263 unt vore kunde gesehen  
 0,3264 waz den von Trôje solte geschehen  
 0,3265 von der en spreche ich niht vort  
 0,3266 ir hât von ir vile gehôrt  
 0,3267 beide ire weinen unt ire klagen  
 0,3268 iedoch hoere ich daz sagen  
 0,3269 daz sie manige tugent hæte  
 0,3270 milte kiusche unt stæte  
 0,3271 Sybilla was dise selbe maget  
 0,3272 von der ich nû habe gesaget  
 0,3273 von Christô sie harte vile sprach  
 0,3274 biz an den jungesten tac  
 0,3275 daz hette sie vore gesehen  
 0,3276 swaz dâ solte geschehen  
 0,3277 Polixena was einvalt  
 0,3278 zuo der schoenesten gezalt  
 0,3279 under den andern zwein  
 0,3280 ire wange alsô schône schein  
 0,3281 als die rôse bî daz blat  
 0,3282 swenne sie sich obene entlât  
 0,3283 gezieret mit vlîze  
 0,3284 der liljen an der wîze  
 0,3285 schein ire hût gelîche  
 0,3286 ire gescheffede was rîche  
 0,3287 beide hier unt dâ  
 0,3288 unt dâr zuo ouch anderswâ  
 0,3289 über allen iren lîp  
 0,3290 was sie ein wole gemachet wîp  
 0,3291 zuo Trôje quam vile manic man  
 0,3292 des ich genennen niht en kan  
 0,3293 waz sol der rede mère  
 0,3294 wen daz ir vile wäre  
 0,3295 beide genant unt ungenant  
 0,3296 daz ich ir geschriben vant  
 0,3297 daz wâren vürsten wole gezogen  
 0,3298 küninge grâven unt herzogen  
 0,3299 als der winter abe nam  
 0,3300 unt ez gein sumerzît quam  
 0,3301 dô erhuop sich ein kreftigez her  
 0,3302 zuo einer stat bî dem mer

- 0,3303 die stat hiez Athêne  
 0,3304 dar brâhte von Mizêne  
 0,3305 Agomennon der küninc gemeit  
 0,3306 hundert schif wole bereitet  
 0,3307 vile wole er sie bewarte  
 0,3308 dar brâhte von Parthe  
 0,3309 Menelaus sîn bruoder  
 0,3310 alsô manic ruoder  
 0,3311 sô sechzic solten hân  
 0,3312 dô volgete im sân  
 0,3313 von Boeze unt von Lenor  
 0,3314 Archelaus unt Prothenor  
 0,3315 die brâhten vünvzic schif geladen  
 0,3316 ûf der Trôjære schaden  
 0,3317 dâr nâch quam Alimus  
 0,3318 unt der grâve Ascalafus  
 0,3319 sie vuorten von Kumenîe  
 0,3320 schoener kumpânîe  
 0,3321 drîzic schif al vol  
 0,3322 dâr nâch zuo gereche wole  
 0,3323 zwêne gesellen harte wîs  
 0,3324 brâhten die von Focidis  
 0,3325 vünvzic schif Herzeclius  
 0,3326 unt sîn geselle Epistropus  
 0,3327 dar quam von Salemîne  
 0,3328 Ajax unt die sîne  
 0,3329 von Thelamone geboren  
 0,3330 vünvzic schif úzerkoren  
 0,3331 die brâhte er ûf daz mer  
 0,3332 dâr inne hette er schoene her  
 0,3333 vüre andere ritterschaft  
 0,3334 hette er erwelte geselleschaft  
 0,3335 die quâmen mit im dar  
 0,3336 Darion unt Polisenar  
 0,3337 Theucer unt Theseus  
 0,3338 unt hîrre Eufimacus  
 0,3339 Nestor brâhte dar dô  
 0,3340 ahtzic schif von Pirô  
 0,3341 vierzic brâhte Theas  
 0,3342 von sîner stat Tholias  
 0,3343 drî unt drîzic Nerius  
 0,3344 sehs unt vierzic Caspus  
 0,3345 mit dem andern Ajacê  
 0,3346 sô brâhte er dise über sê  
 0,3347 Cantipus unt Filitoas  
 0,3348 ir ietweder ein grâve was  
 0,3349 von Calzedonie  
 0,3350 ire kumpânîe

- 0,3351 brâhten vierzic schif dar  
0,3352 wole bereit unt gar  
0,3353 Domerius von Krête  
0,3354 unt Merion hæte  
0,3355 mit guoter gewarheit  
0,3356 sehzic schiffe wole bereit  
0,3357 Ulixes vuorte vierzic dar  
0,3358 Merius zehene an sîner schar  
0,3359 der êrste was von Achais  
0,3360 der ander von Tigris  
0,3361 ouch brâhte vünvzic Prothacus  
0,3362 als manigez brâhte Prothesilaus  
0,3363 Machaon unt Polidarius  
0,3364 ire vater hiez Aschalosius  
0,3365 dise küninge zwêne  
0,3366 vuoren ouch zuo Athêne  
0,3367 in quâmen von Traciâ  
0,3368 zwei unt drîzic schif nâch  
0,3369 Anchilles brâhte ûf daz mer  
0,3370 vünvzic schif mit sîneme her  
0,3371 Theophilus ein küninc gemeit  
0,3372 hette zehene dar geleit  
0,3373 schif mit spîsen wole gevult  
0,3374 im wâren die Kriechen vile holt  
0,3375 in dem mer lac sîn lant  
0,3376 ez was Tosdon genant  
0,3377 der dritte Ajax gebeten wart  
0,3378 daz er in die hervart  
0,3379 vuorte zweinzic schif vol  
0,3380 Euripilus zuo gereche wole  
0,3381 mit vünvzigen dâ vuor  
0,3382 als er zuo der hervart geswuor  
0,3383 von Lize brâhte Cantipus  
0,3384 drîzehene unt Anfimacus  
0,3385 Liochin mit Polipitê  
0,3386 brâhten vierzic ûf den sê  
0,3387 mit geselleschaft gewisse  
0,3388 der hîrre von Arysse  
0,3389 Diomedes unt Stelenus  
0,3390 unt der schoene Euriolus  
0,3391 vuorten vierzic schiffe starke  
0,3392 mit alsô maniger barke  
0,3393 Polidarius der hæte  
0,3394 mit guotem geræte  
0,3395 als iz was vore bedâht  
0,3396 vünf unt zweinzic dar brâht  
0,3397 ouch quâmen mit Politetê  
0,3398 sibene von Melibetê

- 0,3399 von Cypre quâmen och dô  
 0,3400 zehene mit Heleô  
 0,3401 Patroclus dar gâhete  
 0,3402 vünzic schif er brâhte  
 0,3403 Tenedon von Friscâ  
 0,3404 hette zwei unt drîzic dâ  
 0,3405 Fenesteus im bereiten bat  
 0,3406 vierzic schif des was die stat  
 0,3407 dâ sie in wâren zuosamene komen  
 0,3408 die hêrren als ir hât vernomen  
 0,3409 vünf unt zweinzic wolegetân  
 0,3410 vürsten ich genant hân  
 0,3411 die dâ quâmen in die hervart  
 0,3412 alse sie gesworen wart  
 0,3413 tûsent hundert schif vol  
 0,3414 op ich sie vollen zelen sol  
 0,3415 drîzic wâren ir nochdan  
 0,3416 unt âne vürsten sô manic manne  
 0,3417 die mit in kumen wâren  
 0,3418 dannoch in disen jâren  
 0,3419 deweder nâch noch êr  
 0,3420 quam ir zuosamene nie mî  
 0,3421 dâ was ruof über ruof  
 0,3422 iegelîcher sîn dinc schuof  
 0,3423 hier dôz dort schal  
 0,3424 daz lant erbibete überal  
 0,3425 hier drouwe dâ bete  
 0,3426 ir iegelîcher nâch der zît tete  
 0,3427 hier reht dâ gewalt  
 0,3428 dirre vlêhete der schalt  
 0,3429 dirre gebôt der bat  
 0,3430 unz sie die schif hetten bestatet  
 0,3431 sint ire arbeit gelac  
 0,3432 ûf den andern tac  
 0,3433 daz sie hetten ire gemach  
 0,3434 Agomennon der küninc sprach  
 0,3435 "ich bite iuch hêrren alle  
 0,3436 op ich iuch gevalle  
 0,3437 zuo eineme rihtære  
 0,3438 gestatet mîner lêre  
 0,3439 unt och mînen worten"  
 0,3440 sie quâmen unt hôrten  
 0,3441 sîne rede unt sîne wort  
 0,3442 alsus sprach der küninc vort  
 0,3443 "wir sulen sech unt schar  
 0,3444 unt pfluocîsen gar  
 0,3445 zuo pfîlen unt zuo swerten smiden  
 0,3446 unt sulen des niht vermîden

- 0,3447 ez en geschach unsen vorevarn niet  
 0,3448 daz ein vremede diet  
 0,3449 in disen landen  
 0,3450 leit oder schande  
 0,3451 ie ieman getæte  
 0,3452 vruo oder späte  
 0,3453 ich en geruowe niemer mère  
 0,3454 ez en kume an unser êre  
 0,3455 ouch genâde ich iuch allen gelîchen  
 0,3456 armen unt rîchen  
 0,3457 alten unt jungen  
 0,3458 dirre samenungen  
 0,3459 daz ir kumen sît gereit  
 0,3460 zuo rechen mînes bruoderes leit  
 0,3461 ouch geben ich disen rât  
 0,3462 Apollo unser got hât  
 0,3463 ein betehûs reine  
 0,3464 nû râtet alle gemeine  
 0,3465 wie wir uns verenden  
 0,3466 unt wen wir dare senden  
 0,3467 der unser opfer dar bringe  
 0,3468 ûf sôgetân gedinge  
 0,3469 daz unser got vore sê  
 0,3470 waz uns zuo Trôje sole geschên”  
 0,3471 Achilles sprach “ich sî der bote  
 0,3472 wîset mich rehte nâch dem gote  
 0,3473 wie heizet sîn lant”  
 0,3474 “ez ist Delphos genant  
 0,3475 dâ der gotinne ist”  
 0,3476 ân raste unt âne vryst  
 0,3477 huop sich Achilles an die vart  
 0,3478 Patroclus sîn geselle wart  
 0,3479 unt dô er zuo Delphos quam  
 0,3480 sîn opfer er an sîne hant nam  
 0,3481 Apollen er ez brâhte  
 0,3482 unt als er im nâhete  
 0,3483 dô betete er unt las  
 0,3484 als dô site was  
 0,3485 in einer kurzen stunde  
 0,3486 der got sprechen begunde  
 0,3487 “ich sage dir kurzlîche  
 0,3488 den von Trôjenrîche  
 0,3489 geschiet als in vore geschach  
 0,3490 dô Ercules in zuobrach  
 0,3491 beide bürge unt lant”  
 0,3492 der got gesweic dô zehant  
 0,3493 unt alsô schiere er gesweic  
 0,3494 Achilles dar neic

0,3495 sîne wort er wole entvienc  
 0,3496 alzuohant er dannen gienc  
 0,3497 daz der got wäre  
 0,3498 daz ist anders niht mîre  
 0,3499 wen daz der tiuvel satanâs  
 0,3500 sîn gespenste unt sîn getwâs  
 0,3501 úz eineme biledē sprach  
 0,3502 unt sagete in swaz in geschach  
 0,3503 stille unt offenbâre  
 0,3504 zuo wâne unt zuo wâre  
 0,3505 beide in erneste unt in spotte  
 0,3506 des hetten sie in vüre einen got  
 0,3507 ez was ein heidenische diet  
 0,3508 sie ahtten anders gelouben niet  
 0,3509 diz was lange vore gotes geburt  
 0,3510 nû sprechen wir unse rede vort  
 0,3511 under des daz diz was  
 0,3512 dô quam von Trôje Kalcas  
 0,3513 ein wîssage wîs  
 0,3514 in sante dare Parîs  
 0,3515 daz er dâ vernæme  
 0,3516 wie ez im dâr umbe bequæme  
 0,3517 daz er die schoenen Elenam  
 0,3518 zuo Kriechen mit gewalt nam  
 0,3519 Kalcas leiste sîn gebot  
 0,3520 dô sagete im der got  
 0,3521 der dâ hiez Apollô  
 0,3522 “beide sus unt sô  
 0,3523 die Kriechen gerechen ire leit  
 0,3524 aber gewinnen sus arbeit  
 0,3525 iedoch bî disen zehen jâren  
 0,3526 also iuwer vorevarn wâren  
 0,3527 beide erslagen unt ertrat  
 0,3528 unt zuovuort wart iuwer stat  
 0,3529 michels wirs iuch geschiet  
 0,3530 Kalcas nû en sûme dich niet  
 0,3531 tuo als ich dich lêren  
 0,3532 dû salt zuo den Kriechen kêren  
 0,3533 unt salt ire wîssage wesen  
 0,3534 dû salt in sagen unt lesen  
 0,3535 singen unt schrîben  
 0,3536 unt iemer mit in belîben  
 0,3537 tuost dû ez niet dû bist verloren  
 0,3538 unt unsælic geboren”  
 0,3539 dô die antwûte vernam  
 0,3540 der wîssage dô kârte er danne  
 0,3541 îlende in rihte  
 0,3542 dô geschach im von geschihte

- 0,3543 daz im begegenete under des  
0,3544 Patroclus unt Anchilles  
0,3545 dô undergruozen sie sich  
0,3546 "guoten tac got minne dich"  
0,3547 Anchilles vrâgete in mære  
0,3548 wen unt wer er wäre  
0,3549 dô sagete im Kalcas  
0,3550 als ez dar kumen was  
0,3551 beide rede unt räte  
0,3552 waz im geheizen hâte  
0,3553 sîn apgot Apollô  
0,3554 Anchilles wart der rede vrô  
0,3555 zuo herbergen er in leitte  
0,3556 sêre er sich erbeitte  
0,3557 wie er im liebe getäte  
0,3558 mit alleme daz er hâte  
0,3559 vile wole er sîn pflac  
0,3560 ûf den andern tac  
0,3561 riten die hêren zwêne  
0,3562 hin zuo Athêne  
0,3563 zuo der stat bî dem mer  
0,3564 dâ vunden sie daz her  
0,3565 unt wurden wole entvangen  
0,3566 als ez in was ergangen  
0,3567 daz ich die rede kürze  
0,3568 des apgotes antwürte  
0,3569 sîn gebot unt sînen rât  
0,3570 als ir hier gehôrt hât  
0,3571 alsô sagete ez Anchilles  
0,3572 die Kriechen vröuwten sich des  
0,3573 ouch sagete in Calcas  
0,3574 wie er dar kumen was  
0,3575 ungesaget er niht en liez  
0,3576 daz in Apollo dâr hiez  
0,3577 daz er dare kérte  
0,3578 unt sie ouch alle lérte  
0,3579 unt ire wîssage wäre  
0,3580 den Kriechen behagete daz mære  
0,3581 Calcas sprach dô vürebaz  
0,3582 "sie sulen zuo Trôje sprechen daz  
0,3583 ich habe untriuwelîche begân  
0,3584 des en habe ich niht getân  
0,3585 ir wizzet ez alle wole  
0,3586 daz ich billîcher leisten sol  
0,3587 daz mich geheizen hât der got  
0,3588 den ich leiste ire gebot"  
0,3589 an sus getânen worten  
0,3590 die Kriechen dô hörten

- 0,3591 daz sîn rede reht was  
 0,3592 dô begunde Calcas  
 0,3593 üeben sîne wîsheit  
 0,3594 er was gegerwet unt bereit  
 0,3595 als man ez dô bî zîten pflac  
 0,3596 daz er vore sagete den tac  
 0,3597 beide stunde unt zît  
 0,3598 wenne sie vuoren in den strît  
 0,3599 an dem gestirne er dô sach  
 0,3600 daz daz was vile ungemach  
 0,3601 Dianen der gotinnen  
 0,3602 daz mit decheinen minnen  
 0,3603 noch mit opfer noch mit bete  
 0,3604 daz her ir êren niht en tete  
 0,3605 dô sprach er "ich hân vore gesehen  
 0,3606 uns kan guotes niht geschehen  
 0,3607 swenne wir hinnen kêren  
 0,3608 ez en sî daz wir geêren  
 0,3609 Dianen di gotinne  
 0,3610 nû sehet wes ich iuch inne  
 0,3611 kêret in den walt ze Idâ  
 0,3612 unt klaget iuwer nôt dâ  
 0,3613 die hêrsten under der schare  
 0,3614 die bringen ire opfer dare  
 0,3615 unt swenne daz geschiet  
 0,3616 sô kan uns geschaden niet"  
 0,3617 diz gebot alsô geschach  
 0,3618 als ez Calcas vore sprach  
 0,3619 dô daz opfer wart gereit  
 0,3620 Agomennon selbe reit  
 0,3621 hin zuo Ida in den walt  
 0,3622 unt brâhte dar gift mancvalt  
 0,3623 dô er die hulde dâr gewan  
 0,3624 dô saz er ûf unt quam  
 0,3625 zehant ûz dem walde  
 0,3626 unt quam wider balde  
 0,3627 dô er daz her solte bewaren  
 0,3628 unt hiez daz volc dannen varen  
 0,3629 daz her sich bereitte  
 0,3630 Filitos ez leitte  
 0,3631 dem was wole kunt ûf dem mer  
 0,3632 dem volgete daz her  
 0,3633 von Athêne in ein ander lant  
 0,3634 biz er eine habe vant  
 0,3635 gegen Trôirer rîche  
 0,3636 dâ ankerten sie alle gelîche  
 0,3637 bî einer burc zuo dem stade  
 0,3638 des nam die burc grôz schade

- 0,3639 die naht sie dâ lâgen  
0,3640 ires gemaches sie pflâgen  
0,3641 an dem andern tage vruo  
0,3642 giengen sie der burc mit sturme zuo  
0,3643 die jene wolten dingen  
0,3644 unt dô sie zuo giengen  
0,3645 daz sie zuo hulden quæmen  
0,3646 êr die Kriechen vernæmen  
0,3647 ire gedinge unt ire wort  
0,3648 dô was die burc gar zuostôrt  
0,3649 waz dâ jâmers geschæhe  
0,3650 daz ist alsô wæhe  
0,3651 daz ich swîge als ich ez sage  
0,3652 ich weiz wole dâ was michel klage  
0,3653 ouch weiz ich daz dâr abe  
0,3654 sie verluren ire habe  
0,3655 ouch beleip ir harte vile tôt  
0,3656 als in der küninc dô gebôt  
0,3657 ire rihtær Agomennon  
0,3658 dô kârten sie zuo Thenedon  
0,3659 dô sie begunden nâhen  
0,3660 unt die in der stat gesâhen  
0,3661 sie besluzzen tor unt türe  
0,3662 unt hiengen ire schilder her vüre  
0,3663 oben an die zinnen  
0,3664 daz her wart des innen  
0,3665 daz sie zuo gewer giengen  
0,3666 die burc sie umbeviengen  
0,3667 mit grôzeme nîdene  
0,3668 gegen den bervrîden  
0,3669 schuzzzen sie ire pfle  
0,3670 in einer kurzen wîle  
0,3671 quam schar über schar  
0,3672 sie triben ire hantwerke dar  
0,3673 in der stat sie sich werten  
0,3674 mit den steinen rârten  
0,3675 wurfen sie über den graben  
0,3676 alsus wart der strît erhaben  
0,3677 einsît unt ouch andersît  
0,3678 was strît über strît  
0,3679 alumbe die gewere  
0,3680 doch gesigete daz here  
0,3681 maniger dâ die burc brach  
0,3682 wizzet ir wie daz geschach  
0,3683 gegen einen man hundert manne  
0,3684 daz gewan in die burc an  
0,3685 man nam in swaz man dâ vant  
0,3686 spîse silber unt gewant

- 0,3687 unt edel gesteine  
 0,3688 ir genas och decheine  
 0,3689 ez wären kint oder wîp  
 0,3690 der behielt keinez den lîp  
 0,3691 sie wurden erdrungen oder ertrat  
 0,3692 dô man rante in die stat  
 0,3693 dô dise nôt geschach  
 0,3694 die hêrren schuofen ire gemach  
 0,3695 in der stat zuo Tenedon  
 0,3696 der küninc Agomennon  
 0,3697 die vürsten er besante  
 0,3698 swaz er ir benante  
 0,3699 die quâmen mit einzeln scharen  
 0,3700 er sprach "ir sulet iuch bewaren  
 0,3701 unsern willen haben wir hier getân  
 0,3702 nû sehet waz wir ane gân  
 0,3703 mennenlich sînen rât tuo  
 0,3704 och râte ich dâr zuo  
 0,3705 daz wir ân übermuot  
 0,3706 varen daz ist harte guot  
 0,3707 als ich iuch bewîsen  
 0,3708 schuldigen wir Parîsen  
 0,3709 daz er gewalt habe getân  
 0,3710 sô sulen wir daz dâ bî verstân  
 0,3711 daz michel grôzer gewalt  
 0,3712 mit sîner wasen wart gestalt  
 0,3713 ich meine Esionam  
 0,3714 die Thelamon hier nam  
 0,3715 durch daz selbe ungemach  
 0,3716 uns diz leit och geschach  
 0,3717 wir wellen boten senden dar  
 0,3718 daz man an in ervar  
 0,3719 wellen sie Elenam wider geben  
 0,3720 sô sulen wir mit genâden leben  
 0,3721 wollent sie aber des niht  
 0,3722 waz op in lîhte wirs geschiet  
 0,3723 sô wirdet och unser rede reht  
 0,3724 ir hêrren nû sehet  
 0,3725 op ich rehte gesprochen hâ  
 0,3726 nû sprechet nein oder jâ"  
 0,3727 die vürsten dûhte der rât guot  
 0,3728 die andern gelîch sînen muote  
 0,3729 redeten sus unt sô  
 0,3730 dô santen sie zuo Priamô  
 0,3731 umbe daz geræte  
 0,3732 als der küninc geredet hæte  
 0,3733 ûf saz Ulixes  
 0,3734 unt och Diomedes

- 0,3735 unt ire ritter mit in  
0,3736 unt riten zuo Trôje in  
0,3737 sie riten ûf unt nider  
0,3738 die strâze vort unt wider  
0,3739 in der stat überal  
0,3740 dô quâmen sie vüre den sal  
0,3741 einen güldînen boum sie ersâhen  
0,3742 die hêrren dô jähen  
0,3743 sie sâhen dâ wunders genuoc  
0,3744 obene er vile zelgen truoc  
0,3745 undene was er kleine  
0,3746 des wunderte sie gemeine  
0,3747 wannen abe daz wäre  
0,3748 daz er von der swære  
0,3749 unt von der überlesten last  
0,3750 bî der erden niht en brast  
0,3751 er was obene vile breit  
0,3752 sîne zelgen wâren geleit  
0,3753 über al die strâzen  
0,3754 die hêrren nider sâzen  
0,3755 unt haften zuo dem boume  
0,3756 ire ros mit dem zoume  
0,3757 sie giengen vüre den küninc stân  
0,3758 unt wurben ire boteschaft sân  
0,3759 Ulixes zuo allerêrste sprach  
0,3760 daz dâ zuo sprechene geschach  
0,3761 "Agomennon dir sagen tuot  
0,3762 holde minne unt allez guot  
0,3763 unt heizet dich des biten  
0,3764 daz dû im heizes mit siten  
0,3765 wider geben Elenam  
0,3766 die Parîs sînem bruoder nam  
0,3767 daz tuo kurzlîche  
0,3768 ez vrumer dîneme rîche  
0,3769 unt ouch dîneme lande  
0,3770 dû en hâst es keine schande  
0,3771 op sîn bete hier geschiet  
0,3772 ist daz aber im niet  
0,3773 gevrumen mac sîn bete  
0,3774 er tuot als Ercules tete  
0,3775 der her reit mit gewalt  
0,3776 dû weist wole waz dû tuon salt  
0,3777 ich en weiz waz sprechen mî  
0,3778 tuo daz dir wole stê"  
0,3779 Priamus sîre des erschrac  
0,3780 dô dise rede gelac  
0,3781 unt entvienc grôze swære  
0,3782 niewen durch die mære

- 0,3783 die er hette gehôrt  
0,3784 doch entvienc er die wort  
0,3785 senfter unt vile baz  
0,3786 denne im wîsete der alte haz  
0,3787 er sprach "des wirdet guot rât  
0,3788 daz ir hier geworben hât  
0,3789 des en sol ich iuch niht wîzen  
0,3790 sulen mich die Kriechen bîzen  
0,3791 sô müezen sie mir näher kumen  
0,3792 ich en hân hier des niht vernomen  
0,3793 daz ich wolle krouwen  
0,3794 mîn houbet von disen drouwen  
0,3795 oder von leiden  
0,3796 ir müezet hinnen scheiden  
0,3797 von Trôje ân ende  
0,3798 ez en sî daz man mir sende  
0,3799 mîne swester Esionam  
0,3800 ir en gesehet niemer Elenam  
0,3801 daz mir die mâge sint erslagen  
0,3802 daz wil ich iuch hier niht klagen  
0,3803 wen daz ir hier boten sît  
0,3804 die alte vêhe unt nît  
0,3805 die solte iuch zuo unstaten kommen  
0,3806 ich wæne ir habet wole vernomen  
0,3807 unt wizzet wole daz ungemach  
0,3808 daz Andenori geschach  
0,3809 in iuwerme lande  
0,3810 ich geswîge joch der schande  
0,3811 mir wirret daz mære  
0,3812 daz ez unreht wäre  
0,3813 daz der bote entgülte  
0,3814 sînes hîrren schulde"  
0,3815 nâch dirre rede under des  
0,3816 sprach Diomedes  
0,3817 "ez en gezimet niht wole  
0,3818 daz man uns gelîchen sol  
0,3819 hunden wærn wir hunde  
0,3820 ez quæme in kurzer stunde  
0,3821 solten wir iuch bîzen  
0,3822 wir wolten iuch zuorîzen  
0,3823 daz iuwer dechein teil  
0,3824 belibe ganz noch noch geheil  
0,3825 wir sîn decheine hunde niet  
0,3826 waz op iuch líhte wirs geschiet  
0,3827 denne wir iuch bîzen  
0,3828 waz sollte got wîzen  
0,3829 den edeln kriechischen vürsten  
0,3830 daz sie vehten niht en törsten

- 0,3831 des wirdet diz lant noch verhert  
 0,3832 wir bringen hier schilde unt swert  
 0,3833 ez sol noch alsô geschênen  
 0,3834 ir sulet hier ritterschaft noch sehen  
 0,3835 hundert tûsent unt noch mîne  
 0,3836 in disen jâren unt auch êr”  
 0,3837 daz er hette gesprochen  
 0,3838 daz was nâch gerochen  
 0,3839 an ougen unt an zungen  
 0,3840 hundert zuo sprungen  
 0,3841 den Priamus werte  
 0,3842 unt in den lîp nerte  
 0,3843 “waz sol dise rede sîn  
 0,3844 ich wânte diz hûs wäre mîn  
 0,3845 unt daz ich wirt wäre  
 0,3846 nû tuot es niht mîre  
 0,3847 ez gezimet wole mîner krônen  
 0,3848 daz ich boten schône”  
 0,3849 hier zuo sprach Eneas  
 0,3850 der dâ nâhe bî was  
 0,3851 “sint sie wurden her gesant  
 0,3852 die uns zuovuorten unser lant  
 0,3853 unt wellen uns leide sprechen  
 0,3854 man sol ez an in rechen  
 0,3855 in ist andere rede nôt  
 0,3856 daz in ire küninc gebôt  
 0,3857 zuo werbene in diseme rîche  
 0,3858 daz werben gezogenlîche  
 0,3859 unt leisten ires hêrren gebot  
 0,3860 unt getæte ich ez sam mir got  
 0,3861 ez kostte mir vile tiure  
 0,3862 man brente mich in eineme viure  
 0,3863 ader slüege mich mit brenden  
 0,3864 oder man hieze mich blenden  
 0,3865 ez ist vile übel getân  
 0,3866 man sol ez uns mîr erlân”  
 0,3867 Ulixes die rede undernam  
 0,3868 mit worten als ez wole gezam  
 0,3869 unt huop sich von dannen  
 0,3870 mit den sînen mannen  
 0,3871 balde sie ûf sâzen  
 0,3872 unt riten ire strâzen  
 0,3873 dô sie quâmen hin wider  
 0,3874 sie sâzen von den rossen nider  
 0,3875 unt sageten zuo mære  
 0,3876 wie ez in kumen wäre  
 0,3877 beide sus unt sô  
 0,3878 von hêrren Priamô

- 0,3879 unt von Eneâ  
0,3880 beide verre unt nâch  
0,3881 die sint dort hier dâ  
0,3882 beide nein unt jâ  
0,3883 in dem her überal  
0,3884 biz ez vollen ûz schal  
0,3885 unt sie ez wole hetten vernomen  
0,3886 wie ez zuo Trôjen was kumen  
0,3887 den boten was der tisch gereit  
0,3888 dô verklageten sie ire leit  
0,3889 ie baz unt baz  
0,3890 ir iegelîcher vergaz  
0,3891 durch die guoten spîse  
0,3892 der zornlîcher wîse  
0,3893 dô diz geschach under des  
0,3894 bereitte sich Anchilles  
0,3895 unt der küene Theseus  
0,3896 unt dâr zuo Thelafus  
0,3897 drî tûsent mit in  
0,3898 die volgeten den drîn  
0,3899 zuo Messîn in ein guot lant  
0,3900 dar wurden sie gesant  
0,3901 nâch spîse unt nâch gewinne  
0,3902 des was dâ vile inne  
0,3903 sie roubeten unt branten  
0,3904 allez daz sie beranten  
0,3905 daz lant in glüeten allez schein  
0,3906 Theucer reit in engein  
0,3907 der küninc von den landen  
0,3908 sîn leit er dô ante  
0,3909 mit den Kriechen er dô streit  
0,3910 biz daz er si gar überreit  
0,3911 er zuovuorte ire schar  
0,3912 Achilles der nam sîn war  
0,3913 unt tet im einen slac sô grôz  
0,3914 daz er ûf die erden schôz  
0,3915 eine tötlîche wunden  
0,3916 zuo den selben stunden  
0,3917 Thelafus ûf der walstat  
0,3918 Anchillen des bat  
0,3919 daz er Theukrum lieze leben  
0,3920 wende er im wîlen hette gegeben  
0,3921 herberge in sîneme lande  
0,3922 "ich hette es grôze schande  
0,3923 sint er mir hier êre bôt  
0,3924 en hülfe ich im niht ûz der nôt"  
0,3925 des er in gebeten hæte  
0,3926 daz geschach dô zuo späte

- 0,3927 Theucer sô sêre gewunt was  
 0,3928 daz er des slages niht genas  
 0,3929 Theucer lac an der nôt  
 0,3930 niht wole lebende noch tôt  
 0,3931 dô sante er nâch Thelafô  
 0,3932 unt sprach zuo im alsô  
 0,3933 "ich en hân des lîbes niht mî vrist  
 0,3934 nû dû Ercules sun bist  
 0,3935 nû hoere unt sich  
 0,3936 wie er wîlen trôstte mich  
 0,3937 mir was ein küninc in mîn lant  
 0,3938 als ez nû ist gerant  
 0,3939 sîne helfe ich verkôs  
 0,3940 daz ich daz lant niht verlôs  
 0,3941 des genôz ich dô sîn  
 0,3942 alsô solte ich hiute dîn  
 0,3943 op ich den lîp solte hân  
 0,3944 ir hât mir beide wole getân  
 0,3945 des gebe ich dir hiute  
 0,3946 mîn lant unt mîne liute  
 0,3947 manne unt dienestmanne  
 0,3948 unt allez daz ich ie gewan  
 0,3949 dû solt mich lâzen begraben  
 0,3950 ich mac des lîbes niht gehaben  
 0,3951 bestate mich mit êren  
 0,3952 ich muoz hinnen kêren"  
 0,3953 als er dô vore sprach  
 0,3954 daz dinc allez alsô geschach  
 0,3955 er wart mit êren bestatet  
 0,3956 Thelafus lant bürge unt stat  
 0,3957 eidete er in sîne gewalt  
 0,3958 unt ander êre manicvalt  
 0,3959 Achilles der helet gemeit  
 0,3960 wider zuo dem her reit  
 0,3961 unt hiez Thelafum dâ belîben  
 0,3962 daz er hieze schrîben  
 0,3963 sîne bürge unt sîne veste  
 0,3964 unt sîn gelt weste  
 0,3965 unt besetzete sîn lant  
 0,3966 biz im ein bote würde gesant  
 0,3967 daz er denne quæme  
 0,3968 swâ er daz vernæme  
 0,3969 daz geschach alsô  
 0,3970 Achilles sagete dô  
 0,3971 als er quam in rihte  
 0,3972 Thelafes geschihte  
 0,3973 êr ich spreche vürebaz  
 0,3974 sô sulet ir rehte merken daz

- 0,3975 daz ich iuch lêren  
 0,3976 wer die zuo Trôje wären  
 0,3977 mit ireme harnasche ûf die gewer  
 0,3978 gegen den kriechischem her  
 0,3979 von Sizilien Pindarus  
 0,3980 Arpon unt Adrastus  
 0,3981 zuo gewere dâ sâzen  
 0,3982 an einer andern strâzen  
 0,3983 zuo Kolophon gein dem mer  
 0,3984 sâzen sie mit irere gewer  
 0,3985 Saras unt Marsius  
 0,3986 Nesteus unt Phimacus  
 0,3987 dise hêrren viere  
 0,3988 hetten dâ grôze ziere  
 0,3989 der küninc von Size Glaucon  
 0,3990 unt sîn bruoder Sarpedon  
 0,3991 Priamis mâge  
 0,3992 die hetten an irere pflâge  
 0,3993 drî tûsent ritter wole bekant  
 0,3994 über al Trôjenlande  
 0,3995 dâ was von Lauconîe  
 0,3996 mit sîner massenîe  
 0,3997 Eufemes ein küene helet  
 0,3998 mit tûsent rittern úzerwelt  
 0,3999 ouch was dâ Hupus  
 0,4000 unt der grôze Cupesus  
 0,4001 mit guoter geselleschaft  
 0,4002 man saget daz ire ritterschaft  
 0,4003 wäre harte nütze  
 0,4004 mit maniger hande geschütze  
 0,4005 ouch was hêr Remus dâ  
 0,4006 der küninc von Sytenenâ  
 0,4007 sîne gesellen wâren wole gezogen  
 0,4008 siben grâven vier herzogen  
 0,4009 manic ritter milte  
 0,4010 gelîch wâren ire schildre  
 0,4011 ire wâpen unt ire baniere  
 0,4012 von einer hande ziere  
 0,4013 dâ was ouch von Trâce  
 0,4014 von schoenen gelâze  
 0,4015 der küninc Pretemisus  
 0,4016 unt sîn neve Crepeus  
 0,4017 tûsent ritter mit in  
 0,4018 die hetten zuo rosse guoten cwin  
 0,4019 dâ was von Frisce Centipus  
 0,4020 Milceres unt Alchamus  
 0,4021 dise hetten gereit  
 0,4022 siben hundert ritter gemeit

- 0,4023 Funas von Philistea  
0,4024 was mit tûsent rittern dâ  
0,4025 mit alsô manigen dâ was  
0,4026 Fortinus unt Sanias  
0,4027 sie wâren küene alle drî  
0,4028 des guotes unt der spîse vrî  
0,4029 mir saget och daz buoch sus  
0,4030 daz Boetes unt Epistropus  
0,4031 wâren dâ von eineme lande  
0,4032 daz man kûme erkante  
0,4033 alsô verre was daz lant  
0,4034 ez was Botina genant  
0,4035 och was zuo Trôje  
0,4036 der küninc von Pafagôje  
0,4037 Philemenis genant  
0,4038 sô verre was sîn lant  
0,4039 daz er mit grôzer arbeit  
0,4040 in eineme mânde dar gereit  
0,4041 dâr zuo in drîn wochen  
0,4042 alsô hât Dares gesprochen  
0,4043 die wâpen an sîneme schilde  
0,4044 wâren gegraben bileden  
0,4045 von edelme gesteine  
0,4046 die man in den wazzern reine  
0,4047 bî dem paradîse vant  
0,4048 Eufrates unt Tigris sint sie genant  
0,4049 dâ was der küninc von Môrlant  
0,4050 als ich ez geschriben vant  
0,4051 nente ich in daz wäre schande  
0,4052 och hier in disen landen  
0,4053 die vrouwen verdæhten mich des  
0,4054 op ich in nente Xerses  
0,4055 wâr ump solte ich in niht nennen  
0,4056 man mohte harte wole erkennen  
0,4057 an sîner manheit  
0,4058 mit geschütze er zuo allen zîten streit  
0,4059 er hette anders decheine gewer  
0,4060 alsô en hette och sîn her  
0,4061 mit im was Mennon  
0,4062 der was sîner swester sun  
0,4063 dâ was von Therasche Theseus  
0,4064 unt sîn sun Archilogus  
0,4065 Priames mâge  
0,4066 an warte unt an lâge  
0,4067 beidesamet vile wîs  
0,4068 sie hetten och zuo strîte prîs  
0,4069 von Greste dâ was  
0,4070 Fion unt Esdras

- 0,4071 zwêne küninge rîche  
0,4072 die wâren dâ hövischlîche  
0,4073 ouch hette dâ hof unt hûs  
0,4074 der küninc Pistropleus  
0,4075 sîn lant hiez Ezenîe  
0,4076 man vant dâr inne arzâtîe  
0,4077 guote salben guote krût  
0,4078 in den lîp unt an die hût  
0,4079 unt anders guote wurze  
0,4080 daz ich die rede kürze  
0,4081 die hêrren wâren alle dâ  
0,4082 baz danne hier geschriben stâ  
0,4083 iegelîcher durch daz rehte  
0,4084 etelîcher durch sîn geslehte  
0,4085 etelîcher durch vriuntschaft  
0,4086 etelîcher durch ritterschaft  
0,4087 etelîcher durch minne  
0,4088 wâren sie zuo Trôje innen  
0,4089 daz ich ir hier gesaget hân  
0,4090 die wurden Ectori undertân  
0,4091 daz er nû wäre  
0,4092 ire guot rihtære  
0,4093 Ector sîne vriunde bat  
0,4094 daz sie alumbe die stat  
0,4095 zuo den erkären  
0,4096 wole bereitet wâren  
0,4097 unt daz sie bewarten die tor  
0,4098 einenthalben saz Andenor  
0,4099 enanderthalp Troilus  
0,4100 andersît Deiphebus  
0,4101 einsît Polidamas  
0,4102 andersît Eneas  
0,4103 alsus teilten sie sich  
0,4104 dâ huotte ir iegelich  
0,4105 mit lîbe unt mit guote  
0,4106 an sîner warthuote  
0,4107 als ez im zuo êren gezam  
0,4108 unt zuo gevüer wole quam  
0,4109 dannoch was Agomennon  
0,4110 mit den Kriechen zuo Thenedon  
0,4111 unt vröuweten sich des  
0,4112 daz kumen was Polimedes  
0,4113 wende er quam harte wole  
0,4114 mit drîzic schiffen vol  
0,4115 dâ heime er selber beliben was  
0,4116 wende er kûme genas  
0,4117 des lîbes wuwêne  
0,4118 daz sie zuo Athêne

0,4119 sîne vart hetten ûf geleit  
0,4120 des wâren sie sîn ungemeit  
0,4121 beide durch in unt durch sich  
0,4122 daz was harte billich  
0,4123 zuo râte sie dô giengen  
0,4124 wie sie ez ane geviengen  
0,4125 daz sie mohten gesigen  
0,4126 op sie sie wolten beligen  
0,4127 oder mit schiffen bestân  
0,4128 ir iegelîcher sprach ûf wân  
0,4129 als in lârte sîn muot  
0,4130 disen dûlte die rede guot  
0,4131 daz ez mit schiffen würde erhaben  
0,4132 jener daz leger ûf den graben  
0,4133 dirre den sturm der den strît  
0,4134 als man danne in râte pflît  
0,4135 manic rât dâ geschach  
0,4136 Polimedes dô sprach  
0,4137 "maniger gît guoten rât  
0,4138 der selber râtes niht en hât  
0,4139 aleine kume ich zuo dem râte  
0,4140 ein teil alzuo spâte  
0,4141 waz sol lenger hier gelegen  
0,4142 op ir gemaches wollet pflegen  
0,4143 sô en sołtet ir her kumen sîn nie  
0,4144 wollet ir aber ligen hier  
0,4145 unt iuch niergen zuo bereiten  
0,4146 unt alhier erbeiten  
0,4147 unz sie mit iuch strîten  
0,4148 nû zuo disen zîten  
0,4149 die werlt zuogêt êr  
0,4150 denne iuwer wille vollengê  
0,4151 heizet grîfen dâr zuo  
0,4152 daz iuwer schif morgene vruo  
0,4153 zuo Trôje sîn an dem stade  
0,4154 jâ ist ez iuwer schade  
0,4155 daz in zuo grôzen staten stât  
0,4156 daz ir hier gelegen hât  
0,4157 an der warnunge  
0,4158 mit iuwer samenunge  
0,4159 op ich iuch rehtes innen  
0,4160 sô varet balde hinnen  
0,4161 ir liget als unwîse  
0,4162 unt zeret iuwer spîse"  
0,4163 der rât behagete in allen  
0,4164 er mohte in wole gevallen  
0,4165 wende er wîslîchen riet  
0,4166 dô en sûmeten sie sich niet

- 0,4167 sie hiezen schaffen unt bewaren  
0,4168 wer dâ vüre solte varen  
0,4169 wer verre wer nâch  
0,4170 wer hier unt wer dâ  
0,4171 reiten sie sich begunden  
0,4172 ire segel sie ûf bunden  
0,4173 unt bereitten sich alle die naht  
0,4174 als ez vore was gedâht  
0,4175 des morgenes vile vruo  
0,4176 segelten sie zuo Trôje zuo  
0,4177 ie baz unt baz  
0,4178 der wahtær ûf der zinnen saz  
0,4179 sîne tageliet er sanc  
0,4180 daz im sîn stimme erklanc  
0,4181 von grôzeme dône  
0,4182 er sanc "ez taget schône  
0,4183 der tac der schînet in den sal  
0,4184 wole ûf ritter überal  
0,4185 wole ûf ez ist tac"  
0,4186 dô er gesanc sîn herze erschrac  
0,4187 sêre unt harte  
0,4188 er gesach ûf der warte  
0,4189 blicken gegen dem mer wert  
0,4190 halsberc schilt helm swert  
0,4191 unt die banieren manicvare  
0,4192 er en wiste wannen oder ware  
0,4193 sie wâren oder solten  
0,4194 oder waz sie tuon wolten  
0,4195 er schrei alsô sêre  
0,4196 daz alle die wahtære  
0,4197 die ûf den zinnen stuonden  
0,4198 schrifien begunden  
0,4199 er rief unt klagete  
0,4200 daz die burc alle wagete  
0,4201 vürsten vrîen dienestmanne  
0,4202 schutten ire wâpen an  
0,4203 ûf die ros sper an die hant  
0,4204 sporen ump iegelîcher sînen helm bant  
0,4205 swert unt schilt zuo sîten  
0,4206 dô begunden sie vîantliche rîten  
0,4207 vile balde unt gerade  
0,4208 hin zuo des mers stade  
0,4209 rehte an der selben zît  
0,4210 als die Kriechen andersît  
0,4211 ire habe hetten vunden  
0,4212 aldâ sie sie bestuonden  
0,4213 unt werten in die habe  
0,4214 die Kriechen wolten niht dâr abe

- 0,4215 unt en mohten mit êren  
0,4216 dannen niht gekêren  
0,4217 ouch versmâhete ez in gare  
0,4218 dâ hette an der êrsten schare  
0,4219 Prothesilaus der arge  
0,4220 der küninc von Prelarge  
0,4221 hundert schif mit rittern dâ  
0,4222 im was zuo dem lande vile gâch  
0,4223 dô er îlete an den stat  
0,4224 dô wart im vurt unt pfat  
0,4225 gewert dâ vile schiere  
0,4226 die küenen Trôiere  
0,4227 beide vort unt wider  
0,4228 daz mer ûf unt nider  
0,4229 wole drî mîle  
0,4230 schuzzen sie die pfîle  
0,4231 in die schif sô dicke  
0,4232 gelîch eineme ougenblîcke  
0,4233 sluoc slac über slac  
0,4234 daz ire senewe nie gelac  
0,4235 sie sluogen unt stâchen  
0,4236 die mastboume sie in zuobrâchen  
0,4237 sô daz ire segel aller zuostoup  
0,4238 dâ geschach mort unt roup  
0,4239 alsô ûzer mâzen grôz  
0,4240 daz mer rôt von bluote vlôz  
0,4241 als ez wär daz rôte mer  
0,4242 sie nâmien in lîp unt gewer  
0,4243 die her úz kumen wâren  
0,4244 die zugen sie mit den hâren  
0,4245 her unt dar durch den sant  
0,4246 dâ liezen die Kriechen ein pfant  
0,4247 an der selben hervart  
0,4248 als ez dâ geahitet wart  
0,4249 siben hundert oder mî  
0,4250 ân die ertrunken in dem sê  
0,4251 sie sigelten einzelen zuo  
0,4252 Prothesilaus quam dô  
0,4253 ûf daz ros an den griez  
0,4254 er schriet sper unt spiez  
0,4255 er rante unt tratte  
0,4256 sîner er vile beratte  
0,4257 der gevangenen er vile lôste  
0,4258 in dem mer er sie trôste  
0,4259 beide er gebôt unt bat  
0,4260 daz sie drungen ûf den stat  
0,4261 dâ was von gedrenge grôze nôt  
0,4262 als dirre iemanne die hant bôt

- 0,4263 daz er in züge ûf den sant  
0,4264 sô swebete im die hant  
0,4265 daz er es niht wart gewar  
0,4266 êr er im bôt den stumpf dare  
0,4267 dâ was dranc über gedranc  
0,4268 der Kriechen vile zuo stade spranc  
0,4269 mit den spiezen mit den bogen  
0,4270 mit den armbrusten ûf gezogen  
0,4271 entlâzen unt gespannen  
0,4272 mit den schifmannen  
0,4273 mit den sarjanden  
0,4274 die Kriechen genanten  
0,4275 daz ir vile zuo stade quam  
0,4276 eteslîcher ûz swam  
0,4277 eteslich gienc unt wuot  
0,4278 als man zuo solicher nôt tuot  
0,4279 Prothesilaus dô gewan  
0,4280 bî im siben hundert man  
0,4281 drîzic tûsent ritter dâ mite  
0,4282 man saget daz er dô strite  
0,4283 sô rehte  
0,4284 daz in decheineme rîche  
0,4285 nie ritter baz gestreit  
0,4286 niewan sîn eines arbeit  
0,4287 die Kriechen wâren alle begraben  
0,4288 sus wart der strît dâ êrst erhaben  
0,4289 man saget daz dâ en wäre  
0,4290 dechein ritter sô swære  
0,4291 noch sô veizet noch sô grôz  
0,4292 sô ungekleidet noch sô blôz  
0,4293 sô kranc noch sô bloede  
0,4294 sô küene noch sô snoede  
0,4295 er en muoste in dem strîte wesen  
0,4296 der dâ kûme was genesen  
0,4297 der huop sich wider in den strît  
0,4298 dâ wart der alte nît  
0,4299 unt die alte riuwe  
0,4300 sô unsanfte niuwe  
0,4301 daz ez anders niht en koste  
0,4302 denne tjoste wider tjoste  
0,4303 mit dem sper durch den man  
0,4304 swer den andern quam an  
0,4305 der en liez sîn niet  
0,4306 êr er in gar zuoschriet  
0,4307 dâ was val über val  
0,4308 daz volc strebete überal  
0,4309 iegelîcher den andern ane grein  
0,4310 sie schrieten vuoze unt bein

- 0,4311 houbet arme hende  
0,4312 in dem ellende  
0,4313 die von Kriechen dar quâmen  
0,4314 den schaden sie dâ nâmen  
0,4315 ouch geschach dâ michel schade  
0,4316 ir quam ouch vile zuo dem stade  
0,4317 die des niht hetten vernomen  
0,4318 wie ez den vordern was kumen  
0,4319 wenne sie mit einzelinger scharre  
0,4320 vuoren alle dô dare  
0,4321 Archelaus unt Prothenor  
0,4322 vuoren mit iren schiffen vore  
0,4323 nâch Prothesilaô  
0,4324 dô si gesâhen daz er sô  
0,4325 mit den Trôjären vaht  
0,4326 dô versuocheten sie ire maht  
0,4327 wie sie den stat begriffen  
0,4328 mit vünvzic schiffen  
0,4329 dô v louc in engein  
0,4330 schuzze unt gesteine  
0,4331 sô dicke sie vielen  
0,4332 êr denne jene ûz den kielen  
0,4333 geblicketen mit der ougebrâ  
0,4334 sô steckete der pfîl dâ  
0,4335 oder in dem houbete der stein  
0,4336 zuobrochen houbet oder bein  
0,4337 zuowart sie doch hielten  
0,4338 die schif sie dô schielten  
0,4339 mit gewalt an den stat  
0,4340 dâ wart geslagen unt getrat  
0,4341 von vianden unt von vriunden  
0,4342 daz des meres ünden  
0,4343 von gemenge wart trüebe  
0,4344 êr sich daz volc erhüebe  
0,4345 daz ez quæme ûz dem mer  
0,4346 Nestor quam mit sîneme her  
0,4347 mit sehzic schiffen zuo getrieben  
0,4348 die erde mohte erbiben  
0,4349 von rinnen unt von valle  
0,4350 Nestor brâhte sîne alle  
0,4351 ûf den stat mit gewalt  
0,4352 dâ wart wunder gestalt  
0,4353 ûf dem gevilde  
0,4354 mit spiezen unt mit schild  
0,4355 sich wâ wären vürsten  
0,4356 die baz gevehten torsten  
0,4357 wider die Trôiere  
0,4358 denne dise viere

- 0,4359 Prothenor unt Archilaus  
0,4360 Nestor unt Prothesilaus  
0,4361 zuohant quam Aschalaſus  
0,4362 unt der hêrre Alinus  
0,4363 mit drîzic ſchiffen zuo gejaget  
0,4364 als von den andern ist gesaget  
0,4365 êr sie quæmen zuo dem ſtade  
0,4366 gewunnen ſie grôzen ſchaden  
0,4367 ſtich hier unt ſlac dâ  
0,4368 êr er gevregete wâ  
0,4369 unt den ſlac dare bôt  
0,4370 sô lac er ûf der erden tôt  
0,4371 den Kriechen mîrte ire ſchare  
0,4372 des wurden die Trôjære geware  
0,4373 unt wichen hinderwert  
0,4374 in wâren ſper unt ſwert  
0,4375 an den ecken widerleit  
0,4376 daz daz ſwert niht en ſneit  
0,4377 unt daz ſper niht en ſtach  
0,4378 leides in doch niht geschach  
0,4379 ſie triben die Kriechen in daz mer  
0,4380 aleine hetten ſie decheine wer  
0,4381 ir was dâ sô vile ensamen  
0,4382 daz ſie ſich muosten haben geschamen  
0,4383 ûzer mâzen sêre  
0,4384 op in missegangen wäre  
0,4385 Ulixes zuo ruorte  
0,4386 vierzic ſchif er vuorte  
0,4387 dô gesach er ûf dem sê  
0,4388 tûſent Kriechen unt mî  
0,4389 tôt tûchen unt ſwaben  
0,4390 dô begunde er zuo ſtade ſtreben  
0,4391 daz er quæme ûf daz lant  
0,4392 dô werte im mit heledes hant  
0,4393 Philomenis den vurt  
0,4394 Ulixes trat ûf des ſchiffes bort  
0,4395 unt ſluoc unt dranc  
0,4396 unz er ûf den stat ſpranc  
0,4397 dô er ûf dem ſtade ſtuont  
0,4398 Philomenis in bestuont  
0,4399 mit starken ſlegen âne gruoſ  
0,4400 er was zuo rosſe unt dirre zuo vuoze  
0,4401 er ſluoc ſlac über ſlac  
0,4402 daz im der arm nie gelac  
0,4403 ſchône ſtuont Ulixes  
0,4404 unt geſtatete im des  
0,4405 biz er müeden began  
0,4406 dô ſluoc er den man

- 0,4407 durch daz kinne in den munt  
0,4408 daz dâ niht vore bestuont  
0,4409 joch vleisch noch bein  
0,4410 waz daz swert ie berein  
0,4411 dô er wider zukte daz swert  
0,4412 jener viel zuo der erden wert  
0,4413 als er tôt wäre  
0,4414 man klagete in harte sêre  
0,4415 under sînen mannen  
0,4416 sie wolten in vüeren dannen  
0,4417 Ulixes en statete des niht  
0,4418 er sluoc unt schriet  
0,4419 under der ritterschaf  
0,4420 swaz er mit dem swerte traf  
0,4421 daz vuor allez enzwei  
0,4422 ir iegelich sîn zeichen schrei  
0,4423 sie zugen in her unt dare  
0,4424 bleich unt missevare  
0,4425 den küninc von Segontôje  
0,4426 doch hulften im die von Trôje  
0,4427 daz er des lîbes genas  
0,4428 wende ir drízic stunt mîr was  
0,4429 der die in dâ nerten  
0,4430 denne der die in dâ værten  
0,4431 dô hette Thoas  
0,4432 unt Ajax der sîn geselle was  
0,4433 hêrrn Thelamones sun  
0,4434 unt der küninc Agomennon  
0,4435 unt Menelaus sîn bruoder  
0,4436 ire segel unt ire ruoder  
0,4437 mit gewalt an den stat brâht  
0,4438 ire ros wâren wole bedaht  
0,4439 ûf die kovertiure  
0,4440 rîche unt tiure  
0,4441 pfellel unt zindât  
0,4442 arne lewen dâr in genât  
0,4443 unt ander zeichen dâ mite  
0,4444 als ez noch ist site  
0,4445 iren lîp sie behuotten  
0,4446 ire wâpen sie an schuten  
0,4447 beide die hêrren unt ire man  
0,4448 sie zugen ire halsberge an  
0,4449 dâr ûf unt dâr unde  
0,4450 sô man beste kunde  
0,4451 die wâpenrocke vinden  
0,4452 sie hiezen ire helme ûf binden  
0,4453 schilt sper unt swert  
0,4454 gap man in darwert

- 0,4455 daz was als ez solte  
0,4456 von silber unt von golde  
0,4457 wole gezimieret  
0,4458 sie quâmen geleisieret  
0,4459 al mitten ûf den kreiz  
0,4460 tjoste poinde puneiz  
0,4461 vile manicvalt dâ was  
0,4462 durch den sant durch daz gras  
0,4463 sie sluogen dâ unt hier  
0,4464 unt gewerten nie  
0,4465 deweder hêrre noch kneht  
0,4466 êr sie gewunnen halsberc  
0,4467 zuo gelîchen widergelte  
0,4468 in wazzer unt in velde  
0,4469 Prothesilaus was erlegen  
0,4470 er hette strîtes vile gepflegen  
0,4471 iedoch er es noch vile vaste pflac  
0,4472 biz er von krancheit erlac  
0,4473 beide genant unt ungenant  
0,4474 die vürsten von Kriechenlande  
0,4475 wâren vore Trôje alle  
0,4476 leidic von der valle  
0,4477 von vriunden unt von mâgen  
0,4478 die in erslagen lâgen  
0,4479 sie rantan alle in den strît  
0,4480 eine sît unt andersît  
0,4481 hier engegen dâ engein  
0,4482 dâ was gelîch unt ein  
0,4483 beide lîp unde tôt  
0,4484 hier nôt dâ nôt  
0,4485 unt hette ich zehen munde  
0,4486 ich wæne ich niht en kunde  
0,4487 iuch zuo rehte gesagen  
0,4488 waz der von Trôje wart erslagen  
0,4489 ûz der burc quam dô gerant  
0,4490 der küninc dâ von Môrlande  
0,4491 mit den araboisen  
0,4492 unt mit den Turkoisen  
0,4493 die wâren dâ vile nütze  
0,4494 mit ireme geschütze  
0,4495 sie konden beide harte wole  
0,4496 deweder man tuon sol  
0,4497 jagen oder vliehen  
0,4498 unt iren bogen ziehen  
0,4499 swâ die senewe hine sluoc  
0,4500 swaz der ritter ane truoc  
0,4501 ez vuor durch in sân  
0,4502 als er niht en hette an

- 0,4503 beide verre oder bî  
0,4504 mit eineme pfîle durch drî  
0,4505 sie rantan unt liefen  
0,4506 sie schuzzen unt riefen  
0,4507 daz beide berge unt tal  
0,4508 mit gelîcheme lûte wider schal  
0,4509 sie schuzzen sô sêre  
0,4510 daz die Kriechen mère  
0,4511 vluhen wider in daz mer  
0,4512 danne sie sich kârten zuo wer  
0,4513 dô rief Polimedes  
0,4514 "en schamet iuch helede niht des  
0,4515 daz iuch diz môrvolc jaget  
0,4516 ich sehe wole ir sît verzaget  
0,4517 die mit mir hier sît  
0,4518 kêret wider in den strît  
0,4519 swelicher iuwer nû kêret  
0,4520 der sol es sîn geêret  
0,4521 an wîbe unt an kinden  
0,4522 er sol ez niht verwinden  
0,4523 in mîneme künincrîche  
0,4524 swer sô zagelîche  
0,4525 disen strît schiuhet  
0,4526 oder hinnen vliuhet"  
0,4527 under des gesach er einen môr  
0,4528 einen vürsten der hiez Sicamôr  
0,4529 an dem erkuolte er sînen zorn  
0,4530 er nam daz ros mit den sporen  
0,4531 unt begunde in ane rîten  
0,4532 unt stach in durch die sîten  
0,4533 sô sêre daz im die hant  
0,4534 an der wunden widerwant  
0,4535 Polimedes reit vürebaz  
0,4536 unt rach sînen haz  
0,4537 die sîne volgeten im mite  
0,4538 der en was decheiner er strite  
0,4539 mit sôgetâner manheit  
0,4540 als ire hîerre vore streit  
0,4541 under sîner baniere  
0,4542 wart der Trôiere  
0,4543 drî hundert erslagen  
0,4544 daz begunde Ector klagen  
0,4545 wende ez im was vile leit  
0,4546 wole zuo gereche unt bereit  
0,4547 ûf sîn ros er spranc  
0,4548 er sluoc unt dranc  
0,4549 unt hurte unt stiez  
0,4550 sîn ros in sprungen er geliez

- 0,4551 als ez vlücke wäre  
0,4552 Ector der gewære  
0,4553 dô er quam zuo gerant  
0,4554 Prothesilanum er vant  
0,4555 ûf dem gevilde  
0,4556 er râmete im gegen schilde  
0,4557 den schaft er alsô sêre treip  
0,4558 daz dâ niht vore beleip  
0,4559 durch daz herze er in stach  
0,4560 daz er niemer mîr wort gesprach  
0,4561 dô begunden die Kriechen klagen  
0,4562 daz der degen was erslagen  
0,4563 dô begunden schrîen  
0,4564 vürsten unt vrîen  
0,4565 dâ was leit über leit  
0,4566 Ector rante unt reit  
0,4567 von ende zuo ende  
0,4568 arme unt hende  
0,4569 liez er sô ump gân  
0,4570 im en mohte niht widerstân  
0,4571 swaz er beruorte  
0,4572 vile gar er daz zuovuorte  
0,4573 Achilles sporen zuo sîten sluoc  
0,4574 sîn ros in in den strît truoc  
0,4575 er gram unt bram  
0,4576 swaz im zuo quam  
0,4577 sint erhaben was der zorn  
0,4578 daz was allez verloren  
0,4579 zuo dirre hant zuo der hant  
0,4580 im quâmen sîne ritter nâch gerant  
0,4581 drî hundert unt mî  
0,4582 unt strieten mit Ectore  
0,4583 sie begunden zuo strîchen  
0,4584 ez muoste allez wîchen  
0,4585 ire gedrenge unt ire geschürge  
0,4586 unz an daz vorebürg  
0,4587 rehte mitten durch den hagen  
0,4588 begunden sie sich wider jagen  
0,4589 ouch wart gejaget Ector  
0,4590 biz an daz burctor  
0,4591 wan Troilus unt Parîs  
0,4592 Achilles hette grôzen prîs  
0,4593 aldâ begangen  
0,4594 er hette sie gevangen  
0,4595 alle daz ir dâ was  
0,4596 wen daz ir gelîch des genas  
0,4597 daz jene dortinne  
0,4598 sich werten von der zinne

- 0,4599 die Kriechen schocketen dô  
0,4600 allenthalben vaste zuo  
0,4601 ez was âbentstunde  
0,4602 Ector begunde  
0,4603 mit den sînen kêren in die stat  
0,4604 Agomennon die Kriechen bat  
0,4605 daz sie bereiten ûf daz velt  
0,4606 ire pavelûne unt ire gezelt  
0,4607 unt hiez sie hütten stellen  
0,4608 unt boume vellen  
0,4609 unt machen hamîden  
0,4610 sie en torsten ez niht verminden  
0,4611 daz er gebôt daz geschach  
0,4612 sie macheten wende unt dach  
0,4613 von deme walde  
0,4614 zuo dem êrsten einvalte  
0,4615 sint baz unt baz  
0,4616 biz man Trôjam sô besaz  
0,4617 êr denne sie sich liezen vertrîben  
0,4618 wolten sie gevangen belîben  
0,4619 oder lâzen dâ daz leben  
0,4620 oder man muoste in die burc geben  
0,4621 oder sie gewunnen sie mit kraft  
0,4622 dâ sie wart sezhaft  
0,4623 dâ wart sie wole besezzen  
0,4624 des en wart och niht vergezzen  
0,4625 sie en schüefen ire huote  
0,4626 zuo lîbe unt och zuo guote  
0,4627 in aller hande sache  
0,4628 zuo ruowe unt zuo gemache  
0,4629 als ergangen was die naht  
0,4630 Ector wart ûf gewaht  
0,4631 unt die Trôiere  
0,4632 sie hiezen ire baniere  
0,4633 unt ire schilde bringen  
0,4634 die schilde sie ûz hiengen  
0,4635 die baniere sie ûf stakten  
0,4636 daz volc sie ûf wakten  
0,4637 in der stat überal  
0,4638 dâ wart harte grôz schal  
0,4639 der tac begunde schînen  
0,4640 sie bliesen ire busînen  
0,4641 unt aller hande herhorn  
0,4642 ich wæne daz niergen ein turn  
0,4643 in der stat en wäre  
0,4644 dâ bliese ein turnære  
0,4645 sie quâmen alle gemeine  
0,4646 vüre der houbetporten eine

- 0,4647 die dâ hiez Dardanides  
0,4648 unt vereinten sich des  
0,4649 sie wolten die Kriechen bestân  
0,4650 der küene Ector nam sâñ  
0,4651 under den vürsten ware  
0,4652 welicher mit sîner schare  
0,4653 vüre varen mohte  
0,4654 daz der dâ zuo tohte  
0,4655 dô riet der küninc selbe daz  
0,4656 in der werlte nieman viégete baz  
0,4657 denne der küninc Glaucon  
0,4658 unt sîn bruoder Sarpedon  
0,4659 sie wâren beide von Lizelant  
0,4660 sie scharten ire volc aldâ zuohant  
0,4661 vaterhalben hette Ector  
0,4662 einen bruoder hiez Cicillanor  
0,4663 den hiez man wende er was ein degen  
0,4664 der êrsten baniere pflegen  
0,4665 von Therasce Theseus  
0,4666 unt sîn sun Archilogus  
0,4667 dâr nâch sich scharte  
0,4668 Miceres ire schar bewarte  
0,4669 dâr nâch der küene Cantipus  
0,4670 unt der küninc Alchamus  
0,4671 dirre vore gesageten schare  
0,4672 nam hêr Troilus ware  
0,4673 der hette harte guot wort  
0,4674 von ritterschaft unt geurboret  
0,4675 sînen schilt mit grôzen êren  
0,4676 den bat man lêren  
0,4677 unt wîsen daz her  
0,4678 beide zuo strîte unt zuo gewer  
0,4679 er sprach wie gerne er tâte  
0,4680 swes in Ector bæte  
0,4681 "waz sol dîn bete sam mir got  
0,4682 ich leiste gerne dîn gebot"  
0,4683 Ector scharte sich der helet  
0,4684 den daz volc hette erwelt  
0,4685 zuo eineme rihtære  
0,4686 unt Cupesus der gewære  
0,4687 unt Hupus der grôze  
0,4688 unt alle sîne genôze  
0,4689 Remus sîn volc unt sîne diet  
0,4690 en liez ouch ungeschart niht  
0,4691 noch der küene Polidamas  
0,4692 der von Penoie dâr was  
0,4693 der küninc Pretemisus  
0,4694 dise bewarte Deiphebus

- 0,4695 hêrrn Priames sun  
 0,4696 alsô tet der küninc Phiûn  
 0,4697 unt der küninc Esdras  
 0,4698 ir ietweder von Agreste was  
 0,4699 als ich daz buoch hoere sagen  
 0,4700 Fion hette einen wagen  
 0,4701 von silber unt von golde  
 0,4702 dâ er mite strîten wolte  
 0,4703 geprîset unt gezieret  
 0,4704 unt sô gezimieret  
 0,4705 daz allez daz dâr abe sprach  
 0,4706 swaz in mit den ougen sach  
 0,4707 von helfenbeine  
 0,4708 mit guoteme gesteine  
 0,4709 obene unt unde  
 0,4710 er was wert tûsent pfunde  
 0,4711 Ector satzete Pytagoram  
 0,4712 über Phionem unt Esdram  
 0,4713 daz er wäre ire geleite  
 0,4714 zuo strîte unt zuo arbeite  
 0,4715 Ector bat Eneam  
 0,4716 daz er an sîner schar nam  
 0,4717 Eufemem den alten  
 0,4718 unt sîner schare wolte walten  
 0,4719 "gerne" sprach Eneas  
 0,4720 tuon ich daz dû geredet hâst  
 0,4721 wilt dû varen zuo strîte  
 0,4722 sô reite dich bezîte  
 0,4723 dâ en hoert decheine beite zuo  
 0,4724 Ector bereitte sich dô  
 0,4725 alsô tet ouch Parîs  
 0,4726 der bereitte sich in alle wîs  
 0,4727 mit rosse unt mit gewande  
 0,4728 der küninc von Môrlande  
 0,4729 gesellete sich zuo sîner schare  
 0,4730 ir deweder nam des andern ware  
 0,4731 als ich sie vore hân gesaget  
 0,4732 die von Trôje unverzaget  
 0,4733 hetten sich alle geschart  
 0,4734 unt úzer mâzen wole bewart  
 0,4735 sie hetten panzier kollier  
 0,4736 krokanier testier  
 0,4737 armîsen unt platen  
 0,4738 geschütze in guoten baten  
 0,4739 armbrust ûf gezogen  
 0,4740 kocher pfile unt bogen  
 0,4741 strâlen unt bolzen  
 0,4742 îseríne kolzen

- 0,4743 dâr zuo güldîne sporen  
0,4744 unt halsberge ûzerkoren  
0,4745 schilder sper helme swert  
0,4746 ros unt zeltende pfert  
0,4747 satel zoume nâch ireme site  
0,4748 unt kovertiuren dâ mite  
0,4749 ûf die ros über sich  
0,4750 sînen wâpenroc ir iegelich  
0,4751 von maniger hande geschrâte  
0,4752 von schoeneme zindâte  
0,4753 von pfellel von samîte  
0,4754 lanc unt wîte  
0,4755 wole zuo gereche  
0,4756 wil man daz ich spreche  
0,4757 mit kurzlîchen worten  
0,4758 sie offeneten ire pforten  
0,4759 unt riten ûz vile wole bereit  
0,4760 mit sôgetâner gewisheit  
0,4761 unt mit solicher gereitschaft  
0,4762 daz dâ niht zuo en traf  
0,4763 Dardanides die pforte hiez  
0,4764 dâ man daz volc ûz liez  
0,4765 dô sie quâmen vüre daz tor  
0,4766 dô begunde Ector  
0,4767 ump sich zuo sehen  
0,4768 vaterhalben zehene  
0,4769 sîner bruoder er gesach  
0,4770 zuo den zehenen er sprach  
0,4771 daz sie sîn war næmen  
0,4772 wenne sie zuo strîte quæmen  
0,4773 ritter sie alle wâren  
0,4774 unt kunden wole gebâren  
0,4775 der eine hiez Odinias  
0,4776 unt der ander Esdras  
0,4777 der dritte hiez Anthomus  
0,4778 der vierde Rodomerius  
0,4779 der fünfte hiez Delon  
0,4780 der sechste hiez Quintilion  
0,4781 der sibende Sylilous  
0,4782 der ahtode Cassibilaus  
0,4783 der niunde hiez Dayron  
0,4784 der zehende was Mahtinen sun  
0,4785 der hiez dô Roscalcus  
0,4786 mir saget daz welhische buoch sus  
0,4787 sie nâmnen Ectores alle ware  
0,4788 unt hetten an irere schare  
0,4789 zweinzic tûsent ûzerkoren  
0,4790 ritter von Trôje geboren

- 0,4791 Ector ûf ein ros saz  
0,4792 harte guot man saget daz  
0,4793 ez hieze Galathea  
0,4794 ez sante im Pendesilea  
0,4795 ein hövische juncvrouwe  
0,4796 mit slegen noch mit drouwe  
0,4797 mohte man ez betwingen  
0,4798 swâ ez quam zuo springen  
0,4799 dâ en kunde niht vore bestân  
0,4800 ez en wolte vollen sprunc hân  
0,4801 ez en wart nie dechein nôz  
0,4802 daz pfert wære sô grôz  
0,4803 sô hôch noch sô wolegetân  
0,4804 sô daz selbe kastelân  
0,4805 Ector dô Priamum bat  
0,4806 sînen vater varn ûf die walstat  
0,4807 daz er der lezzeste wär mit sîner schar  
0,4808 sîner süne nâmen sîn zweinzic war  
0,4809 under den bastharten  
0,4810 zehen Ectorem bewarten  
0,4811 ir wâren drîzic der kebeskinde  
0,4812 zehene ir genant sint  
0,4813 nochdan ich ir geschriben vant  
0,4814 sibenzechene genant  
0,4815 drî sint ir über beliben  
0,4816 ungenant unt ungeschrieben  
0,4817 ich en weiz niht ump die drî  
0,4818 wie ez dâr umbe kumen sî  
0,4819 die sibenzechene wil ich nennen  
0,4820 daz ir sie kunnet erkennen  
0,4821 der êrste hiez Menalus  
0,4822 unt der ander Cirrus  
0,4823 der dritte Celidomas  
0,4824 der vierde Ermagoras  
0,4825 der vünfte Clareanus  
0,4826 der sehste Sardineus  
0,4827 Ysidor hiez der sibende sun  
0,4828 der ahtode Margariton  
0,4829 der niunde Fanianus  
0,4830 der zehende Gymeanus  
0,4831 der einlifte Mathan  
0,4832 der zwelifie Almadian  
0,4833 der drîzehende Dolodageles  
0,4834 der vierzehende Godeles  
0,4835 der vünvzehende Duglas  
0,4836 der sehszehende geheizen was  
0,4837 Damor der lezzeste Thare  
0,4838 wäre ir mir gesaget mî

- 0,4839 ich hette ire namen hier gewahen  
0,4840 sie wâren decheine zagen  
0,4841 sie wâren hövisch küene vrô  
0,4842 mit ireme vater Priamô  
0,4843 dô bî der selben zîte  
0,4844 riten sie zuo strîte  
0,4845 dô scharten sich gein Colophon  
0,4846 Pindarus unt Arpon  
0,4847 unt die von Philistê  
0,4848 unt die von Arbeê  
0,4849 unt die von Botinê  
0,4850 Surianê unt Erminê  
0,4851 unt die von Bionê  
0,4852 unt die von Pafagonîe  
0,4853 unt anders harte manic man  
0,4854 des ich genennen niht en kan  
0,4855 ouch scharten sich andersît  
0,4856 die kriechischen vürsten in den strît  
0,4857 ire rihtær Agomennon  
0,4858 unt Achilles Peleus sun  
0,4859 irere baniere sich underwant  
0,4860 ouch sô scharte sich zuohant  
0,4861 sîn geselle Patroclus  
0,4862 Merion unt Idomeneus  
0,4863 dise küninge zwêne  
0,4864 unt Menesteus von Athêne  
0,4865 unt der küninc Aschalophus  
0,4866 unt sîn sun Alinus  
0,4867 die hêrren von Torconîe  
0,4868 unt dise küninge drîe  
0,4869 Prothenor unt Archelaus  
0,4870 unt der küninc Menelaus  
0,4871 umbe den diz leit allez quam  
0,4872 durch sîn wîp Elenam  
0,4873 ouch scharten sich von Focidis  
0,4874 Epistropus von Celidis  
0,4875 Ajax unt die sîne  
0,4876 Thelamones sun von Salemîne  
0,4877 Theucer unt Theseus  
0,4878 unt Dormus unt Eufimacus  
0,4879 dise hêrren viere  
0,4880 vuoren under einer baniere  
0,4881 Polixenus reit under ire scharre  
0,4882 unt nam irere baniere ware  
0,4883 ouch scharte sich Thoas  
0,4884 unt hêr Filithoas  
0,4885 Ajax von Calcedonienlande  
0,4886 nam ire baniere an die hant

- 0,4887 och scharte sich balde  
0,4888 Nestor der alte  
0,4889 och scharte sich under des  
0,4890 Mabonen sun Hunes  
0,4891 der küninc mit im hæte  
0,4892 die von Massagete  
0,4893 unt die araboise  
0,4894 unt die Turkoise  
0,4895 Ulixes sich scharte  
0,4896 Menelaus mit im kârte  
0,4897 der küninc dâ von Tigrîs  
0,4898 sie wâren beide vile wîs  
0,4899 och schartern sich dô  
0,4900 die von Prelargen unvrô  
0,4901 sie begunden harte sêre klagen  
0,4902 daz in der hêrre was erslagen  
0,4903 Prothesilianus von Ectore  
0,4904 dâr umbe îlten sie deste mî  
0,4905 daz sie wurden bereit  
0,4906 zuo rechenne ires hêrren leit  
0,4907 als ez was vile billich  
0,4908 och schartern sich  
0,4909 ein vater unt sîn sun  
0,4910 daz was der küninc Machaon  
0,4911 unt sîn vater Aschalofius  
0,4912 mit in der küninc Polidius  
0,4913 dô scharte sich Theophilus  
0,4914 der sô unt dirre sus  
0,4915 unt der küninc Euripilus  
0,4916 mit sîner massenîe  
0,4917 er was von Yrcanîe  
0,4918 och schartern sich mit nîde  
0,4919 zwêne küninge dâ von Lîde  
0,4920 der eine daz was Antipus  
0,4921 unt der ander Eufimacus  
0,4922 och scharte sich von Amîse  
0,4923 mit harte grôzen prîse  
0,4924 der hêrre Polibetes  
0,4925 unt der küninc Politetes  
0,4926 geboren von Melibê  
0,4927 unt mit Diomedê  
0,4928 der herzoge Stelenus  
0,4929 unt der schoene Eurialus  
0,4930 och scharte sich dâ mî  
0,4931 der küninc von Manessê  
0,4932 unt der vile schoene Prothoilus  
0,4933 unt von Kypre Eunuchus  
0,4934 och huop sich ûf ire spor

- 0,4935 von Capadie Capador  
0,4936 Agomennon der gewære  
0,4937 der Kriechen rihtære  
0,4938 der bewarte sîne schare  
0,4939 ouch sô nam sîn ware  
0,4940 von Micene ein starke diet  
0,4941 sie liezen in unbewaret niht  
0,4942 weder er gienge oder rite  
0,4943 sô wâren sie im vaste mite  
0,4944 manic hundert tûsent man  
0,4945 liez sich dâ strîten an  
0,4946 dem eines riemen niht gebrach  
0,4947 dô in zuo strîtene geschach  
0,4948 siben unt zweinzic was der schar  
0,4949 die zuo strîte quâmen dare  
0,4950 manic tûsent baniere  
0,4951 rehte unt alsô schiere  
0,4952 sô sie sich gescharten beidersît  
0,4953 sie begunden sô in den strît  
0,4954 beide îlen unt streben  
0,4955 als sie dâ solten leben  
0,4956 iemer mère âne nôt  
0,4957 sie en ahnten niht ûf den tôt  
0,4958 oder waz tôt wäre  
0,4959 daz was in unmære  
0,4960 sie begunden sich undergrâzen  
0,4961 zuo êrst mit gelâzen  
0,4962 dâr nâch mit worten  
0,4963 die schefte die sie vuorten  
0,4964 vazzen sie die begunden  
0,4965 sie en mohten noch en kunden  
0,4966 nihtes erbîten  
0,4967 sie wolten sament strîten  
0,4968 Hector sporen zuo sîten sluoc  
0,4969 sîn ros in gegen den Kriechen truoc  
0,4970 als ez vlücke wäre  
0,4971 Patroclus sô sêre  
0,4972 daz ros mit sporen ruorte  
0,4973 daz ez in vuorte  
0,4974 Hectori sô balde engein  
0,4975 als von einen bogen ein zein  
0,4976 oder ein pfil dâ wäre gesant  
0,4977 alsô quâmen sie gerant  
0,4978 zuosamene schnellîche  
0,4979 beide sament gelîche  
0,4980 sie zuobrâchen die sper  
0,4981 beide dirre unt ouch der  
0,4982 die schefte stuben ûfwert

- 0,4983 die hêrren griffen an die swert  
0,4984 dô begunden die recken  
0,4985 mit den brûnen ecken  
0,4986 houwen schrôten snîden  
0,4987 den wâpenroc von sîden  
0,4988 unt den halsberc dâr unde  
0,4989 Patroclô wart ein wunde  
0,4990 in daz herze sô grôz  
0,4991 daz er tôt zuo der erden schôz  
0,4992 der geist vuor sîne vart  
0,4993 Patroclus wart alsô hart  
0,4994 unt alsô kalt als ein stein  
0,4995 im starren arm unt bein  
0,4996 Hector zôch in tôtvare  
0,4997 beide her unt dare  
0,4998 über tal unt über berc  
0,4999 biz er im den halsberc  
0,5000 unde ander sîne wâpen genam  
0,5001 Merion dâr zuo quam  
0,5002 unt begunde slahen unt treten  
0,5003 unt wolte daz harnasch bereten  
0,5004 unt begreif sich mit Ectorê  
0,5005 dô en mohte er niht mêt  
0,5006 wende er harte müede was  
0,5007 Merion hurte in ûf daz gras  
0,5008 unt sluoc im slac über slac  
0,5009 daz er ûf der erden lac  
0,5010 gevangen hette in Merion  
0,5011 wen der küene Glaucon  
0,5012 unt von Therasche Theseus  
0,5013 unt sîn sun Archilogus  
0,5014 dise starken helde drî  
0,5015 quâmen zuo hülfe Hectorâ  
0,5016 Glaucon von Sice  
0,5017 bestuont dâ von Lice  
0,5018 den küenen Merionem  
0,5019 er wolte sîn niht schönen  
0,5020 sie sluogen sich ump den kreiz  
0,5021 sô sêre daz in der sweiz  
0,5022 durch die sarewât dranc  
0,5023 daz viur in under die ougen spranc  
0,5024 dô sie hiewen unt sniten  
0,5025 ire dienær quâmen zuo geriten  
0,5026 zuo den selben stunden  
0,5027 sêre sie begunden  
0,5028 houwen unt schrôten  
0,5029 unt zugen den tôten  
0,5030 ûf unt nider durch den sant

- 0,5031 Hector sich sîn dô underwant  
0,5032 über den tôten er schreit  
0,5033 er sluoc unt sneit  
0,5034 umbe sich mit deme swerte  
0,5035 manigen er des gewerte  
0,5036 swelicher im zuo quam  
0,5037 daz er beleip tôt oder lam  
0,5038 biz er einen rûm gewan  
0,5039 dô nam er den manne  
0,5040 allez daz er hæte  
0,5041 ân daz gewæte  
0,5042 daz zuo wer niht gehörte  
0,5043 sîn îsen er dannen vuorte  
0,5044 Merion niht en beite  
0,5045 Hectorî er nâch leite  
0,5046 mit sîner baniere  
0,5047 unt sluoc der Trôiere  
0,5048 mê denne zehene dâr nider  
0,5049 Hector kârte sich wider  
0,5050 sînen schilt er vüre schielt  
0,5051 unt schriet unt spielt  
0,5052 covertiure ros gewant  
0,5053 houbet bein arm hant  
0,5054 er begunde sie vaste wider jagen  
0,5055 biz er vierzehene hette erslagen  
0,5056 Merion ûf der walstat  
0,5057 Hectorî vaste zuo trat  
0,5058 sie giengen sich underhouwen  
0,5059 man mohte dâ wunder schouwen  
0,5060 Merion alsô sêre vaht  
0,5061 biz daz Ectorî die maht  
0,5062 sêre was entgangen  
0,5063 Merion hette in gevangen  
0,5064 wen daz Cicillanor  
0,5065 gesach daz hêrre Hector  
0,5066 niht mê mohte  
0,5067 sîn swert er ûz zuhte  
0,5068 sô sêre er in werte  
0,5069 daz er in generte  
0,5070 biz der von Trôje sô vile quam  
0,5071 daz man in mit gewalt nam  
0,5072 als Hector genas  
0,5073 unt im die hülfe kumen was  
0,5074 unt wider gewan die kraft  
0,5075 er denete sînen schaft  
0,5076 in den strît er wider reit  
0,5077 daz er geræche sîn leit  
0,5078 an Merione

- 0,5079 eine wîle hielt er schône  
0,5080 op er sîn würde gewar  
0,5081 dô quam dâr zuo mit sîner schar  
0,5082 Menesteus von Athêne  
0,5083 gegen diseme dise zwêne  
0,5084 Cantipus unt Miceres  
0,5085 mit disen quam ouch under des  
0,5086 Hectoris bruoder Troilus  
0,5087 unt von Falede Alcamus  
0,5088 gegen disen vieren  
0,5089 mit sîner baniere  
0,5090 rante Manesteus  
0,5091 dô begeinete im Troilus  
0,5092 Manesteus liez dar gân  
0,5093 im kunde niht vore bestân  
0,5094 ûf die erden er in stach  
0,5095 daz er en hörte noch en sprach  
0,5096 er vienc in an dem valle  
0,5097 sie ranten zuo alle  
0,5098 dise daz sie in beretten  
0,5099 jene daz sie in behetten  
0,5100 ez was ein harte lanc zît  
0,5101 êr sie in behielten wedersît  
0,5102 Miceres nam die banier  
0,5103 er schrei "ritter schevalier"  
0,5104 er rief Alcamum an  
0,5105 daz er löste disen man  
0,5106 unt hîrren Cantipum  
0,5107 "verliesen wir Troilum  
0,5108 sô hân wir zuo vile verloren"  
0,5109 er nam daz ros mit den sporen  
0,5110 alsô tâten jene zwêne  
0,5111 unt bestuonden den von Athêne  
0,5112 unt sluogen vaste ûf in  
0,5113 Menesteus disen drîn  
0,5114 sich setzete zuo wer  
0,5115 doch wâren die drî eines her  
0,5116 sie nâmnen Troilum mit gewalt  
0,5117 doch werte sich der degen balt  
0,5118 mit vile grôzen widerslegen  
0,5119 sie begunden beidersît zuo legen  
0,5120 viande unt vriunde  
0,5121 êr Troilus kunde  
0,5122 wider ûf daz ros kommen  
0,5123 dô hetten die sînen genomen  
0,5124 vile bittern schaden leit grôz  
0,5125 Hectoren des sêre verdrôz  
0,5126 daz die sînen wârn erladen

- 0,5127 beide mit laster unt mit schaden  
0,5128 under die andern er treip  
0,5129 nieman hinder im beleip  
0,5130 von sîner massenê  
0,5131 von Torcomenê  
0,5132 ein hîerre Aschalafer genant  
0,5133 quam gegen im gerant  
0,5134 dirre hier jener dort  
0,5135 beide wider unt vort  
0,5136 ranten sie ûf den rinc  
0,5137 ir iegelîcher den andern entvienc  
0,5138 unt gap im vüre den guoten tac  
0,5139 mit dem swerte einen slac  
0,5140 daz iz gar besouf  
0,5141 unt daz bluot dâr ûz trouf  
0,5142 beide zuo leide unt zuo lobe  
0,5143 wîlen lägen die Kriechen obe  
0,5144 bîwîlen lägen sie unde  
0,5145 Hector dô begunde  
0,5146 sîne sterke wîsen  
0,5147 unt teilte daz îsen  
0,5148 mit grôzer grimmicheit  
0,5149 swaz er der viande bereit  
0,5150 die muosten wîchen alle  
0,5151 ane vluht oder an valle  
0,5152 daz was dâ bî wole schîn  
0,5153 Troilum den bruoder sîn  
0,5154 vuorte er an daz burctor  
0,5155 Menesteus sach daz Hector  
0,5156 die sînen jagete unt valte  
0,5157 unt in strîte wunder stalte  
0,5158 er kârte im vaste zuo under des  
0,5159 gesach er daz Miceres  
0,5160 an eineme ende dâ hielt  
0,5161 sînen schilt er vüre sich schielt  
0,5162 mit sîneme sper quam er gerant  
0,5163 unt stach in ûf des schildes rant  
0,5164 sô ûzer mâzen sêre  
0,5165 daz er gevallen wäre  
0,5166 unt komen zuo gezoge  
0,5167 wen der hinder satelboge  
0,5168 dâ er ane behafte  
0,5169 unt entsaz dem schafte  
0,5170 die wîle daz dise striten  
0,5171 quâmen dise zuo geriten  
0,5172 mit schalle unt mit dôze  
0,5173 Hupus der grôze  
0,5174 unt Cupesus von Arîse

- 0,5175 mit harte grôzem prîse  
 0,5176 mit einer micheln schare  
 0,5177 gegen disen quâmen von Kriechen dare  
 0,5178 Archelaus unt Prothenor  
 0,5179 grôze nôt was dâ vore  
 0,5180 hier wart daz leit zwivalt  
 0,5181 die Kriechen vuoren mit gewalt  
 0,5182 in gienc zuo an der maht  
 0,5183 ire volc den sic ervaht  
 0,5184 daz ersach Remus unt Polidamas  
 0,5185 ir ietweder von Zizonien was  
 0,5186 sie quâmen mit gesprenge  
 0,5187 in daz grôze gedrenge  
 0,5188 mit drîn tûsenden unt mî  
 0,5189 zwivalt was ire nôt êr  
 0,5190 nû wart sie drîvalt erhaben  
 0,5191 sie begunden stapfen unt draben  
 0,5192 unt ouch zuo rinnen  
 0,5193 al mit unminnen  
 0,5194 mit leide unt mit swerde  
 0,5195 gemâlet wart die erde  
 0,5196 mit dem bluote alrôt  
 0,5197 der Kriechen lac dâ vile tôt  
 0,5198 Menelaus die nôt gesach  
 0,5199 von den daz leit allez geschach  
 0,5200 er sprach "mir ist leide  
 0,5201 sô mir got beide  
 0,5202 daz wir die unsen hân verloren  
 0,5203 unt ouch ump den alten zorn  
 0,5204 daz ich daz wîp verloren hân  
 0,5205 nû muoz ich under die erden gân  
 0,5206 oder ich gereche mînen haz  
 0,5207 ich sage iuch hêrren allen daz  
 0,5208 êr denne ich daz lenger lite  
 0,5209 ich lieze êr bein unt lide  
 0,5210 gar an mir zuosnîden  
 0,5211 ich wil ez niht lîden  
 0,5212 ich en sol noch en mac  
 0,5213 hiute sî mîn lezzester tac  
 0,5214 op ich ez lenger gespurn  
 0,5215 swer mîner êren nû gere  
 0,5216 der volge mir mit êren"  
 0,5217 dô begunde er zuo kêren  
 0,5218 unt als er zuo kârte  
 0,5219 Remus im gewarte  
 0,5220 unt stoup im engein  
 0,5221 dâ geschach under in zwein  
 0,5222 stiche unt slege sô grôz

- 0,5223 daz daz viur dâr abe schôz  
 0,5224 die wîle der strît under in was  
 0,5225 dô begreif sich Polidamas  
 0,5226 mit Meriône  
 0,5227 ire schilde schinen schône  
 0,5228 ire swert wole blichen  
 0,5229 swaz sie bestrichen  
 0,5230 daz zuovuor allez gar  
 0,5231 Polidamas sluoc dar  
 0,5232 sô sêre daz daz swert gienc  
 0,5233 durch des halsberges rinc  
 0,5234 durch vleisch durch bein  
 0,5235 als dâ niht wäre engein  
 0,5236 durch bûch durch rücke  
 0,5237 dâ vielen zwei stücke  
 0,5238 einez zuo der rehten hant  
 0,5239 daz ander zuo der linken in den sant  
 0,5240 dâ was allenthalben klage  
 0,5241 Menelaus quam zuo slage  
 0,5242 mit hêren Remô  
 0,5243 sie underhiewen sich dô  
 0,5244 daz Remus wirs dâr abe geschiet  
 0,5245 sînen helm er im zuoschriet  
 0,5246 unt sluoc im die stirne enzwei  
 0,5247 Polidamas sîn zeichen schrei  
 0,5248 lûte unt grimme  
 0,5249 dar quam zuo sîner stimme  
 0,5250 von Zizonie sîn her  
 0,5251 sie triben die Kriechen biz an daz mer  
 0,5252 an der widerkêre  
 0,5253 bestuont sie mit vâre  
 0,5254 der küninc dâ von Focidis  
 0,5255 der dâ hiez Celidis  
 0,5256 der benôte von minnen  
 0,5257 durch eine küninginnen  
 0,5258 von Femenîe  
 0,5259 die was sîn amîe  
 0,5260 durch der vrouwen êre  
 0,5261 liez er sich sô sêre  
 0,5262 an maniger hande hövischheit  
 0,5263 in dem strîte im widerreit  
 0,5264 der küene Polidamas  
 0,5265 er sprach "daz dû getân hâst  
 0,5266 ûf diseme velde  
 0,5267 daz kumet zuo widergelte"  
 0,5268 zuohant dô er gesprach daz wort  
 0,5269 Polidamas sînes swertes ort  
 0,5270 durch den halsberc im stach

- 0,5271 daz daz ïsen vüre brach  
 0,5272 unt daz swert im durch die buckelen wuot  
 0,5273 unt in sînes selbes bluote  
 0,5274 an der erden lac tôt  
 0,5275 wende dâ wart nôt über nôt  
 0,5276 sie schrîten über Celidê  
 0,5277 "ouwî unt ouwê"  
 0,5278 dô sie lange hetten geschrît  
 0,5279 Hector kürzete in die zít  
 0,5280 mit dem swerte umbe sich  
 0,5281 sô daz ir iegelich  
 0,5282 der zít gar vergaz  
 0,5283 wie solte er in die zít kürzen baz  
 0,5284 swâ sîn swert hine quam  
 0,5285 daz er in beide nam  
 0,5286 die zít unt den lîp dâr mite  
 0,5287 êr er die schar durchrite  
 0,5288 dô sluoc er im nâhe bî  
 0,5289 mit eineme slage ritter drî  
 0,5290 der von Salemîne  
 0,5291 Thelamon sach sîne  
 0,5292 harte lasterlîche ligen  
 0,5293 daz begunde er hôhe wigen  
 0,5294 beide er unt hîrre Theucer  
 0,5295 sie vazzeten beide ire sper  
 0,5296 unt ander ire geselleschaft  
 0,5297 Theucer Hectoren traf  
 0,5298 dô verwundete er sîn niet  
 0,5299 Thelamon mit sîneme swerte schriet  
 0,5300 daz dâ niet vore bestuont  
 0,5301 ez en læge tôt oder wunt  
 0,5302 Hector jagete Theucrum  
 0,5303 dô begegenete im Doriun  
 0,5304 dem stiez er den munt enzwei  
 0,5305 daz er daz bluot ûz spei  
 0,5306 Theseus von Kriechlande  
 0,5307 der quam dô zuo gerant  
 0,5308 mit den sînen ûf den rinc  
 0,5309 man saget daz der jungelinc  
 0,5310 driu jâr unt niht vort  
 0,5311 hette sînen schilt geurboret  
 0,5312 hîrren Hectorî er zuo sprach  
 0,5313 dâ er in in dem strîte sach  
 0,5314 "ir mohtet wole mit êren  
 0,5315 ûz diseme strîte kêren  
 0,5316 ich weiz wole daz ir ein helet sît  
 0,5317 ir kêret danne hinnen in zít  
 0,5318 ir hât iuwern lîp verloren"

- 0,5319 Hectorâ was die rede zorn  
 0,5320 er îlte mit dem swerte dar  
 0,5321 die wîle wart er gewar  
 0,5322 daz im abe gevangen was  
 0,5323 der küene degen Polidamas  
 0,5324 Thelamon hette Polidamam  
 0,5325 gevangen biz im zuo quam  
 0,5326 Menelaus zuo helfe  
 0,5327 sie vuorten in mit gelfe  
 0,5328 hin zuo ireme gezelte  
 0,5329 dô begênete im ûf dem veldē  
 0,5330 Hector vile unverzaget  
 0,5331 er quam mit sînen gejaget  
 0,5332 sîn swert vuorte er albare  
 0,5333 unt durchreit ire schare  
 0,5334 drîzic er zuo tôde sluoc  
 0,5335 sîn ros in alsô verre truoc  
 0,5336 daz er es vile grôzen schaden nam  
 0,5337 Thelamon im zuo quam  
 0,5338 unt hîrre Epistropus  
 0,5339 unt der küninc Menelaus  
 0,5340 unt ander ire gesinde  
 0,5341 der strît der wart swinde  
 0,5342 er widerstuont in allen drîn  
 0,5343 doch sluogen sie vaste ûf in  
 0,5344 wen daz er gar was ein degen  
 0,5345 er muoste dâ tôt sîn gelegen  
 0,5346 der sînen iedoch wênic was  
 0,5347 sie hetten daz grüene gras  
 0,5348 mit bluote beroetet  
 0,5349 Hector was benoetet  
 0,5350 sie sluogen im sîn ros dâr nider  
 0,5351 doch quam er zuo vuozener wider  
 0,5352 lange er sich werte  
 0,5353 iedoch in daz generte  
 0,5354 daz die zehene bruoder quâmen  
 0,5355 die sîn war nâmen  
 0,5356 die quâmen im zuo helfe alle  
 0,5357 mit gulfte unt mit schalle  
 0,5358 dô wart ir Ector vile vrô  
 0,5359 er sluoc hîrren Amphimacô  
 0,5360 daz houbet abe mit eineme slage  
 0,5361 des hetten die Kriechen grôze klage  
 0,5362 dô quam dâr zuo Odinias  
 0,5363 der der bruoder einer was  
 0,5364 der stach dâr nider Theseum  
 0,5365 alsô tet Epistropum  
 0,5366 Anthonius der bruoder ein

- 0,5367 Esdras quam Thelamone engein  
 0,5368 dô erviel Thelamon  
 0,5369 Polixenum stach Delon  
 0,5370 daz er ûf die erden sleif  
 0,5371 Delon sîn ros begreif  
 0,5372 Hector ûf daz ros saz  
 0,5373 dô mohten sie vile baz  
 0,5374 Sysileus einen vürsten stach  
 0,5375 daz sîn schilt aller zuobrach  
 0,5376 dô quam Quintilion zuo gerant  
 0,5377 unt stach ir einen ûf den sant  
 0,5378 alsô tet Rodomerius  
 0,5379 unt sîn bruoder Cassibilaus  
 0,5380 ouch stach ir einen Odinias  
 0,5381 daz er kûme genas  
 0,5382 Doroschalcus der lezzeste  
 0,5383 des schaft was sô veste  
 0,5384 dô er ûf einen stach  
 0,5385 sîn schaft dâ niht zuobrach  
 0,5386 er stach über drî schrite  
 0,5387 den ritter unt daz ros dâr mite  
 0,5388 dô griffen sie zuo den swerten  
 0,5389 die wîle daz die werten  
 0,5390 dâ en konde niht vore bestân  
 0,5391 ouch quâmen in zuo helfe sâñ  
 0,5392 zwêne küninge von Peône  
 0,5393 gezieret harte schône  
 0,5394 êr was drîvalt ire leit  
 0,5395 nû wart ez viervalt gebreit  
 0,5396 Deiphebus der quam dare  
 0,5397 dô gesach er under der schare  
 0,5398 daz Theucer dâ vile sêre vaht  
 0,5399 in dem strîte mit grôzer maht  
 0,5400 er quam ûf in gerant  
 0,5401 unt sluoc daz sîn swert zuospranc  
 0,5402 Therefeus zuo dranc  
 0,5403 gegen im Pretemisus  
 0,5404 gegen Pretemisô Theseus  
 0,5405 ir quam ie mî unt mî  
 0,5406 dâ was ach unt wê  
 0,5407 man sach daz bluot vliezen  
 0,5408 sie sluogen unt stiezen  
 0,5409 mit des schildes borte  
 0,5410 unt mit des speres orte  
 0,5411 mit des swertes knoufe  
 0,5412 ir lac an eineme houfe  
 0,5413 tôt bleich unt val  
 0,5414 daz ich bin âne zal

- 0,5415 Quintilion unt Rodomerius  
 0,5416 sâhen daz hêrre Theseus  
 0,5417 grôz wunder begienc  
 0,5418 dô viengen sie den jungelinc  
 0,5419 Hector bat daz er genas  
 0,5420 wende er ein kindisch ritter was  
 0,5421 unt iedoch ein küene degen  
 0,5422 er wäre anders tôt gelegen  
 0,5423 ouch quam dâ Andenor  
 0,5424 von sîner urbor  
 0,5425 harte hövischlîche  
 0,5426 er begunde stolzlîche  
 0,5427 wenken unt grâzen  
 0,5428 dô wart er sîn niht erlâzen  
 0,5429 gegen im quam Thoas  
 0,5430 unt ouch Philithoas  
 0,5431 unt Ajax von Agrestê  
 0,5432 drî Kriechen vuoren über sê  
 0,5433 die biderbeten ire hende  
 0,5434 in dem ellende  
 0,5435 beide swerte unt schaft  
 0,5436 mit grôzer sterke unt kraft  
 0,5437 swâ sie hine kârten  
 0,5438 von den bastharten  
 0,5439 hêrren Priamis süne ein  
 0,5440 quam im in dem strîte engein  
 0,5441 Cassibilaus der quam  
 0,5442 gegen hêrren Thoam  
 0,5443 Thoas baz geriten was  
 0,5444 des sluoc im Thoas  
 0,5445 den schilt enzwei zuo dem andern slage  
 0,5446 daz im erviel der pfage  
 0,5447 als der pfage dâr nider lac  
 0,5448 dô sluoc er ouch einen slac  
 0,5449 daz swert im biz an daz gehilze  
 0,5450 durch herze unt durch milze  
 0,5451 andersît gegen dem rücke ûz wuot  
 0,5452 ûz pfeif im daz bluot  
 0,5453 einsît unt andersît  
 0,5454 Ector hette des nît  
 0,5455 daz im der bruoder was verloren  
 0,5456 dô wuohs sîn alter zorn  
 0,5457 er begunde wüeten unt toben  
 0,5458 unt quam under sie gestoben  
 0,5459 als ein lewe tæte  
 0,5460 swenne er hunger hæte  
 0,5461 op man in under schâf lieze  
 0,5462 mit solicheme rieze

- 0,5463 vuor hêrre Hector  
0,5464 daz im niht bestuont vore  
0,5465 zuo einer hant zuo der andern hant  
0,5466 ez wart allez geschant  
0,5467 swaz sîn swert ie bestreich  
0,5468 ez wäre hart oder weich  
0,5469 Hector vuor mit unsiten  
0,5470 im riten sîne sîne niun bruoder mite  
0,5471 der zehende lac im tôt  
0,5472 ump den was die grôze nôt  
0,5473 ûf der selben walstat  
0,5474 Hector als ein mülenrat  
0,5475 treip sîn ros umbe  
0,5476 man saget daz er swümme  
0,5477 in dem bluote sô vile ir was  
0,5478 die er valte ûf daz gras  
0,5479 dô gesâhen die von Crête  
0,5480 daz hêr Hector hæte  
0,5481 der Kriechen vile dâr nider gevalt  
0,5482 êr was die nôt viervalт  
0,5483 vünvvaltic sie nû wart  
0,5484 die von Crête wole bewart  
0,5485 ranten zuo balde  
0,5486 Nestor der alte  
0,5487 von Pire mit in zuo treip  
0,5488 vore im niht en beleip  
0,5489 unzerslagen unt unzervuort  
0,5490 er quam sô zuo geruort  
0,5491 daz man in unsanfte entsuop  
0,5492 swâ er sîn swert ûf erhuop  
0,5493 Esdras unt Fion  
0,5494 hêrren Glancones sun  
0,5495 begunden dô zuo jagen  
0,5496 daz was der den wagen  
0,5497 mit ime vuorte  
0,5498 swaz er beruorte  
0,5499 ebene er ez abe schriet  
0,5500 als an dem grase geschiet  
0,5501 swâ die segense über gêt  
0,5502 daz obereste sie obene ane næjet  
0,5503 dâ was grôz geschelle  
0,5504 Fiones geselle  
0,5505 stalte wunder Esdras  
0,5506 im quam zuo helfe Pythagoras  
0,5507 Priamus kebessüne ein  
0,5508 er half harte wole in zwein  
0,5509 Fion der ûf den wagen saz  
0,5510 der tet ez harte vile baz

- 0,5511 etewenne her nider spranc  
 0,5512 unt sluoc unt dranc  
 0,5513 zuo etelîcher wîle  
 0,5514 schôz er sîne pfile  
 0,5515 sîn râme im nie gelouc  
 0,5516 swâ sîn pfîl hin gevloc  
 0,5517 doch gerou in die vart  
 0,5518 wende er gevangen wart  
 0,5519 dô volgete im Esdras  
 0,5520 unt ouch Pytagoras  
 0,5521 sie hetten in gerne gelöst  
 0,5522 dô vant er an dewederme trôst  
 0,5523 zuo ranten die von Messiê  
 0,5524 vünvvalt was daz leit êr  
 0,5525 sehsvalt wart ez dô  
 0,5526 Hector rante aber zuo  
 0,5527 alsô tet Polidamas  
 0,5528 mit in ouch dâ was  
 0,5529 Hectoris bruoder Deiphebus  
 0,5530 gegen in Menelaus  
 0,5531 quam mit Thelamône  
 0,5532 ez en wart nie sô schoene  
 0,5533 strît noch urlouge  
 0,5534 dâ en was dechein getouge  
 0,5535 under irre baniere  
 0,5536 lac der Trôiere  
 0,5537 vile tôt unt gewundet  
 0,5538 Eneas dô ouch bestuont  
 0,5539 mit sîner massenîe  
 0,5540 mit im von Lauconîe  
 0,5541 der küninc Eufemes  
 0,5542 Hector stalte under des  
 0,5543 ûf dem velde grôzen mort  
 0,5544 Ajax quam zuo gehurt  
 0,5545 hêren Thelamonis kint  
 0,5546 alsô snel als ein wint  
 0,5547 quam sîn ors zuo gevlogen  
 0,5548 oder als ein pfîl von einen bogen  
 0,5549 er sprach "wie ist uns nû geschehen  
 0,5550 ich hân selten gesehen  
 0,5551 unser volc underligen  
 0,5552 unt die von Trôje gesigen  
 0,5553 wie wê ez mir tæte  
 0,5554 swer ez mir gesaget hæte  
 0,5555 vore eineme ganzen jâre  
 0,5556 swie ich nû gebâre  
 0,5557 nû muoz ez alsô wesen  
 0,5558 aleine solte ich niemer genesen

- 0,5559 op ez noch hiute wesen sal  
0,5560 mîn tôt unt mîn val  
0,5561 unt solte man mich schinden  
0,5562 ich wil es niht erwinden  
0,5563 ich versuoche op ich herze hâ"  
0,5564 dô er ez gesprach dô was er dâ  
0,5565 dâ er ez versuochen mohte  
0,5566 op er zuo manne tohte  
0,5567 er versuochete ez ouch mit triuwen  
0,5568 ez mohte in allen grûwen  
0,5569 in deme ringe  
0,5570 wen er dâ vienge  
0,5571 wen er dâ velte  
0,5572 wen er dâ zuoswelte  
0,5573 wen er dâ zuobræche  
0,5574 wen er dâ nider stæche  
0,5575 weme er den lîp næme  
0,5576 weme er zuo helfe quæme  
0,5577 eine wîs unt ander wîs  
0,5578 sô hette er einen solichen prîs  
0,5579 op ich ez gesagen kunde  
0,5580 die zît mir widerstüende  
0,5581 wolte ich die zît dâr zuo hân  
0,5582 sô muoste ich ander rede lân  
0,5583 als ez von im erhaben was  
0,5584 von Calcedonie Philithoas  
0,5585 mit den sînen zuo rante  
0,5586 als Ajax dô erkante  
0,5587 daz er im zuo helfe quam  
0,5588 daz swert er mit beiden handen nam  
0,5589 unt sluoc ir ûz der mâze vile  
0,5590 von der swarten biz an daz swil  
0,5591 beide kleine unt grôz  
0,5592 wole bedecket unt blôz  
0,5593 âdern bein unt lide  
0,5594 er gap in decheinen vride  
0,5595 er gienc sô schrôten  
0,5596 daz von den tötten  
0,5597 die erde was bedaht  
0,5598 dô versuochete sîne kraft  
0,5599 Philithoas an Hectorê  
0,5600 dô beitte Ector niht mê  
0,5601 er hette sîn swert sô erzogen  
0,5602 daz er im den hindern satelbogen  
0,5603 schriet in zwei stücke  
0,5604 unt traf in in den rücke  
0,5605 sô sêre daz ez zwîvel was  
0,5606 op er der wunden genas

- 0,5607 dâ huop sich leit über leit  
0,5608 swer dâ vore im gestreit  
0,5609 der huop sich zuo strîte  
0,5610 bî der selben gezîte  
0,5611 nôt unt quâle  
0,5612 huop sich zuo dem mâle  
0,5613 zuo rante ouch under des  
0,5614 vrouwen Mahtmien sun Hunes  
0,5615 gegen im von grôzen prîse  
0,5616 Ulixes der wîse  
0,5617 gegen im Emilius  
0,5618 beide sô unt sus  
0,5619 sanfte unt sêre  
0,5620 huop sich die unêre  
0,5621 mit schilde unt mit swerte  
0,5622 die lange werte  
0,5623 joch alsô lange  
0,5624 biz von der Kriechen getwange  
0,5625 die von Trôje wichen vore  
0,5626 wider an daz burctor  
0,5627 dâ wâren sie überwunden  
0,5628 wen daz sie helfe vunden  
0,5629 von den von Persiâ  
0,5630 die hetten guot geschütze dâ  
0,5631 die werten in die graben  
0,5632 iezunt hette sich erhaben  
0,5633 harte ritterlîche gar  
0,5634 Parîs mit sîner schar  
0,5635 Helena die küniginne  
0,5636 saz ûf der zinne  
0,5637 unt ander die vrouwen  
0,5638 daz sie mohten schouwen  
0,5639 wie ez im ergienge  
0,5640 unt wie er ez ane vienge  
0,5641 dâ der hêrre ûfe reit  
0,5642 sîn zeltende pfert sanfte schreit  
0,5643 daz er ez niewen entsuop  
0,5644 wenne ez den vuoz ûf huop  
0,5645 sô wole gienc ez in zelte  
0,5646 dô begênete ûf dem velde  
0,5647 dem edeln Parîse  
0,5648 der küninc dâ von Pîse  
0,5649 dô was Parîs  
0,5650 zuo schirmslegen vile wîs  
0,5651 er sluoc einen slac dar  
0,5652 des wart jener wole gewar  
0,5653 dô sluoc er zwêne after ein  
0,5654 alsô tet er dâ engein

0,5655 dô sluoc er drî mit dem dritten  
 0,5656 spielt er im daz houbet mitten  
 0,5657 daz er die bein ûf kârte  
 0,5658 Ulixes des gewarte  
 0,5659 daz Parîs sîneme never  
 0,5660 hette genomen daz leben  
 0,5661 zuo im er ruorte  
 0,5662 eine banier er vuorte  
 0,5663 von swarzeme zindâte  
 0,5664 sîneme rosse er ez vile drâte  
 0,5665 zuo dem bûche einsît in stach  
 0,5666 daz ez andersít ûz brach  
 0,5667 daz banier rôte varwe vienc  
 0,5668 daz ez durch daz ros gienc  
 0,5669 von dem rôten bluote  
 0,5670 Troilum ez muote  
 0,5671 daz sîn bruoder zuo vuoze stuont  
 0,5672 des zuobletzete er im den munt  
 0,5673 unt die nasen sô sêre  
 0,5674 als der munt vorne wäre  
 0,5675 weder helm noch nasebant  
 0,5676 mit Hectore quam zuo gerant  
 0,5677 Deiphebus unt Polimas  
 0,5678 sehsvalt êr diz leit was  
 0,5679 nû mohte ez sibenvalt wesen  
 0,5680 ir en konde decheiner genesen  
 0,5681 swelicher ime under disen zwein  
 0,5682 Ajax oder Ectorî quam engein  
 0,5683 die von Trôje erholeten sich dô  
 0,5684 sie trâten den Kriechen vaste zuo  
 0,5685 unt triben sie mit gewalt  
 0,5686 an ire gezelt unt an ire behalt  
 0,5687 êr daz geschæhe  
 0,5688 sô wart dâ manic spæhe  
 0,5689 beide wort unt slac  
 0,5690 ez was ein unsenfte tac  
 0,5691 der vaht der vaht  
 0,5692 beide sterke unt maht  
 0,5693 sêre sich versuocheten  
 0,5694 sie en ahnen noch en ruocheten  
 0,5695 wie ez in ergienge  
 0,5696 weder sie ûf dem ringe  
 0,5697 wurden erslagen oder ertratt  
 0,5698 sus behielten sie ire stat  
 0,5699 die wîle diz werte  
 0,5700 unt nieman des gerte  
 0,5701 zuo redene zuo suone noch zuo tage  
 0,5702 Hector huop sîn alte klage

- 0,5703 er sprach "ir hêren gebet mir rât  
 0,5704 sint ir mich erkoren hât  
 0,5705 zuo eineme rihtære  
 0,5706 umbe unser swære  
 0,5707 wie wir die gerechen  
 0,5708 dâ sulet ir zuo sprechen  
 0,5709 ich sihe wole wir sîn bestân  
 0,5710 mit volke des ich angst hân  
 0,5711 waz râtes mac ich anders geben  
 0,5712 wir müezen lîp unt leben  
 0,5713 läzen âne gezucke  
 0,5714 ez en sî danne ungelücke  
 0,5715 wellen wir halten in hart  
 0,5716 sie geriuwet die vart  
 0,5717 hier ist nieman er wizze wole  
 0,5718 daz er eines tôdes sol  
 0,5719 sterben unt decheines mère  
 0,5720 weret lant unt êre  
 0,5721 iuch hilfet got deste baz"  
 0,5722 daz ors dâ er ûfe saz  
 0,5723 daz sporete er zuo den sîten  
 0,5724 sie liezen hine rîten  
 0,5725 daz ir mit im dâ was  
 0,5726 dô begonde hêrre Thoas  
 0,5727 andersît zuo jagen  
 0,5728 der Ectoris bruoder hette erslagen  
 0,5729 der dâ Cassibilaus hiez  
 0,5730 Quintilion sich gegen im liez  
 0,5731 zuo helfe er mit im nam  
 0,5732 sînen bruoder Odiniam  
 0,5733 unt Rodomerium dâ mite  
 0,5734 dise drî mit unsite  
 0,5735 hurten sêre ûf in  
 0,5736 dô geschach im von in drîn  
 0,5737 dechein ander leit  
 0,5738 wen daz in ir ein im ein kleit sneit  
 0,5739 mit dem swerte in die hant  
 0,5740 Menesteus quam zuo gerant  
 0,5741 von Athêne der herzoge  
 0,5742 der brâhte der bruoder einen zuo gezoge  
 0,5743 er stach Odiniam  
 0,5744 daz er ûf die erden quam  
 0,5745 des wart Parîs gewar  
 0,5746 unt sluoc einen pfil dar  
 0,5747 in daz rippe er in schôz  
 0,5748 hier huop sich ein strît grôz  
 0,5749 under den Kriechen unt Ectorê  
 0,5750 sibenvalt was daz leit êr

- 0,5751 nû muoste ez ahtvalt sîn  
 0,5752 daz wart vile unsanfte schîn  
 0,5753 Hector liez umbe gân  
 0,5754 des er dâ vore hette getân  
 0,5755 des tet er nû mère  
 0,5756 man saget daz dâ wäre  
 0,5757 beidersît grôz haz  
 0,5758 Hector sîn niht vergaz  
 0,5759 er gienc mit beiden handen  
 0,5760 sîn leit vaste anden  
 0,5761 dô schôz im der küninc Hunes  
 0,5762 bî dem ougen in under des  
 0,5763 unt wunte in ein kleine  
 0,5764 ûf dem ougebeine  
 0,5765 daz rach zuohant Ector  
 0,5766 er sluoc daz daz houbet enbore  
 0,5767 vlouc ûf die erden  
 0,5768 niemer durfe werden  
 0,5769 sô grôze nôt sô dâ geschach  
 0,5770 sie riefen "stich unt slac"  
 0,5771 ir iegelich gap umbe sich  
 0,5772 beide slac unt stich  
 0,5773 dô ranten ûf die walstat  
 0,5774 ahte tûsent úz der stat  
 0,5775 man mochte wunder dâ sehen  
 0,5776 daz dâ vore was geschehen  
 0,5777 unt geschehen solte sint  
 0,5778 daz was allez ein wint  
 0,5779 wider daz ungemach  
 0,5780 daz iezunt dâ geschach  
 0,5781 dâ was anders niet mî  
 0,5782 wen ach unt wê  
 0,5783 dâ reit Ajax under  
 0,5784 unt stalte manic wunder  
 0,5785 alsô tet Hector  
 0,5786 unt ein sîn bruoder hiez Ysdor  
 0,5787 unt einer der hiez Curus  
 0,5788 der dritte bruoder Cedius  
 0,5789 unt der vierde Celidonias  
 0,5790 unt der fünfte Ermagoras  
 0,5791 Sardineus unt Margoriton  
 0,5792 gegen disen quam Thelamon  
 0,5793 Prothenor unt Ulixes  
 0,5794 gegen im Godeles  
 0,5795 Almadian unt Emelcus  
 0,5796 gegen disen Archilogus  
 0,5797 Theucer mit im was  
 0,5798 gein disen Duglas

- 0,5799 der treip gegen Theucerô sîn sper  
 0,5800 dô entweich im Theucer  
 0,5801 sîn ros er an die stirne stach  
 0,5802 niunvalt wart daz ungemach  
 0,5803 daz êr ahtvalt was  
 0,5804 daz geschuof hîrre Duglas  
 0,5805 ez wär im übel ergangen  
 0,5806 wende er wär gevangen  
 0,5807 mit Menesteô von Athêne  
 0,5808 wen daz sîner bruoder zwêne  
 0,5809 im zuo helfe quâmen  
 0,5810 unt in im benâmen  
 0,5811 Hector reit durch die schare  
 0,5812 mit sîneme swerte albare  
 0,5813 mit im reit ouch dâ  
 0,5814 der küninc von Persiâ  
 0,5815 mit hîrren Parîse  
 0,5816 maniger hande wîse  
 0,5817 ire zeichen sie schrîten  
 0,5818 sie begunden zuosamene rîten  
 0,5819 mit ire baniere  
 0,5820 Kriechen unt Trôiere  
 0,5821 sîn zeichen schrei Parîs  
 0,5822 alsô tet andersît Rodoîs  
 0,5823 gegen hêrrn Parîse  
 0,5824 unt die von Anîse  
 0,5825 unt die von Torcomenîe  
 0,5826 mit sîner massenîe  
 0,5827 dô huop den strît under des  
 0,5828 der küninc Bilibetes  
 0,5829 Hector sprach den sînen zuo  
 0,5830 "ez ist mir alsô mære vruo  
 0,5831 als vile späte  
 0,5832 leider ungeræte"  
 0,5833 als er gesprach daz wort  
 0,5834 vort ritter nû vort  
 0,5835 volget helede alle  
 0,5836 von klage unt von valle  
 0,5837 von ruofe unt von dôze  
 0,5838 von hurte unt von stôze  
 0,5839 von stiche unt von slage  
 0,5840 geschach an dem tage  
 0,5841 daz man ez iemer klagen mac  
 0,5842 jener âne houbet lac  
 0,5843 dirre ân hant der âne bein  
 0,5844 jenen ûz dem büche schein  
 0,5845 herze unt lunge  
 0,5846 jeneme die zunge

- 0,5847 halp ûf den zanen  
0,5848 die nase lac disem ûf den granen  
0,5849 dem lac die swarte  
0,5850 ûf dem bûche bî dem bart  
0,5851 dem wappete der bart  
0,5852 jeneme wâren die ougen verkârt  
0,5853 diseme bluotte die stirne  
0,5854 schedel unt hirne  
0,5855 hâr unt ôre  
0,5856 lâgen im in dem trôre  
0,5857 mit bluote bevlozen  
0,5858 der lac erschozzen  
0,5859 der lac erstochen  
0,5860 dirre zuobrochen  
0,5861 dirre zuobletzet  
0,5862 jener zuoquetzet  
0,5863 dirre ertrunken der ertratt  
0,5864 iedoch jene von der stat  
0,5865 die Kriechen in nôt brâhten  
0,5866 wende sie sige vâhten  
0,5867 als ich ez biz her hân gezalt  
0,5868 iezunt was ez zehenvalt  
0,5869 daz niunvalt hiez  
0,5870 durch sant durch griez  
0,5871 durch velt durch gras  
0,5872 sô vile leides dâ was  
0,5873 unt joch sô úz der mâze vile  
0,5874 op ich rehte zelen wil  
0,5875 sô leitet mich leit über leit  
0,5876 an die manicvaltigkeit  
0,5877 manicvalt was ire nôt  
0,5878 Hectoris swert was alrôt  
0,5879 von sîner vîande bluote  
0,5880 mit grôzeme unmuote  
0,5881 lange er umbekreizte  
0,5882 Merion gegen im erbeizte  
0,5883 unt begunde sêre klagen  
0,5884 daz er im hette erslagen  
0,5885 Patroclum den küenen degen  
0,5886 dô sîn klage was gelegen  
0,5887 er sluoc in von dem rosse nider  
0,5888 Hector quam zuo vuoze wider  
0,5889 Merion hette es widergelt genomen  
0,5890 wen daz dâr zuo was kommen  
0,5891 von Athêne Menesteus  
0,5892 dô er zuo vuoze stuont alsus  
0,5893 dô bestuonden sie in beide  
0,5894 mit nîde unt mit leide

- 0,5895 Menesteus huop ûf sîn swert  
 0,5896 unt sluoc zuo ime wert  
 0,5897 sô er meist kunde  
 0,5898 dô wart im ein wunde  
 0,5899 als im die wunde geschach  
 0,5900 von dem kleide er ein tuoch brach  
 0,5901 in drî valten er ez vielt  
 0,5902 in die wunden er ez schielt  
 0,5903 dô beitte er niht mî  
 0,5904 aleine tete im sîn wunde wê  
 0,5905 er sluoc vaste umbe sich  
 0,5906 biz ir iegelich  
 0,5907 im rûme muoste geben  
 0,5908 dô begunde er îlen unt streben  
 0,5909 biz er ûf daz ros quam  
 0,5910 manigem er den lîp nam  
 0,5911 alsô gewundet sô er was  
 0,5912 er valte ir vile ûf daz gras  
 0,5913 dô quam im Ajax engein  
 0,5914 waz dâ von in zwein  
 0,5915 mit worten geschæhe  
 0,5916 daz ist alsô wæhe  
 0,5917 daz ich es iuch bereite  
 0,5918 als ich langer beite  
 0,5919 ir hât vile wole gehoeret  
 0,5920 wie Trôje wart zuostoeret  
 0,5921 dô sie Erkules wîlent brach  
 0,5922 unt waz in dem betehûse geschach  
 0,5923 daz Thelamon Esionam  
 0,5924 des küninges tohter nam  
 0,5925 umbe daz och dise hervart  
 0,5926 anderwerbe erhaben wart  
 0,5927 von vrouwen Esiônen  
 0,5928 der juncvrouwen schoenen  
 0,5929 gewan hêrre Thelamon  
 0,5930 einen harte schoenen sun  
 0,5931 als ich in biz her hân genant  
 0,5932 daz was Ajax den vant  
 0,5933 Hector bî der zîte  
 0,5934 vore Trôje in dem strîte  
 0,5935 unt quam mit im zuo worte  
 0,5936 sô vile daz er gehörte  
 0,5937 daz er sîn näher mâc was  
 0,5938 an sîneme vinger er dô las  
 0,5939 unt zalte vile rehte  
 0,5940 ire beider geslehte  
 0,5941 er sprach "mir ist wole kuntlich  
 0,5942 zuo Trôje was ein küninc rîche

- 0,5943 mîn eltervater Laomedon  
 0,5944 Priamus mîn vater was sîn sun  
 0,5945 Laomedontis tohter hiez Esionâ  
 0,5946 dîn muoter unt mîn vater alsô nâch  
 0,5947 under in gesippe sint  
 0,5948 sie sint beide eines mannes kint  
 0,5949 Esiona unt Priamus  
 0,5950 von zwein geswisteren sîn wir sus  
 0,5951 die êrsten kint her kommen"  
 0,5952 Ajax hette vernomen  
 0,5953 wie gesippe sie wâren  
 0,5954 dô en wiste er wie gebâren  
 0,5955 von grôzer liebe  
 0,5956 an buoche unt an brieve  
 0,5957 geschrîben ich niht en kunde  
 0,5958 dô sie gerecheneten zuo künde  
 0,5959 wie liep in was beiden  
 0,5960 daz sie sich solten scheiden  
 0,5961 daz leidete in mère  
 0,5962 danne ire lîp in liep wære  
 0,5963 Hector Ajaxen dô bat  
 0,5964 daz er rite in die stat  
 0,5965 mit im schouwen  
 0,5966 sîn wîp unt ander vrouwen  
 0,5967 sîne nifteln unt sîne neven  
 0,5968 "ich wil dir guot geleite geben  
 0,5969 beide dar unt here  
 0,5970 nû tuo unt gewere  
 0,5971 mich des ich gebeten hân  
 0,5972 sô hâst dû liebe getân  
 0,5973 allen dînen mâgen"  
 0,5974 dô sîne wort gelâgen  
 0,5975 Ajax sîne rede tete  
 0,5976 "ich leiste gerne dîne bete  
 0,5977 ich wil dare rîten  
 0,5978 niht in disen zîten  
 0,5979 ich tuon her nâch vile baz  
 0,5980 daz volc sprâche lîhte daz  
 0,5981 geschâhe im ungeræte  
 0,5982 daz ich ez gerâten hette  
 0,5983 ouwê unsælichkeit  
 0,5984 waz solte iemer groezer leit  
 0,5985 daz ich zuo schaden bin kumen  
 0,5986 den ich von rehte solte vrumen  
 0,5987 unt dâ niht solte wesen  
 0,5988 mit den ich solte genesen"  
 0,5989 als er sprechen wolte vort  
 0,5990 Hector nam im die wort

- 0,5991 úz dem munde  
0,5992 "ouwê dirre stunde  
0,5993 wê dem tage wê der zît  
0,5994 dô sich ane huop dirre nît  
0,5995 mîn klage ist dîn klage  
0,5996 ich en weiz waz mî sagen  
0,5997 swaz dû wilt daz tuon ich"  
0,5998 Ajax sprach "got behüete dich"  
0,5999 dô was ez âbentstunde  
0,6000 daz volc daz en kunde  
0,6001 swie gerne sô ez tæte  
0,6002 gestrîten alsô spâte  
0,6003 och hetten sie übel zît gehabet  
0,6004 dise vuoren in ire stat  
0,6005 jene in ire hamîden  
0,6006 unt schuofen iren runzîden  
0,6007 unt in selben ire gemach  
0,6008 als in zuo tuone dô geschach  
0,6009 als Hector zuo Trôje in reit  
0,6010 sie wurden sîn alle gemeit  
0,6011 grôz unt kleine  
0,6012 unt giengen im engein  
0,6013 muoter swester wîp maget  
0,6014 also sie êr hetten geklaget  
0,6015 klagen sie begunden  
0,6016 von êrst sîne wunden  
0,6017 "wir waren unsælic geboren  
0,6018 hetten wir dich einen verloren  
0,6019 got der hât dich erlöst  
0,6020 dû bist aleine unser trôst  
0,6021 wir hetten verloren hiute  
0,6022 lant unt liute  
0,6023 unt waren alle entân  
0,6024 wan daz wir dich einen hân"  
0,6025 sie zugen im úz die sarwât  
0,6026 sîn arzât sprach "des wirdet rât  
0,6027 er sol schiere wesen heil"  
0,6028 sie wâren des trôstes alle geil  
0,6029 im was sîn bette gereit  
0,6030 mit solicher zierheit  
0,6031 als ez küninge gezam  
0,6032 unt als er in daz bette quam  
0,6033 die dâ ezzen solten  
0,6034 oder mohten oder wolten  
0,6035 zuo tische sie sâzen  
0,6036 unt als sie gâzen  
0,6037 die vrouwen hetten einen strît  
0,6038 dâ mite kürzeten sie die zît

- 0,6039 sie redeten von manheit  
0,6040 wie der ritter dâ streit  
0,6041 wer dâ næhest Ectore  
0,6042 hette prîses gewunnen mêt  
0,6043 iegelîche sprach daz Parîs  
0,6044 næhest im hette den prîs  
0,6045 etelîche daz Troilus  
0,6046 etelîche daz Deiphebus  
0,6047 etelîche Polidamas  
0,6048 der in deme muote was  
0,6049 der was in in dem munde  
0,6050 biz an die stunde  
0,6051 daz sie slâfen solten gân  
0,6052 dô muosten sie die rede lân  
0,6053 dô ez quam ûf den tac  
0,6054 Hector lenger niht en lac  
0,6055 "wole ûf" sprach er "des ist zît  
0,6056 wir sulen wider in den strît"  
0,6057 die wîle quâmen boten gerant  
0,6058 die hetten die Kriechen dar gesant  
0,6059 Hectorem sie bâten  
0,6060 als ez was gerâten  
0,6061 daz er in tæte  
0,6062 einen vride stæte  
0,6063 zwêne mâñôde daz geschach  
0,6064 beidersît durch gemach  
0,6065 dô der vride was gegeben  
0,6066 bruder mâge unt neven  
0,6067 unt alle ire geslehte  
0,6068 ritter unt knechte  
0,6069 unt swer sie ouch wären  
0,6070 die bestateten sie mit êren  
0,6071 beide mit opfer unt mit gebete  
0,6072 als man bî der zît tete  
0,6073 dô diz geschach under des  
0,6074 dô klagete Achilles  
0,6075 Patroclum sînen gesellen  
0,6076 er begunde wunder stellen  
0,6077 er kuste in dô er tôt lac  
0,6078 "ouwê unsæliger slac  
0,6079 der dich mir hât genomen  
0,6080 wie ist mir dirre tôt kumen  
0,6081 ich was dû dû wär ich  
0,6082 beide dich unt mich  
0,6083 hette eine triuwe  
0,6084 dû bist iemer mîn riuwe  
0,6085 dîn nôt mîn nôt  
0,6086 ich bin mit dir halptôt

- 0,6087 dîn geist ist halp mit mir  
0,6088 ich gehirme niht ez sî daz wir  
0,6089 kumen zuosamene beide  
0,6090 mir geschæhe niht leide  
0,6091 op ich tôt wäre  
0,6092 gereche ich mîne swære  
0,6093 mîn leit unt mîn zorn  
0,6094 wîl daz ich dich hân verloren  
0,6095 stürbe ich danne ich wär es vrô"  
0,6096 dô er geklagete alsô  
0,6097 dô hiez er sîn vleisch unt sîne bein  
0,6098 legen in einen mermelstein  
0,6099 dâ stuont ûfe geschriben  
0,6100 daz er in strîte was tôt beliben  
0,6101 sô daz nie dechein sîn gelîche  
0,6102 alsô manlîche  
0,6103 bî sîner zîte  
0,6104 tôt beleip in strîte  
0,6105 Agomennon dô liez  
0,6106 als in bat unt hiez  
0,6107 daz volc allez gemeine  
0,6108 in einen mermelsteine  
0,6109 Prothesilaum begraben  
0,6110 mit güldînen buochstab'en  
0,6111 was geschriben dâr dâr obe  
0,6112 beide von sîneme lobe  
0,6113 wie er lop gewünne  
0,6114 von sîneme künne  
0,6115 unt von anderre sîner biderbicheit  
0,6116 als dô was gewonheit  
0,6117 dô mohten die Kriechen in zehen tagen  
0,6118 ire tötten niht zuosamene getragen  
0,6119 daz ir in zuo begrabene quam  
0,6120 den von Trôje geschach alsam  
0,6121 Priamus hiez sîner kebessüne einen  
0,6122 legen in einen mermelstein  
0,6123 daz was Cassibilaus  
0,6124 man legete in bî daz betehûs  
0,6125 dâ man vrouwen Junône  
0,6126 alle tage schône  
0,6127 beide sanc unt las  
0,6128 als dô site was  
0,6129 nû hoeret wie Cassandra sprach  
0,6130 dô sie die tötten alle sach  
0,6131 ziehen dar unt her  
0,6132 sô vile daz man ein wer  
0,6133 dâ mite mohte hân beleit  
0,6134 unt wär ez einer mîle breit

- 0,6135 "tôten unde tumben  
 0,6136 touben unt stummen  
 0,6137 mac man geweichen  
 0,6138 swenne man in zeichen  
 0,6139 mit dem vinger tuot  
 0,6140 ir hât ôren ougen muot  
 0,6141 witze kunst unt list  
 0,6142 nû weiz ich niht wie iuch armen ist  
 0,6143 ir en geloubet mir niht  
 0,6144 daz iuch iezunt ist geschiet  
 0,6145 daz müget ir grîfen unt sehen  
 0,6146 daz iuch noch sol geschehen  
 0,6147 daz müget ir dâ bî entstân  
 0,6148 daz ich iuch vore gesaget hân  
 0,6149 des ist ein teil worden wâr  
 0,6150 op ich noch sprechen tar  
 0,6151 sô wirdet es harte vite mî  
 0,6152 ach ach leider ouwê  
 0,6153 ez en wart nie stein sô hart  
 0,6154 ich en hette in etewaz bekârt  
 0,6155 unt noch baz einen stein  
 0,6156 denne der dechein  
 0,6157 die mit mir ein vleisch sint  
 0,6158 mîn muoter mîn vater unt ire kint  
 0,6159 bruoder Ector küene degen  
 0,6160 got der müeze dîn pflegen  
 0,6161 alsô müeze Parîsen  
 0,6162 got wole gewîsen  
 0,6163 unt mînen bruoder Troilum  
 0,6164 unt ouch Deiphebum  
 0,6165 ump den vünften würde es guot rât  
 0,6166 daz ist Elenus der verstât  
 0,6167 unt weiz vite wole  
 0,6168 waz uns noch geschehen sol  
 0,6169 got pflege iuwer algemeine  
 0,6170 burc lant unt geine  
 0,6171 küninc ritter sîne man  
 0,6172 wes neme ich mich an  
 0,6173 daz ich den wünsche heil  
 0,6174 der niergen dechein teil  
 0,6175 samene belîben mac  
 0,6176 ez was ein unsælic tac  
 0,6177 dô Helena in daz lant quam  
 0,6178 der tiuvel neme Elenam  
 0,6179 vervluochet sî sie iemer mî  
 0,6180 sô daz ir niemer geschê  
 0,6181 genâde noch êre  
 0,6182 swâ sie hine kêre"

- 0,6183 doch hette die maget  
0,6184 mēr gescholten unt geklaget  
0,6185 op man ez ir hette gestatet  
0,6186 ire muoter sie swīgen bat  
0,6187 ire vater ouch alsam tete  
0,6188 kūme geleiste sie ire bete  
0,6189 iezunt begunde  
0,6190 nāhen die stunde  
0,6191 daz der vride sich solte enden  
0,6192 dō gesâhen sie in allen enden  
0,6193 dannoch in dem vride  
0,6194 türme zinnen bervride  
0,6195 mûren erkære  
0,6196 unt wie in wäre  
0,6197 an dem graben unt an der graft  
0,6198 Hector tac unt naht  
0,6199 bûwete baz unt baz  
0,6200 biz er harte wole daz  
0,6201 gesach unt weste  
0,6202 daz die stat was veste  
0,6203 als dō diz geschach  
0,6204 sîne ritter er besach  
0,6205 wie diseme unt deme  
0,6206 daz unt diz wole gezeme  
0,6207 in den rât unt in den strît  
0,6208 die wîle klageten andersît  
0,6209 die Kriechenvürsten under des  
0,6210 der herzoge Polimedes  
0,6211 daz ire rihtære  
0,6212 Agomennon niht en wäre  
0,6213 von solicheme geslehte  
0,6214 daz er von rehte  
0,6215 soliches volkes solte pflegen  
0,6216 er wær ouch niht ein solich degen  
0,6217 daz er dâ zuo gezæme  
0,6218 daz man einen andern næme  
0,6219 dâ wâren vile vürsten  
0,6220 die baz gestrîten torsten  
0,6221 manic rede dâ geschach  
0,6222 iegelîcher sînen muot sprach  
0,6223 beide sus unt sô  
0,6224 biz sie sich geebeneten dō  
0,6225 mit sôgetânen worten  
0,6226 die dâ zuo gehörten  
0,6227 als die rede gelac  
0,6228 dō was kumen der tac  
0,6229 daz der vride ûz gienc  
0,6230 sie griffen an ire alte dinc

- 0,6231 Agomennon nam ir war  
 0,6232 unt was der êrste mit sîner schar  
 0,6233 dâr nâch Achilles  
 0,6234 dâr nâch Diomedes  
 0,6235 Menelaus dâr nâch  
 0,6236 den andern was allen gâch  
 0,6237 vürsten vrîen dienestman  
 0,6238 Hector dort andersît began  
 0,6239 sîne ritterschaft scharen  
 0,6240 zuo vorderest wolte er selber varen  
 0,6241 dâr nâch scharte sich  
 0,6242 sîne bruoder ir iegelich  
 0,6243 unt alsô hêrre Hector hiez  
 0,6244 daz volc man dô zuo velde liez  
 0,6245 den vrouwen was zuo den zinnen gâch  
 0,6246 unt sâhen iren vriunden nâch  
 0,6247 ûz den venstern überal  
 0,6248 sie klummen oben ûf den sal  
 0,6249 dâ sie die venster vunden  
 0,6250 dâ sie sâzen unt stuonden  
 0,6251 dô gleiz ire varwe der sunnen engein  
 0,6252 alsô schône sô die sunne schein  
 0,6253 sie zeigeten mit den vingern dar  
 0,6254 dâ sie sâhen in die schar  
 0,6255 ire man unt ire amîs  
 0,6256 sie sprâchen "dâ rîtet Parîs  
 0,6257 unt dâ hêrre Hector  
 0,6258 den andern allen bevore  
 0,6259 dâ rîtet ouch Eneas  
 0,6260 unt dâ hêrre Polidamas  
 0,6261 beide vürewert unt vort  
 0,6262 dirre hier jener dort  
 0,6263 got der müeze ir aller pflegen"  
 0,6264 vrouwen gelîch tet iren segen  
 0,6265 unt ire gebet über in las  
 0,6266 der ir allerliebest was  
 0,6267 ir iegelîche dô tete  
 0,6268 daz sie kunde mit gebete  
 0,6269 wende des was in nôt  
 0,6270 man sach dâ die schilde rôt  
 0,6271 grüene unt wîze  
 0,6272 houwen mit vlîze  
 0,6273 Hector der liez umbe gân  
 0,6274 als er dâ vore hette getân  
 0,6275 mit sper unt mit schilde  
 0,6276 ûf dem gevilde  
 0,6277 begunde stieben der melm  
 0,6278 man sluoc die swert dâ in den helm

- 0,6279 unt machete dâr unden  
0,6280 die vile tiefen wunden  
0,6281 beide velt unt gras  
0,6282 daz dâ vore vile eben was  
0,6283 daz was mit tôten als beleit  
0,6284 swer Hectori widerreit  
0,6285 der liez im daz leben  
0,6286 er bat im anders niht geben  
0,6287 zuo rante under des  
0,6288 der starke degen Achilles  
0,6289 hêrren Peleusis sun  
0,6290 den dâ zôch Ciron  
0,6291 halp ros unt halp man  
0,6292 der brâhte in manic dinc an  
0,6293 von manheit lârte er in vile  
0,6294 ouch lârte er in von spile  
0,6295 gevuocheit maniger hande  
0,6296 man saget daz in dem lande  
0,6297 sîner gelîche wär dechein  
0,6298 als in dem strîte wole schein  
0,6299 zuo vuozzen im harte wole gezam  
0,6300 swenne er aber zuo rosse quam  
0,6301 sô gezam im vile baz  
0,6302 daz ros dâ er ûfe saz  
0,6303 daz hette der wolken snelheit  
0,6304 sîn sarwât solicher schoenheit  
0,6305 unt von solicher zierde was  
0,6306 daz der andern als ein glas  
0,6307 unt sîne als ein karfunkelstein  
0,6308 ûf der walstat schein  
0,6309 dô dô quam in den rinc  
0,6310 Achilles der edel jungelinc  
0,6311 mit dem rosse sprangte er dâr  
0,6312 des wart Hector gewar  
0,6313 er ruorte im engein  
0,6314 mit handen unt mit beine  
0,6315 strebete dirre ûf jenen  
0,6316 under einander sie grinen  
0,6317 als zwêne hunde  
0,6318 ir deweder en kunde  
0,6319 den andern nihtes gevrägen  
0,6320 dô sie des lange pflâgen  
0,6321 dô wart ein zogen dâ erhaben  
0,6322 von dem mer biz an den graben  
0,6323 unt aber dâ hin wider  
0,6324 Hector hurte in doch dâr nider  
0,6325 daz von sîneme valle  
0,6326 die erde erbibete alle

- 0,6327 wande er was swær  
 0,6328 wie swær er doch wäre  
 0,6329 snellîche er ûf quam  
 0,6330 Hector im daz ros nam  
 0,6331 daz werte sêre Achilles  
 0,6332 er sprach "ez ist mîn" jener "wes"  
 0,6333 dirre "mîn"  
 0,6334 jener "dîn"  
 0,6335 "entriuwen já"  
 0,6336 "ez en ist" "ez ist nû lá"  
 0,6337 ez wær im liep oder leit  
 0,6338 Achilles ûf daz ros schreit  
 0,6339 êr er vollen ûf geschrîte  
 0,6340 dô rante er ûf in dâr mite  
 0,6341 unt sluoc in gerihte  
 0,6342 under daz anesihte  
 0,6343 ump die nasen unt den munt  
 0,6344 daz er sêre wart gewunt  
 0,6345 Hector des ouch niht vergaz  
 0,6346 er geræche ouch daz  
 0,6347 beide mit stôzen unt mit slegen  
 0,6348 dô begonden zuo legen  
 0,6349 von beider sít ire beider manne  
 0,6350 ein grimmer strît huop sich dô an  
 0,6351 under disen hêrren zwein  
 0,6352 wäre dâ tôt beliben ein  
 0,6353 oder líhte beide  
 0,6354 wen daz leit mit leide  
 0,6355 aldâ gescheiden wart  
 0,6356 ir was vile dâr zuo gekârt  
 0,6357 die ez undernâmen  
 0,6358 dise dâr zuo kâmen  
 0,6359 einsít Diomedes  
 0,6360 andersít Troilus under des  
 0,6361 unt die mit in wâren  
 0,6362 ire swert dâ schâren  
 0,6363 ïsen als ein scharesahs  
 0,6364 schroetet hâr unt vahs  
 0,6365 dâ vuor daz sper durch den man  
 0,6366 als er hette niht an  
 0,6367 Diomedes Troilô  
 0,6368 quam engein gehurt sô  
 0,6369 daz sie vielen beide  
 0,6370 dô wart in vile leide  
 0,6371 man saget von Diomêde  
 0,6372 daz er zuo rosse quæme  
 0,6373 êr Troilus des schaden nam  
 0,6374 daz er zuo rosse êr quam

- 0,6375 er sluoc ime manigen slac grôz  
 0,6376 Troilus des genôz  
 0,6377 daz er im daz ros erstach  
 0,6378 solich gelücke im geschach  
 0,6379 ir ietweder dô zuo vuoze gienc  
 0,6380 sie sluogen sich umbe den rinc  
 0,6381 beide gelîche  
 0,6382 harte manlîche  
 0,6383 Parîs quam dô zuo gehurt  
 0,6384 dem er daz wîp hette entvuort  
 0,6385 die schoenen Helenam  
 0,6386 Menelaus im zuo quam  
 0,6387 ire volc rante ouch hin zuo  
 0,6388 diz was an dem tage vruo  
 0,6389 rehte gegen morgen  
 0,6390 dâ geschach mit sorgen  
 0,6391 leit unt quâle  
 0,6392 durch den vloc die strâle  
 0,6393 hier unt dâ ûz unt vort  
 0,6394 eineme andern durch des schildes ort  
 0,6395 unt durch den der dâr under saz  
 0,6396 unt durch den dritten vürebaz  
 0,6397 swenne ein pfîl dâr nâch quam  
 0,6398 zwein er den lîp nam  
 0,6399 in dem dritten er behafte  
 0,6400 der mit dem schafte  
 0,6401 stach ir zwêne oder drî  
 0,6402 unt als einer wolte dâ bî  
 0,6403 einen andern mit dem swerte slân  
 0,6404 sô muoste er selbe den lîp lân  
 0,6405 swenne der vuozgenge  
 0,6406 in daz gedrenge  
 0,6407 mit zwein beinen gespranc  
 0,6408 mit einen beine er ûz hanc  
 0,6409 unt als der dô erhuop den slac  
 0,6410 die hant im bî dem beine lac  
 0,6411 ûf deme sande  
 0,6412 swenne der ander wânte  
 0,6413 beide vuoz unt hant  
 0,6414 wider bringen in sîn lant  
 0,6415 sô mochte man in schouwen  
 0,6416 als einen stoc behouwen  
 0,6417 swer dâ viel wole gesunt  
 0,6418 ungeslagen unt vol gesunt  
 0,6419 sô mochte er vore den pferden  
 0,6420 sich erheben niht von der erden  
 0,6421 swenne sich dirre wole erhuop  
 0,6422 unt nihtes übels besuop

- 0,6423 êr er sich vollen hette erhaben  
0,6424 sô hette er der wunden entsaben  
0,6425 als er sich hette ûf gezogen  
0,6426 biz an den satelbogen  
0,6427 daz er in mit der hant begreif  
0,6428 unt als er in den stegereif  
0,6429 sînen vuoz dare bôt  
0,6430 sô lac er mit dem pferde tôt  
0,6431 unt swer durch sînen zorn  
0,6432 daz ros hiew mit den sporen  
0,6433 sô negelte im des pfiles zein  
0,6434 zuo dem rosse daz bein  
0,6435 Hector begienc dô grôzen prîs  
0,6436 alsô tet ouch Parîs  
0,6437 dô diz gesach Boetes  
0,6438 dô rante er zuo under des  
0,6439 Hector rante im engein  
0,6440 dô huop ez sich von in zwein  
0,6441 vile baz denne êr  
0,6442 Hector en beitte niht mî  
0,6443 er sluoc in mitten enzwei  
0,6444 Archilodus sîn zeichen schrei  
0,6445 der des hêrren mâc was  
0,6446 Hector kûme vore im genas  
0,6447 sô sêre er Hectoren stach  
0,6448 daz im der schaft in dem lîbe brach  
0,6449 hier nam er ane sîn wert  
0,6450 Hector huop ûf sîn swert  
0,6451 unt sluoc in nider in den sant  
0,6452 unt begreif daz ros mit einer hant  
0,6453 mit der andern den man  
0,6454 dâ huop sich die nôt an  
0,6455 ein ûz der mâzen grôz strît  
0,6456 umbe mitten morgenzt  
0,6457 den Kriechen geschach grôz gewalt  
0,6458 dirre wart hier gevalt  
0,6459 dirre beleip unberat  
0,6460 jener wart dâ getrat  
0,6461 der jener gevangen  
0,6462 wunder wart begangen  
0,6463 mit zornigem muote  
0,6464 sie ranten in dem bluote  
0,6465 als in eineme pfuole  
0,6466 man saget uns von wuole  
0,6467 waz mohte grôzer wuol wesen  
0,6468 dâ en konde nieman genesen  
0,6469 Achilles wart des geware  
0,6470 dô gewan er von zorne ein varwe

- 0,6471 die dâr zuo gehörte  
 0,6472 daz swert daz er vuorte  
 0,6473 versuochete er alzuo sâre  
 0,6474 waz dâr ane wäre  
 0,6475 an eineme dem er quam engein  
 0,6476 Priamis süne ein  
 0,6477 úz den bastharten  
 0,6478 er sluoc in in die swarten  
 0,6479 durch daz hirn unt durch den munt  
 0,6480 durch herze dô ez bestuont  
 0,6481 dâ hette ez gespalten  
 0,6482 den satel beidentalben  
 0,6483 in dem rosse beleip der slac  
 0,6484 Doroschalcus dâ tôt lac  
 0,6485 unt sîn ros dâ mite  
 0,6486 daz was ein unsanfte snite  
 0,6487 ire klage wart grôzlich  
 0,6488 ouch hette ir iegelich  
 0,6489 geklaget vile mère  
 0,6490 op im leide niht en wäre  
 0,6491 ump sîn selbes nôt  
 0,6492 Troilus wolte sînen tôt  
 0,6493 rechen unt Parîs  
 0,6494 sie versuocheten ez manige wîs  
 0,6495 sie liezen vaste zuo legen  
 0,6496 beide mit stichen unt mit slegen  
 0,6497 alsô tet Polidamas  
 0,6498 als dô ein wîle was  
 0,6499 dô rante zuo Hector  
 0,6500 gegen im Prothenor  
 0,6501 unt hurte in nider in den kreiz  
 0,6502 Hector im daz verweiz  
 0,6503 êr er dannen kérte  
 0,6504 er sluoc in mit dem swerte  
 0,6505 alsô wît als ein vurch  
 0,6506 oben in unt niden durch  
 0,6507 dô en sûmete Archilaus niht  
 0,6508 im was vile leide geschiet  
 0,6509 an sînen mâge  
 0,6510 der an sîner pflâge  
 0,6511 mit im dar quam  
 0,6512 unt wolte den lîchnam  
 0,6513 den vianden nemen mit gewalt  
 0,6514 dâ von Trôje wart ervalt  
 0,6515 tûsent ritter unt erslagen  
 0,6516 als ich daz buoch hoeren sagen  
 0,6517 dô was ez umbe mitten tac  
 0,6518 dô Prothenor tôt lac

- 0,6519 die Kriechen wolten in tôt hân  
0,6520 die Trôjære wolten sîn niht lân  
0,6521 alsô werte der strît  
0,6522 biz an die vesperzît  
0,6523 iedoch sie in wider gewunnen  
0,6524 bî schînender sunnen  
0,6525 vile leides doch dâr abe geschach  
0,6526 die wîle dirre jenen rach  
0,6527 unde wânte in hân gerochen  
0,6528 dô was im daz houbet zuobrochen  
0,6529 einer quam gegen zwein  
0,6530 unt zwêne quâmen drîn engein  
0,6531 drî gegen vieren riten  
0,6532 viere gegen vünven striten  
0,6533 vünve sehse bestuonden  
0,6534 sehse siben überwunden  
0,6535 sibene ranten ahte an  
0,6536 ahte bestuonden niun manne  
0,6537 niune tâten zehenen gewalt  
0,6538 als ich biz her hân gezalt  
0,6539 stige ich ûfwert alsô  
0,6540 mîn zal würde alsô hôh  
0,6541 daz von eines mannes nôt  
0,6542 tûsent muosten belîben tôt  
0,6543 alsô tet von Prothenorê  
0,6544 tûsent ritter oder mî  
0,6545 dannoch wær ir mî beliben  
0,6546 hette sie die naht niht vertriben  
0,6547 wende ûf dem ringe  
0,6548 sus getâner dinge  
0,6549 die edel ritter muosten pflegen  
0,6550 swer ez rehte wil wegen  
0,6551 sô ist der helt unt der zage  
0,6552 gelîch zuo stiche unt zuo slage  
0,6553 alsô swarz unt wîz  
0,6554 der küene der hât grôzen vlîz  
0,6555 wie er sînen schilt wole getrage  
0,6556 sô vliuhet gerne der zage  
0,6557 des muoz er sich schamen  
0,6558 sô jener beheltet heldes namen  
0,6559 dô daz volc sô lange vaht  
0,6560 daz sie vore der vinstern naht  
0,6561 niht mîr gesehen kunden  
0,6562 zogen sie begunden  
0,6563 die von Trôje an ire gewalt  
0,6564 die von Kriechen an ire behalt  
0,6565 rehte an solich gemach  
0,6566 als in zuo dem êrsten strîte geschach

- 0,6567 sie begunden beidersît klagen  
 0,6568 daz ire vriunde wârn erslagen  
 0,6569 Priamus sînen sun  
 0,6570 Prothenoren Agomennon  
 0,6571 er sprach "ich bite unt ist mîn rât  
 0,6572 daz ir ein arbeit bestât  
 0,6573 unt helfet mir dâr zuo  
 0,6574 wie ich den leit getuo  
 0,6575 der uns allez leit tuot  
 0,6576 unt uns vile sîre hât gemuot  
 0,6577 Hectorem ich meine  
 0,6578 erslüegen wir in einen  
 0,6579 sô hetten sie daz lant verloren  
 0,6580 unt hetten si ez alle gesworen  
 0,6581 daz si ez behalten solten  
 0,6582 gewinnen wir ez doch wolten  
 0,6583 âne ir aller danc  
 0,6584 über kurz oder über lanc  
 0,6585 ouch wil ich noch mî  
 0,6586 reden von Hectorê  
 0,6587 man tuo im denne unreht  
 0,6588 er ist des lîbes ein guot kneht  
 0,6589 unt von stæteme herzen ein man  
 0,6590 umbe daz ich im des tôdes gan  
 0,6591 doch en ist er es niht wert  
 0,6592 nû wäre doch sîn einez swert  
 0,6593 swie guot helt sô er sî  
 0,6594 wir hetten unser vürsten drî  
 0,6595 âne die er anders hât erslagen  
 0,6596 Prothesilaum ich klage  
 0,6597 ump Patroclô ist mir leit  
 0,6598 wan Hectoris manheit  
 0,6599 dise lebeten unt ouch Prothenor  
 0,6600 diz hât allez Hector  
 0,6601 uns unt den unsern getân  
 0,6602 als ich iuch gesaget hân  
 0,6603 swer sô nû wäre  
 0,6604 der sich dirre swære  
 0,6605 wolte underwinden  
 0,6606 ez gevromete sînen kinden  
 0,6607 unt ouch sîneme geslehte  
 0,6608 unt quæme im zuo rehte  
 0,6609 an êren unt an gevüere  
 0,6610 op ich einen ervüere  
 0,6611 der dâ zuo tohte  
 0,6612 unt ez getuon mohte  
 0,6613 unt ez danne tæte  
 0,6614 prîs er des hæte

- 0,6615 er hette och harte wole verschult  
 0,6616 wolte er silber oder golt  
 0,6617 oder bürge oder lant  
 0,6618 daz heize ich im zuohant  
 0,6619 beide gewinnen unt geben  
 0,6620 Hector hette verloren daz leben  
 0,6621 dô im Achilles widerreit  
 0,6622 wan die unsälichkeit  
 0,6623 daz im sîn bruoder zuo quam  
 0,6624 dem er doch den lîp nam"  
 0,6625 diz sprach er durch den willen  
 0,6626 daz er Achillen  
 0,6627 dâr zuo bræhte  
 0,6628 daz er dâr an dæhte  
 0,6629 daz geschach alsô  
 0,6630 Achilles dâhte dâr ane dô  
 0,6631 unt entvienc die wort  
 0,6632 als er sie von im hette gehôrt  
 0,6633 dô er si hette gevangen  
 0,6634 dô was ez ergangen  
 0,6635 andersît als hier  
 0,6636 sie rieten wenne oder wie  
 0,6637 weme waz oder wâ  
 0,6638 hier geschæhe also dâ  
 0,6639 och was ire tisch bereit  
 0,6640 unt ire spîse dâr ûf geleit  
 0,6641 ir iegelich tranc unt az  
 0,6642 dirre wirs dirre baz  
 0,6643 als sie an dem werde  
 0,6644 unt an der grôzen swerde  
 0,6645 an lemede unt an wunden  
 0,6646 zuo der zît state vunden  
 0,6647 die hêrren sich halten  
 0,6648 die knechte wunder stalten  
 0,6649 mit den scheltworten  
 0,6650 die dâr zuo gehörten  
 0,6651 mit der rede spæhe  
 0,6652 als ez noch geschæhe  
 0,6653 würde ein burc besezzen  
 0,6654 des würde niht vergezzen  
 0,6655 dô der wahtær entsuop  
 0,6656 daz sich der tac ûf huop  
 0,6657 unt grâwen begunde  
 0,6658 er kunte die stunde  
 0,6659 sîn stimme harte lûte erschal  
 0,6660 "der tac schînet überal  
 0,6661 wole ûf rittere ez ist tac"  
 0,6662 daz die burc alle erschrac

- 0,6663 dâ wart lenger niht gebîtet  
0,6664 sie wâren gereit in den strît  
0,6665 michel schierer denne dâ bevore  
0,6666 ûz reit Hector  
0,6667 unt mit im Eneas  
0,6668 unt Polidamas  
0,6669 Andenor unt Troilus  
0,6670 Parîs unt Deiphebus  
0,6671 unt der küninc Mennon  
0,6672 gegen disen Agomennon  
0,6673 Menelaus unt Ulixes  
0,6674 Ajax unt Achilles  
0,6675 unt die dar gehôrten  
0,6676 beidersît sie vuorten  
0,6677 volkes ûzer mâze  
0,6678 sie tâten mit den gelâze  
0,6679 unt mit der gebære  
0,6680 als in niht wäre  
0,6681 ump ire leit leide  
0,6682 dô üebeten sie beide  
0,6683 ire gelâz unt ire tât  
0,6684 als ir dâ vore vernomen hât  
0,6685 von irere zierheit  
0,6686 wie sie wâren bereit  
0,6687 als ich ez von dem buoche hân  
0,6688 solte iz anderwerbe bestân  
0,6689 daz ich gesaget hân êr  
0,6690 sô tæte ich anders niht mî  
0,6691 wan daz ich arbeitte  
0,6692 unt mîne rede bereitte  
0,6693 dâr sie von rechte wesen sal  
0,6694 kurz enge unt smal  
0,6695 dâr êr geschach ein leit  
0,6696 von der manicvaltigkeit  
0,6697 dâ wart sîn nû sô vile gestalt  
0,6698 daz ez wart übermanicvalt  
0,6699 dâ rante schar gegen schare  
0,6700 speres ort swert bare  
0,6701 wurden dâ geurboret  
0,6702 daz in beide ecke unt ort  
0,6703 swâ sie wurden zuo getrieben  
0,6704 entweder in dem lîbe beliben  
0,6705 oder êr sie dâr in quâmen  
0,6706 des mannes lîp nâmnen  
0,6707 oder vuoren durch andersît  
0,6708 mit in zwein wart der nît  
0,6709 gesterket lange wîle  
0,6710 alsô geschach auch von den pfîle

- 0,6711 alsô von den zwein geschach  
0,6712 manic grôz ungemach  
0,6713 von gevengnisse  
0,6714 unt von verrætenisse  
0,6715 mit hurte mit stôze  
0,6716 mit ruofe mit dôze  
0,6717 mit vlühte mit valle  
0,6718 mit strîte mit schalle  
0,6719 allez mit sorgen  
0,6720 vruo hin gein morgen  
0,6721 gegen âbent spæte  
0,6722 solich ungeræte  
0,6723 daz dâ niht widerstuont  
0,6724 denne tôt oder tôtwunt  
0,6725 Hector begienc dâ grôzen prîs  
0,6726 als tet och Parîs  
0,6727 die bruoder alle gemeine  
0,6728 grôz unt kleine  
0,6729 ez wäre der basthart  
0,6730 oder von der edeln art  
0,6731 die wîle sie allermeist striten  
0,6732 Agomennon quam geriten  
0,6733 gegen hîrre Hectorê  
0,6734 dô beitte Hector niht mî  
0,6735 sînen schilt er im zuoschriet  
0,6736 Achilles en sûmete och niht  
0,6737 er quæme im engein gerant  
0,6738 unde zuoschriet im die bant  
0,6739 die den helm bunden  
0,6740 dô sluoc er im âne wunden  
0,6741 einen slac daz der helm  
0,6742 viel zuo der erden in den melm  
0,6743 dâ wäre Hector der degen  
0,6744 gewislîchen tôt gelegen  
0,6745 wenne daz dâ bî im was  
0,6746 Troilus unt Eneas  
0,6747 sie ranten zuo beide  
0,6748 dâ wart leit mit leide  
0,6749 von überleide undermangt  
0,6750 dô quâmen mit in zuo gesprangt  
0,6751 die stolzen Trôjâne  
0,6752 unt ire kompâne  
0,6753 dâ mohte man wunder schouwen  
0,6754 Achilles gienc dâ houwen  
0,6755 under in allen eine  
0,6756 wîlen gein dem beine  
0,6757 wîlen gein vuoze gein dem knie  
0,6758 sîn arm der gelac nie

- 0,6759 êr er allez daz zuosluoc  
 0,6760 swar im die hant daz swert truoc  
 0,6761 Achilles nam dâr ane wert  
 0,6762 als wole tûsent als ein swert  
 0,6763 unde alsô manic strâle  
 0,6764 alsô manic pfîl zuo mâle  
 0,6765 quâmen ûf in gevarn  
 0,6766 des en mohte er niht bewarn  
 0,6767 im würde der schilt sô zuoslagen  
 0,6768 daz er ez niht mohte getragen  
 0,6769 sô manic was der stücke  
 0,6770 man saget von gelücke  
 0,6771 unt von sâlden  
 0,6772 man konde eine nâlden  
 0,6773 niergen an im gestecket hân  
 0,6774 sô sêre was er über gegân  
 0,6775 unt mit pfîlen bestaht  
 0,6776 umbe daz er alsô lange vaht  
 0,6777 daz in sîn bluot bespræjete  
 0,6778 als er gewalget hâte  
 0,6779 mitten ûf der walstat  
 0,6780 dâ daz volc lac ertrat  
 0,6781 doch wart sîn guot rât  
 0,6782 von einen manne soliche tât  
 0,6783 zuo strîte nie mî geschach  
 0,6784 Diomedes gesach  
 0,6785 daz er sich sô werte  
 0,6786 unde maniger slege herte  
 0,6787 unde stiche genas  
 0,6788 ouch sach er wâ Eneas  
 0,6789 sluoc alumbe sich  
 0,6790 eineme helede wole gelîch  
 0,6791 daz ros er umbe kârte  
 0,6792 unt menete ez sô harte  
 0,6793 daz er ûf Eneam  
 0,6794 mit sô starker tjoste quam  
 0,6795 unt mit deme schafte  
 0,6796 an dem rippe behafte  
 0,6797 er treip den schaft vürebaz  
 0,6798 unt stach in daz er besaz  
 0,6799 êr er in lieze  
 0,6800 ûf deme grieze  
 0,6801 er sprach "nû lic al stille  
 0,6802 wende dû Achille  
 0,6803 leide tâte unt mir  
 0,6804 diz lôn habe dû dir  
 0,6805 biz dir mîr werde"  
 0,6806 dô müejete in sîn swerde

- 0,6807 doch wart im der swerde buoz  
0,6808 er quam wider zuo vuoze  
0,6809 Hector quam zuo under des  
0,6810 alsô tet Achilles  
0,6811 dâ er den slac liez êr  
0,6812 dâ sluoc er zweier nû mî  
0,6813 dicke unt alsô lange  
0,6814 biz im über daz wange  
0,6815 von dem houbete vlôz daz bluot  
0,6816 daz er es genas daz was genuoc  
0,6817 dô kârte Hector sînen haz  
0,6818 an einen andern vürebaz  
0,6819 unde neigete sînen schaft  
0,6820 ûf einen ander mit solich kraft  
0,6821 Diomedes genant  
0,6822 daz er in stach ûf den sant  
0,6823 ouch erholete sich der  
0,6824 er spranc ûf unt begreif sîn sper  
0,6825 mit beiden sînen handen  
0,6826 unt gienc sîn leit anden  
0,6827 zuo reit Agomennon  
0,6828 unt Ajax Thelamonis sun  
0,6829 Menelaus unt Ulixes  
0,6830 Nestor unt Polimedes  
0,6831 Politetes unt Stelenus  
0,6832 unt der grôze Neptolomus  
0,6833 Polidarius unt Thoas  
0,6834 Menesteus unt Philithoas  
0,6835 Aschalaphus unt Archilogus  
0,6836 Theseus unt Euriolus  
0,6837 unde der küninc von Kartaginê  
0,6838 unt der Kriechen dannoch mî  
0,6839 vrîen unt vürsten  
0,6840 die wole vehten torsten  
0,6841 die von Trôje in ander sît  
0,6842 quâmen engein in den strît  
0,6843 Pandarus unt Karas  
0,6844 Adrastus unt Samias  
0,6845 Remus von Zizonie  
0,6846 unt von Calzedonie  
0,6847 der küninc Eufemes  
0,6848 unt der küninc Miceres  
0,6849 Nesteus von Arpon  
0,6850 Archilogus von Sarpedon  
0,6851 unt Philomenîs  
0,6852 unt ouch hêrre Parîs  
0,6853 unt sîne bruoder alle  
0,6854 unt under in mit schalle

- 0,6855 der küene helt Hector  
0,6856 ouch quam Anthenor  
0,6857 unt Polidamas  
0,6858 ez was wunder swer genas  
0,6859 in dem kreize  
0,6860 dâ wart grôz gereize  
0,6861 gedense unt gezerge  
0,6862 allez mit erge  
0,6863 unt mit unmuote unminne  
0,6864 zuo verlust unt zuo gewinne  
0,6865 dâ was von gedrenge  
0,6866 daz wîte velt zuo enge  
0,6867 unt daz enge velt zuo wît  
0,6868 als ez quam in der zît  
0,6869 daz ir ein mit vluht genas  
0,6870 der kurze wec im zuo lanc was  
0,6871 sô dirre vlôch unt hinder sach  
0,6872 ein ander im in daz ouge stach  
0,6873 êr er daz getæte  
0,6874 den pfîl er selbe hæte  
0,6875 sô diseme ein ander helfe bôt  
0,6876 sô was im selber hülfe nôt  
0,6877 sô der unt der zuo quam  
0,6878 sô geschach im alsam  
0,6879 waz sol lenger zale  
0,6880 dirre lac wibelvale  
0,6881 der lac tôtbleich  
0,6882 dirre den slegen vore weich  
0,6883 dirre viel unt vant  
0,6884 daz er niemer mî verwant  
0,6885 an lîbe unt an guote  
0,6886 der krouch ûz dem bluote  
0,6887 der wart dâ vunden  
0,6888 mit maniger grôzen wunden  
0,6889 dem kruchen dâr ûz die maden  
0,6890 anders geschach dâ grôze schade  
0,6891 in den selben stunden  
0,6892 lac ir dâ zuodrunden  
0,6893 sô vile unt zuoswalt  
0,6894 daz in wart zwivalt  
0,6895 über die manicvaltigkeit  
0,6896 beide ire angst unt ire leit  
0,6897 dâ wart niht gebeitet mî  
0,6898 gegen Agomennonê  
0,6899 hêrre Pandarus stach  
0,6900 daz in beiden geschach  
0,6901 zuo der erden der val  
0,6902 dâ rante zuo under in al

- 0,6903 Menelaus unt Parîs  
 0,6904 wole gewâpenet alle wîs  
 0,6905 dâ sluoc er Parîsen  
 0,6906 wan sîn guot ïsen  
 0,6907 er wäre tôt dâ gelegen  
 0,6908 Menelaus der degen  
 0,6909 stach im ûf den lîp  
 0,6910 daz Helena ir beider wîp  
 0,6911 von dem stiche erschrac  
 0,6912 wende Parîs ûf der erden lac  
 0,6913 Adrastus unt Ulixes  
 0,6914 quâmen zuosamene under des  
 0,6915 waz sol nû der rede mî  
 0,6916 Adrastus von Ulixê  
 0,6917 wart zuo der erden geslagen  
 0,6918 unt verlös sînen pfagen  
 0,6919 von Polibête  
 0,6920 geschach Arpoin ungeräte  
 0,6921 daz er nâch tôt was  
 0,6922 wan daz er mit der vluht genas  
 0,6923 zuo reit Neptolomus  
 0,6924 unt gein im Archilogus  
 0,6925 ir ietweder ûf den ander stach  
 0,6926 daz sie vielen ûf daz grach  
 0,6927 Polimedes Polidamam  
 0,6928 under des in ane quam  
 0,6929 Polidamas mit solicher kraft  
 0,6930 treip ûf in sînen schaft  
 0,6931 daz er in gewunt wânte hân  
 0,6932 Polimedes liez dare gân  
 0,6933 ûf eineme rosse vile snel  
 0,6934 unt ritzete im vleisch unt vel  
 0,6935 unt hurte in alsô sêre  
 0,6936 êr er kumen wäre  
 0,6937 zuo der erden dô klageten sînen val  
 0,6938 die von Trôje überal  
 0,6939 dô er geviel under des  
 0,6940 dô sprach Polimedes  
 0,6941 mir ist kommen mære  
 0,6942 ir sît ein minnære  
 0,6943 unt sît wole in vrouwen lobe  
 0,6944 unt müget ouch wole zuo hove  
 0,6945 sint ir ein minnær sît  
 0,6946 sô ist ez schande daz ir lît  
 0,6947 alsô lasterlîche  
 0,6948 ûf diseme ertrîche  
 0,6949 dô schamete sich Polidamas  
 0,6950 sîn geselle quam dô Karas

- 0,6951 gegen im quam Stelenus  
 0,6952 dâ geschach Karen alsus  
 0,6953 als dem êrsten geschach  
 0,6954 Stelenus in dâr nider stach  
 0,6955 der von Athêne ein helt gemeit  
 0,6956 Laissirandere zuo reit  
 0,6957 sîn ros in hôhen sprungen gienc  
 0,6958 er quam ûf den rinc  
 0,6959 mit reiner vuore zuo gerant  
 0,6960 Menesteus was er genant  
 0,6961 gein im Philemenîs  
 0,6962 sie quâmen zuosamene in al die wîs  
 0,6963 daz die hêren beide  
 0,6964 schieden mit leide  
 0,6965 Philemenîs stach dare  
 0,6966 Menesteus nam es ware  
 0,6967 unt gewartete dem stiche  
 0,6968 êr er doch entwiche  
 0,6969 sô behielt hêrre Philemenîs  
 0,6970 an dem stiche grôzen prîs  
 0,6971 er stach in nider in den sant  
 0,6972 unt nam sîn ros mit einer hant  
 0,6973 mit der andern daz swert  
 0,6974 Miceres rante darwert  
 0,6975 gegen dem küninge von Kartaginê  
 0,6976 dâ geschach Micerê  
 0,6977 prîs unt êre  
 0,6978 er hurte in alsô sêre  
 0,6979 daz er zuo der erden quam  
 0,6980 Miceres sîn ors nam  
 0,6981 als der gevallen was  
 0,6982 zuo quam Philithoas  
 0,6983 Remis gein im dare  
 0,6984 ir ietweder mit sîner schare  
 0,6985 an lenge unt an wîte  
 0,6986 begiengen si mit strîte  
 0,6987 solich ungebære  
 0,6988 daz in ire swære  
 0,6989 niht mohte werden buoz  
 0,6990 êr sie quæmen zuo vuoze  
 0,6991 dâ schiet iren strît  
 0,6992 Theseus einsît  
 0,6993 Euriolus dâr engein  
 0,6994 dâ sîn manheit ane schein  
 0,6995 in der zît dâ geschach  
 0,6996 beidersît ungemach  
 0,6997 dô reit Thelamon  
 0,6998 gegen im Sarpedon

- 0,6999 dô mohte man aber sehen  
0,7000 als dâ vore was geschehen  
0,7001 vile manic herzeleit  
0,7002 über di manicvaltigkeit  
0,7003 wart daz leit drîvalt  
0,7004 dâ wart wunder gestalt  
0,7005 von den bastharten  
0,7006 die Hectoren bewarten  
0,7007 alsô tet ouch Hector  
0,7008 nû als dâ vore  
0,7009 als tet ouch Thoas  
0,7010 Achilles dâr mite was  
0,7011 der begegenete als êr  
0,7012 der alten nôt mit Hectorê  
0,7013 sie griffen an ire alte werc  
0,7014 helm schilt halsberc  
0,7015 von dem viure blichen  
0,7016 swâ sie hine strichen  
0,7017 Achilles nam die überhant  
0,7018 Ector sîne nôt verwant  
0,7019 wende im zuo helfe quâmen  
0,7020 die sín war nâmen  
0,7021 wenne die kebesbrüeder sín  
0,7022 er hette niemer sunnenschîn  
0,7023 gesehen mê noch den tac  
0,7024 dâ was beidersît bejac  
0,7025 ûf deme sande  
0,7026 an rosse unt an gewande  
0,7027 dâr zuo an der sarewât  
0,7028 sie tâten beidersît ire tât  
0,7029 wole unde schône  
0,7030 man saget von Thelamône  
0,7031 unt von Thoâ  
0,7032 daz sie mit êren wâren dâ  
0,7033 wole tet ez Thoas  
0,7034 Deiphebus im mite was  
0,7035 unde ouch Andenor  
0,7036 unt der küene Hector  
0,7037 unde vuorten in von der walstat  
0,7038 mit gewalt in die stat  
0,7039 dô sie in hine vuorten  
0,7040 die Kriechen nâch ruorten  
0,7041 unt wolten in haben berattt  
0,7042 dô wurden erslagen unde ertrat  
0,7043 tûsent an eineme houfe  
0,7044 zuo sus getâname koufe  
0,7045 volget sôgetân gewin  
0,7046 alsô geschach under in

- 0,7047 dô daz was ergangen  
0,7048 daz Thoas was gevangen  
0,7049 Thelamon sîn leit rach  
0,7050 er sluoc unt stach  
0,7051 daz er zuo ime quæme  
0,7052 unt in in benæme  
0,7053 dô en mohte es gewesen niet  
0,7054 er vaht sô sêre unde schriet  
0,7055 unde begienc dâ grôzen prîs  
0,7056 alsô lange biz Parîs  
0,7057 mit einem bogen ûz reit  
0,7058 sîn geschütze was wole bereit  
0,7059 durch den halsberc er schôz  
0,7060 den man als er wäre blôz  
0,7061 manigen er den líp nam  
0,7062 Menelaus im dô quam  
0,7063 mit grôzeme nîde engein  
0,7064 dâ wart under in zwein  
0,7065 ie baz unt baz  
0,7066 ernieuwet der alte haz  
0,7067 mit geschelte unt mit drouwe  
0,7068 Helena die vrouwe  
0,7069 gesach von den zinnen  
0,7070 daz sie mit unminnen  
0,7071 unt mit grôzeme leide  
0,7072 die ire manne wâren beide  
0,7073 zuosamene wâren geriten  
0,7074 unde ump sie sô sêre striten  
0,7075 als ir wole gehoeret her nâch  
0,7076 dô wîsete Helenâ  
0,7077 an ire gebære  
0,7078 daz ir vile lieber wäre  
0,7079 daz Parîs sige næme  
0,7080 als ez wole gezæme  
0,7081 Parîs hette sînen bogen  
0,7082 alsô hôh ûf gezogen  
0,7083 dô er in entliez unde schôz  
0,7084 êr den dôz  
0,7085 gehörte unde der senewen lût  
0,7086 sô was im durch sîne hût  
0,7087 beide durch vleisch unde durch bein  
0,7088 der pfîl getriben biz an daz zein  
0,7089 dô er des schuzzes wart gewar  
0,7090 dô greif er mit der hant dar  
0,7091 den pfîl er ûz zuhte  
0,7092 sô er êrst mochte  
0,7093 unde reit sân dannen  
0,7094 unde vrâgete sîne manne

- 0,7095 die ez bekennen kunden  
 0,7096 umbe sîne wunden  
 0,7097 op er wær tôtwunt  
 0,7098 dô sprâchen den ez was kunt  
 0,7099 daz er die rede lieze wesen  
 0,7100 er solte harte wole genesen  
 0,7101 Menelaus dô nider saz  
 0,7102 unt hiez sîn ros gûrten baz  
 0,7103 unde sprach "nû des wirdet rât  
 0,7104 daz mich dirre geschozzen hât  
 0,7105 unde al sî mir nû sus geschênen  
 0,7106 wir sulen schiere einander sehen"  
 0,7107 Ajaxen er dô bat  
 0,7108 daz er ûf der walstat  
 0,7109 sîn wolte nemen ware  
 0,7110 unde reit anderweit dare  
 0,7111 dô diz alsus geschach  
 0,7112 Hector merkete ez unde sach  
 0,7113 daz er durch in niet widerreit  
 0,7114 wenne zuo rechene sîn leit  
 0,7115 an hêren Parîse  
 0,7116 Hector der wîse  
 0,7117 der bat dô Eneam  
 0,7118 daz er Parîses war nam  
 0,7119 ûf deme ringe  
 0,7120 êr daz ergienge  
 0,7121 dô rante Menelaus zuo  
 0,7122 unt sluoc sô sêre dô  
 0,7123 ûf Parîsen  
 0,7124 daz er mohte wîsen  
 0,7125 ûf der erden den slac  
 0,7126 wende er viel unt lac  
 0,7127 als er tôt wäre  
 0,7128 waz wollet ir mère  
 0,7129 wen daz Eneas  
 0,7130 dâ bî Parîse was  
 0,7131 sô wäre daz sîn lezzeste tac  
 0,7132 des entvienc manigen slac  
 0,7133 Eneas der milte  
 0,7134 mit sîneme schilde  
 0,7135 doch brâhte er in dannen mit gewalt  
 0,7136 Parîsen der dâ was gevalt  
 0,7137 unde vuorte in hine im was gâch  
 0,7138 die Kriechen volgeten im nâch  
 0,7139 biz an daz burctor  
 0,7140 daz gesach Hector  
 0,7141 unt liez aber dare gân  
 0,7142 als er dicke hette getân

- 0,7143 mit slegen unde stichen  
0,7144 die Kriechen aber wichen  
0,7145 gegen iren gezelte  
0,7146 Hector ûf dem velde  
0,7147 mit in alsô lange vaht  
0,7148 biz in die vinster naht  
0,7149 treip ûz dem kreize  
0,7150 mit bluote unt mit sweize  
0,7151 bevlozen unt begozzen  
0,7152 dô reit er unverdrozzen  
0,7153 swie er gemüejet wäre  
0,7154 mit stolzer gebære  
0,7155 mit senftem gemüete  
0,7156 in sîn heimuote  
0,7157 êr er doch quæme dâr in  
0,7158 sô reit er allenthalben hin  
0,7159 dâ er die ritter weste  
0,7160 beide sîne unde och die geste  
0,7161 ire wunden er besach  
0,7162 unde hiez in schaffen ire gemach  
0,7163 harte ritterlîche  
0,7164 heim reit er vroelîche  
0,7165 von wîbe unt von kinde  
0,7166 von dem ingesinde  
0,7167 wart er baz waz sol es mî  
0,7168 entvangen danne er wär êr  
0,7169 man zôch im ûz die sarwât  
0,7170 verwandelt hette zindât  
0,7171 die varwe die er hette  
0,7172 von der sarwâte  
0,7173 von sweize unde von bluote  
0,7174 Ecuba die guote  
0,7175 Cassandra unde och Polixenâ  
0,7176 die giengen umbe in dâ  
0,7177 unde vertriben im sîn leit  
0,7178 mit liebe unt senfticheit  
0,7179 sie pflâgen sîner wunden  
0,7180 sô sie beste kunden  
0,7181 sîne swulst sie bæheten  
0,7182 grôze nôt sie hæten  
0,7183 umbe in allenthalben  
0,7184 beide mit salben  
0,7185 unde mit anderere sache  
0,7186 die dâ gehörte zuo sîneme gemache  
0,7187 sie pflâgen sîn wole alle wîs  
0,7188 die wîle quam Parîs  
0,7189 der wart wole entvangen  
0,7190 wie ez im was ergangen

- 0,7191 daz hette Elena gesehen  
0,7192 sie sprach mir ist geschehen  
0,7193 an diseme tage leide  
0,7194 liep unt leide  
0,7195 ich was des harte vrô  
0,7196 daz dû Menelaô  
0,7197 den lîp nâch hette genomen  
0,7198 ouch muoste ich des underkommen  
0,7199 daz ich ouch dâ gesach  
0,7200 daz er dich dâr nider stach  
0,7201 doch hoert ez dâr zuo  
0,7202 daz man in strîte alsô tuo  
0,7203 daz man under wîlen habe sige  
0,7204 unt ouch bîwîlen underlige  
0,7205 des wirdet doch allez guot rât  
0,7206 biz uns bezzer heil entstât  
0,7207 Hector gesach dô  
0,7208 Parîsen unde wart sîn vrô  
0,7209 er spranc im vroelîche engein  
0,7210 dâ wart von in zwein  
0,7211 unde von anderme ireme künne  
0,7212 vröuwede unt wünne  
0,7213 als ez von rehte solte wesen  
0,7214 umbe daz Parîs was genesen  
0,7215 dô was bî Priamis trône  
0,7216 ein kamere vile schoene  
0,7217 an dem esterîche  
0,7218 schinen dâ rîlîche  
0,7219 die lûtern kristalle  
0,7220 die wende wâren alle  
0,7221 unt daz gewelbe dâ obe  
0,7222 von vile grôzeme lobe  
0,7223 als ez sîn solte  
0,7224 von silber unde von golde  
0,7225 unde von edelme gesteine  
0,7226 lieht unt reine  
0,7227 Priamus hiez in daz gadem  
0,7228 sîne râtgeben laden  
0,7229 dar quam Parîs unde Hector  
0,7230 Troilus unt Andenor  
0,7231 Deiphebus unt Eneas  
0,7232 ouch quam dâ Polidamas  
0,7233 dâ was ein kolter gebreit  
0,7234 von solicher zierheit  
0,7235 etewâ wîz als ein snê  
0,7236 eteswâ grüene als ein klê  
0,7237 eteswâ brûn eteswâ rôt  
0,7238 als der küninc gebôt

- 0,7239 alsô saz ir iegelich  
0,7240 dô sprach der küninc “hoeret mich  
0,7241 hier ist hêrre Thoas  
0,7242 der unser vîant ie was  
0,7243 sint in uns got gegeben hât  
0,7244 nû gebet dâr zuo iuwern rât  
0,7245 weder wir in schinden  
0,7246 brinnen oder blenden  
0,7247 oder binden zuo eineme pfagen  
0,7248 unt ûf unt nider jagen  
0,7249 oder wir in [...] [...] henken  
0,7250 oder wie wir in gekrenken  
0,7251 mit solicher krancheit  
0,7252 als ez den Kriechen sî leit  
0,7253 daz sie es zuo Kriechlande  
0,7254 iemê haben schande”  
0,7255 dô sprach Eneas  
0,7256 “küninc daz dû geredet hâs  
0,7257 daz en behaget mir niht wole  
0,7258 op ich ez widerreden sol  
0,7259 sehet zuo mînen triuwen  
0,7260 ez solte uns geriuwen  
0,7261 op ez sô geschæhe  
0,7262 ez ist alsô wæhe  
0,7263 daz man ander rede habe  
0,7264 hier en kumet niht quotes abe  
0,7265 ez wäre schiere volente  
0,7266 wär unser nôt ein ende”  
0,7267 dô Eneas geredet hæte  
0,7268 daz man alsô tæte  
0,7269 dô lobete ez Hector  
0,7270 er sprach “wir hân noch hier vore  
0,7271 vile manigen schoenen tac  
0,7272 dâ man sich ane versinnen mac  
0,7273 waz man mit im tuo  
0,7274 die rede ist noch vile vrüe”  
0,7275 Priamus sprach “die rede ist guot  
0,7276 sêt doch daz ir den rât tuot  
0,7277 der uns allen wole stê  
0,7278 ich en weiz waz sprechen mî  
0,7279 waz hülfe daz ich hæle daz  
0,7280 ich hân zuo den Kriechen solichen haz  
0,7281 swie ez dâr nâch ergienge  
0,7282 daz ich in gerne hiengen  
0,7283 doch halte ich gerne iuwern rât  
0,7284 daz ir vore geredet hât  
0,7285 daz en widerrede ich niet”  
0,7286 die hêrschaft dô dannen schiet

- 0,7287 mit sôgetânen worten  
 0,7288 die dâr zuo gehörten  
 0,7289 Troilus unde Eneas  
 0,7290 Andenor unde Polidamas  
 0,7291 mit zuht unt mit ziere  
 0,7292 giengen die viere  
 0,7293 besehen unde beschouwen  
 0,7294 Helenam die vrouwen  
 0,7295 in einer kamern dâ sie saz  
 0,7296 die was gezieret vile baz  
 0,7297 unt zehenstunt mère  
 0,7298 danne die êrste wäre  
 0,7299 dâ sâzen sie inne  
 0,7300 unde sageten von der minne  
 0,7301 unt von wîbe natûre  
 0,7302 schoene âventiure  
 0,7303 von strîten unde von vride  
 0,7304 hetten sie manige rede  
 0,7305 in der stunt zuo handen  
 0,7306 von êren unt von schanden  
 0,7307 die küniginne Ecubâ  
 0,7308 saz mit grôzer zierde dâ  
 0,7309 mit ir ouch dâ sâzen  
 0,7310 die wole kunden gelâzen  
 0,7311 juncvrouwen harte vile  
 0,7312 Ecuba sprach "daz ich wil  
 0,7313 biten daz ist harte guot  
 0,7314 daz ir ez durch iuch selben tuot  
 0,7315 ir sulet alle dâ nâch streben  
 0,7316 wie wir behalten daz leben  
 0,7317 lant unde êre  
 0,7318 waz wollet ir nû mère  
 0,7319 iuch belîbet daz zuo lône  
 0,7320 unt uns die werde krône  
 0,7321 iuch belîbet daz rîche  
 0,7322 des vehtet manlîche  
 0,7323 der unser aller hât gewalt  
 0,7324 der behalte uns unser behalt  
 0,7325 daz wünsche ich ouch dâr mite"  
 0,7326 die hêrren nâch des landes site  
 0,7327 gâben ir antwürte  
 0,7328 daz ich die rede kürze  
 0,7329 ir iegelich sprach er tâte  
 0,7330 gerne daz sie bæte  
 0,7331 ân dise rede unde ân dise wort  
 0,7332 wart manic mère dâ gehôrt  
 0,7333 als man danne pflît  
 0,7334 dô nâhete ez der zît

- 0,7335 daz dâ sedels niet en was  
0,7336 ûf stuont Polidamas  
0,7337 urloup er dâ nam  
0,7338 unt trôste Elenam  
0,7339 als tâten die andern drâ  
0,7340 die ime stuonden bî  
0,7341 under des wâren die ritter al  
0,7342 zuo hove kumen ûf den sal  
0,7343 die dâ ezzen solten  
0,7344 oder ezzen wolten  
0,7345 dô dâ was geezzen  
0,7346 dô en wart des niht vergezzen  
0,7347 si ne hæten leit unt nôt  
0,7348 daz in der bruoder was tôt  
0,7349 sie begunden weinen unde klagen  
0,7350 daz Doroschalcus was erslagen  
0,7351 sie begruoben in dâ sîn bruoder lac  
0,7352 als man pflît unde pflac  
0,7353 in eineme schoenen steine  
0,7354 lûter unde reine  
0,7355 sô man in allerbezzest vant  
0,7356 Onichilus was der stein genant  
0,7357 die Kriechen klageten andersît  
0,7358 rehte ump die selben zít  
0,7359 daz Thelamon gewundet was  
0,7360 unde abe gevangen Thoas  
0,7361 unde ander manige unsälichkeit  
0,7362 ire ungelücke unt ire leit  
0,7363 in der selben stunde  
0,7364 ire unheil begunde  
0,7365 wahsen vile mère  
0,7366 der wint wære sô sère  
0,7367 daz er in vünf hundert gezelt  
0,7368 warf nider ûf daz velt  
0,7369 unde in in der naht geschach  
0,7370 zuo dem lîbe nie dechein gemach  
0,7371 vore tage der starke wint gelac  
0,7372 êr sich die sunne oder der tac  
0,7373 vollen erhüebe  
0,7374 sô zuogienc die wolkentrüebe  
0,7375 unt was der wint unde der regen  
0,7376 vore dem tage gelegen  
0,7377 als ergangen was die naht  
0,7378 unde der tac sîne maht  
0,7379 ougen begunde  
0,7380 vore der morgenstunde  
0,7381 sô die sunne ûf gât  
0,7382 unde die roeten noch hât

- 0,7383 als ein viur alsô rôt  
0,7384 dô huop sich aber die alte nôt  
0,7385 michels mê denne dâ vore  
0,7386 eine sít Hector  
0,7387 Agomennon in ander sít  
0,7388 sus huop sich die sûre zít  
0,7389 die siurede unt die bittericheit  
0,7390 die kurze wîle was geleit  
0,7391 als Achilles zuo rosse quam  
0,7392 im en wart nieman sô gram  
0,7393 der in zuo rosse sâhe  
0,7394 daz er anders iht jæhe  
0,7395 wen daz er wäre  
0,7396 beide an der gebære  
0,7397 unde an dem herzen ein man  
0,7398 den halsberc den er vuorte an  
0,7399 der was maniger marke wert  
0,7400 grôzer tiuredede sîn swert  
0,7401 sîn schilt was goltdurchslagen  
0,7402 den er ûf solte tragen  
0,7403 der helm ûzer mâzen guot  
0,7404 im was erzürnet sîn muot  
0,7405 dô hiez er im langen  
0,7406 ein viereggete stangen  
0,7407 die sîn sper solte sîn  
0,7408 an sîneme rosse was wole schîn  
0,7409 dâ ez wenkete unde spranc  
0,7410 daz sîn sprunc unde sîn wanc  
0,7411 gelîchete eineme pfile  
0,7412 under der selben wîle  
0,7413 Hector zuo leite  
0,7414 Achilles was gereite  
0,7415 sîne sporen er zuo sîten sluoc  
0,7416 sîn ors in balde hin truoc  
0,7417 dô quam gegen sîneme stôze  
0,7418 Hupos der grôze  
0,7419 Hupos sluoc im einen slac  
0,7420 daz im der schilt ein teil erschrac  
0,7421 Huples vröuwete sich des  
0,7422 ûf huop Achilles  
0,7423 unde sluoc mit eineme slage dar  
0,7424 daz es beide wart gewar  
0,7425 der hîrre unde daz ros dâr mite  
0,7426 er spielt sie beide mit eineme snite  
0,7427 jener viel zuo der erden kalt  
0,7428 iezunt wart viervalvt  
0,7429 ire nôt unde ire leit  
0,7430 über die manicvaltigkeit

- 0,7431 sie quâmen zuosamene gerant  
0,7432 dise werten ire lant  
0,7433 jene wolten ez hân  
0,7434 dâ wart beidersît getân  
0,7435 weder minre noch mî  
0,7436 von der burc biz an den sê  
0,7437 unde waz dâ enzwischen was  
0,7438 ez wäre sant oder gras  
0,7439 daz velt smal oder breit  
0,7440 daz wart mit tôtēn allez beleit  
0,7441 die wîle die sie meist striten  
0,7442 sô quam dâ zuo geriten  
0,7443 der küninc Orcamenîs  
0,7444 man saget daz er wäre wîs  
0,7445 doch was daz niet ein wîsheit  
0,7446 daz er gein Hectorê reit  
0,7447 alsô vrevellîche  
0,7448 er vuor hövischlîche  
0,7449 daz ist gewislichen wâr  
0,7450 er was fier unde klâr  
0,7451 daz en half aber niet  
0,7452 Hector im sô zuoschriet  
0,7453 daz er in zuo strûchen sluoc  
0,7454 dô hette er des strîtes genuoc  
0,7455 die mit im dâ wâren  
0,7456 en wisten wie gebâren  
0,7457 vore zorne unt vore nîde  
0,7458 sie wolten sîn gesmîde  
0,7459 unde sîne sarwât retten  
0,7460 sie begunden rinnen unde treten  
0,7461 sie stâchen under im den pfagen  
0,7462 Ajax begunde zuo jagen  
0,7463 unde Diomedes  
0,7464 unde Antipus under des  
0,7465 der was ein Trôiere  
0,7466 mit sîner baniere  
0,7467 liez Diomedes dar gân  
0,7468 unde stach in durch den bûch sân  
0,7469 daz im die lunge ûz hangete  
0,7470 swaz sô er belanete  
0,7471 man saget daz ez wiche  
0,7472 vore sîneme stiche  
0,7473 dâ was nôt alle wîs  
0,7474 dâ reit Palimenîs  
0,7475 gegen hîrren Hectorê  
0,7476 Hector en beitte niet mî  
0,7477 er gap im einen slac  
0,7478 daz er dâ tôt lac

- 0,7479 des en was er niht wert  
0,7480 er hette selbe sîn swert  
0,7481 harte wole geurboret  
0,7482 unde was von rîcher geburt  
0,7483 bî eineme wazzer was sîn lant  
0,7484 daz was Iotharus genant  
0,7485 dâ riten in dem ringe  
0,7486 zwêne zwillinge  
0,7487 des muotes vrô des guotes vrâ  
0,7488 swaz sie verre oder bî  
0,7489 mit slegen oder mit stichen  
0,7490 iergen begriffen  
0,7491 daz was allez verloren  
0,7492 sie kuolten iren zorn  
0,7493 ûzer mâzen sêre  
0,7494 sie hetten guot unde êre  
0,7495 unt under der ritterschaft den prîs  
0,7496 sie wâren von Focidis  
0,7497 von einer guoten geine  
0,7498 Epistropus der eine  
0,7499 der ander hiez Cedius  
0,7500 eine glevîen vuorte Epistropus  
0,7501 dâ er sich mite werte  
0,7502 ire stahel der was herte  
0,7503 die hette er zuo stiche erhaben  
0,7504 Hector begonde zuo draben  
0,7505 des erhuop er sich baz  
0,7506 er stach in daz er kûme besaz  
0,7507 er treip in ûf den satelbogen  
0,7508 "mir en hât mîn stich niht gelogen  
0,7509 nû schamet iuch niht hîrre Hector  
0,7510 daz ir mir sît entwichen vore  
0,7511 êr ich hinnen scheide  
0,7512 iuch wirdet daz zuo leide  
0,7513 daz die mînen sint von iuch tôt  
0,7514 ir kumet an die selben nôt"  
0,7515 dô er sprechen wolte vort  
0,7516 Hector sluoc im daz wort  
0,7517 als unsanfte wider in  
0,7518 daz im wort unde sin  
0,7519 unt sîn geist dâr mite  
0,7520 entgulten sîner unsite  
0,7521 er erschrac des slages harte  
0,7522 die bein er ûf kârte  
0,7523 Hector sprach "boesez âs  
0,7524 dînes kelzes dû entgolten hâs  
0,7525 arme hergeselle  
0,7526 var hine zuo der helle

- 0,7527 unde warte wie ez dâ stê  
 0,7528 ich en wil dîner rede niht mêt  
 0,7529 der dâ Cedius hiez  
 0,7530 umbe sînen bruoder er geliez  
 0,7531 harte jámerlîche  
 0,7532 "nû geschê mir semelîche  
 0,7533 als mînem bruoder ist geschên  
 0,7534 ich en müeze an Hectore gesehen  
 0,7535 daz er an im gesehen hât  
 0,7536 sehet swie ez mir ergât  
 0,7537 ich habe gewunnen oder verloren  
 0,7538 ich erküele mînen zorn  
 0,7539 wole danne in den strît  
 0,7540 alle die mit mir hier sít"  
 0,7541 sîne vriunde zuosamene quâmen  
 0,7542 dô sie sîne wort vernâmen  
 0,7543 sie liezen es heil walten  
 0,7544 unde giengen schilde spalten  
 0,7545 unde halsberge schrôten  
 0,7546 dâ beliben vile tôtēn  
 0,7547 sie stalten wunder alle  
 0,7548 mit ruofe unt mit schalle  
 0,7549 dô dâ vaht die grimme diet  
 0,7550 wenne daz houbet von dem bûche schiet  
 0,7551 an der scheidunge  
 0,7552 lellete die zunge  
 0,7553 man sach den dâ rîten  
 0,7554 sô er wolte strîten  
 0,7555 unde zuo strîte wart geschart  
 0,7556 daz im abe geslagen wart  
 0,7557 daz bein mit dem vuoze  
 0,7558 dâ wart sûr süeze  
 0,7559 in süezete sêre  
 0,7560 ire leit unt ire swære  
 0,7561 ire süeze hette siurede  
 0,7562 jámer unt triurede  
 0,7563 nôt unt unsälichkeit  
 0,7564 volgete irere süezicheit  
 0,7565 sus was dâ beide  
 0,7566 liep in dem leide  
 0,7567 sûr in dem süezen  
 0,7568 sie kunden blôz büezen  
 0,7569 ire slahte was alsô grôz  
 0,7570 dâ daz velt was blôz  
 0,7571 êr ez würde mittentac  
 0,7572 daz velt von tôtēn vol lac  
 0,7573 Cedius rach den zorn sîn  
 0,7574 Hector als ein wildez swîn

- 0,7575 disen allen widerstuont  
 0,7576 dirre lac hier gewunt  
 0,7577 unt jener lac dâ tôt  
 0,7578 ouch quam er selbe in grôze nôt  
 0,7579 Cedius ime zuo trat  
 0,7580 unde sluoc in an die stat  
 0,7581 daz er zuo der erden  
 0,7582 viel mit grôzen swerden  
 0,7583 ûf daz gras an den wasen  
 0,7584 dô zuovleckete er im die nasen  
 0,7585 munt unt nasel  
 0,7586 wen daz Ector was vile snel  
 0,7587 unde zuo vuoze spranc wider  
 0,7588 er wäre dâ tôt gelegen nider  
 0,7589 als Hector zuo vuoze stuont  
 0,7590 dô grein er als ein hunt  
 0,7591 unde sluoc mit eineme slage dare  
 0,7592 Cediô von sîneme lîbe gare  
 0,7593 swaz sîn swert dâ vant  
 0,7594 den rehten arm mit der hant  
 0,7595 gein dem nabel beleip daz swert  
 0,7596 jener viel tôt under daz pfert  
 0,7597 zuo rante Eneas  
 0,7598 Mennon unde Polidamas  
 0,7599 Troilus unt Parîs  
 0,7600 Andenor unde Philemenîs  
 0,7601 unde mit in tûsent oder mî  
 0,7602 viervalt was ire leit êr  
 0,7603 über die manicvaltigkeit  
 0,7604 an die vünvvalticheit  
 0,7605 ire nôt iezunt komen was  
 0,7606 daz erhuop Eneas  
 0,7607 Anfimacus ûf Eneam  
 0,7608 mit baren swerte geriten quam  
 0,7609 unde als er den slac dare bôt  
 0,7610 sô lac er ûf der erden tôt  
 0,7611 daz wart im dâ zuo teile  
 0,7612 zuo grôzeme unheile  
 0,7613 was ime der strît erhaben  
 0,7614 dô begunde zuo draben  
 0,7615 Menelaus unde Ulixes  
 0,7616 Archelaus unde Diomedes  
 0,7617 Ajax unde Thelamon  
 0,7618 Menesteus unt Agomennon  
 0,7619 unt allez ire volc mite  
 0,7620 dâ huop sich der unsite  
 0,7621 die Kriechen erholeten schiere  
 0,7622 daz die Trôiere

- 0,7623 in getân hæten  
0,7624 wie sie daz widertæten  
0,7625 ir iegelich sich sô versuochete  
0,7626 daz ir dechein en ruochete  
0,7627 weliches tôdes er stürbe  
0,7628 ûf daz er prîs erwürbe  
0,7629 mit in reit Achilles  
0,7630 dem bequam Eufemes  
0,7631 unde wânte prîs an im bezalen  
0,7632 dem zerspielt er die schalen  
0,7633 daz daz hirn dâr úz vlôz  
0,7634 unde er ûf die erden schôz  
0,7635 dô klagete Priamus sêre  
0,7636 daz er erslagen wäre  
0,7637 Hector was ez ouch ungemach  
0,7638 der ire aller leit rach  
0,7639 der sie wîsete unde leitte  
0,7640 wen sîne arbeite  
0,7641 sie wâren alle erlegen  
0,7642 daz was Hector der degen  
0,7643 der treip aber dâ engein  
0,7644 dô begênete er zwein  
0,7645 küningen vermezzen  
0,7646 der eine was gesezzen  
0,7647 zuo Salatreeâ  
0,7648 dem nam er den lîp êr  
0,7649 der ander was von Libanor  
0,7650 dise beide sluoc Ector  
0,7651 unt anders manic muoter barn  
0,7652 ouch quam Parîs zuo gevarn  
0,7653 wen dise hêrren zwêne  
0,7654 ez wäre harte unwæne  
0,7655 daz ir genesen wäre dechein  
0,7656 der dâ volgete den zwein  
0,7657 in die stat quam dô mære  
0,7658 daz in helfe nôt wäre  
0,7659 Hectori unt Parîse  
0,7660 daz vernam der küninc wîse  
0,7661 der kunde unt wiste  
0,7662 die selben liste  
0,7663 die man dô konde in der zît  
0,7664 der man dô pflac unde noch pfât  
0,7665 kurzlîchen ich lêre  
0,7666 wie die künste wâren  
0,7667 an einer lêret man buochstaben  
0,7668 die ander ist erhaben  
0,7669 als ich iuch wil innen  
0,7670 zuo den scharpfen sinnen

- 0,7671 die dritte zuo der werlte zierde  
 0,7672 zuo dem sange die vierde  
 0,7673 die vünfte lêret mezzen wole  
 0,7674 die sehste wie man zelen sol  
 0,7675 die sibende lêret die list  
 0,7676 waz wunders an dem gestirne ist  
 0,7677 der dise liste kunde  
 0,7678 zuo der selben stunde  
 0,7679 quam von Trôje zuo gerant  
 0,7680 Pistropus was er genant  
 0,7681 von Azomenlande  
 0,7682 überal man in erkante  
 0,7683 beide bî namen unde an worte  
 0,7684 driu tûsent hette er dar gevoort  
 0,7685 unde einen schützen sô getân  
 0,7686 als ich geschriben vunden hân  
 0,7687 von den nabel niderwert  
 0,7688 was er gestalt als ein pfert  
 0,7689 als ein hirz alsô snel  
 0,7690 beide hût unde vel  
 0,7691 als ein katze alsô rûch  
 0,7692 houbet hende unt bûch  
 0,7693 gelîch einen mennischen gare  
 0,7694 als ein môr swarzgevare  
 0,7695 beide hût unt hâr  
 0,7696 die ougen brûn swarz klâr  
 0,7697 er hette gespannen unde ûf gezogen  
 0,7698 einen wunderlîchen bogen  
 0,7699 die wîle er in an der hant truoc  
 0,7700 swâ sîn senewe hine sluoc  
 0,7701 sô schôz er als an dem buoche stât  
 0,7702 durch man durch schilt durch sarewât  
 0,7703 mit eineme râme durch drî  
 0,7704 beide verre unt bî  
 0,7705 swelichen sô er getraf  
 0,7706 under der ritterschaft  
 0,7707 ir dechein genas  
 0,7708 als er iezunt hier was  
 0,7709 sô was er zehant anderswâ  
 0,7710 als man im gewartte dâ  
 0,7711 sô was er her wider  
 0,7712 als er mit gevidere  
 0,7713 dar gevlogen wäre  
 0,7714 waz mac ich sagen mère  
 0,7715 wen daz man manigen dâ vant  
 0,7716 verloren von sîn eines hant  
 0,7717 beide tôt unde lam  
 0,7718 Polixenô er den lîp nam

- 0,7719 sîn râme im niht en louc  
 0,7720 er schôz in daz sîn houbet vlouc  
 0,7721 von dem bûche zwêne schrite  
 0,7722 dirre grôzen unsite  
 0,7723 alsô lange er pflac  
 0,7724 daz sîn senewe nie gelac  
 0,7725 dô diz geschach under des  
 0,7726 dô sprach Diomedes  
 0,7727 "wie sîn wir hiute sus verschert  
 0,7728 ist diz der tiuel daz hier vert  
 0,7729 oder sîn muoter oder sîn sun  
 0,7730 waz nû Agomennon  
 0,7731 vile edel rihtære  
 0,7732 got gesegene uns iemer mère  
 0,7733 wie gevâhen wir unser dinc an  
 0,7734 torste dechein man  
 0,7735 disen vâlant bestân  
 0,7736 vernemet wes ich gedâht hân  
 0,7737 wir wellen in al umbevâhen  
 0,7738 daz ist daz bezziste uns getân  
 0,7739 an eine sît unt ander sît  
 0,7740 wole danne schiere des ist zît"  
 0,7741 sie ranten alle sament zuo  
 0,7742 unde umbeviengen in dô  
 0,7743 sie begunden in umberingen  
 0,7744 als er wolte entspringen  
 0,7745 sô wart im hier ein stôz  
 0,7746 sô er aber dare schôz  
 0,7747 sô wart im ein stich  
 0,7748 als er dâ bewarte sich  
 0,7749 sô wart im ein slac anderswâ  
 0,7750 beide hier unt dâ  
 0,7751 alsô dicke unt alsô lange  
 0,7752 daz er vore gedrange  
 0,7753 unde vore ireme getwenge  
 0,7754 beherten die lenge  
 0,7755 noch mohte noch en kunde  
 0,7756 des gewan er übel stunde  
 0,7757 ouch gewunnen die Kriechen übel zît  
 0,7758 iedoch wart er gar zuoschîtet  
 0,7759 dô er was gevallen  
 0,7760 die Kriechen begunden schallen  
 0,7761 mit werken unde mit worten  
 0,7762 ire swert sie urboreten  
 0,7763 vile baz danne êr  
 0,7764 sie sluogen der von Trôje mêt  
 0,7765 denne der Kriechen wäre erslagen  
 0,7766 sie begunden vaste zuo jagen

- 0,7767 dâ behielten sie den prîs  
0,7768 dâ erviel Philemenîs  
0,7769 der küninc von Palatîne  
0,7770 unde als die sîne  
0,7771 sêre klageten under des  
0,7772 quam hîerre Achilles  
0,7773 mit sîneme schafte zuo getriben  
0,7774 dâ ire klage was beliben  
0,7775 dâ wart sie vollen erhaben  
0,7776 Hector begonde och zuo draben  
0,7777 sie riten zornlîche  
0,7778 beide wole gelîche  
0,7779 mit manlîcher krefte  
0,7780 zuobrâchen sie die schefte  
0,7781 sie griffen zuo den swerten  
0,7782 die wîle daz die gewerten  
0,7783 riten sie slahende durch den kreiz  
0,7784 daz in bluot unde sweiz  
0,7785 durch die sarewât vlôz  
0,7786 dô wart daz gedrenge alsô grôz  
0,7787 daz sie zuo vuoze quâmen  
0,7788 ir iegelich begonde râmen  
0,7789 beide Hector unt Achilles  
0,7790 wie der ein dem andern under des  
0,7791 sîn ors genæme  
0,7792 êr er dâr ûf quæme  
0,7793 Achilles doch zuo rosse quam  
0,7794 Hector der wolte och alsam  
0,7795 daz werte Achilles  
0,7796 unt begreif sîn ros under des  
0,7797 daz ros hiez Galatheâ  
0,7798 Hector lief im zuo vuozzen nâch  
0,7799 vile schnellîchen lief  
0,7800 starke er im nâch rief  
0,7801 “kêre helet kêre  
0,7802 mir ist alsô mære  
0,7803 daz ich den tôt kiese  
0,7804 als ich mîn ros verliese  
0,7805 waz nû ir Trôiere  
0,7806 wole danne schiere  
0,7807 helfet mir mîn ros retten  
0,7808 ich wil mich lâzen ertreten  
0,7809 êr ich alsus hân verloren”  
0,7810 sie ruorten die ros mit den sporen  
0,7811 unde quâmen sô zuo getriben  
0,7812 daz die erde mohte erbiben  
0,7813 dâ nâch der unt der  
0,7814 dâ vuor durch den schilt daz sper

- 0,7815 durch den halsberc daz swert  
0,7816 dâ beleip man unde pfert  
0,7817 ûfe deme ringe  
0,7818 von schoene jungelingen  
0,7819 beide erslagen unt ertrat  
0,7820 doch sô wart daz ros beratt  
0,7821 von den bastharten  
0,7822 iren vlîz sie dâr zuo kârten  
0,7823 daz ez behielt Hector  
0,7824 dô wart gevangen Andenor  
0,7825 als er gevangen was  
0,7826 dô rante zuo Polidamas  
0,7827 sie begunden aber zuo draben  
0,7828 dô hette sich die nôt erhaben  
0,7829 als von êrst beidersít  
0,7830 wen daz die vesperzit  
0,7831 unt die âbentstunde  
0,7832 in strîtes niht en gunde  
0,7833 sie riten an ire gemach  
0,7834 als in dâ vore geschach  
0,7835 alsô entvienc man sie dô  
0,7836 unde baz dâr zuo  
0,7837 Priamus unt Ecubâ  
0,7838 entviengen iren sun dâ  
0,7839 unde vuorten sie zuo danke  
0,7840 mit âze unde mit tranke  
0,7841 als in harte wole gezam  
0,7842 ire spîse die was lobesam  
0,7843 in wâren ire bette bereit  
0,7844 nâch der gewonheit  
0,7845 ir iegelich an sîn bette lac  
0,7846 unde ruoweten biz an den tac  
0,7847 waz die Kriechen tæten  
0,7848 dô sie geezzen hæten  
0,7849 als ich ez geschriven vunden hân  
0,7850 alsô müget ir es an mir verstân  
0,7851 Agomennon besante  
0,7852 die hêrren die er erkante  
0,7853 daz sie von den jâren  
0,7854 unt anders wîse wâren  
0,7855 die sîn gebot vernâmen  
0,7856 vile schiere sie dar quâmen  
0,7857 er sprach "nû râtet alle  
0,7858 wie ez iuch gevalle  
0,7859 gevangen ist hier Anthenor  
0,7860 sô hât ouch hêrre Hector  
0,7861 Thoam gevangen  
0,7862 daz ist unlange ergangen

- 0,7863 man wil sînes gedinges niet  
 0,7864 op nû wechsel geschiet  
 0,7865 under in beiden  
 0,7866 sô ist ez wole gescheiden  
 0,7867 wir senden morgen boten dare  
 0,7868 daz man an in ervare  
 0,7869 op in der wechsel behage  
 0,7870 ich weiz wole sie hânt klage  
 0,7871 daz wir ir alsô vile hân erslagen  
 0,7872 daz selbe mügen och wir klagen"  
 0,7873 sie lobeten alle den rât  
 0,7874 "rehte als ir gerâten hât  
 0,7875 mac ez geschehen alsô  
 0,7876 sô sîn wir es alle vile vrô"  
 0,7877 rehte ump die selben zît  
 0,7878 klageten jene dort andersît  
 0,7879 daz Andenor gevangen was  
 0,7880 dô rieten sie daz Thoas  
 0,7881 gegen im wider gegeben wart  
 0,7882 als ir vore sît gelârt  
 0,7883 die naht ergienc der tac quam  
 0,7884 der tagesterne in beiden nam  
 0,7885 iren schîn biz ûf den morgen  
 0,7886 der dâ was verborgen  
 0,7887 unde der mit der sunnen ûf gienc  
 0,7888 daz velt dô den tou entvienc  
 0,7889 dô nazzete och daz gras  
 0,7890 die wîle daz die küelde was  
 0,7891 die dâ solten strîten  
 0,7892 die quâmen von beiden sîten  
 0,7893 unde riten ûz als dâ vore  
 0,7894 von Trôjen Ector  
 0,7895 Agomennon dâ engein  
 0,7896 unt die dâ volgeten in zwein  
 0,7897 dâ wart lenger niht gebît  
 0,7898 sie huaben beidersît den strît  
 0,7899 mit slegen unt mit stichen  
 0,7900 die lebenden daz tichen  
 0,7901 daz die tötten wâren tôt  
 0,7902 vünvvaltic was êr ire nôt  
 0,7903 über die manicvaltigkeit  
 0,7904 nû wart sie sehsvalt gebreit  
 0,7905 in entstuont ein unsælic tac  
 0,7906 slac unt widerslac  
 0,7907 stich unt wunde  
 0,7908 gegen der morgenstunde  
 0,7909 ûf den tac vürebaz  
 0,7910 râchen sie nît unt haz

- 0,7911 sô sêre unt sô næhe  
0,7912 swelich man ez sæhe  
0,7913 unt ez rehte weste  
0,7914 er en wäre nie sô veste  
0,7915 daz er sich enthalten kunde  
0,7916 in jâmerte durch die sünde  
0,7917 unt umbe den grimmigen mort  
0,7918 dannoch ûf den tac vort  
0,7919 giengen sie sô houwen  
0,7920 daz in der stat die vrouwen  
0,7921 von der grôzen bittericheit  
0,7922 weinten sô daz ire kleit  
0,7923 von den zeheren wurden naz  
0,7924 ir iegelîche alsô leidic saz  
0,7925 unt an solicher gebære  
0,7926 als sie halptôt wäre  
0,7927 ûf den tac nâch prîme zît  
0,7928 erhuop sich dâ sô grôz strît  
0,7929 unt solich vehte  
0,7930 daz daz vünfte geslehte  
0,7931 daz nâch disen quam  
0,7932 an sîneme künne schaden nam  
0,7933 dannoch êr mittentage  
0,7934 quâmen sie sô zuo slage  
0,7935 daz ire bluot nider gôz  
0,7936 unt in daz mer schôz  
0,7937 alsô starke unde alsô sêre  
0,7938 als ez ouch ein wazzer wäre  
0,7939 daz dâ rünne unt vlüzze  
0,7940 unt in daz mer schüzze  
0,7941 rehte ump den mittentac  
0,7942 des volkes sô vile tôt lac  
0,7943 sie mohten noch en kunden  
0,7944 vore den tötten noch vore den gewundeten  
0,7945 noch vore den sêren  
0,7946 niergen sich bekêren  
0,7947 dannoch umbe nône  
0,7948 geschach dâ dechein suone  
0,7949 noch der rede dechein teil  
0,7950 dâ in abe quæme heil  
0,7951 vore vesperzît ein lützel êr  
0,7952 geschach dâ zehenstunt mêt  
0,7953 von noeten unde von sorgen  
0,7954 denne von dem morgene  
0,7955 geschehen wäre biz dare  
0,7956 sie wurden der vesperzît geware  
0,7957 daz der vünfte kûme genas  
0,7958 der in dem strîte was

- 0,7959 er en læge tôt oder lam  
 0,7960 dô ez an den âbent quam  
 0,7961 ir dechein was sô starc  
 0,7962 noch sô übel noch sô arc  
 0,7963 im en gienge die kraft  
 0,7964 wen daz sie schiet die swarze naht  
 0,7965 sie wâren zuosamene gekrochen  
 0,7966 unt hetten sich gerochen  
 0,7967 ûf der hant unt ûf die knie  
 0,7968 ez en geschach grôzer nôt nie  
 0,7969 noch von strîte grôzer ungemach  
 0,7970 denne an dem tage dâ geschach  
 0,7971 waz sol umberede mêt  
 0,7972 sie riten heim als ouch êr  
 0,7973 dô klagete Calcas  
 0,7974 der der Kriechen wîssage was  
 0,7975 "uns ist missegangen  
 0,7976 uns ist abe gevangen  
 0,7977 vile manic küene swertdegen  
 0,7978 ouch ist ir uns tôt vile gelegen  
 0,7979 nû lazzet ire hêrren werden schîn  
 0,7980 op ir gevolgic wollet sín  
 0,7981 sô wil ich râten harte wole  
 0,7982 op ich tar unde op ich sol  
 0,7983 unt op ir mit mir bestât  
 0,7984 sô sol daz wesen mîn rât  
 0,7985 daz wir werben ump einen vride  
 0,7986 unz wir unse siechen lide  
 0,7987 geheilen unt unse wunden  
 0,7988 binnen den stunden  
 0,7989 lîhte uns zuo wizzene geschiet  
 0,7990 des wir noch en wizzen niet"  
 0,7991 als Calcas diz gesprach  
 0,7992 Agomennon des jach  
 0,7993 er hette wole gerâten  
 0,7994 die Kriechen alle bâten  
 0,7995 daz ez alsô geschæhe  
 0,7996 biz daz man gesæhe  
 0,7997 waz in baz gezæme  
 0,7998 sie rieten wer in bequæme  
 0,7999 under der ritterschaft  
 0,8000 baz zuo der boteschaft  
 0,8001 denne hêrre Ulixes  
 0,8002 unt Diomedes  
 0,8003 daz wâren zwêne wîse manne  
 0,8004 sie schutten ire halsberge an  
 0,8005 unt schuofen ire gewarheit  
 0,8006 ir ietweder saz ûf unt reit

- 0,8007 ez was an der vinstern naht  
0,8008 dô quam engein in geraht  
0,8009 ein ritter snellîche  
0,8010 hövisch unt rîche  
0,8011 Dolon was er genant  
0,8012 er was ûz der stat gesant  
0,8013 daz er solte hoeren unde sehen  
0,8014 unde vorschen unt spehen  
0,8015 in was beidersît gâch  
0,8016 er sprach "wer rîtet dâ"  
0,8017 "wer vrâget des" "daz tuon ich"  
0,8018 "wer bist dû" er nante sich  
0,8019 "ich hân gesaget nû saget mir"  
0,8020 "waz sulen wir sagen" "wer sît ir"  
0,8021 "wir sîn geboren von über mer  
0,8022 unt rîten ûz diseme her  
0,8023 unt sulen werben ein teil  
0,8024 sô dir gebe got guot heil  
0,8025 zuo dîner hövischheite  
0,8026 wis unser geleite  
0,8027 in die stat wir wollen dâr in  
0,8028 zuo zwein mannern oder zuo drîn  
0,8029 eines vrides sulen wir biten"  
0,8030 "ir bitet mit sô guoten siten  
0,8031 unt sô gezogenlîche  
0,8032 ich tâte boeslîche  
0,8033 ich en leiste iuwer bete"  
0,8034 er gelobete unt tete  
0,8035 des er gebeten was  
0,8036 er brâhte sie ûf daz palas  
0,8037 dâ der küninc ûfe saz  
0,8038 mit sînen kinden unt az  
0,8039 unt ander sîne ritterschaft  
0,8040 sie wurben ire boteschaft  
0,8041 mit sôgetânen worten  
0,8042 also dâr zuo gehôrten  
0,8043 der küninc hiez sie dannen gân  
0,8044 unt als dâ geezzen was sân  
0,8045 gienc er mit sînen râte  
0,8046 in eine kemenâten  
0,8047 umbe daz ir vernomen hât  
0,8048 den hêrren behagete der rât  
0,8049 allen gemeine  
0,8050 Hector aleine  
0,8051 der begunde ez widerreden  
0,8052 unt wolte ez niht vriden  
0,8053 er sprach "vernemet alle  
0,8054 wâr umbe ez mir missevalle

- 0,8055 wirdet in gegeben tac  
0,8056 sô mêret sich ire bejac  
0,8057 unt unse spîse wirdet verzert  
0,8058 unt uns die schifgart ist bewert  
0,8059 unde aller unser gewin  
0,8060 al sî daz ich niht wîse en bin  
0,8061 unde iuch widertrîben niht en sol  
0,8062 ez en behaget mir niht wole  
0,8063 wizzet waz ich iuch sagen  
0,8064 von uns zuo vierzehen tagen  
0,8065 mügen sie wole vride haben  
0,8066 daz wir die tötten begraben  
0,8067 sehet waz ir dâr umbe tuot  
0,8068 daz ist uns beidersît guot"  
0,8069 dâ wart manic rede getân  
0,8070 ir iegelîcher sagete sînen wân  
0,8071 beide sus unt sô  
0,8072 dô vereinten sie sich dô  
0,8073 daz der vride gegeben wart  
0,8074 die boten huoben sich ûf die vart  
0,8075 Dolon ire geleite was  
0,8076 was aldâ bereite  
0,8077 er nam ir guote ware  
0,8078 unt geleitte sie biz dare  
0,8079 dâ er in êr zuo was kumen  
0,8080 als ir dâ vore hât vernomen  
0,8081 dô sie riten under des  
0,8082 vrâgete in Ulixes  
0,8083 maniger hande mære  
0,8084 wâ ire burc wære  
0,8085 kranc oder stæte  
0,8086 des er gevreget hæte  
0,8087 mit grôzer kündicheit  
0,8088 des hette in jener bereit  
0,8089 sunder argeliste  
0,8090 sô er ez beste wiste  
0,8091 Dolon sprach "gebietet mir  
0,8092 got segene iuch" "got lône dir  
0,8093 dû hâst dich wole an uns behuot  
0,8094 got gebe dir iemer guot"  
0,8095 Dolon dannen kârte  
0,8096 sie zwêne îlten harte  
0,8097 dô sie zuo gezelte quâmen wider  
0,8098 sie sâzen von den rossen nider  
0,8099 unde sageten Agomennon vort  
0,8100 als ir ez biz her hât gehört  
0,8101 daz in vride wär gegeben  
0,8102 unde mit gemache solten leben

- 0,8103 die boten schuofen ire gemach  
0,8104 daz in zuo schaffene geschach  
0,8105 hôhe úf den andern tac  
0,8106 als man zuo den zîten pflac  
0,8107 wâren sie den tôten mite  
0,8108 sie hetten zweier hande site  
0,8109 sie hiezen viur machen  
0,8110 von holze unde von spachen  
0,8111 unt als ez allermeist bran  
0,8112 sô warf man den tôten man  
0,8113 unt als er gar verbrunnen was  
0,8114 sîne aschen man zuosamene las  
0,8115 unde behielt sie vile reine  
0,8116 in der erden oder in eineme steine  
0,8117 an solicher stat dâ sie lac  
0,8118 daz dechein boeser smac  
0,8119 noch übel ruch quam dâr abe  
0,8120 iegelîchen truoc man zuo grabe  
0,8121 als man noch hiute pfliget  
0,8122 sie bestateten ire tôten beidersît  
0,8123 mit vile grôzen êren  
0,8124 êr sie begraben wâren  
0,8125 wâren liten vierzehen naht  
0,8126 ouch sô was die erde entdaht  
0,8127 unt gruonte als êr  
0,8128 úz der burc biz an den sê  
0,8129 in was vrides nôt gewesen  
0,8130 sie en kunden decheine wîs genesen  
0,8131 vore dem stanke  
0,8132 des was ez in zuo danke  
0,8133 dô daz was verrochen  
0,8134 in der dritten wochen  
0,8135 schuofen sie anders ire dinc  
0,8136 Agomennon zuo râte gienc  
0,8137 alsô tet ouch Hector  
0,8138 dise dâr inne die dâ vore  
0,8139 eine wîs unt ander wîs  
0,8140 dirre wolte den prîs  
0,8141 alsô wolte ouch der jene  
0,8142 alsô gienc die zît hine  
0,8143 die wîle daz ire vride was  
0,8144 die wîle klagete Calcas  
0,8145 daz er in der stat hæte  
0,8146 eine tohter harte stæte  
0,8147 schoene hövisch unde wîs  
0,8148 die was geheizen Briseis  
0,8149 die mohte dâ niht beliben  
0,8150 sie wolten sie vertrîben

- 0,8151 durch ire gotinne  
0,8152 die sie hetten dâr inne  
0,8153 "sie klageten daz alle tage  
0,8154 daz ich wäre ire wîssage  
0,8155 unt über wäre gekârt  
0,8156 ich tet als geboten wart  
0,8157 Priamus sprach ich wäre wert  
0,8158 daz mich zuovuorte ein pfert  
0,8159 von den untriuwen  
0,8160 ez sule mich beriuwen  
0,8161 ich sî boeser denne ein hunt"  
0,8162 sie sprâchen "uns ist wole kunt  
0,8163 daz ir unschuldic sît  
0,8164 ouch sprechen si ez durch nît"  
0,8165 dô sprach Calcas vürebaz  
0,8166 "râtent ir hêren daz  
0,8167 daz ich mîne tohter zuo mir neme  
0,8168 sehet op uns daz wole gezeme  
0,8169 sô kume ich gerne an den rât"  
0,8170 sie sprâchen "tuot als ir gesprochen hât"  
0,8171 daz geschach alsô  
0,8172 des wart er sint unvrô  
0,8173 die hêren ûz unde innen  
0,8174 mit vride unt mit minnen  
0,8175 dicke unde allertagelîche  
0,8176 underbaneketen sich  
0,8177 Achilles zuo Hectore reit  
0,8178 sie wâren harte wole bekleit  
0,8179 unde harte rîchelîche  
0,8180 beide gelîche  
0,8181 sie sageten ire mære  
0,8182 wie ez komen wäre  
0,8183 diseme hier deme dâ  
0,8184 beide nein unt jâ  
0,8185 sie hetten grôz joie  
0,8186 in der stat zuo Trôje  
0,8187 unt bîwîlen ouch dâ vore  
0,8188 dô hette Hector  
0,8189 schoene kleinôte  
0,8190 steine harte rôte  
0,8191 grüene unt wîze  
0,8192 gemachet wole mit vlîze  
0,8193 in daz silber unde in daz golt  
0,8194 im was ouch ein vrouwe holt  
0,8195 Pendesilea genant  
0,8196 die hette im allez daz gesant  
0,8197 ein edel küninginne  
0,8198 durch der vrouwen minne

0,8199 truoc er daz golt an sîner hant  
0,8200 unt ein güldîn hârbant  
0,8201 in den selben stunden  
0,8202 umb sîn houbet gebunden  
0,8203 er was ein harte schoene man  
0,8204 sîne gezierde sach Achilles an  
0,8205 als er in lange ane gesach  
0,8206 nû hoeret wie er zuo im sprach  
0,8207 "ir sît hövisch sô mir got  
0,8208 ein ist ernest ein ander ist spot  
0,8209 nû lât es iuch betrâgen  
0,8210 saget mir des ich iuch vrâgen  
0,8211 ich en vrâge anders niet mî  
0,8212 wunder hât mich wie ez ergê  
0,8213 under uns beiden  
0,8214 êr wir hinnen scheiden  
0,8215 ir hât mir leide getân  
0,8216 den vriunt den ich verloren hân  
0,8217 Patroclum wil ich iemer klagen  
0,8218 hîerre Hector den ir hât erslagen  
0,8219 daz kumet iuch zuo unheile  
0,8220 mîn lîp ist dâr umbe veile  
0,8221 die selben sarwât  
0,8222 die ir im genomen hât  
0,8223 sie werde mir widere  
0,8224 ich gesetze iuch sô nidere  
0,8225 alsô lasterlîche  
0,8226 hier in iuwerme rîche  
0,8227 daz ir es iemer laster hât  
0,8228 die wîle dise werlt stât  
0,8229 ich gesach iuch alsô rehte nie  
0,8230 sô an dirre stat hier  
0,8231 umb daz ich zuo iuch haben haz  
0,8232 ich spreche von wârheiten daz  
0,8233 ir sît starc unt küene  
0,8234 doch en wirde ich niemer grüene  
0,8235 alsô küene als ir sît  
0,8236 ez en kume noch die zît  
0,8237 daz ich iuch leide getuo  
0,8238 ez sî spâte oder vruo"  
0,8239 Hector antwurte des  
0,8240 "nû hoeret hîerre Anchilles  
0,8241 vile rehte waz ich iuch sage  
0,8242 ich wär iemer ein zage  
0,8243 verzagete ich von worten  
0,8244 iedoch den vorhten  
0,8245 den ich von diser drouwe hân  
0,8246 der sol harte wole zuogân

- 0,8247 ich wæne iuwer herze baz stê  
0,8248 denne iuwer rede hier gê  
0,8249 daz Patroclus ist erslagen  
0,8250 wollet ir daz sô sêre klagen  
0,8251 daz müeze iemer alsô wesen  
0,8252 en mac ich vore iuch niht genesen  
0,8253 daz muoz sîn als ez sîn mac  
0,8254 ich en sterbe niht vore mînen tage  
0,8255 nû versinnet iuch iedoch  
0,8256 ich entrinne iuch niht noch  
0,8257 in wazzer noch in welde  
0,8258 bin ich iuch zuo gelte  
0,8259 oder zuo eigene gegeben  
0,8260 daz ir mir dröuwet an daz leben  
0,8261 mir ist leit die schande  
0,8262 daz man mich in diseme lande  
0,8263 mit stolzen worten übergât  
0,8264 ich weiz wole daz ez übel stât  
0,8265 unde vile übel gezimet  
0,8266 daz ir vergeben iuch sus gremet  
0,8267 ouch en stêt ez uns niet wole  
0,8268 op ich ouch nû sprechen sol  
0,8269 ein teil stolzliche  
0,8270 unt sô iuch got der rîche  
0,8271 wer wænet ir daz ir sít  
0,8272 wolte got wær die zît  
0,8273 daz wir quæmen ûf daz velt  
0,8274 ir vundet an mir widergelt”  
0,8275 dô zurnte Achilles sêre  
0,8276 er sprach “mir ist unmære  
0,8277 daz ich ie wart geboren  
0,8278 ich gereche disen zorn  
0,8279 al hier noch hiute  
0,8280 wâ nû mîne liute  
0,8281 bringet mîn ros unde mîn swert  
0,8282 er sol der zît sîn gewert  
0,8283 unt des werdes dâr zuo  
0,8284 nû werde schîn waz er tuo”  
0,8285 sie sprungen ûf der unde der  
0,8286 unde hieschen swert schilt unde sper  
0,8287 hette man sie beide niht gehat  
0,8288 sie hetten aldâ an der stat  
0,8289 den vride zuobrochen  
0,8290 des wart in gesprochen  
0,8291 beiden vile leide  
0,8292 des schameten sie sich beide  
0,8293 Priamus schuldigete sînen sun  
0,8294 Achillen Agomennon

- 0,8295 ouch klageten die vrouwen sêre  
0,8296 daz ez alsô kumen wäre  
0,8297 des en solte niht mêt nôt geschên  
0,8298 sie hetten gerne vride gesehen  
0,8299 daz die unkunden  
0,8300 zuo iren vriunden  
0,8301 durch tanz unde durch singen  
0,8302 in die stat giengen  
0,8303 dô gelac beidersît  
0,8304 beide zorn unt nît  
0,8305 der rede was decheine nôt mêt  
0,8306 sie giengen zuosamene als êr  
0,8307 dô dises leides geswigen was  
0,8308 hêrren Troilum bat dô Calcas  
0,8309 durch die alten künde  
0,8310 daz er im zuo staten stüende  
0,8311 sîne tohter er bat  
0,8312 im geben ûz der stat  
0,8313 dô Troilus veriesch  
0,8314 daz er sîne tohter wider hiesch  
0,8315 sêre er daz underquam  
0,8316 umbe die schoene Briseidam  
0,8317 sîne amîe sîn wîp  
0,8318 sie was im liep als der lîp  
0,8319 torste ez widerredet hân  
0,8320 er hette ez niemer getân  
0,8321 daz er sie hette wider gegeben  
0,8322 er mohte übel gestreben  
0,8323 wider sie alle gemeine  
0,8324 ouch was daz niht kleine  
0,8325 daz er durch ire schulde  
0,8326 sîner gote hulde  
0,8327 unde ire minne hette verloren  
0,8328 unde grôzlîchen iren zorn  
0,8329 hette iemer mère  
0,8330 des was sîn rede swære  
0,8331 dô Briseida gesach  
0,8332 daz ir zuo rûmene geschach  
0,8333 die stat dâ sie inne was geboren  
0,8334 sie sprach "wær ich grôz als ein turm  
0,8335 ich müeste kleine werden  
0,8336 von sorgen unt von swerden  
0,8337 unt von grôzen leiden  
0,8338 sol ich hinnen scheiden  
0,8339 wie scheide ich joch hinne  
0,8340 ich bin ein küninginne  
0,8341 nû muoz ich hinnen kêren  
0,8342 als ein betelære

- 0,8343 unde rûmen daz lant  
0,8344 hette ich daz in der hant  
0,8345 daz ich hân in dem gemüete  
0,8346 ein mezzer wüete  
0,8347 mitten durch daz herze mîn  
0,8348 wen daz ich hoffende bin  
0,8349 daz mir zuo belibene geschê  
0,8350 mînes lebenes en wär niht mêt  
0,8351 jâmerlîcher denne ich iuch sage  
0,8352 wart der vrouwen klage  
0,8353 sie sprach "ouwê unt ouwê  
0,8354 ouwê nû unt iemer mêt  
0,8355 ouwê daz ich den lîp ie gewan  
0,8356 Troile herzelieber man  
0,8357 mir ist mîn unsälichkeit  
0,8358 hêrre umb dich einen leit  
0,8359 ez ist mir allez umbe dich  
0,8360 ich en ruoche niht umbe mich  
0,8361 en wares dû hêrre aleine  
0,8362 würde ich danne zuo eineme steine  
0,8363 des würde guot rât  
0,8364 gienge ich als ein krete gât  
0,8365 unde solte ich bî eineme zûne gân  
0,8366 unde mohte ich dîn alsô vile hân  
0,8367 daz ich dich gesæhe  
0,8368 swaz mir geschæhe  
0,8369 daz vertrüege harte wole  
0,8370 nû en weiz ich waz ich tuon sol  
0,8371 sælic naht unde sælic tac  
0,8372 an sweder ich bî dir gelac  
0,8373 eiâ trôjisch künne  
0,8374 swer ie liep gewünne  
0,8375 der vergunne mir des  
0,8376 daz ich entgelte ich en weiz wes  
0,8377 daz ich lâzen einen helt  
0,8378 den ich arme hette erwelt  
0,8379 zuo mîneme lîbe  
0,8380 an mir armen wîbe  
0,8381 nû weiz ich waz man richet  
0,8382 daz man mir leide spricht  
0,8383 unt trîbet von dem manne  
0,8384 den ich von herzen liep hân  
0,8385 ouwê unt ouwê  
0,8386 ouwê nû unt iemer mêt  
0,8387 waz wil man an mir rechen  
0,8388 oder waz mac ich nû sprechen  
0,8389 ich en weiz op ich entgülte  
0,8390 mînes vateres schulde

- 0,8391 sô genieze ich mit rehte  
 0,8392 daz mîn geslehte  
 0,8393 mîn man unt mîn kint  
 0,8394 von dirre stat geboren sint  
 0,8395 ouwî unt ouwê  
 0,8396 ouwî nû unt iemer mêt  
 0,8397 ist ieman der daz vernomen hât  
 0,8398 daz ich mit worten oder mit tât  
 0,8399 oder mit geræte  
 0,8400 übel ie getæte  
 0,8401 daz ich verschuldet hân den tôt  
 0,8402 sô tuot mir schendigen nôt  
 0,8403 sô sulet ir niht beiten  
 0,8404 heizet viur bereiten  
 0,8405 unt lâzet mich verbrinnen  
 0,8406 kêre ich alsus hinnen  
 0,8407 in ein unkünde  
 0,8408 des hât ir alle sündne"  
 0,8409 Troilus hette gehört  
 0,8410 ire klage unde ire wort  
 0,8411 unt op er wäre steinen  
 0,8412 sô müeste er balde weinen  
 0,8413 grôz jâmer im ane gienc  
 0,8414 mit armen er sie umbevienc  
 0,8415 dô stuonden sie beide  
 0,8416 in sô grôzer leide  
 0,8417 daz sie en wisten waz sie wolten  
 0,8418 oder waz sie tuon solten  
 0,8419 sie en wisten waz râten  
 0,8420 sie en wisten waz sie tâten  
 0,8421 sie en wusten wâ sie wâren  
 0,8422 sie wusten wie gebâren  
 0,8423 sie en wusten waz sie kunden  
 0,8424 beide samet sie stuonden  
 0,8425 in solichen gebâren  
 0,8426 als sie verzaget waren  
 0,8427 si hielt in er hielt sie  
 0,8428 grôzer jâmer en wart nie  
 0,8429 denne dâ was under in zwein  
 0,8430 er wäre harter denne ein stein  
 0,8431 swer daz jâmer gesach  
 0,8432 op im zuo weinen niht geschach  
 0,8433 Priamus sprach Troilô zuo  
 0,8434 "weist dû sun waz dû tuo  
 0,8435 gehabe dich menlîche  
 0,8436 ez stêt dir boeslîche  
 0,8437 wes wilt dû beginnen  
 0,8438 dû salt dich versinnen

- 0,8439 daz dû ein man bist  
0,8440 unt dir dîn sin entgangen ist  
0,8441 ez mac uns schiere got geben  
0,8442 daz wir uns liebe geleben  
0,8443 in diseme lande  
0,8444 waz tuot ir ez ist schande"  
0,8445 dô im der trôst gegeben wart  
0,8446 dô was in als sie bekârt  
0,8447 von einer sühte wären  
0,8448 von ire herzeswären  
0,8449 muosten sie sich twingen  
0,8450 mit swærlichen dingen  
0,8451 dô hiez Troilus ire gewant  
0,8452 ûf binden dâ zuohant  
0,8453 unde hiez sie dannen rîten  
0,8454 er en liez sie niht bîten  
0,8455 des saz sie ûf unt reit  
0,8456 vile schoene was ire kleit  
0,8457 von golde unt von gesteine  
0,8458 wen ire varwe eine  
0,8459 die was alsô schoene  
0,8460 ir gezæme wole die krône  
0,8461 ir en mohte niht gelîchen  
0,8462 man sach dâ beide blîchen  
0,8463 die kleider unde die vrouwen  
0,8464 swer ez wolte schouwen  
0,8465 ir wart durch ire schoene  
0,8466 zuo minnen unde zuo lône  
0,8467 vile dicke gegeben  
0,8468 süezer wunsch unde süeze leben  
0,8469 man saget von iren gewanden  
0,8470 daz ez von eineme verren lande  
0,8471 zuo Trôje was gesant  
0,8472 gevüeget was daz gewant  
0,8473 mit sôgetâner liste  
0,8474 daz nieman en wiste  
0,8475 wâ engein wäre sîn nât  
0,8476 die kürse under der wât  
0,8477 die was von grôzer ziere  
0,8478 von einer hande tiere  
0,8479 was die kürse genomen  
0,8480 unde was von eineme lande kommen  
0,8481 dâ die sunne ûf gât  
0,8482 sô der morgen entstât  
0,8483 ire kleit was guot in alle wîs  
0,8484 die steine die daz paradîs  
0,8485 in sîneme wazzer treit  
0,8486 wâren verworht in ire kleit

- 0,8487 sol ich iuch sagen vürebaz  
0,8488 dâ die vrouwe ûfe saz  
0,8489 daz was ein zeltende pfert  
0,8490 unt was wole hundert marke wert  
0,8491 dô sie úz der stat quam  
0,8492 unde urloup genam  
0,8493 sie wâren alle unvrô  
0,8494 daz sie dannen schiet alsô  
0,8495 alsô vile oder mî  
0,8496 denne dâ leides was êr  
0,8497 was dâ zuo stunden  
0,8498 klagen dô begunden  
0,8499 unde weinen Ecuba  
0,8500 unde die schoene Elena  
0,8501 unt die vrouwen alle gemeine  
0,8502 grôz unt kleine  
0,8503 alte unt junge  
0,8504 durch die scheidunge  
0,8505 dô die vrouwe enwec vuor  
0,8506 Troilus bî gote swuor  
0,8507 daz er dechein ander wîp  
0,8508 legete mîr bî sînen lîp  
0,8509 er bat daz sie ire êre  
0,8510 behielte unt stæte wäre  
0,8511 uns en scheide danne der tôt  
0,8512 des en schiet dechein nôt  
0,8513 "wir kumen in kurzen jâren  
0,8514 zuosamene als wir wâren"  
0,8515 sie sprach "hêrre op got wil  
0,8516 beide zuo erneste unde zuo spile  
0,8517 sol ich halten mâze  
0,8518 an werke unt an gelâze"  
0,8519 Salomon der wîse  
0,8520 nemet daz zuo prîse  
0,8521 swer ein wîp hæte  
0,8522 biderbe unt stæte  
0,8523 hielte er sie rehte  
0,8524 ez vromete sîneme geslehte  
0,8525 er sprichet der sî eine  
0,8526 und zehen kûme reine  
0,8527 die rehtliche stæte sî  
0,8528 eine zwô oder drî  
0,8529 machent mit ire krancheit  
0,8530 daz man der zehenden sprichet leit  
0,8531 swer denne eine stæte hât  
0,8532 dem gît er guoten rât  
0,8533 daz er iemer mîre  
0,8534 got durch sîne êre

- 0,8535 hier muoz dise rede belîben  
 0,8536 zuo sprechenne von den wîben  
 0,8537 nû bin ich niuwit her komen  
 0,8538 als ir vore hât vernomen  
 0,8539 Troilus unt Briseidâ  
 0,8540 die schieden sich dâ  
 0,8541 mit sôgetânen leiden  
 0,8542 solten sie verscheiden  
 0,8543 unde des lîbes wandel hân  
 0,8544 ez hette in vile baz getân  
 0,8545 Menesteus unt Thelamon  
 0,8546 unt hêrren Thideusis sun  
 0,8547 der herzoge Diomedes  
 0,8548 unde der wîse Ulixes  
 0,8549 unde ander manic man  
 0,8550 des ich genennen niht en kan  
 0,8551 die riten unde giengen  
 0,8552 die vrouwen sie entviengen  
 0,8553 vile lieplîchen under des  
 0,8554 gesach Diomedes  
 0,8555 daz die roete ire wangen  
 0,8556 hette bevangen  
 0,8557 alsô rôt unde alsô breit  
 0,8558 als dâr ûf wär geleit  
 0,8559 ein harte vrisch rôsenblat  
 0,8560 unde dâr umbe gezatt  
 0,8561 die varwe wîz als ein snê  
 0,8562 daz ist anders niht mî  
 0,8563 danne wangen rôt hût wîz  
 0,8564 wolte ich es haben mînen vlîz  
 0,8565 von sus getânem umbelobene  
 0,8566 wolte ich sie unden unde oben  
 0,8567 von der swarten biz an daz swil  
 0,8568 loben ûzer mâzen vile  
 0,8569 waz wollet ir daz ich spreche vort  
 0,8570 dit sint harte kurze wort  
 0,8571 ich spreche daz sie schoene was  
 0,8572 daz meinet daz ire vahs  
 0,8573 ougen wangen kinne munt  
 0,8574 ir allez harte wole stuont  
 0,8575 Diomedes sach dare  
 0,8576 unt wart ire schoenheit gewar  
 0,8577 unde als er ir gewar wart  
 0,8578 sô wart er aller verkârt  
 0,8579 sîn gedanc vuor hin  
 0,8580 als tet sîn sin  
 0,8581 alsô tet sîn muot  
 0,8582 alsô tet sîn guot

- 0,8583 alsô tet sîn lîp  
 0,8584 er dâhte allez umb daz wîp  
 0,8585 hette er tûsent sinne gehat  
 0,8586 er hette sie alle an ir bestatet  
 0,8587 sô er ir baz nâhete  
 0,8588 sô er mîr dâhete  
 0,8589 unz er ir alsô nâhe quam  
 0,8590 daz sie sîn wort wole vernam  
 0,8591 nû hoeret wie er zuo ir sprach  
 0,8592 als im zuo sprechene geschach  
 0,8593 "sô mir got der guote  
 0,8594 ich wæne mîn herze bluote  
 0,8595 ich hân vile übele zît  
 0,8596 ich en weiz waz mir dâr inne lît  
 0,8597 mir ist übel heim gehuot  
 0,8598 mîn gedanc noch mîn muot  
 0,8599 noch mîne sinne  
 0,8600 en sint dâ niht inne  
 0,8601 doch entsebe ich wole  
 0,8602 ez ist von andern ding vol  
 0,8603 ich wæne dû ez allez mit dir hâs  
 0,8604 swaz sô dâr inne was  
 0,8605 daz hât dîn minne dâr ûz vertriben  
 0,8606 unt ist enmitten dâr inne beliben  
 0,8607 kleiner dinc denne minne  
 0,8608 twingen mich dâr inne  
 0,8609 ich mac wole minnensiech sîn  
 0,8610 daz machet dîner varwen schîn  
 0,8611 unde op ich von minnen siech bin  
 0,8612 sô gesende mir dâr in  
 0,8613 dîner arzâtîe  
 0,8614 zwô oder drîe  
 0,8615 guote rede lieben gruoz  
 0,8616 sô wirdet mîner swære buoz  
 0,8617 oder einen guoten wân  
 0,8618 nû ich daz gesprochen hân  
 0,8619 daz ich minnensiech sî  
 0,8620 nû wiste ich gerne dâ bî  
 0,8621 waz minnensiech wäre  
 0,8622 ich wæne ez sint swære  
 0,8623 unde gedanke über gedanc  
 0,8624 eines mannes herzekranc  
 0,8625 sô er gerne hâte  
 0,8626 ein kiusche wîp stâte  
 0,8627 schoene unde wole gevare  
 0,8628 sô vert sîn gedanc dare  
 0,8629 ie baz unt baz  
 0,8630 dâ ez êr was naz

- 0,8631 dâ mac regenen ez lîhte  
 0,8632 ich sol dir mîne bîhte  
 0,8633 alle biz an ein ende sagen  
 0,8634 ich wil durch dîne minne tragen  
 0,8635 alsô grôze swære  
 0,8636 swer ez joch wäre  
 0,8637 der solte es geniezen  
 0,8638 des mac dich wole bedriezen  
 0,8639 daz mîn rede sô lanc ist  
 0,8640 des dû gemanet bist  
 0,8641 des gip mir antwürte"  
 0,8642 daz ich die rede kürze  
 0,8643 dô sprach die vrouwe  
 0,8644 als hette sie riuwe  
 0,8645 "wes sol ich dir antwürte geben  
 0,8646 nû sihes dû wole daz ich kûme leben  
 0,8647 wende mir sô leide nie en wart  
 0,8648 sô umbe dise ûzvart  
 0,8649 die stat dâ ich inne wart geboren  
 0,8650 die hân ich verloren  
 0,8651 dâr zuo einen guoten man  
 0,8652 daz nie liebers niet gewan  
 0,8653 dîn bete ist harte gæhe  
 0,8654 ez ist alsô wæhe  
 0,8655 daz dû mich ungemüejet lâs  
 0,8656 biz dû mîn bezzer kündne hâs  
 0,8657 ich en weiz ouch rehte wer dû bist  
 0,8658 ich wil dirre rede haben vrist  
 0,8659 sie wäre ouch nû unstæte  
 0,8660 swelich wîp einen manne tæte  
 0,8661 alsô schiere guoten wân  
 0,8662 ir sulet die rede lân  
 0,8663 ich sehe dort dâ mîn vater stêt  
 0,8664 unde engegen mir gêt  
 0,8665 ûz den pavelûne"  
 0,8666 dô liezen sie ire geriune  
 0,8667 dô entvienc sie Calcas  
 0,8668 alse sîn reht was  
 0,8669 sie schuldigete in sêre  
 0,8670 daz ez sîn schult wäre  
 0,8671 daz ir leides was geschên  
 0,8672 "ez mac wole sîn ich wil es jehen  
 0,8673 bî dînen hulden  
 0,8674 doch maht dû baz schulden  
 0,8675 den got der mir ez gebôt  
 0,8676 dû gesehes noch soliche nôt  
 0,8677 in dirre geine  
 0,8678 daz stein ûf steine

- 0,8679 als ein mel wirdet zuoriben  
0,8680 unt ez allez wirdet vertriben  
0,8681 daz in diseme lande ist  
0,8682 gote lop daz dû hier bist  
0,8683 dû salt noch hier bevinden  
0,8684 wie wole wir überwinden  
0,8685 nôt unt swære  
0,8686 ich wil iemer mère  
0,8687 lesen unt singen  
0,8688 ûf den ich dâ gedingen  
0,8689 daz ist der got Apollô  
0,8690 wir werden sîn noch beide vrô"  
0,8691 er trôste sie allen den tac  
0,8692 unz ire klage doch gelac  
0,8693 dannoch werte der vride  
0,8694 geruowet hetten ire lide  
0,8695 unde geheilet ire wunden  
0,8696 sie hetten überwunden  
0,8697 allez ungeræte  
0,8698 schoene unt dræte  
0,8699 wâren ros unt ire pfert  
0,8700 wole gestælet ire swert  
0,8701 geveget ire halsberge  
0,8702 tal unt berge  
0,8703 gerûmet von den tötten  
0,8704 helme zuoschrôten  
0,8705 zuobrochene kolzen  
0,8706 sper pfile bolzen  
0,8707 kocher armbrust unde bogen  
0,8708 kovertiure zuozogen  
0,8709 wâpenroc zuoslizzen  
0,8710 wambeis zuorizzen  
0,8711 wâren wider gemachet wole  
0,8712 ire hüttten von spîse vol  
0,8713 die wîle was der vride gelegen  
0,8714 des sie unlange hetten gepflegen  
0,8715 sie bereitten sich aber in den strît  
0,8716 alse kommen was die zît  
0,8717 daz der vride gelac  
0,8718 êr sich erhüebe der tac  
0,8719 ire ros stuonden bereit  
0,8720 kovertiuren ûf geleit  
0,8721 dâr über pfellel unde dâr mit  
0,8722 zindât unde samît  
0,8723 wâpenen sie sich begunden  
0,8724 sô sie beste kunden  
0,8725 in die kolzen halsberge ane  
0,8726 rôt unde wîz als ein swane

- 0,8727 gel blâ zindât  
 0,8728 über die sarewât  
 0,8729 helm ûf sper an die hant  
 0,8730 sporen umbe alzuohant  
 0,8731 zuo den sîten schilt dâr under swert  
 0,8732 ûf die ros ûf die pfert  
 0,8733 hêren unde knehte  
 0,8734 zuo strîte unde zuo vehte  
 0,8735 zuo gereche wole zuo velde  
 0,8736 dise ûz dem gezelte  
 0,8737 jene ûz der gewer  
 0,8738 beidersît vile michel her  
 0,8739 Agomennon quam Hectorî engein  
 0,8740 die andern volgeten disen zwein  
 0,8741 sehsvalt was êr ire leit  
 0,8742 über die manicvaltigkeit  
 0,8743 sibenvalt ez nû wart  
 0,8744 sie wâren zuosamene gekârt  
 0,8745 mit worten mit gruoze  
 0,8746 zuo rosse unt zuo vuoze  
 0,8747 zuo sprunge unt zuo loufe  
 0,8748 quâmen sie zuo houfe  
 0,8749 mit grôzeme gereize  
 0,8750 quâmen sie zuo kreize  
 0,8751 sie brâhten dâr ûf unde dâr in  
 0,8752 niuwe tât niuwe begin  
 0,8753 niuwe ungebære  
 0,8754 waz wollet ir mère  
 0,8755 grôze unmâze  
 0,8756 mit worten unt mit gelâze  
 0,8757 der brûne stahel schriet den rinc  
 0,8758 sô daz daz viur dâr ûz gienc  
 0,8759 als ganeistern ûz der gluot  
 0,8760 der niuwe pfil spræjete daz bluot  
 0,8761 an die vrischen schilde  
 0,8762 ûf dem gevilde  
 0,8763 wart zuotretet daz gras  
 0,8764 daz ein teil entsprozzen was  
 0,8765 beide sant unt griez  
 0,8766 sîn alte spor ez niet en liez  
 0,8767 die wîseten iren übermuot  
 0,8768 als man gerne dannen tuot  
 0,8769 nâch dem übermuote  
 0,8770 mit sweize unt mit bluote  
 0,8771 wâren ire lide begozzen  
 0,8772 die schilde durchschozzen  
 0,8773 die sarewât zuoschrôten  
 0,8774 dâ gienc ez an die tôtten

- 0,8775 dâ blichen schilde unde swert  
 0,8776 hin gein der burc wert  
 0,8777 durch die venster in den sal  
 0,8778 dâ die vrouwen überal  
 0,8779 giengen unt stuonden  
 0,8780 die tötēn unt die gewundeten  
 0,8781 vielen nider als êr  
 0,8782 dô huop ez sich von Hectorê  
 0,8783 gein im quam gerant  
 0,8784 der küninc von Calcedonienlande  
 0,8785 mit sîner baniere  
 0,8786 "wâ nû ritter viere  
 0,8787 wole her gein Hector"  
 0,8788 sie triben beide die sper enbore  
 0,8789 iren deweder valte der stich  
 0,8790 sie understâchen beide sich  
 0,8791 sô daz der schaft ûf stoup  
 0,8792 als vore dem winde ein dürre loup  
 0,8793 Hector huop ûf daz swert  
 0,8794 daz was maniger marke wert  
 0,8795 er sluoc in ûf den schedelkopf  
 0,8796 durch den helm in den topf  
 0,8797 den slac entvienc die stirne  
 0,8798 úz seic daz hirne  
 0,8799 er rettete wider sîn swert  
 0,8800 jener viel zuo der erden wert  
 0,8801 als er dâr nider lac  
 0,8802 Hector gewan einen boesen tac  
 0,8803 bî zwein bî drîn  
 0,8804 ranten tûsent ûf in  
 0,8805 den er allen werte sich  
 0,8806 des entvienc er slac unde stich  
 0,8807 manigen slac unde manigen stôz  
 0,8808 sîn nôt die was harte grôz  
 0,8809 doch en wolte er niht entwîchen  
 0,8810 er liez dare strîchen  
 0,8811 als ein eber mit den zenen  
 0,8812 disen hier dort jenen  
 0,8813 gruozte er mit grôzen slegen  
 0,8814 Cantipus begunde zuo legen  
 0,8815 des swestersun was Philithoas  
 0,8816 der küninc der dâ erslagen was  
 0,8817 er rach sînen neven  
 0,8818 daz im leit was daz leben  
 0,8819 aller der der im widerreit  
 0,8820 der hette er vile nider geleit  
 0,8821 manigen er den líp nam  
 0,8822 Hectorî er och zuo quam

- 0,8823 mit dem swerte er dar streich  
0,8824 Hector dem slage entweich  
0,8825 Cantipus sluoc aber dare  
0,8826 unt zuosluoc im die riemen gare  
0,8827 dâ der helm mite gebunden was  
0,8828 er sprach "nû ist Philithoas  
0,8829 an dir gerochen  
0,8830 dir ist daz houbet zuobrochen  
0,8831 wie mohtes dû genesen"  
0,8832 Hector sprach "daz muoz wesen  
0,8833 iedoch ich dir es baz gan"  
0,8834 dô sluoc er den manne  
0,8835 mit eineme slage daz houbet abe  
0,8836 er sprach "nû lic unde habe  
0,8837 daz ich von dir solte hân  
0,8838 dich hât betrogen dîn wân"  
0,8839 sus nam er in beiden daz leben  
0,8840 Cantipô unde sîneme neven  
0,8841 dô diz geschach under des  
0,8842 dô rante zuo Achilles  
0,8843 mit ûf gerihteteme sper  
0,8844 poinete er hine unt her  
0,8845 mit eineme stiche durch drî  
0,8846 mit dem swerte dâ bî  
0,8847 valte er vile ûf daz gras  
0,8848 alsô snite ein scharsahs  
0,8849 zweinzic hâr mit eineme snite  
0,8850 alsô tet sîn swert dâ er mite  
0,8851 under der ritterschaft streit  
0,8852 zweinzic mit eineme slage sneit  
0,8853 er sluoc sie vort unt wider  
0,8854 unt legete ir alsô vile nider  
0,8855 swaz er ir begatete  
0,8856 daz er in dem bluote watete  
0,8857 dem rosse unz an die büege  
0,8858 man saget daz er erslüge  
0,8859 sô vile mit sîn eines hant  
0,8860 daz ez Hector niemer verwant  
0,8861 zwêne græven er im ersluoc  
0,8862 unde ires volkes genuoc  
0,8863 swelichen er ane quam  
0,8864 den machete er tôt oder lam  
0,8865 wen Troilus aleine  
0,8866 sie wâren alle gemeine  
0,8867 sô sêre von im hin danne  
0,8868 daz sie sich niht mohten hân  
0,8869 bekobert decheine wîs  
0,8870 Achilles behielt dâ den prîs

- 0,8871 Troilus unt Hector  
0,8872 die wichen im beide vore  
0,8873 er sluoc sie mit gewalt  
0,8874 zuo der burc an ire behalt  
0,8875 er gienc sô houwen  
0,8876 daz in der stat die vrouwen  
0,8877 weinten ûf der gewer  
0,8878 daz man ez hörte in dem her  
0,8879 Achilles vast enmitten stuont  
0,8880 dâ wart ein wênic gewundet  
0,8881 Hector wart dô geware  
0,8882 eines küninges mitten in der schar  
0,8883 der was Merion genant  
0,8884 unde was küninc zuo Kriechenlant  
0,8885 in swelichen noeten Hector rite  
0,8886 er was im vaste mite  
0,8887 unz er in mitten enzwei gespielt  
0,8888 Achilles langer niht enthielt  
0,8889 er sluoc dâ unde hier  
0,8890 durch daz bein durch daz kneie  
0,8891 durch den bûch in den darm  
0,8892 durch die hant in den arm  
0,8893 durch den munt unde dâr inne  
0,8894 durch die zene unz an daz kinne  
0,8895 ûf daz houbet einen slac  
0,8896 zuo der nase unz an den nac  
0,8897 durch den guomen unz an die zungen  
0,8898 unde vürebaz in die lungen  
0,8899 unde vürebaz unz an den satelbogen  
0,8900 Hector hette daz swert erzogen  
0,8901 er rante in an unde was im mite  
0,8902 unde zuoschriet im den samît  
0,8903 unde den halsberc dâr under  
0,8904 die nôt sich begunde  
0,8905 als von êrst erheben  
0,8906 Achilles wânte in bedreben  
0,8907 mitten in dem ringe  
0,8908 daz er in gevienge  
0,8909 oder ander leit getæte  
0,8910 als er in bestanden hæte  
0,8911 mit hôhen worten mit starker tât  
0,8912 sîn wart harte guot rât  
0,8913 Troilus quam zuo gerant  
0,8914 wen sîn ellenthalfe hant  
0,8915 sie wâren gar erlegen  
0,8916 Menelaus der degen  
0,8917 umbe den daz allez geschach  
0,8918 an den von Trôje er sich rach

- 0,8919 beide verre unde nâch  
 0,8920 Mennon der küninc von Persia  
 0,8921 der quam ûf in geriten  
 0,8922 mit nîde unde mit unsiten  
 0,8923 dô gerou in die vart  
 0,8924 ein slac in gegen den ougen wart  
 0,8925 daz swert im in die wangen wuot  
 0,8926 daz im dâr ûz spranc daz bluot  
 0,8927 Troilus sîn leit rach  
 0,8928 Menelaum er stach  
 0,8929 durch daz ros in die huf  
 0,8930 unt negelte in dâr ûf  
 0,8931 unde hielt in mit dem spere  
 0,8932 daz er dare noch here  
 0,8933 gewanken niht en mohte  
 0,8934 den schaft er in in druhete  
 0,8935 unt wolte in getoetet hân  
 0,8936 Menelaus was entân  
 0,8937 im wäre missegangen  
 0,8938 erslagen oder gevangen  
 0,8939 wen daz in lôste under des  
 0,8940 der herzoge Diomedes  
 0,8941 hêren Thideus sun  
 0,8942 unde hêrre Mennon  
 0,8943 die bestuonden in beide  
 0,8944 daz wart Troilô zuo leide  
 0,8945 Diomedes mit solicher maht  
 0,8946 quam ûf Troilum geraht  
 0,8947 daz er in ûf die erden stach  
 0,8948 unde begreif daz ros unde sprach  
 0,8949 zuo sîneme knechte  
 0,8950 "vernim mîne wort rehte  
 0,8951 nim diz ros unde bringe ez hin  
 0,8952 einer vrouwen der ich bin  
 0,8953 holt ûzer mâze  
 0,8954 nû rít dîne strâze  
 0,8955 unde sage ir wer ez gewunnen hâ  
 0,8956 die vrouwe heizet Briseidâ  
 0,8957 ire vater heizet Calcas  
 0,8958 unde sage ir wes diz ros was"  
 0,8959 er nam daz ros als er hiez  
 0,8960 ungeworben er niht en liez  
 0,8961 daz im sîn hêrre gebôt  
 0,8962 die vrouwe wart der sendunge rôt  
 0,8963 iedoch sie die gift entvienc  
 0,8964 sie sprach "saget hêrre jungelinc  
 0,8965 waz meinet dise sande  
 0,8966 sô mir got ich wânte

- 0,8967 unde och dûhte mich des  
 0,8968 daz hêrre Diomedes  
 0,8969 ein hövisch man wäre  
 0,8970 sîn gift ist mir unmære  
 0,8971 diseme orse ich wole guotes gan  
 0,8972 durch Troilum mînen lieben man  
 0,8973 ich weiz och wole sam mir got  
 0,8974 ez ist nû sîn spot  
 0,8975 daz Troilus dâr nider lît  
 0,8976 ez kumet noch die zît  
 0,8977 daz im daz selbe geschiet  
 0,8978 wär er zuo strîte kumen niet  
 0,8979 sô wäre im niht dâ geschên  
 0,8980 wir hân daz selten gesehen  
 0,8981 daz der boese unt der zage  
 0,8982 quæme zuo strîte oder zuo slage"  
 0,8983 der knappe reit dannen  
 0,8984 dô hette mit sînen mannen  
 0,8985 under des begangen Parîs  
 0,8986 beide ruom unde prîs  
 0,8987 bî der selben wîlen  
 0,8988 mit bogen unde mit pfilen  
 0,8989 sîn senewe sluoc sô dicke  
 0,8990 daz eineme ougenblicke  
 0,8991 beide an schuzze unde an zoge  
 0,8992 gelîchete wole sîn boge  
 0,8993 er gienc sô schiezen  
 0,8994 daz die Kriechen guot hiezen  
 0,8995 daz sie vore sînen bogen  
 0,8996 niergen konden benüegen  
 0,8997 dô reit zuo Polidamas  
 0,8998 der sîn geselle was  
 0,8999 daz ich ez niht en lenge  
 0,9000 beide vuozgenge  
 0,9001 ritter unde knechte  
 0,9002 wâren mit der vehte  
 0,9003 alzuo sêre benôtet  
 0,9004 gewundet unde getoetet  
 0,9005 beide erslagen unde ertrat  
 0,9006 dô mohte man an der walstat  
 0,9007 grôz jâmer schouwen  
 0,9008 maniger lac dâ zuohouwen  
 0,9009 dô quam zuo Diomedes  
 0,9010 unde Agomennon under des  
 0,9011 die quâmen beide in den kreiz  
 0,9012 daz kalte îsen wart heiz  
 0,9013 von dem warmen bluote  
 0,9014 mit zornigeme muote

- 0,9015 reit Agomennon  
0,9016 unt Thideus sun  
0,9017 Diomedes der küene  
0,9018 schilde rôt grüene  
0,9019 von golde von lâsure  
0,9020 rosse kovertiure  
0,9021 die halsberge wîze  
0,9022 hiewen sie mit vlîze  
0,9023 durch den helm unz an den loc  
0,9024 wambeis wâpenroc  
0,9025 man ros unde pfert  
0,9026 die viânde wichen hinderwert  
0,9027 unz an den burchagen  
0,9028 dâ wart ir vile erslagen  
0,9029 der sturm der was herte  
0,9030 harte wole sich werte  
0,9031 der küene Polidamas  
0,9032 unde dô der sturm allerhertest was  
0,9033 Troilus gewarte  
0,9034 daz Diomedes kârte  
0,9035 ûf Polidamam  
0,9036 der was der im daz ros nam  
0,9037 Troilus versuochete sîne maht  
0,9038 ûf Diomeden quam er geraht  
0,9039 alsô zornic als ein bere  
0,9040 von dem orse mit dem spere  
0,9041 treip er in eines schrites lanc  
0,9042 Diomedes zuo vuoze spranc  
0,9043 Troilus begreif daz pfert  
0,9044 sie versuocheten alle ire swert  
0,9045 ûf Diomedis lide  
0,9046 sie sluogen als tûsent smide  
0,9047 ûf einen anebôz  
0,9048 Diomedes genôz  
0,9049 hêren Thideus sun  
0,9050 unde daz Agomennon  
0,9051 ime wole bî stuont  
0,9052 doch wart er sêre wunt  
0,9053 Briseiden quam daz mære  
0,9054 daz Diomedes wäre  
0,9055 nider gestochen von Troilô  
0,9056 des mares was sie vile vrô  
0,9057 Achilles quam zuo getrieben  
0,9058 dâ der sturm was beliben  
0,9059 harte starke er in erhuop  
0,9060 er sluoc dem rosse in den buoc  
0,9061 dem ritter in den enkel  
0,9062 dem pferde an den schenkel

- 0,9063 dem ritter durch daz bein  
0,9064 er gemachete in zwein  
0,9065 daz sie bî der erden  
0,9066 lam muosten werden  
0,9067 daz wart in obene harte leit  
0,9068 durch die understen krancheit  
0,9069 die sie hine solte tragen  
0,9070 wart daz oberste zuoslagen  
0,9071 Troilus tet alsame  
0,9072 beide sîn tât unde sîn name  
0,9073 stuonden harte wole zuo lobe  
0,9074 in sînes vateres hove  
0,9075 unde ûf dem velde  
0,9076 Briseida in dem gezelte  
0,9077 was des vile gemeit  
0,9078 daz er sô menlîchen streit  
0,9079 Achilles quam ûf in gerant  
0,9080 Troilus mit der lerzen hant  
0,9081 sluoc im ûf daz rippebein  
0,9082 daz im daz bluot spranc engein  
0,9083 Achilles hette übel zît  
0,9084 wen daz man sîn huotte andersît  
0,9085 er wäre dâ gar entân  
0,9086 Troilus liez dare gân  
0,9087 unde stach im daz ros unde  
0,9088 daz ez niht en kunde  
0,9089 enthalten den der dâr ûfe saz  
0,9090 Hector der gesach daz  
0,9091 balde er zuo kârte  
0,9092 mit im die bastharte  
0,9093 dâ wäre im geschênen leide  
0,9094 wen dise beide  
0,9095 Menesteus von Athêne  
0,9096 unde Ajax die zwêne  
0,9097 er wäre gevangen oder geslagen  
0,9098 dô begunde Achilles klagen  
0,9099 "ich en weiz wes ich entgelten  
0,9100 ez ist geschêen selten  
0,9101 als an diseme tage hiute  
0,9102 daz sus getâne liute  
0,9103 mir tæten dechein ungemach  
0,9104 ouwê daz ez mir ie geschach"  
0,9105 sîn zorn wuohs sîn herze drant  
0,9106 sie liezen alle ein pfant  
0,9107 swaz ir im zuo quam  
0,9108 sie beliben tôt oder lam  
0,9109 sie wâren alle ein wint  
0,9110 die noete die iuch gesaget sint

- 0,9111 wider dem daz nû geschach  
 0,9112 er ersluoc unt erstach  
 0,9113 unde tratte unt stiez  
 0,9114 decheinen schilt er ganz liez  
 0,9115 helm noch halsberc  
 0,9116 über tal unde berc  
 0,9117 jagete er si alle  
 0,9118 eteslîche mit dem valle  
 0,9119 eteslîche mit vluht genas  
 0,9120 unz ez rehte âbent was  
 0,9121 mē naht denne tac  
 0,9122 sîn arm dannoch nie gelac  
 0,9123 noch sîn ellenthafte hant  
 0,9124 unz er niemannen vant  
 0,9125 ûf dem velde  
 0,9126 dô kârte er zuo dem gezelte  
 0,9127 ist ez als ich gelesen hân  
 0,9128 sô wâren die drîzic tage ergân  
 0,9129 mit sturme unt mit strîte  
 0,9130 rehte von der zîte  
 0,9131 daz sie die burc besâzen  
 0,9132 des hette dâ gelâzen  
 0,9133 manic schoene man den lîp  
 0,9134 des was manic vrümic wîp  
 0,9135 wie die mit weisen  
 0,9136 durch den selben vreisen  
 0,9137 als sie quâmen in die stat  
 0,9138 der von Trôje was ertrat  
 0,9139 harte vile unde erslagen  
 0,9140 ouch begunde Hector klagen  
 0,9141 daz er sêre was gewunt  
 0,9142 ouch gemissete er zuo der stunt  
 0,9143 zweier bastharte  
 0,9144 die klagete er vile harte  
 0,9145 dô bestreich man sîne wunden  
 0,9146 decheines strîtes er begunde  
 0,9147 binnen vierzehnen tagen  
 0,9148 die Trôiere begunden klagen  
 0,9149 sie hetten einen unsælichen tac  
 0,9150 umbe Hectoris ungemach  
 0,9151 unde umbe daz ungerâete  
 0,9152 daz Achilles hâte  
 0,9153 geletzet aleine  
 0,9154 ire volc algemeine  
 0,9155 dâ mohte man schouwen  
 0,9156 ritter unde vrouwen  
 0,9157 schrifien sêre überal  
 0,9158 sie leiten Hectoren ûf den sal

- 0,9159 unde tâten im nâch sîneme rehte  
0,9160 allez sîn geslehte  
0,9161 houbete an den küenen degen  
0,9162 unde wär er aleine erlegen  
0,9163 gevangen oder ervallen  
0,9164 ez schadete in iemer allen  
0,9165 Priamus der wîse  
0,9166 Troilô unde Parîse  
0,9167 unde ander sînen kinden  
0,9168 mit den er solte verwinden  
0,9169 sîne angest unde sîne nôt  
0,9170 des selben nahtes gebôt  
0,9171 daz sie zuo ime quæmen  
0,9172 unde sînen rât vernæmen  
0,9173 dô sie dare wâren kommen  
0,9174 er sprach "wir hetten es vromen  
0,9175 ist iuch als mir ist  
0,9176 daz wir sehs mânde vryst  
0,9177 hetten zuo eineme vride  
0,9178 sô geruoweten unse lide  
0,9179 die wîle würde Hector heil  
0,9180 unde anders der ein michel teil  
0,9181 die zuo ungereche sint  
0,9182 ouch begrüebe ich mîne kint  
0,9183 mîne ritter unde mîne manne  
0,9184 den ich en mac noch en kan  
0,9185 getuon nâch mîneme rehte  
0,9186 noch ander ire geslehte"  
0,9187 sie lobeten den rât  
0,9188 den ir dâ vore gehoeret hât  
0,9189 zuo den selben zîten  
0,9190 hiez er boten rîten  
0,9191 daz sie wurben daz geschach  
0,9192 daz ez nieman widersprach  
0,9193 zuo sehs mânden sie in tâten  
0,9194 vride als si bâten  
0,9195 dô sich der tac hette erhaben  
0,9196 sie begunden ire tötten begraben  
0,9197 unde verbrant sie dâr mite  
0,9198 nâch dem alten site  
0,9199 Priamus hiez als dâ vore  
0,9200 sîner süne zwêne enbore  
0,9201 in zwêne marmelsteine  
0,9202 legen harte reine  
0,9203 dâ die andern zwêne lâgen  
0,9204 von vater unde von mâgen  
0,9205 wurden sie wole begangen  
0,9206 dô daz was ergangen

- 0,9207 Andromachê unt Ecuba  
 0,9208 Helena unde Polixena  
 0,9209 brâhten Hectorî salben  
 0,9210 unde bestrichen in allenthalben  
 0,9211 unde heilten sîne wunden  
 0,9212 sô sie beste kunden  
 0,9213 über in die vürsten quâmen  
 0,9214 die sîne nôt vernâmen  
 0,9215 dâr zuo die vrouwen ûz der stat  
 0,9216 Hector sie sitzen bat  
 0,9217 als man danne pflît  
 0,9218 die ritter kürzeten die zît  
 0,9219 mit den vrouwen harte vile  
 0,9220 beide zuo spotte unde zuo spile  
 0,9221 in die kamern dâ er inne lac  
 0,9222 dâ en dorfte niht schînen ander tac  
 0,9223 sô klâr unde sô reine  
 0,9224 was daz gesteine  
 0,9225 daz dâr inne lühte  
 0,9226 swer dâr in quam den dûhte  
 0,9227 daz dâ wäre ein paradîs  
 0,9228 ouch en was nieman sô wîs  
 0,9229 der die steine erkente  
 0,9230 ez en wäre op man sie nente  
 0,9231 jaspis rubînus saphîrus  
 0,9232 ametistes crisolitus  
 0,9233 smaradus unde topazius  
 0,9234 berillus calcedonius  
 0,9235 sardonix carbunculus  
 0,9236 manic stein anders dâ was  
 0,9237 die lühten an daz palas  
 0,9238 in der kamern dâ er inne lac  
 0,9239 dâ was von wurzen guot gesmac  
 0,9240 latwârjen in den bühsen  
 0,9241 pfülwen bette küssen  
 0,9242 von pfellele der umbehanc  
 0,9243 stuol tische unde banc  
 0,9244 von grôzer zierheit  
 0,9245 denne ir hier sît bereit  
 0,9246 unt rîchheit maniger hande  
 0,9247 mit edeln gewanden  
 0,9248 wâren die ricke wole geladen  
 0,9249 vieregge was daz gadem  
 0,9250 viere pfîlære  
 0,9251 schoene unt gewære  
 0,9252 an den enden stuonden  
 0,9253 gedräjet unde gewunden  
 0,9254 der eine was ein jaspis

- 0,9255 gehouwen dâr an ein aspis  
0,9256 unt ander tiere besunder  
0,9257 vile harte manic wunder  
0,9258 der ander was ein agetstein  
0,9259 sîn glast harte schône schein  
0,9260 der dritte was ein rubîn  
0,9261 onichillus gap den vierden schîn  
0,9262 ire gelt unde ire wert  
0,9263 was wole tûsent marke wert  
0,9264 sie hetten alle viere  
0,9265 sôgetâne ziere  
0,9266 unde sôgetân gewürhte  
0,9267 sagete ich ez ich vürhte  
0,9268 daz ich würde widertriben  
0,9269 doch vant ich ez geschriben  
0,9270 vier meister wole gelârt  
0,9271 hetten iren vlîz dâr an gekârt  
0,9272 mit sôgetâner liste  
0,9273 daz nieman en wiste  
0,9274 welich ire liste wären  
0,9275 ûf zwein pfilären  
0,9276 mohte man schouwen  
0,9277 zwô juncvrouwen  
0,9278 geworht von steine  
0,9279 daz von vleische noch von beine  
0,9280 schoener maget nie bequam  
0,9281 ûf dem andern alsam  
0,9282 zwêne jungelinge  
0,9283 sô die sunne ûf gienge  
0,9284 sô en wäre sie niemer sô klâr  
0,9285 sô ire varwe unt ire hâr  
0,9286 swer die biledes gesach  
0,9287 swie wîse er wäre er sprach  
0,9288 daz in got hette daz leben  
0,9289 ûf dem steine gegeben  
0,9290 obene noch unden  
0,9291 dechein man en kunde  
0,9292 decheine wîs gemerken  
0,9293 op ez mennische solte werken  
0,9294 wie er daz getæte  
0,9295 daz ein biledes hæte  
0,9296 ougen lûter unde klâr  
0,9297 stirne schoene unde offenbâr  
0,9298 wîze zene rôten munt  
0,9299 die ûf der êrstens sûle stuont  
0,9300 die was snel unde gerat  
0,9301 unde sprach unde trat  
0,9302 nahtes unt tegelich

- 0,9303 einer tûmerschîn gelîch  
0,9304 ûf einer tavelen breit  
0,9305 mit golde harte wole geleit  
0,9306 unde mit anderere ziere  
0,9307 scharpfer mezzer viere  
0,9308 warf ez vort unde wider  
0,9309 beide hôch unde nider  
0,9310 an dem valle ez sie vienc  
0,9311 swaz ûf der erden gienc  
0,9312 unde in den luften ie wart  
0,9313 daz was ez allez gelârt  
0,9314 wie dem dinge wäre  
0,9315 an spile unde an gebære  
0,9316 unt wie im solte werden  
0,9317 in der luft unde an der erden  
0,9318 swelich man dar quam  
0,9319 unt die spil vernam  
0,9320 mohte man der stat entboren hân  
0,9321 er hette iemer dâ gestân  
0,9322 ouch was daz ander schoene  
0,9323 ûf sîneme houbete stuont ein krône  
0,9324 von gesteine unde von golde  
0,9325 swer schoene varwe wolte  
0,9326 als er die steine gesach  
0,9327 sîn wille der geschach  
0,9328 erliuhtet wart in rihte  
0,9329 sîn varwe unde sîn gesihte  
0,9330 ez kunde wunders harte vile  
0,9331 unde aller hande seitenspile  
0,9332 ouch kunde ez die seiten  
0,9333 vingern unt bereiten  
0,9334 dâ was harte süeze gesanc  
0,9335 schoene lûte unde woleklanc  
0,9336 swie leide einem manne wäre  
0,9337 er vergæze sîner swære  
0,9338 als ich ez dâ vernomen hân  
0,9339 daz dritte was ouch wole getân  
0,9340 einem manne wole gelîch  
0,9341 daz warf ûf den esterîch  
0,9342 bluomen harte manicvalt  
0,9343 unde hette an bluomen solichen gewalt  
0,9344 swie vile ez ir nider spræjete  
0,9345 daz ez ir ie mîr hæte  
0,9346 dâ was naht unde tac  
0,9347 süezer ruch unt süezer smac  
0,9348 gerouch si ein siecher man  
0,9349 sîne gesunt er wider nam  
0,9350 op er joch wäre tôtgewuntet

- 0,9351 des wart Hector gesunt  
0,9352 von dem ruche er genas  
0,9353 swie er tōtwunt was  
0,9354 daz vierde was von solicher list  
0,9355 allez daz in der erden ist  
0,9356 unde dâr ûfe noch werden sol  
0,9357 daz wiste ez allez vore wole  
0,9358 iegelich mennische dâ vant  
0,9359 sollte er werden geschant  
0,9360 unde ouch geêret  
0,9361 daz mich diz buoch lêret  
0,9362 daz vernemet alle  
0,9363 wie ez iuch gevalle  
0,9364 ez mac doch wole wâr wesen  
0,9365 ich hân grôzer dinc gelesen  
0,9366 denne des ir hier bereit sît  
0,9367 von gotes gebote an der zít  
0,9368 der tiuvel úz den bileden sprach  
0,9369 unde vore sagete swaz geschach  
0,9370 manic wunder er treip  
0,9371 daz man von im schreip  
0,9372 hin abe quam uns zoubelist  
0,9373 die nigromantia geheizen ist  
0,9374 als ir hât vernomen vore  
0,9375 in der kamern lac Hector  
0,9376 unz er wole gesunt wart  
0,9377 die kamer Parîse gegeben wart  
0,9378 dô er von Kriechen quam  
0,9379 unde mit im brâhte Helenam  
0,9380 dâ wâren sie inne  
0,9381 an irere süezen minne  
0,9382 die wîle sie dâr inne lâgen  
0,9383 kurzwîle sie pflâgen  
0,9384 maniger hande unde mê  
0,9385 denne hier geschriben stê  
0,9386 dicke sie dâr inne wâren  
0,9387 bî den zehen jâren  
0,9388 dô zehen jâr ergiengen  
0,9389 dô muoste in misselingen  
0,9390 dô Hector genesen was  
0,9391 unde der vride gegeben was  
0,9392 harte veste unde guot  
0,9393 die Kriechen hetten unmuot  
0,9394 daz er sô lange werte  
0,9395 ir iegelîcher des gerte  
0,9396 daz sie úz der nôt  
0,9397 entweder næmen den tôt  
0,9398 oder daz sie mit strîte

- 0,9399 der übelen zîte  
 0,9400 in den grôzen swerden  
 0,9401 ledic mohten werden  
 0,9402 sie wären gerne zuo lande  
 0,9403 ouch hetten sie des schande  
 0,9404 daz sie niht mohten iren nît  
 0,9405 gerechen in sô langer zît  
 0,9406 ouch klagete Achilles alle tage  
 0,9407 daz Hector was von sîneme slage  
 0,9408 genesen unde von sîner wunden  
 0,9409 in sô kurzen stunden  
 0,9410 ouch sô klagete under des  
 0,9411 Thideus sun Diomedes  
 0,9412 im wäre missegangen  
 0,9413 "mich mac wole erlangen  
 0,9414 daz sich sus lenget unse vart  
 0,9415 daz ich ie geboren wart  
 0,9416 waz solte ich her in diz lant  
 0,9417 ich bin sêre gepfant  
 0,9418 von mîner vrouwen Briseidâ  
 0,9419 sie hât mîn herze mit ir dâ  
 0,9420 ump daz ich ich hier in vleische bin  
 0,9421 doch ist mîn sêle unde mîn sin  
 0,9422 al mit eineme wîbe  
 0,9423 ich hân niht in dem lîbe  
 0,9424 dâ mîn herze solte wesen  
 0,9425 dâ trage ich eine liehte vesen  
 0,9426 oder ein strô oder einen wisch  
 0,9427 ich hafte an ir als ein visch  
 0,9428 tuot an einer ruoten  
 0,9429 kunde ich joch die guoten  
 0,9430 erbiten sanfter grüeze  
 0,9431 ez quæme mir zuo buoze  
 0,9432 nû ist sie harte stille  
 0,9433 mir lûzet ire wille  
 0,9434 mir ist ire zuht zuo swære  
 0,9435 mir dröuwet ire gebære  
 0,9436 ire ouge mich vliuhet  
 0,9437 ire munt mich schiuhet  
 0,9438 zuo mir zürnet ire ganc  
 0,9439 des ist leider vile lanc  
 0,9440 daz mir der dinge dechein  
 0,9441 von ir zuo guote erschein"  
 0,9442 er sprach der vrouwen selbe zuo  
 0,9443 "ich wil späte unt vrwo  
 0,9444 läzen mîn unsälichkeit  
 0,9445 an dîn erbarmherzicheit  
 0,9446 vrouwe unt an dîne êre

- 0,9447 unde en wil niemer mère  
0,9448 gehirmen noch erwinden  
0,9449 êr ich genâde vinden  
0,9450 nû geschihet mir dechein genâde  
0,9451 waz op ich ungenâde  
0,9452 unt ander ungeræte  
0,9453 in der helle hæte  
0,9454 gerner wil ich sie hier hân  
0,9455 ump ein wîp sô wolegetân  
0,9456 doch ist mîn pîne vile grôz  
0,9457 sint mich dîn süeze minne schôz  
0,9458 sint kunde ich nie erlachen  
0,9459 mîn slâfen mîn wachen  
0,9460 mîn trinken mîn ezzen  
0,9461 hât mîn sint vergezzen  
0,9462 ân daz ist mir vile wê  
0,9463 got wolle daz ez baz ergê”  
0,9464 die vrouwe in sîne wort sprach  
0,9465 “hât ir von mir ungemach  
0,9466 des en weiz ich niht  
0,9467 wie iuch daz sî geschiet  
0,9468 von decheiner wârheit  
0,9469 ir tâtet mir eine smâchheit  
0,9470 die wil ich gerne vertragen  
0,9471 ir santet mir einen pfagen  
0,9472 bî iuwerme knehte  
0,9473 daz en quam mir niht rehte  
0,9474 ouch en stuont ez iuch niht wole  
0,9475 wen daz ich ez reden niht en sol  
0,9476 ir soltet ez haben gelân  
0,9477 dem ez zuo leide was getân  
0,9478 der hât ez wole gerochen  
0,9479 ich en hân ez niht gesprochen  
0,9480 durch haz noch durch nît  
0,9481 wen daz ir mit gewarnet sît”  
0,9482 sân nâch disen worten  
0,9483 Diomedes antwurte  
0,9484 “eiâ sâlic vrouwe  
0,9485 iuwer wort sîn âne drouwe  
0,9486 sie sint doch harte spâhe  
0,9487 mir wære alsô wâhe  
0,9488 daz ir mir sagetet iuwern muot  
0,9489 als ir umberede tuot  
0,9490 daz ich Troilô hân getân  
0,9491 des en wil ich iuch niht zuo buoze stân  
0,9492 daz ich in dâr nider stach  
0,9493 daz selbe mir von im geschach  
0,9494 sîn orse ich im nam

- 0,9495 alsô tet er mir sam  
 0,9496 daz iuch sîn ors wart gesant  
 0,9497 dâ sît ir niht mite geschant  
 0,9498 ich tet ez iuch niht zuo smâchheit  
 0,9499 iedoch ist ez mir leit  
 0,9500 ich sante ez umbe daz dâ here  
 0,9501 daz ir wurdet geware  
 0,9502 daz ich zuo strîte komen tar  
 0,9503 bî iuwern hulden ez ist wâr  
 0,9504 daz iuwer zorn ist sô grôz  
 0,9505 des entgiltet der ez nie genôz  
 0,9506 oder ich werde des wert  
 0,9507 daz ouch mân ein wîp gert  
 0,9508 sô iuch got lâze leben  
 0,9509 ir solet mir eine stûchen geben  
 0,9510 zuo eineme kleinôte  
 0,9511 des darf ich zuo noete  
 0,9512 daz man erkenne dâ bî  
 0,9513 daz ich ein vrouwenritter sî  
 0,9514 ich meine iuch vrouwe dâ mite niht  
 0,9515 ich hoffe daz mir doch guot geschiet  
 0,9516 mir ist daz gesaget  
 0,9517 ein man belibe unverzaget  
 0,9518 swenne sîn zeichen wäre  
 0,9519 durch einer vrouwen êre"  
 0,9520 die vrouwe sprach "daz sol sîn"  
 0,9521 sie reiz im einen ziklâtîn  
 0,9522 von irere zeswen hant  
 0,9523 ûf sînen schaft er daz bant  
 0,9524 eine senften er entvienc  
 0,9525 unde neic der vrouwen unde gienc  
 0,9526 vroelîche dannen  
 0,9527 wider zuo sînen mannen  
 0,9528 sehs mânen quâmen zuo ende  
 0,9529 dô treip daz ellende  
 0,9530 die Kriechen zuo ringe  
 0,9531 ûf ander gedinge  
 0,9532 die von Trôje dâ engeine  
 0,9533 zuo behalten ire geine  
 0,9534 sie wâren zuo ireme schaden vile balt  
 0,9535 êr was ire nôt sibenvalt  
 0,9536 über die manicvaltigkeit  
 0,9537 nû wart ahtvalt ire leit  
 0,9538 des sturmes gloste  
 0,9539 huop sich mit koste  
 0,9540 nû vort ritter vort  
 0,9541 jener sweimete umbe bort  
 0,9542 dirre stuont mitten dâr in

- 0,9543 bî zwein unde bî drîn  
 0,9544 unt bî vieren  
 0,9545 giengen sie punieren  
 0,9546 sie quâmen einzelen zuo gekârt  
 0,9547 biz ir ein grôze schar wart  
 0,9548 zuo strîte sie griffen  
 0,9549 niuwen swert gesliffen  
 0,9550 wole geveget wole geworht  
 0,9551 hetten ire scherpfe unde vorht  
 0,9552 sô grôz was ire vehte  
 0,9553 sie wurden vleckehte  
 0,9554 von bluote unde von sweize  
 0,9555 sie quâmen ûf dem kreize  
 0,9556 beide zuo stiche unde zuo slage  
 0,9557 volliclîche zwelif tage  
 0,9558 sunder ruowe ân gemach  
 0,9559 wen als in nahtes geschach  
 0,9560 als die sunne ûf gienc  
 0,9561 huoben sie sich ûf den rinc  
 0,9562 hette sie die vinster niht vertriben  
 0,9563 sie wären die naht dare beliben  
 0,9564 dô zwelif tage umbe quâmen  
 0,9565 beidersît sie nâmnen  
 0,9566 ûzer mâze grôzen schaden  
 0,9567 daz velt was al überladen  
 0,9568 von gewunten unde von tôten  
 0,9569 von schilden zuoschröten  
 0,9570 von rossen von pferden  
 0,9571 sie hetten ûf der erden  
 0,9572 niergen einer hende breit  
 0,9573 ez en wäre allez beleit  
 0,9574 Agomennon entbôt  
 0,9575 Priamô in wäre nôt  
 0,9576 eines vrides beidersît  
 0,9577 der wart gegeben zuo kurzer zît  
 0,9578 drîzic tage unde niht mî  
 0,9579 sie tâten den tôten als êr  
 0,9580 dô aber die scharpfle stunde  
 0,9581 nâhen begunde  
 0,9582 unde sie des morgenens vruo  
 0,9583 aber solten dâr zuo  
 0,9584 des âbendes spâte  
 0,9585 gienc Priamus zuo râte  
 0,9586 er sprach zuo sînen holden  
 0,9587 die daz hoeren solten  
 0,9588 "dirre vride ergangen ist  
 0,9589 daz wir sô kurze vryst  
 0,9590 zuo gemache hân genomen

- 0,9591 ez mac uns übel dâr umbe kommen  
0,9592 mir anet harte grôz leit  
0,9593 ich hân leider gebeit  
0,9594 alzuo lange ein teil  
0,9595 uns nähet ein unheil  
0,9596 daz ist leider alsô swâr  
0,9597 daz ich ez niht gesprechen tar  
0,9598 uns ist die zît vile nâch  
0,9599 von dem Cassandrâ  
0,9600 lange vore gesaget hât  
0,9601 es würde anders guot rât  
0,9602 ich vürhte daz der ervalle  
0,9603 der uns behüetet alle”  
0,9604 daz was sîn sun Hector  
0,9605 im was in troume kumen vüre  
0,9606 im solte leide geschêen  
0,9607 er en torste es iedoch niht jehen  
0,9608 vore sîneme sune offenbâr  
0,9609 doch wart ez leider alzuo wâr  
0,9610 Andromacha Hectoris wîp  
0,9611 die quelte sêre iren lîp  
0,9612 ump die selben swære  
0,9613 man saget daz ez ir wäre  
0,9614 in eineme slâfe vüre kommen  
0,9615 als ir ez von Priamô hât vernomen  
0,9616 sie lac alle die naht  
0,9617 an vile grôzer unmaht  
0,9618 sie en torste ez im niht sagen  
0,9619 dô ez begunde tagen  
0,9620 sô grôz was ire swære  
0,9621 daz sie sich niht mère  
0,9622 mochte enthalten  
0,9623 “nû muoz es got walten”  
0,9624 unde sprach daz ist wâr  
0,9625 sô lûte unde ouch offenbâr  
0,9626 daz ez alle die hörten  
0,9627 die dâr zuo gehörten  
0,9628 “süeze Hector lieber man  
0,9629 mich gêt daz leit mîr an  
0,9630 denne ez iemannen tuo  
0,9631 durch daz spreche ich dir zuo  
0,9632 sô dir got der guote  
0,9633 entvâch ez mit guotem muote  
0,9634 mîne nôt unde mîne klage  
0,9635 unde vernim waz ich dir sage  
0,9636 ich hân in troume gesehen  
0,9637 daz dir leide sol geschêen  
0,9638 harte kurzlîche

- 0,9639 wir verliesen unser rîche  
 0,9640 dâr zuo manic muoter barn  
 0,9641 daz lieze ich allez hin varn  
 0,9642 behielte ich dich aleinen  
 0,9643 ich mac vile wole weinen  
 0,9644 waz sol mîn gewerden  
 0,9645 himel unde erden  
 0,9646 op ez allez mîn wäre  
 0,9647 verzige ich durch dîn êre  
 0,9648 dû hâst es grôze schande  
 0,9649 verderbet Laudamanna  
 0,9650 unde Aternandes  
 0,9651 nû gedenke hêrre des  
 0,9652 daz sie sint dîne kint  
 0,9653 unde noch harte kleine sint  
 0,9654 lâ die andern rîten  
 0,9655 unde belîp zuo disen zîten  
 0,9656 rîtes dû ouwê  
 0,9657 dû en kumest wider niemer mêt  
 0,9658 Hectorî was die rede zorn  
 0,9659 "ir sît unsælic geboren  
 0,9660 daz ir mich geuntroestet hât  
 0,9661 unde des gebet rât  
 0,9662 daz ich hier heime belîbe  
 0,9663 sehet bî iuwerme lîbe  
 0,9664 daz ez niemer mîr geschê  
 0,9665 geschihet es dechein nôt mêt  
 0,9666 ir hât iemer verloren  
 0,9667 ich hette iuch zuo liebe erkoren  
 0,9668 nû tuot ir mir leide  
 0,9669 mîn sèle von mir scheide  
 0,9670 êr daz iemer geschê  
 0,9671 daz ich die von Trôje sê  
 0,9672 in strîte oder in vehte  
 0,9673 wider mîneme rehte  
 0,9674 ich wæne ez unreht wäre  
 0,9675 bin ich rihtære  
 0,9676 daz ich sie strîten hieze  
 0,9677 unde ez selbe lieze  
 0,9678 daz ich des geswîge  
 0,9679 swâ mîn vater zuo wîge  
 0,9680 unt mîne bruoder sulen wesen  
 0,9681 dâ wil ich mit in genesen  
 0,9682 oder belîben mit in tôt  
 0,9683 ich geswîge joch der nôt  
 0,9684 hier en ist in dirre geine  
 0,9685 nieman sô kleine  
 0,9686 ich sule im iemer sîn bereit

- 0,9687 unde hette ich anders dechein leit  
0,9688 wen als ich zuo den Kriechen hân  
0,9689 ich wolte den lîp lân  
0,9690 ich en gereche mînen haz"  
0,9691 sîn wîp weste wole daz  
0,9692 daz er alsô tâte  
0,9693 sîn rede was sô stæte  
0,9694 allerérste hette sie ire leide gehôrt  
0,9695 sie en torste niht sprechen vort  
0,9696 in wie getâner swære  
0,9697 ire hêrre dô wäre  
0,9698 daz tet ire varwe wole kunt  
0,9699 die wandelte sich wole tûsent stunt  
0,9700 Parîs gedâhte im leide dô  
0,9701 doch sô reite er sich zuo  
0,9702 alsô tet Eneas  
0,9703 Andenor unde Polidamas  
0,9704 Troilus unde Deiphebus  
0,9705 Sarpedon unde Cupesus  
0,9706 Eufemes unde Adrastus  
0,9707 sie wâren alle bereit  
0,9708 daz was Priamô leit  
0,9709 daz daz volc sô gâhete  
0,9710 er wiste wole im nâhete  
0,9711 leide unt swære  
0,9712 daz er niht vrô en wäre  
0,9713 Hector harte wole besach  
0,9714 wende er zuo dem volke niht en sprach  
0,9715 als er dâ vore was gewone  
0,9716 ez was im allez ump die sune  
0,9717 Hector ûf sîn ros saz  
0,9718 sîn wîp sich niht vergaz  
0,9719 sînen zoum unde sînen stegereif  
0,9720 mit beiden handen sie begreif  
0,9721 sie vlêhete unt bat  
0,9722 daz er belibe in der stat  
0,9723 dô er niht wolte beliben  
0,9724 vrouwen unt wîben  
0,9725 swaz sie ir genennen kunde  
0,9726 ruofen sie begunde  
0,9727 dô sie alsô lûte rief  
0,9728 ir iegelich zuo lief  
0,9729 Cassandra unde Polixena  
0,9730 unde ire muoter Ecuba  
0,9731 Cassandra alsô lûte schrei  
0,9732 ir mochte daz houbet brechen enzwei  
0,9733 Polixena want ire hende  
0,9734 Ecuba brach ire gebende

- 0,9735 Andromacha hâr unde hût  
 0,9736 Helenen wuof wart harte lût  
 0,9737 underwîlen sie in hielten  
 0,9738 ire hende sie ime vielten  
 0,9739 unde beswuoren in bî sînen kinden  
 0,9740 daz es wolte erwinden  
 0,9741 ez en half allez niht  
 0,9742 Hector in allen entriet  
 0,9743 er rief ane sîne liute  
 0,9744 "wes beiten wir hiute  
 0,9745 dise wîp die reben  
 0,9746 got gekürze in daz leben  
 0,9747 der tiuvel müeze ir walten  
 0,9748 w  nent sie mich enthalten  
 0,9749   ber m  nen willen"  
 0,9750 er w  nte sie gestillen  
 0,9751 d   von   rst huoben si ez an  
 0,9752 Andromacha d   toben began  
 0,9753 ire gebende sie zuoreiz  
 0,9754 hâr unt hût sie abe sleiz  
 0,9755 unde zuokram sich an allen enden  
 0,9756 mit vuozzen unde mit henden  
 0,9757 stalte sie ungeb  re  
 0,9758   r dechein w  le w  re  
 0,9759 begreif sie irere s  ne ein  
 0,9760 unde truoc in im engein  
 0,9761 unde sprach "n   k  re unde erwint  
 0,9762 des bite ich dich durch diz kint  
 0,9763 ez ist d  n vleisch unde d  n bluot  
 0,9764 bek  re noch d  nen muot  
 0,9765 ich en weiz waz im tuo  
 0,9766 wenne warte selbe d  r zuo  
 0,9767 bel  p h  rre unt senfte mir  
 0,9768 ich swere b   ime unde b   dir  
 0,9769 ich en weiz waz ich mit im sol  
 0,9770 woltes d   bel  ben d   t  test wole"  
 0,9771 im was s  n muot als   hart  
 0,9772 daz er beweichet niht en wart  
 0,9773 weder sus noch s    
 0,9774 die vrouwe huop d   s   h  h  
 0,9775 ire geschreie   beral  
 0,9776 daz erbibete der sal  
 0,9777 unde allez daz d  r inne was  
 0,9778 sie lief durch daz palas  
 0,9779 d   sie Priamum vant  
 0,9780 sie sprach "h  t dich der tiuvel geblant  
 0,9781 d   bist mit sehenden ougen blint  
 0,9782 sehes d   daz Hector d  n kint

- 0,9783 stinkender hunt boesez âs  
0,9784 des dû iemer schande hâs  
0,9785 rîtet in sînen tôt"  
0,9786 Priamus wart der rede rôt  
0,9787 Andromacha rief in dicke an  
0,9788 "louf balde halt den man  
0,9789 ich hân übel getân  
0,9790 daz ich dir leide gesprochen hân  
0,9791 daz kumet allez von leiden  
0,9792 er wil hinnen scheiden  
0,9793 wir gesehen in leider niemer mêt  
0,9794 warte wie ez dir ergê  
0,9795 bite in daz er belîbe"  
0,9796 dô begunde er mit dem wîbe  
0,9797 siufzen unt weinen  
0,9798 sie liezen durch in einen  
0,9799 alle jâmerlîche  
0,9800 er hette in och daz rîche  
0,9801 unde ire êre unt ire lant  
0,9802 behalten mit sîner hant  
0,9803 er saz ûf unde reit im nâch  
0,9804 unde überreit in aldâ  
0,9805 dâ er in der strâzen reit  
0,9806 er sprach "sun vernim mîn leit  
0,9807 sô mir mîne triuwe  
0,9808 ich vürhte ez dich geriuwe  
0,9809 daz dû sô îles in den strît  
0,9810 hætes dû biz morgene gebîtet  
0,9811 dû hettes harte wole getân  
0,9812 lâ dir gerâten sân  
0,9813 sô dich got êre  
0,9814 kêre wider kêre"  
0,9815 Hectorî was die rede zorn  
0,9816 er nam daz ros mit den sporen  
0,9817 dô Priamus allermeist bat  
0,9818 unde reit balde úz der stat  
0,9819 hine dâ er die sîne sach  
0,9820 hin rîtende er sprach  
0,9821 "wâr umbe stellet ir dise nôt  
0,9822 ez ist doch niht wen ein tôt  
0,9823 sol ich verderben  
0,9824 oder sol ich nû sterben  
0,9825 unt sol ich haben swære  
0,9826 sô ist mir ez alsô mære  
0,9827 hiute alsô morgene"  
0,9828 dô reit er hin mit zorne  
0,9829 Priamus stalte solich leit  
0,9830 daz er doch wart beweit

- 0,9831 er schriete sô sêre  
0,9832 op er ein stein wäre  
0,9833 er müeste wider kêren  
0,9834 mit grôzen ungebären  
0,9835 reit er wider in den sal  
0,9836 sie bâten in al  
0,9837 daz er ûz tæte die sarewât  
0,9838 weder durch bete noch durch rât  
0,9839 en mohte des niht geschéen  
0,9840 ich wil sitzen unde sehen  
0,9841 unde vernemen dâr zuo  
0,9842 waz man ûf dem velde tuo  
0,9843 vater mich dunket guot  
0,9844 daz ir mînen rât tuot  
0,9845 trîbet hin zuo der vehte  
0,9846 ritter unt knechte  
0,9847 gebûre unt koufmanne  
0,9848 ich wil mîne sarewât haben an  
0,9849 ez gê zuo schaden oder zuo vrumen  
0,9850 daz ich zuo gewer müge kumen  
0,9851 eteswâ hier enbinnen  
0,9852 in türmen oder in zinnen  
0,9853 Priamus dô kârte  
0,9854 in der stat er wartे  
0,9855 beide kleine unde grôz  
0,9856 alein was er niht ritters genôz  
0,9857 swer sô er wäre  
0,9858 waz wollet ir mère  
0,9859 kneht gebûr koufman  
0,9860 muosten îsen tragen an  
0,9861 ir beleip wênic in der stat zuo wer  
0,9862 er sante sie alle in daz her  
0,9863 in den selben stunden  
0,9864 die Kriechen begunden  
0,9865 hin zuo ringe wert zogen  
0,9866 sie kunden niergen genüegen  
0,9867 êr sie quæmen ûf daz velt  
0,9868 dâ en was niht wenne geschelt  
0,9869 scharpf e wort sûre tât  
0,9870 als ir dicke vernomen hât  
0,9871 dô reit zuo Agomennon  
0,9872 Menelaus unt Thelamon  
0,9873 Achilles Diomedes  
0,9874 Ajax Polimedes  
0,9875 sie ranten zuo engein in  
0,9876 ûf den rinc under in  
0,9877 von Trôje manic küene man  
0,9878 Troilus huop den sturm an

- 0,9879 mit Diomedê  
 0,9880 im tet daz harte wê  
 0,9881 daz sînes wîbes ziklâtîn  
 0,9882 sîn baniere solte sîn  
 0,9883 er sach an der stûchen dâ  
 0,9884 daz sîn amîe Briseidâ  
 0,9885 sînen willen schiere tâte  
 0,9886 oder getân hæte  
 0,9887 sie hæten beide grôzen haz  
 0,9888 Troilus umbe daz  
 0,9889 daz jener sîn wîp wolte hân  
 0,9890 der ander ûf den wân  
 0,9891 hette im gerne genomen den lîp  
 0,9892 daz er erwürbe daz wîp  
 0,9893 sie poineten ûf einander  
 0,9894 ire schefte wâren glander  
 0,9895 ire glevîen scharpf vorne  
 0,9896 sie stiften zuo zorne  
 0,9897 zuo dem êrsten mit der tjoste  
 0,9898 als der stich niht koste  
 0,9899 unt næme dechein wert  
 0,9900 sie griffen schiere an die swert  
 0,9901 in wart ire zorn undernomen  
 0,9902 ire volc was zuo kommen  
 0,9903 ir iegelich tet sîne tât  
 0,9904 als ez danne in strîte gât  
 0,9905 sie wurden underdrungen  
 0,9906 ire brûnen ecken klungen  
 0,9907 ire schefte zuoschiverten alse schît  
 0,9908 Troilus truoc dare nît  
 0,9909 dâ man im daz wîp wolte entspanen  
 0,9910 unde gewarte dem vanen  
 0,9911 den sîn vîant vuorte  
 0,9912 ûf in er starke ruorte  
 0,9913 Thideus sun under des  
 0,9914 der helet Diomedes  
 0,9915 stach im durch den schilt sîn  
 0,9916 daz sper biz an den ziklâtîn  
 0,9917 Troilus liez dare gân  
 0,9918 dô er den stich hette entvâhen  
 0,9919 wende in der stich muote  
 0,9920 er sprach "ritter nû hüete  
 0,9921 dîner vrouwen baniere"  
 0,9922 er hette nie sô schiere  
 0,9923 zuo im gesprochen daz wort  
 0,9924 er slüege sînes swertes ort  
 0,9925 durch Diomedes sarewât  
 0,9926 in sîn vleisch unde in sîn brât

- 0,9927 daz swert im in den lîp wuot  
0,9928 ûz pfeif im sâñ daz bluot  
0,9929 gelîche hôh dem schafte  
0,9930 dâ die stûche ane hafte  
0,9931 der borte unde daz gesteine  
0,9932 daz wart allez unreine  
0,9933 von sîn selbes bluote  
0,9934 mit zornigen muote  
0,9935 vaste er im zuo trat  
0,9936 hette in Menelaus niht gerattt  
0,9937 er wäre gar under gelegen  
0,9938 zuo rante der küene degen  
0,9939 von Frisce der küninc Miceres  
0,9940 Menelaus gewarte des  
0,9941 unt stach in ûf den rinc  
0,9942 daz im daz bluot dâr ûz gienc  
0,9943 unde vlôz ûf den sant  
0,9944 die Kriechen quâmen zuo gerant  
0,9945 unde begunden in umberingen  
0,9946 daz sie in geviengen  
0,9947 ahtvalt was êr daz leit  
0,9948 über die manicvaltigkeit  
0,9949 niunvalt ez iezuo was  
0,9950 zuo reit dô Polidamas  
0,9951 daz er gelôste den man  
0,9952 Troilus rief ane  
0,9953 "nû â helede nemet mîn war  
0,9954 Miceres liget tôtvar  
0,9955 under unsen handen  
0,9956 wir lâzen in mit schanden"  
0,9957 Troilus quam zuo geruort  
0,9958 "nû vort ritter nû vort  
0,9959 ez en sol niht geschêen"  
0,9960 dô mohte man wunder sehen  
0,9961 ûf deme ringe  
0,9962 êr daz ergienge  
0,9963 daz sie in behielten  
0,9964 herte houbet sie spielten  
0,9965 sie zuosniten die helme hart  
0,9966 dâ wurden halsberge zuozart  
0,9967 unt wart manic man ertrat  
0,9968 Miceres wart von in berattt  
0,9969 iedoch manlîche  
0,9970 der küninc von Friscenrîche  
0,9971 Ajax Thelamonis sun  
0,9972 von dem was man ungewon  
0,9973 daz er alsô lange zît  
0,9974 danne hette gebîtet

- 0,9975 daz er ente decheine tât  
 0,9976 als ein silber sîn sarewât  
 0,9977 sîn schilt schein als ein golt  
 0,9978 er quam in grôz ungedult  
 0,9979 daz sîner dâ vile tôt lac  
 0,9980 er sûmete sich niht er sluoc er stach  
 0,9981 swaz im dô widerreit  
 0,9982 dem machete er den lîp leit  
 0,9983 dâr nâch er quam  
 0,9984 geriten ûf Polidamam  
 0,9985 mit einer starken tjoste  
 0,9986 die sînen er dâ löste  
 0,9987 er stach in nider ûf daz gras  
 0,9988 ûf spranc dô Polidamas  
 0,9989 Troilus was aber dâ  
 0,9990 im was zuo den slegen vile gâch  
 0,9991 sêre er umbe berte  
 0,9992 biz er beherte  
 0,9993 daz Polidamas zuo rosse quam  
 0,9994 Ajax manigen den lîp nam  
 0,9995 êr daz geschæhe  
 0,9996 Parîs der wâhe  
 0,9997 was in dem strîte dâ  
 0,9998 mit den von Persia  
 0,9999 sînen bogen hette er gespannen  
 0,10000 mit sînen mannern  
 0,10001 quam er in den strît gerant  
 0,10002 des wart maniger geblant  
 0,10003 dâr nâch daz der pfil quam  
 0,10004 beleip och maniger dâ lam  
 0,10005 gewundet unde mit pînen  
 0,10006 beide von den sînen  
 0,10007 unt och von sîn selbes bogen  
 0,10008 quam under die Kriechen gevlogen  
 0,10009 alsô vile der pfile  
 0,10010 daz êr decheine wîle  
 0,10011 die Kriechen wâren an der vluht  
 0,10012 Achilles sach die unzuht  
 0,10013 an hêrren Parîse  
 0,10014 er dâhte in welicher wîse  
 0,10015 er im daz leit vergülte  
 0,10016 unde umbe die alten schulde  
 0,10017 daz er zuo Hectori truoc haz  
 0,10018 sô erzurnte ime daz  
 0,10019 êr danne gelæge der zorn  
 0,10020 hette maniger den lîp verloren  
 0,10021 unde êr maniger den verlüre  
 0,10022 sô was niht bestanden vore

- 0,10023 sînes swertes orte  
0,10024 gar ez zuovuorte  
0,10025 beide ros unt pfert  
0,10026 halsberge unde swert  
0,10027 sper schilt unt helm  
0,10028 daz valte er allez in den melm  
0,10029 dô erkoberten sich die sîne  
0,10030 Ajax von Salemine  
0,10031 unt die mit ime wâren  
0,10032 bî unsern jâren  
0,10033 en kunde des geschehen niht  
0,10034 daz ein michel her entriet  
0,10035 alsô sêre einen man  
0,10036 sie vluhen alle sament danne  
0,10037 Troilus schamete sich harte  
0,10038 iedoch er umbe kârte  
0,10039 dô volgete im Polidamas  
0,10040 Parîs an der schare was  
0,10041 sîne kebesbruoder dâr nâch  
0,10042 sie tâten Achillen manigen schâch  
0,10043 an der widerkâre  
0,10044 beide offenbâre  
0,10045 unt ouch dâr zuo stille  
0,10046 daz erzurnte Achille  
0,10047 er liez aber dare gân  
0,10048 ez was allez entân  
0,10049 swaz sîn swert iergen berein  
0,10050 dô bequam im der bruoder ein  
0,10051 Priamus kebessun  
0,10052 der hiez Margariton  
0,10053 den traf er mit solicher kraft  
0,10054 daz im in der hant der schaft  
0,10055 zuostoup unde zuobrach  
0,10056 iedoch er in dâr nider stach  
0,10057 harte was er gewundet  
0,10058 in der selben stunt  
0,10059 er en sach noch en hörte  
0,10060 sîn volc in dannen vuorte  
0,10061 dô sie in vuorten dannen  
0,10062 von wîben unde von mannen  
0,10063 wart in der stat sô geschrît  
0,10064 daz Hectores herze bî der zît  
0,10065 erschrac des gewan er swären muot  
0,10066 dô vrâgete der helet guot  
0,10067 waz die rede wäre  
0,10068 als er vernam daz mære  
0,10069 "ist ez sus sam mir got  
0,10070 sô mügen si es wole haben iren spot

- 0,10071 die von Kriechenlande  
 0,10072 daz ich in der schande  
 0,10073 hiute inne gesezzen bin  
 0,10074 daz mir ein wîp mînen sin  
 0,10075 alsus hât verkêret  
 0,10076 mîn vater sî geunêret  
 0,10077 unde alle sîne liute  
 0,10078 die mich hânt behalten hiute  
 0,10079 wider mînen willen  
 0,10080 sie vorhten alle Achillen  
 0,10081 unde sturben vore den sorgen  
 0,10082 ouwê armen gorgen  
 0,10083 iuwerre grôzen zageheit  
 0,10084 wirdet iuwers kindes kinde leit"  
 0,10085 dô er geklagete allermeist  
 0,10086 dô was Margaritonis geist  
 0,10087 von dem lîbe gevarn  
 0,10088 daz weinte maniger muoter barn  
 0,10089 dô daz vernam Hector  
 0,10090 er zurnte mî denne vore  
 0,10091 er hiez sîn ros bringen  
 0,10092 unde wolte dâr ûf springen  
 0,10093 dô quam sîn vater als êr  
 0,10094 unde bat in tûsent stunt mî  
 0,10095 denne er in dâ vore bæte  
 0,10096 unde als er in erweichet hæte  
 0,10097 daz sîn zorn gelegen was  
 0,10098 dô hette Eneas  
 0,10099 grôzen prîs dâ begân  
 0,10100 doch als ich ez gelesen hân  
 0,10101 was ez allez ein wint  
 0,10102 beide dô unde sint  
 0,10103 in der kurzen zîte  
 0,10104 daz Hector in deme strîte  
 0,10105 mit im niht en was gewesen  
 0,10106 des muoste ir wênic genesen  
 0,10107 dô wart Agomennon geware  
 0,10108 daz Hector in sîner schare  
 0,10109 in dem strîte niht en reit  
 0,10110 er was es alsô gemeit  
 0,10111 daz im sô liebe nie geschach  
 0,10112 Achillen er zuo sprach  
 0,10113 "wie nû hêrre Achilles  
 0,10114 ir merket niht des  
 0,10115 Hector en ist hier niergen  
 0,10116 wir mügen den Trôieren  
 0,10117 tuon daz wir wollen  
 0,10118 rîtent och vollen

- 0,10119 hin vüre iuch an den graben  
 0,10120 sich hât ire unsælde erhaben"  
 0,10121 Achilles nam dise zwêne  
 0,10122 Menesteum von Athêne  
 0,10123 unde Merionen dâr mite  
 0,10124 dô huaben sich die unsite  
 0,10125 under in unde den von Trôje  
 0,10126 der küninc von Pafagôje  
 0,10127 Philemenis genant  
 0,10128 quam ûf Menesteum gerant  
 0,10129 mit sîner baniere  
 0,10130 unde stach im der zene viere  
 0,10131 ûz sînen munde  
 0,10132 Menesteus en kunde  
 0,10133 mit sterke noch mit witzen  
 0,10134 dem stiche vore gesitzen  
 0,10135 er viel nider sêre gewundet  
 0,10136 die sîne nâmnen in zuo stunt  
 0,10137 unde vuorten in hinewec under des  
 0,10138 begeinete in Palimedes  
 0,10139 im was sîn ungemach leit  
 0,10140 mit zorne er zuo reit  
 0,10141 er quam under sie getriben  
 0,10142 dâ ez êr was beliben  
 0,10143 dâ wart ez nû erhaben baz  
 0,10144 dâ en was nieman sô laz  
 0,10145 sô træge noch sô swære  
 0,10146 der dâ niht snel en wäre  
 0,10147 sturm slac stich stôz  
 0,10148 schal geschreie ruof dôz  
 0,10149 unt der harte küene man  
 0,10150 der mit disen dingan kan  
 0,10151 wole bewaren sîne diet  
 0,10152 Polimedi er geriet  
 0,10153 daz er die von Trôje  
 0,10154 unde den von Pafagôje  
 0,10155 brâhte in harte grôze nôt  
 0,10156 dâ kôs maniger den tôt  
 0,10157 Achilles unde Agomennon  
 0,10158 Menelaus unde Thelamon  
 0,10159 unt Ajax Thelamones sun  
 0,10160 unde dâ mite Merion  
 0,10161 und hêrre Diomedes  
 0,10162 unde ouch Palimedes  
 0,10163 ensament zuo strichen  
 0,10164 die von Trôje wichen  
 0,10165 der küninc Philemenis  
 0,10166 Troilus unde París

- 0,10167 unde och Polidamas  
0,10168 unde hêrre Eneas  
0,10169 unde Andenor  
0,10170 ez was wole schîn daz Hector  
0,10171 in der burc was beliben  
0,10172 sie hetten sie getriben  
0,10173 rehte an die porten  
0,10174 die baniere die sie vuorten  
0,10175 lâgen dâ zuohouwen  
0,10176 in der burc die vrouwen  
0,10177 schrîen begunden  
0,10178 unde schriten al den stunden  
0,10179 ritter unde knechte  
0,10180 sturm unde vehte  
0,10181 was vore der porten sô grôz  
0,10182 daz man die stat ûf slôz  
0,10183 unde wâren sô benoetet  
0,10184 daz mit bluote wart beroetet  
0,10185 porte unt mûre  
0,10186 dô die schumpfentiure  
0,10187 allergroezest was  
0,10188 dô hielt Polidamas  
0,10189 unde Troilus sîn geverte  
0,10190 mit im beherte  
0,10191 daz die stat niht wart verloren  
0,10192 dâ en was nie dechein turn  
0,10193 erkær noch bervrit  
0,10194 noch dechein zinne dâ mit  
0,10195 man schüzze unde würfe dâr abe  
0,10196 von der vrouwen ungehabe  
0,10197 von ireme geschreie  
0,10198 unt von klage maniger leie  
0,10199 unde von ireme ungelâze  
0,10200 unde von der unmâze  
0,10201 die von in wart gestalt  
0,10202 wart Hector erschalt  
0,10203 under in allen  
0,10204 was sîn bluot entwallen  
0,10205 sîn herze zuodrunden  
0,10206 enthalten sie in niht en kunden  
0,10207 ân ire aller danc  
0,10208 sô balde er ûf daz ros spranc  
0,10209 daz sîn vuoz den stegereif  
0,10210 an dem sprungen niht begreif  
0,10211 helm schilt sper swert  
0,10212 iegelich zuo sîner stat wert  
0,10213 vater muoter wîp kint  
0,10214 die mohten wole wesen blint

- 0,10215 sie weinten sô sêre  
 0,10216 daz was im unmære  
 0,10217 er en sprach niht wende er reit hin  
 0,10218 daz was sîn êrste begin  
 0,10219 daz er einen schaft brach  
 0,10220 swen er an der vluht sach  
 0,10221 under sîner ritterschaft  
 0,10222 den sluoc er wâ er in traf  
 0,10223 unde treip sie ûz dem burctore  
 0,10224 dâ vant er sînes volkes vore  
 0,10225 ein unmâze erslagen  
 0,10226 dô begunde er zuo jagen  
 0,10227 "rûme lâ justieren"  
 0,10228 bî zwein bî drîn bî vieren  
 0,10229 volgeten die sîne nâch  
 0,10230 sie entsuoben alle wole dâ  
 0,10231 daz Hector in dem strîte reit  
 0,10232 er hette michel arbeit  
 0,10233 ûf unde nider in der schare  
 0,10234 er sluoc her unde dare  
 0,10235 sô dicke unde sô lange  
 0,10236 daz von sîneme getwange  
 0,10237 die Kriechen liten grôze nôt  
 0,10238 dâ beleip Euripilus tôt  
 0,10239 der küninc von Orkanîe  
 0,10240 dô huop sich geschrîe  
 0,10241 ûf der zinnen  
 0,10242 "thera hei sie kêrent hinnen"  
 0,10243 er wäre hinden oder vore  
 0,10244 sie wânten daz Hector  
 0,10245 in allen enden wäre  
 0,10246 waz wolte ir mère  
 0,10247 in swelichen enden er was  
 0,10248 daz ir dechein dâ genas  
 0,10249 ire dechein getorste bîten  
 0,10250 sie giengen hin [unde] rîten  
 0,10251 sô sêre daz von sîner hant  
 0,10252 beide velt unde sant  
 0,10253 wart mit tôten ervult  
 0,10254 sîn zorn unde sîn ungedult  
 0,10255 manigen den lîp nam  
 0,10256 die Kriechen hetten Polidamam  
 0,10257 vore der burc gevangen  
 0,10258 der hette dâ begangen  
 0,10259 manic wunder under in  
 0,10260 sie vuorten in vaste mit in hin  
 0,10261 Polidamas solte vore der stat  
 0,10262 Philemenem hân beratt

- 0,10263 dô er in beratt hæte  
0,10264 dô geschach im ungeræte  
0,10265 daz er gevangen wart  
0,10266 Hector sach ûf der vart  
0,10267 daz man in hine vuorte  
0,10268 balde er nâch ruorte  
0,10269 unde quam im zuo trôste  
0,10270 die wîle daz er in löste  
0,10271 unde in Polidamas gesach  
0,10272 leider im nie geschach  
0,10273 vile lieber ime wäre  
0,10274 daz er gevangen wäre  
0,10275 oder beliben wäre tôt  
0,10276 daz was ouch umbe die nôt  
0,10277 die ir vore vernomen hât  
0,10278 er vorhte sîn würde niemer rât  
0,10279 er dâhte er muoste tôt sîn  
0,10280 dâ tet Hector wole schîn  
0,10281 daz er guot unt leben  
0,10282 umbe sîne triuwe wolte geben  
0,10283 durch der Trôierer heil  
0,10284 satzte er sich in urteil  
0,10285 mit sô grôzen triuwen  
0,10286 er mochte sie wole riuwen  
0,10287 op er solte sîn verloren  
0,10288 die in zuo hêrren hetten erkoren  
0,10289 was sîn lîp veile  
0,10290 daz quam den zuo unheile  
0,10291 die sînes leides warten  
0,10292 swâ sie zuo kârten  
0,10293 zuo ietweder hant  
0,10294 muosten sie lâzen ein pfant  
0,10295 lide lîp unt guot  
0,10296 biz er gekuolte sînen muot  
0,10297 Politetes ein vürste  
0,10298 man saget daz er torste  
0,10299 komen wole zuo kreize  
0,10300 der quam ageleize  
0,10301 mit zorne unde mit unsiten  
0,10302 ûf hêrren Hectoren geriten  
0,10303 daz er versuochete sîne maht  
0,10304 als er zuo quam geraht  
0,10305 Hector entvienc den jungelinc  
0,10306 an sîneme houbete er ane vienc  
0,10307 unde spielt in ûf den satelbogen  
0,10308 als er ûf hette erzogen  
0,10309 zuo eineme andern slage daz swert  
0,10310 dô viel jener under daz pfert

- 0,10311 der slac gienc iedoch vüre sich  
 0,10312 der Kriechen ir iegelich  
 0,10313 gâben ruom sîneme slage  
 0,10314 er wäre helet oder zage  
 0,10315 Achilles merkete den slac  
 0,10316 dâ der hêrre von tôt lac  
 0,10317 Politetes genant  
 0,10318 er sprach "ez ist ein unsælic hant  
 0,10319 die dich hât ervellet  
 0,10320 unde die diz wunder stellet  
 0,10321 ûf diseme ringe  
 0,10322 ich wâne er übel gedinge  
 0,10323 êr er hinnen scheide  
 0,10324 ez wirdet im zuo leide  
 0,10325 mir ist leit dîn tôt"  
 0,10326 daz tet Achilli grôze nôt  
 0,10327 solte er behalten hân daz leben  
 0,10328 er hette im sîne swester gegeben  
 0,10329 die er im gelobet hâte  
 0,10330 Hector der stæte  
 0,10331 hielt ûf dem ringe  
 0,10332 unde wolte dem jungelinge  
 0,10333 den halsberc ûz hân gezogen  
 0,10334 von Kaukasô dem herzogen  
 0,10335 die wîle er zuo zôch under des  
 0,10336 quam hêrre Achilles  
 0,10337 Achilles zuo Hectore sprach  
 0,10338 dô er dise unzuht sach  
 0,10339 "waz ist daz ir ane gât  
 0,10340 gelüstet iuch dirre sarewât  
 0,10341 sô kêret her zuo mir  
 0,10342 entweder ich oder ir  
 0,10343 muoz sie behalten  
 0,10344 got der muoz es walten  
 0,10345 êr ich hinnen scheide  
 0,10346 wir belîben hier beide  
 0,10347 entweder ir oder ich  
 0,10348 dirre hêrre riuwet mich"  
 0,10349 Hector sprach "daz muoz wesen  
 0,10350 ich sol harte wole genesen  
 0,10351 wil mir got genædic sîn"  
 0,10352 Achilles sprach "nû hüete dîn"  
 0,10353 Hector einen slac sluoc  
 0,10354 Achilles des niht vertruoc  
 0,10355 Hector sluoc aber dare  
 0,10356 Achilles nam des slages ware  
 0,10357 Hector mit dem dritten  
 0,10358 spielt im den helm mitten

- 0,10359 durch die hûben dâr unde  
 0,10360 er sprach "hüete dich die wunde  
 0,10361 die dir an dem houbete ist  
 0,10362 die gît mir des tôdes vrist"  
 0,10363 daz was wâr er was gewundet  
 0,10364 des kârte er dannen al zuo stunt  
 0,10365 biz er die wunden gebant  
 0,10366 dô reit er wider alzuohant  
 0,10367 Hector huop sich im engein  
 0,10368 ir ietweder den andern ane grein  
 0,10369 als er in wolte bîzen  
 0,10370 "waz wilt dû mir verwîzen"  
 0,10371 sprach hêrre Achilles  
 0,10372 "bin ich gewundet waz nû des  
 0,10373 hât dir mîn wunde vryst gegeben  
 0,10374 maht dû behalten daz leben  
 0,10375 sô hilfet dich mîn wunde"  
 0,10376 in der selben stunde  
 0,10377 huop er unt sluoc dare  
 0,10378 Hector was hantgare  
 0,10379 unt tet semelîche  
 0,10380 unt sluogen sich gelîche  
 0,10381 ûf unt nider durch den rinc  
 0,10382 der ein des andern slac entvienc  
 0,10383 sie zogeten sich dar unde here  
 0,10384 als ein lewe unde als ein bere  
 0,10385 mit zorne unde mit nîde  
 0,10386 dâ brunsete ire gesmîde  
 0,10387 von dem viure daz dâr ûz spranc  
 0,10388 der sturm was alsô lanc  
 0,10389 daz ireme ietwederme nider  
 0,10390 beide hût unde lider  
 0,10391 unde daz vleisch dâr mite  
 0,10392 beide von slage unde von snite  
 0,10393 hangete ûf die sarewât  
 0,10394 rôt wart der zindât  
 0,10395 der dâ wîz solte sîn  
 0,10396 Achilles tet daz schîn  
 0,10397 daz er der sterker was  
 0,10398 er warf in ûf daz gras  
 0,10399 daz er aller zuodrant  
 0,10400 unde quam ûf in gerant  
 0,10401 er sluoc in unde tratte  
 0,10402 decheine wîs er ime statete  
 0,10403 daz er sich ûf erhüebe  
 0,10404 sîn ougen wurden trüebe  
 0,10405 sîn nase begunde bleichen  
 0,10406 daz was ein bitter zeichen

- 0,10407 im entvielen die hende  
 0,10408 Hector nam sîn ende  
 0,10409 dô er in verscheiden sach  
 0,10410 Achilles sus zuo ime sprach  
 0,10411 "got der müeze dich bewaren  
 0,10412 dîn sîle müeze wole gevaren  
 0,10413 dû wäre in dîneme künne  
 0,10414 trôst unde wünne  
 0,10415 dîne vriunde gemeine  
 0,10416 grôz unde kleine  
 0,10417 arme unde rîche  
 0,10418 alle gemeine gelîche  
 0,10419 vater muoter wîp kint  
 0,10420 bruoder swester unde die dâ sint  
 0,10421 den dû vore soltes sîn  
 0,10422 die en mügen den tôt dîn  
 0,10423 verwinden niemer mî  
 0,10424 ich wæne der werlte êr zuogê  
 0,10425 êr dîn gelîche werde geboren  
 0,10426 dû hâst den lîp hier verloren  
 0,10427 durch triuwe unde durch êre  
 0,10428 got genâde dîn iemer mîre"  
 0,10429 dâ schrîeten die Trôiere  
 0,10430 sie wurfen die baniere  
 0,10431 ûf die erden  
 0,10432 von leiden unt von swerde  
 0,10433 wâren sie alle verzaget  
 0,10434 Achilles quam in nâch gejaget  
 0,10435 dâ wart erslagen unde ertrat  
 0,10436 vünf hundert vore der stat  
 0,10437 die ervielen alle  
 0,10438 nâch Hectores valle  
 0,10439 daz lant sîn schaden hâte  
 0,10440 diz grôze ungeræte  
 0,10441 unde ander manic ungemach  
 0,10442 der sint durch die schult geschach  
 0,10443 wende Hector was ervalt  
 0,10444 die nôt die wart sô manicvalt  
 0,10445 daz ich ez gesagen niht en kunde  
 0,10446 unde hette ich zehen munde  
 0,10447 dô Hector tôt was gelegen  
 0,10448 dô klagete manic tiure degen  
 0,10449 wende ire hîrre tôt lac  
 0,10450 daz lant allez erschrac  
 0,10451 dorf burc unde stat  
 0,10452 sîner sîle guotes bat  
 0,10453 vater muoter kint wîp  
 0,10454 klagete allez sînen lîp

- 0,10455 bruoder swester nifteln neven  
 0,10456 klageten ump sîn leben  
 0,10457 vrouwe maget ritter knecht  
 0,10458 klageten alle daz unreht  
 0,10459 waz wollet ir mère  
 0,10460 beide burgære  
 0,10461 gebûre unde koufmanne  
 0,10462 liezen sich daz klagen an  
 0,10463 unde daz volc algemeine  
 0,10464 hetten die steine  
 0,10465 witze unt sinne  
 0,10466 turm unt zinne  
 0,10467 erkær unde bervrit  
 0,10468 unde daz burctor dâ mit  
 0,10469 obene unde unden  
 0,10470 von dem vullemunde  
 0,10471 beide kalc unt sant  
 0,10472 von deme dache biz an die want  
 0,10473 kunden sie sich verstân  
 0,10474 sie mohten wole geklaget hân  
 0,10475 durch Hectores unheil  
 0,10476 nû beleip ir ensament dechein teil  
 0,10477 die Trôirer dô quâmen  
 0,10478 Hectorem sie nâmnen  
 0,10479 zuo der stat sie in brâhten  
 0,10480 dô sie dar nâheten  
 0,10481 dô schrei daz volc überal  
 0,10482 unde volgeten im ûf den sal  
 0,10483 unt als er nider wart geleit  
 0,10484 dô huop sich leit über leit  
 0,10485 man sach in zuohouwen  
 0,10486 des schrîeten die vrouwen  
 0,10487 unde allez daz volc daz dâ was  
 0,10488 "ouwê leider eilas"  
 0,10489 sîn vater der viel ûf in  
 0,10490 unde sprach "ich en weiz waz ich bin  
 0,10491 dû wäre mîn sèle unde mîn sin  
 0,10492 mîn vröuwede unde mîn gewin  
 0,10493 mîn rîche mîn krône  
 0,10494 mîn milte mîn schoene  
 0,10495 mîn triuwe mîn êre"  
 0,10496 dô schrîete er alsô sêre  
 0,10497 daz er dannen gezogen wart  
 0,10498 als ein stein alsô hart  
 0,10499 unt als ein ïs alsô kalt  
 0,10500 er was ûz sîner gewalt  
 0,10501 bleich unde missevare  
 0,10502 hette man sîn niht ware

- 0,10503 genomen in kurzer zît  
 0,10504 er hette sich zuo tôde erschrît  
 0,10505 dô lief hêrre Parîs  
 0,10506 âne sin zuo gelîcher wîs  
 0,10507 als ein tobender man  
 0,10508 den blîât den er truoc an  
 0,10509 zuoreiz er biz an die hût  
 0,10510 sîn geschrei was sô lût  
 0,10511 daz mit sînen ôren  
 0,10512 nieman gehoeren  
 0,10513 mochte noch en kunde  
 0,10514 an der selben stunde  
 0,10515 quam er ûf in gevallen  
 0,10516 er sprach waz hât uns allen  
 0,10517 got an dir gewizzen  
 0,10518 leider wir en wizzen  
 0,10519 wie wir dich verwinden  
 0,10520 under mînes vateres kinden  
 0,10521 daz ir noch in lîbe ist  
 0,10522 nû dû eine tôt bist  
 0,10523 uns geschihet niemer mère  
 0,10524 genâde noch êre  
 0,10525 zuo lîbe noch zuo guote  
 0,10526 in Hectores bluote  
 0,10527 walgete er her unde dare  
 0,10528 biz sîn harte schoene varwe  
 0,10529 alsô sêre wart verstalt  
 0,10530 daz in Helena schalt  
 0,10531 unde nam in mit der hant  
 0,10532 unde leitte in dannen zuohant  
 0,10533 Troilus quam zuo gegân  
 0,10534 "waz hân ich hêrre got getân  
 0,10535 wider dich" sprach er "eilas  
 0,10536 daz dû mich sus geuntroestet hâs  
 0,10537 daz dû mir den bruoder mîn  
 0,10538 der mîn herze solte sîn  
 0,10539 alsô vruo genomen hâs  
 0,10540 unt mir den lîp lâzes  
 0,10541 waz solte ich armer geboren  
 0,10542 nû hân ich den bruoder verloren  
 0,10543 unde dâr zuo mîn liebez wîp  
 0,10544 waz sol mir nû mîr der lîp"  
 0,10545 er kuste in aldâ er lac  
 0,10546 Deiphebus des selben pflac  
 0,10547 alsô tet Eneas  
 0,10548 unde och Polidamas  
 0,10549 unde Andenor  
 0,10550 "ouwê liebe Hector

- 0,10551 von dîn eines valle  
0,10552 sîn wir verloren alle”  
0,10553 die kebesbruoder quâmen dar  
0,10554 mit einer grôzen schar  
0,10555 sie wisten wie gelâzen  
0,10556 vore leide sie vergâzen  
0,10557 wie sie sich verstalten  
0,10558 zuo den wenden sie sich halten  
0,10559 unde zuo den sûlen  
0,10560 schriende unt hiulen  
0,10561 ir iegelich begonde  
0,10562 mit gemeinen munde  
0,10563 versuocheten sie ire stimme  
0,10564 sô lûte unde sô grimme  
0,10565 daz die stimme unde die zunge  
0,10566 mit der bibunge  
0,10567 alsô sêre ûz dôz  
0,10568 daz in die gurgele wart grôz  
0,10569 unde zuoblies alle  
0,10570 von ruofe unde von schalle  
0,10571 sîn muoter vrouwe Ecuba  
0,10572 die huop ire klage dâ  
0,10573 sie sprach “Trôja unde Ilion  
0,10574 wâren harte ungewon  
0,10575 sus getâner leide  
0,10576 hier wuohs wîlen heide  
0,10577 gras unde buschæhe  
0,10578 ez ist an der næhe  
0,10579 daz sich hebet die zît  
0,10580 dâ ir ane verloren sît  
0,10581 ouwê dirre riuwe  
0,10582 iuwer schoene gebriuwe  
0,10583 wirdet zuovuort als ein wint  
0,10584 ouwê Hector liebez kint  
0,10585 weinet alle liute  
0,10586 disen tôt hiute  
0,10587 ir müget alle wole klagen  
0,10588 ir sît an den hôhesten tagen  
0,10589 unde an der grôzesten êre  
0,10590 die iuch geschihet mère”  
0,10591 ûf die erden sie saz  
0,10592 irere klage sie niht vergaz  
0,10593 die edel künninginne  
0,10594 ire wange unde ire kinne  
0,10595 legete sie ûf ire hant  
0,10596 ire ougen sie bewant  
0,10597 unde begunde weinen  
0,10598 wär sîn herze steinen

- 0,10599 swer sie weinen sâhe  
 0,10600 zuo weinen im geschæhe  
 0,10601 Andrômacha sîn schoenez wîp  
 0,10602 die hette iren reinen lîp  
 0,10603 alsô sêre gequalt  
 0,10604 sie hette decheine gewalt  
 0,10605 an sinne noch an worte  
 0,10606 ir hangete der borte  
 0,10607 unde der schoene ziklâtîn  
 0,10608 unde die kûrsene dâr ïn  
 0,10609 zuobrochen unde zuorissen  
 0,10610 unde gar zuoslizzen  
 0,10611 ire hâr unde ire gebende  
 0,10612 zuobrochen ire hende  
 0,10613 gar âne witze  
 0,10614 zuokrummen ire antlitze  
 0,10615 berunnen mit bluote  
 0,10616 man hette ir grôze huote  
 0,10617 hette man des niht getân  
 0,10618 sie muoste den lîp verloren hân  
 0,10619 sie was vile nâch von leiden  
 0,10620 tôt unt verscheiden  
 0,10621 under iren handen  
 0,10622 daz mîrrer teil wânte  
 0,10623 daz sie tôt wære  
 0,10624 sô grôz was ire swære  
 0,10625 zuo sînem houbete saz Helena  
 0,10626 unde sîn muoter Ecuba  
 0,10627 von Helenen was dâ gehôrt  
 0,10628 halbe rede halbe wort  
 0,10629 als ez ire in den munt quam  
 0,10630 daz siufzen ez ir halp abe nam  
 0,10631 nâch einer langen stunde  
 0,10632 quam ez ir ûz dem munde  
 0,10633 mî geschrîet denne gesaget  
 0,10634 sie hette geweinet unde geklaget  
 0,10635 daz ire ougen unde ire munt  
 0,10636 gar ûz sîneme rehten stuont  
 0,10637 Polixena der swester ein  
 0,10638 sô lûte schrei unde grein  
 0,10639 daz aller der palas  
 0,10640 von ireme ruofe vol was  
 0,10641 sie schrîeten alle gemeine  
 0,10642 grôz unde kleine  
 0,10643 daz von ireme geschreie  
 0,10644 ire stimme maniger leie  
 0,10645 mit gelîcheme lûte wider schal  
 0,10646 ûf unt nider in dem sal

- 0,10647 als daz buoch gesaget hât  
0,10648 sie zugen im úz die sarwât  
0,10649 unde wuoschen mit wîne  
0,10650 die gewunten lide sîne  
0,10651 sie strichen wurze unde krût  
0,10652 an sîn vleisch unde an sîn hût  
0,10653 sie bestrichen in allenthalben  
0,10654 mit balsemen unde mit salben  
0,10655 an den selben stunden  
0,10656 den hêrren sie bewunden  
0,10657 in einen tiuren blîalt  
0,10658 mit borten harte wole bestalt  
0,10659 mit golde unde mit gesteine  
0,10660 schoene unde reine  
0,10661 êr man in och bestetete  
0,10662 ûf ein edel spanbette  
0,10663 wart hêrre Hector geleit  
0,10664 dâ was ein pfellel ûf gebreit  
0,10665 guot unt lobesam  
0,10666 als ez dô wole gezam  
0,10667 dâ was daz golt ane erhaben  
0,10668 mit güldinen buochstaben  
0,10669 dâr in geworht unde genât  
0,10670 swaz Plato geschriben hât  
0,10671 sîne kunst unde sîne list  
0,10672 die zuo Parîs genge ist  
0,10673 mē denne anderswâ  
0,10674 daz ist dialecticâ  
0,10675 sô guot was sîn gewürhte  
0,10676 spræche ich ez ich vürhte  
0,10677 daz ez gelogen wäre  
0,10678 waz sol es nû mère  
0,10679 er was ûzer mâzen guot  
0,10680 daz buoch mir kunt tuot  
0,10681 die kerzen die dâ wâren  
0,10682 gesetzet ump die bâre  
0,10683 wâren von grôzer ziere  
0,10684 dar quâmen die Trôiere  
0,10685 ûze der stat die bezzisten  
0,10686 die kunden unde westen  
0,10687 an buochen unt an pfafheit  
0,10688 list unt wîsheit  
0,10689 die huoben iren sanc an  
0,10690 dâ schriete wîp unde man  
0,10691 durch den jæmerlîchen sanc  
0,10692 der in úz dem munde klanc  
0,10693 ir iegelich sanc unde las  
0,10694 biz die naht ergangen was

- 0,10695 dô die naht dô ergienc  
0,10696 Agomennon zuo râte gienc  
0,10697 des morgenes vile vruo  
0,10698 unt nam die vürsten dâr zuo  
0,10699 er sprach "vernemet gelîche  
0,10700 arme unt rîche  
0,10701 unt sehet mit welicher wîse  
0,10702 wir gelônen Parîse  
0,10703 daz er vrouwen Helenam  
0,10704 zuo Kriechen mit gewalt nam  
0,10705 sie hânt verloren den man  
0,10706 den ir dechein verwinden kan  
0,10707 nû Hector ist ervallen  
0,10708 daz lâzet iuch liep allen  
0,10709 uns wirdet burc unde lant  
0,10710 des danket alle sîner hant  
0,10711 der uns daz liep getân hât  
0,10712 unser nôt wirdet nû guot rât  
0,10713 Achilles sêre gewundet ist  
0,10714 wir müezen haben eine vrast  
0,10715 unt vride unde tac  
0,10716 zwêne mânde op ez sîn mac  
0,10717 biz er werde gesunt"  
0,10718 sie santen boten zuo stunt  
0,10719 in vride gegeben wart  
0,10720 als ir iezunt sít gelârt  
0,10721 waz sol umberede mî  
0,10722 sie begruoben ire tötten als êr  
0,10723 als ich daz buoch hoeren sagen  
0,10724 rehte in vünvzehen tagen  
0,10725 Priamus sich versan  
0,10726 unt ander sîne râtmanne  
0,10727 der er zuo râte was gewon  
0,10728 wie er mochte sînen sun  
0,10729 begraben mit êren  
0,10730 sie begunden in lêren  
0,10731 unde râten als er bat  
0,10732 dâ was ein porte in der stat  
0,10733 die dâ hiez Timbrê  
0,10734 die stuont rehte gegen dem sê  
0,10735 dâ hette bî ein betehûs  
0,10736 ein got der hiez Phebus  
0,10737 schoene unt rîche  
0,10738 dâ rieten sie alle gelîche  
0,10739 daz man in dâ leite  
0,10740 die stat was ungereite  
0,10741 dâ er ligen solte  
0,10742 von silber unde von golde

- 0,10743 unde von edelme gesteine  
0,10744 ein grap harte reine  
0,10745 dem betehûse nâhen bî  
0,10746 worhten steinmetzen drâ  
0,10747 ein gewelbe sôgetân  
0,10748 solte man ez gelônet hân  
0,10749 sô was ez alsô schoene  
0,10750 man hette in zuo lône  
0,10751 von rehte gegeben  
0,10752 iemer rîche unde iemer leben  
0,10753 vier sûle stuonden dâr unde  
0,10754 an dem vullemunde  
0,10755 was der sûle iegelich  
0,10756 eineme lewen gelîch  
0,10757 dâ was in geworht daz golt  
0,10758 sie wâren harte wole ervollet  
0,10759 mit guoteme gesteine  
0,10760 mitten niht zuo kleine  
0,10761 beide unden unde obe  
0,10762 zuo prîse unde zuo lobe  
0,10763 dâ was wunder an gegraben  
0,10764 geschriften och mit buochstaben  
0,10765 swaz ie mohte werden  
0,10766 in wazzer unt in erden  
0,10767 von vischen von tieren  
0,10768 ûf den sûlen vieren  
0,10769 daz gewelbe sô schône stuont  
0,10770 daz ouge noch munt  
0,10771 nie soliches niht gesach  
0,10772 der munt nie soliches niht gesprach  
0,10773 zwô siule wâren rubîne  
0,10774 zwô almetîne  
0,10775 an dem gewelbe was solich prîs  
0,10776 ez en wart nie man sô wîs  
0,10777 swer ez gesæhe  
0,10778 der wânte unt jæhe  
0,10779 daz ez ein paradîse  
0,10780 in aller hande wîse  
0,10781 daz ie ich gewar wart  
0,10782 was sîn kraft unde sîn art  
0,10783 grüene rôt wîz grâ  
0,10784 daz was allez sam dâ  
0,10785 daz gewürhte was sô rîche  
0,10786 ûf dem esterîche  
0,10787 was ein lûter stein geleit  
0,10788 zuo mâze lanc zuo mâze breit  
0,10789 als ein sarc solte sîn  
0,10790 schoene als ein sunnenschîn

0,10791 dâ legete man in in  
0,10792 als ich gelârt bin  
0,10793 daz ich die rede kürze  
0,10794 sie legeten dar wurze  
0,10795 alsô maniger hande  
0,10796 als sie in dem lande  
0,10797 vunden die bezzisten  
0,10798 unt guot westen  
0,10799 sie legeten bî in ein swert  
0,10800 daz was maniger marke wert  
0,10801 waz wollet ir mère  
0,10802 dâ was grôze êre  
0,10803 vruo unt späte  
0,10804 op er den geist hâte  
0,10805 dâ wär ein paradîse  
0,10806 man dorfte dâ niht der spîse  
0,10807 solich was der wurze smac  
0,10808 daz gesteine gap den tac  
0,10809 gelîche der sunnen  
0,10810 vier kerzen dâ brunnen  
0,10811 zwô zuo den vüezen  
0,10812 sô wir sagen müezen  
0,10813 zuo dem houbete zwô  
0,10814 mit listen gemachet sô  
0,10815 die wîle sie dâ stuonden  
0,10816 verleschen sie niht en kunden  
0,10817 dâ stuont umbe daz grap  
0,10818 von golde manic buochstap  
0,10819 mit kurzer rede tuon ich kunt  
0,10820 waz dâ geschriben stuont  
0,10821 "von Trôje von Ilion  
0,10822 des küninges Priamus sun  
0,10823 der starke Hector hier lît  
0,10824 ez en wart bî sîner zît  
0,10825 nie küener man geboren  
0,10826 des hât er den lîp verloren  
0,10827 ouch ist von sîner hant  
0,10828 manic küninc von Kriechenlande  
0,10829 hier zuo Trôje tôt beliben"  
0,10830 der namen wâren dâ geschriben  
0,10831 als Hector was bestatet  
0,10832 sie kârten wider in die stat  
0,10833 mit riuwen unde mit swære  
0,10834 mit sôgetânen gebären  
0,10835 die dâr zuo gehörten  
0,10836 mit leidigen worten  
0,10837 sie geswigen nie in dem tage  
0,10838 sie wâren allez in der klage

- 0,10839 sie stalten manic wunder  
 0,10840 sament unde besunder  
 0,10841 grôze unmâze  
 0,10842 an geschreie unde an gelâze  
 0,10843 noch mî denne dâ vore  
 0,10844 in was allez Hector  
 0,10845 in muote unde in munde  
 0,10846 sie hetten swære stunde  
 0,10847 under den Kriechen under des  
 0,10848 klagete Polidames  
 0,10849 daz Agomennon wäre  
 0,10850 zuo lange ire rihtære  
 0,10851 "er en hât die manheit  
 0,10852 noch sterke noch wîsheit  
 0,10853 unde ist dâr zuo niht geboren  
 0,10854 daz er zuo hêren sî erkoren  
 0,10855 über sô manigen wîsen man  
 0,10856 er en tar noch en kan  
 0,10857 noch en mac mit êren  
 0,10858 gewîsen noch gelêren  
 0,10859 eine sô kreftige diet  
 0,10860 ich wil sîn zuo hêren niht  
 0,10861 sint Hector tôt lît  
 0,10862 versinnet iuch nû des ist zât  
 0,10863 diz lant daz ist gewunnen  
 0,10864 op wir uns kunnen  
 0,10865 dâr umbe vereinen  
 0,10866 daz wir kiesen einen  
 0,10867 der uns nû leite  
 0,10868 unde wole bereite  
 0,10869 mit witzen unde mit sinnen  
 0,10870 ich wil kêren hinnen  
 0,10871 ez en sî daz mir werde  
 0,10872 ein hêrre zuo guoten werde"  
 0,10873 den die rede ane gienc  
 0,10874 Agomennon ez entvienc  
 0,10875 sô gezogenlîche  
 0,10876 daz dechein sîn gelîche  
 0,10877 daz baz entvangen hæte  
 0,10878 er sprach "wer anders tæte  
 0,10879 wan als ir gesprochen hât  
 0,10880 der en hette es niht mînen rât  
 0,10881 iuwern rât hân ich gerne  
 0,10882 biz ich baz gelerne  
 0,10883 sô râte ich harte gerne baz  
 0,10884 ir sulet iedoch wizzen daz  
 0,10885 daz ich zuo rihtær was genomen  
 0,10886 daz ist von vrevel niht kommen

- 0,10887 ich en hân es gevüere noch gewin  
 0,10888 daz ich rihtær bin  
 0,10889 des hân ich michel arbeit  
 0,10890 daz ist mir hiute unde iemer leit  
 0,10891 daz ich dâr zuo erwelt wart  
 0,10892 en wäre dise hervart  
 0,10893 durch mînen bruoder niht geschêen  
 0,10894 ir soltet daz hân gesehen  
 0,10895 ich en hette es mich niht underwunden  
 0,10896 hât ir den vunden  
 0,10897 der dâr zuo guot ist  
 0,10898 an der kunst unde an der list  
 0,10899 an tugenden unde an êre  
 0,10900 den nemet zuo rihtære  
 0,10901 sehet wer iuch gevalle  
 0,10902 dunket ez iuch guot alle  
 0,10903 der iuch disen rât gît  
 0,10904 der kan harte wole dâ mit  
 0,10905 Palimedes der ist wîs  
 0,10906 eine wîs unde ander wîs  
 0,10907 der ist vile guot dâr zuo  
 0,10908 ich wæne er ez ouch gerne tuo"  
 0,10909 dirre rât der geschach  
 0,10910 als Agomennon vore sprach  
 0,10911 Palimedes wart erkoren  
 0,10912 daz was Achilli vile zorn  
 0,10913 swie zorne ez ime wäre  
 0,10914 doch beleip er rihtære  
 0,10915 Palimedes sich zuohant  
 0,10916 sînes gerichtes underwant  
 0,10917 dô was der vride ouch ûz gegân  
 0,10918 der zuo einem mânde was getân  
 0,10919 Priamus in der stat  
 0,10920 sîne ritterschaft bat  
 0,10921 mit grôzer vléhe  
 0,10922 daz ir iegelich sâhe  
 0,10923 wie wole er wäre gereit  
 0,10924 zuo rechene sînes sunes leit  
 0,10925 "ich bite es iuch iemer mère  
 0,10926 durch triuwe unde durch êre  
 0,10927 unde durch mînen willen  
 0,10928 swer mir Achillen  
 0,10929 von dem lîbe tâte  
 0,10930 mînes rîches er hâte  
 0,10931 alsô vile sô er wolte  
 0,10932 von silber unde von golde  
 0,10933 muoste er iemer rîche sîn  
 0,10934 küene helede lázet schîn

- 0,10935 werden op er iuch riuwe  
0,10936 sô leistet im triuwe  
0,10937 des sol doch werden guot rât  
0,10938 ist daz ir triuwe hât  
0,10939 alsô ist Hector belegen  
0,10940 hier ist sô manic guot degen  
0,10941 wir sulen uns harte wole erweren  
0,10942 unde unser lant wole generen  
0,10943 unde die vesten dâr mite  
0,10944 tuot eht des ich iuch bite"  
0,10945 die rede in wole behagete  
0,10946 ir iegelich sagete  
0,10947 wie gerne er tâte  
0,10948 swes er sie bâte  
0,10949 beide in erneste unde in spotte  
0,10950 wolten sie sîn gebot  
0,10951 tuon unt leisten  
0,10952 zuo dem minnesten unde zuo dem meisten  
0,10953 dô der tac ûf gienc  
0,10954 unde die werlt die lieht entvienc  
0,10955 von der klâren sunnen  
0,10956 dô hetten sie begunnen  
0,10957 irere alten reite  
0,10958 die hêrren geleitte  
0,10959 Hectores bruoder Deiphebus  
0,10960 dem volgete Troilus  
0,10961 Parîs unde Eneas  
0,10962 unde ouch Polidamas  
0,10963 daz volc sich scharte  
0,10964 Priamus sie bewarte  
0,10965 von ende zuo ende  
0,10966 der ûz dem ellende  
0,10967 nam hêrre Palimedes war  
0,10968 ûf unde nider in der schar  
0,10969 er nam sich ez harte sêre an  
0,10970 wende er es von êrsten began  
0,10971 daz er sie wole berichtte  
0,10972 sie riten zuosamene in rihte  
0,10973 beidersît als êr  
0,10974 waz sol umberede mî  
0,10975 dâ wart lîp gegen lîbe gegeben  
0,10976 beide tôt unde leben  
0,10977 vuoren an einer strâze  
0,10978 mit grôzer unmâze  
0,10979 alsô gar gelîche  
0,10980 als ir iegelîche  
0,10981 dem andern gelîch ist  
0,10982 der hier des lîbes hette vrist

- 0,10983 der lac andersît tôt  
0,10984 der hier was in solicher nôt  
0,10985 daz er nâch tôt was  
0,10986 harte kûme er genas  
0,10987 sus getân gewerbe  
0,10988 ist aller der erbe  
0,10989 die gerne in strîte sint  
0,10990 ir sehet wole wie der starke wint  
0,10991 die vedern umbe trîbet  
0,10992 sô sie niergen belîbet  
0,10993 weder verre noch nâch  
0,10994 iezunt hier unde iezunt dâ  
0,10995 in allen steten mæren  
0,10996 alsô geschach den Trôjären  
0,10997 dô sie wânten tôt wesen  
0,10998 des tages wâren sie genesen  
0,10999 unde begiengen grôzen prîs  
0,11000 Troilus unde Parîs  
0,11001 unt ander ire gesinde  
0,11002 des gelîche ich sie dem winde  
0,11003 zuo gelücke unde och zuo heile  
0,11004 ist der ritter veile  
0,11005 zuo verlust unde zuo gewinne  
0,11006 jene von dâr inne  
0,11007 tâten ez wole an dem tage  
0,11008 beide zuo stiche unde zuo slage  
0,11009 von Lizelant quam zuo gerant  
0,11010 ein küninc Sarpedon genant  
0,11011 Neptolomus quam im engein  
0,11012 dô huop sich von in zwein  
0,11013 grôz ungeverte  
0,11014 sie sluogen slege herte  
0,11015 swaz ire swert ie vant  
0,11016 buckeln oder schildes rant  
0,11017 daz lac dâ zuoschrôten  
0,11018 Sarpedon was in noeten  
0,11019 sîn gedinge wäre kranc dâ  
0,11020 wan der von Persia  
0,11021 der quam under sie gevlogen  
0,11022 mit pfilen unde mit bogen  
0,11023 treip er die Kriechen hinderwert  
0,11024 Menelaus rukte sîn swert  
0,11025 unde Ajax Thelamonis sun  
0,11026 unde sîn vater Thelamon  
0,11027 unde manic vürste von übermer  
0,11028 unde beringeten mit ireme her  
0,11029 den küninc dâ von Persialande  
0,11030 unde als der hîrre wânte

0,11031	daz er helfe hæte
0,11032	dô geschach im ungeræte
0,11033	daz er dâr nider wart getrat
0,11034	des beleip er ûf der walstat tôt
0,11035	wole von tûsent wunden
0,11036	dô wart och sîner vunden
0,11037	ûzer mâzen vile erslagen
0,11038	die man sêre mohte klagen
0,11039	dô huop sich daz alte leit
0,11040	Priamus dâ reit
0,11041	eineme helde gelîche
0,11042	er hette och sîn rîche
0,11043	verloren an deme tage
0,11044	wan daz er mit stiche unde mit slage
0,11045	daz manlîchen werte
0,11046	unt vile wole beherte
0,11047	als ez quam zuo der vesperzît
0,11048	starker helde beidersît
0,11049	lac dâ alsô vile tôt
0,11050	daz in vrides was nôt
0,11051	biz man sie begrüebe
0,11052	êr sie ez aber erhuoben
0,11053	daz sie an dem andern tage
0,11054	vruo aber solten dar zogen
0,11055	dô wart geworben ump den vride
0,11056	zuo begrabenne ire tötten unde ire lide
0,11057	zuo heilene ire wunden
0,11058	die ez gewerben kunden
0,11059	die wurden ump den vride gesant
0,11060	den gâben die von Kriechenlande
0,11061	als sie gebeten wâren
0,11062	ich en weiz zuo wie manigen jâren
0,11063	oder mânen oder tagen
0,11064	vüre wâr ich iuch des niht en sage
0,11065	wende ich vant es niht geschriben
0,11066	des sít ir es unberichtet beliben
0,11067	wan daz ich daz bin gelârt
0,11068	daz er lange gegeben wart
0,11069	waz sol umberede mî
0,11070	sie tâten den tötten als êr
0,11071	sie wurden harte wole bestatet
0,11072	ûf dem velde unde in der stat
0,11073	Priamus von Ilion
0,11074	klagete daz Mennon
0,11075	der küninc dâ von Persiâ
0,11076	sînen lîp hette verloren dâ
0,11077	sie wâren trûric alle
0,11078	von des hêrren valle

- 0,11079 Parîs den rât vant  
 0,11080 daz man in vuorte in sîn lant  
 0,11081 unde begrüebe in nâch sîneme rehte  
 0,11082 under sîn geslehte  
 0,11083 sîne vriunde tâten  
 0,11084 als dâ was gerâten  
 0,11085 sie vuorten in zuo lande  
 0,11086 in pfellînen gewande  
 0,11087 mit wurzen bewunden  
 0,11088 sô sie beste kunden  
 0,11089 beide wurze unde gewant  
 0,11090 dô sie in brâhten in ire lant  
 0,11091 sîne vriunde in begiengen  
 0,11092 mit sôgetânen dingen  
 0,11093 als man vriunde tuon sol  
 0,11094 er wart begangen harte wole  
 0,11095 zuo Trôje in der gebiurede  
 0,11096 wart dô sô grôz tiurede  
 0,11097 unde sô grôz hungernôt  
 0,11098 daz man ein vile kleinez brôt  
 0,11099 koufete ump einen bîsant  
 0,11100 dicke man ez niht veil vant  
 0,11101 Palimedes dô geriet  
 0,11102 des en weiz ich niht  
 0,11103 op er ez durch guot tæte  
 0,11104 ez was doch sîn geræte  
 0,11105 daz Agomennon wart gesant  
 0,11106 úz in ein ander lant  
 0,11107 umbe vuoter unde umbe spîse  
 0,11108 Agomennon der wîse  
 0,11109 wider der rede niht en sprach  
 0,11110 daz sînes bruoders ungemach  
 0,11111 würde gerochen deste baz  
 0,11112 mit sîneme volke er ûf saz  
 0,11113 unde reit gein Thesidas  
 0,11114 dâ Theseus hêrre was  
 0,11115 daz was ein harte rîche lant  
 0,11116 Agomennon dâr inne vant  
 0,11117 unt mit im die sîne  
 0,11118 von korne unde von wîne  
 0,11119 als er gewünschet hæte  
 0,11120 man saget daz er bæte  
 0,11121 Theseum durch vriuntschaft  
 0,11122 daz er vore Trôje der ritterschaft  
 0,11123 mit spîse zuo staten stüende  
 0,11124 er klagete man en vûnde  
 0,11125 dâ korn noch wîn  
 0,11126 Theseus sprach "daz sol sîn

- 0,11127 ich tuon ez gerne durch dich"  
0,11128 Agomennon warnete sich  
0,11129 mit spîse eine mâze  
0,11130 unde huop sich an die strâze  
0,11131 zuo dem her er wider kârte  
0,11132 man vröuwete sich dâ harte  
0,11133 wande er was wider kumen  
0,11134 mit gevüere unde mit vrumen  
0,11135 als daz jâr dô ergienc  
0,11136 hêrre Priamus begienc  
0,11137 Hectoris jârzit  
0,11138 als ir vore berichtet sít  
0,11139 ûzwendic der stat  
0,11140 aldâ er begraben lac  
0,11141 dar quam sîn geslehte  
0,11142 zuo êren unde zuo rehte  
0,11143 den hêrren sie begiengen  
0,11144 mit sôgetânen dingn  
0,11145 der man in den gezîten pflac  
0,11146 ez was ein harte schoene tac  
0,11147 âne daz eine  
0,11148 daz sie alle gemeine  
0,11149 hetten riuwe unde klage  
0,11150 ez en wart nie tac dem tage  
0,11151 gelîch an der schoenheit  
0,11152 hêrre Achilles dar reit  
0,11153 die wîle der vride werte  
0,11154 des er dâ gerte  
0,11155 daz wart im unsanfte dâ  
0,11156 als ir wole gehoert her nâch  
0,11157 er quam dar durch schouwen  
0,11158 dô gesach er under den vrouwen  
0,11159 Priamis tohter Polixenam  
0,11160 die selbe maget im nam  
0,11161 daz bezziste daz er hâte  
0,11162 sterke unt stæte  
0,11163 im half mannes herze niht  
0,11164 sint er dâr ane geriet  
0,11165 daz in des dûhete  
0,11166 daz ire varwe lûhte  
0,11167 gelîche wole der sunnen  
0,11168 im was gar entrunnen  
0,11169 der tugende der er ie gewan  
0,11170 unz dar was er gewesen ein man  
0,11171 dô zuogienc im der manheit  
0,11172 er beleip in einer krancheit  
0,11173 durch Polixenen minne  
0,11174 ûzen unde innen

- 0,11175 was er aller verkârt  
 0,11176 er sprach "ouwê daz ich ie wart  
 0,11177 ich mac mich harte wole schamen  
 0,11178 daz mir durch eines wîbes namen  
 0,11179 mannes herze ist entgangen  
 0,11180 ich vürhte ich müeze den namen hân  
 0,11181 daz ich heize ein wîbetôre  
 0,11182 ez en gesach nie ouge noch ôre  
 0,11183 daz wunder nie gehörte  
 0,11184 joch en quam nie mit worte  
 0,11185 ûz mennischen munde  
 0,11186 waz mir an dirre stunde  
 0,11187 von minnen ist worden kunt  
 0,11188 mîn ôre mîn ouge mîn munt  
 0,11189 unde daz man üebet mit disen drîn  
 0,11190 daz ist drîvaltic sin  
 0,11191 sprechen hoeren unt sehen  
 0,11192 daz ist verloren des muoz ich jehen  
 0,11193 daz mîn munt nie gesprach  
 0,11194 noch mîn ouge nie gesach  
 0,11195 noch mîn ôre nie vernam  
 0,11196 unde in mînen muot nie quam  
 0,11197 daz ist in hônewîs mir kommen  
 0,11198 unde hât mir selber mich benomen  
 0,11199 unde eineme andern gegeben  
 0,11200 swie sêre ich dâr ane streben  
 0,11201 daz ich wider werde mîn  
 0,11202 sô muoz ich doch der vrouwen sîn  
 0,11203 die mîn decheine ahte hât  
 0,11204 an daz eine mîn würde rât  
 0,11205 daz iren bruoder hân erslagen  
 0,11206 deste mîr muoz ich nû vertragen  
 0,11207 des ich dô zuo küene was  
 0,11208 ouwê leider elas  
 0,11209 mir wäre alsô mære  
 0,11210 daz ich Narcissus wäre  
 0,11211 der harte schoene jungelinc  
 0,11212 der über einen brunnen gienc  
 0,11213 unde sîne schoene dâr inne sach  
 0,11214 unde wider in sprach  
 0,11215 er wânte ein wîp ersehen hân  
 0,11216 ûfe genâde unde ûfe wân  
 0,11217 ûf dem brunnen er lac  
 0,11218 einen sumerlangen tac  
 0,11219 unde vlêhete unde bat  
 0,11220 unz er an der selben stat  
 0,11221 von swære unde von leiden  
 0,11222 muoste verscheiden

- 0,11223 ich wolte êr haben den tôt  
 0,11224 denne an dem lîbe soliche nôt  
 0,11225 wär alle dise werlt an mich gewant  
 0,11226 unt liute unt lant  
 0,11227 die sterke von Samsone  
 0,11228 die schoene von Absolone  
 0,11229 unde Salomonis wîsheit  
 0,11230 unde dirre werlte rîchheit  
 0,11231 an silber unde an golde  
 0,11232 umbe minne ich ez geben wolte  
 0,11233 ich pflac zuo schuldigene die manne  
 0,11234 die sich daz gemach liezen an  
 0,11235 daz sie mit wîben gerne wâren  
 0,11236 solte ich biz zuo tûsent jären  
 0,11237 leben unde dannoch vort  
 0,11238 mich solten riuwen die wort  
 0,11239 daz ich sie ie gesprach  
 0,11240 sô gerne hette ich solich gemach  
 0,11241 ich wäre eineme wîbe sô undertân  
 0,11242 wolte sie mich dâ heime lân  
 0,11243 ich belibe zuo den zîten  
 0,11244 hieze sie mich ûz rîten  
 0,11245 ich wäre gereit unt rite  
 0,11246 ich volgete ir alles des mite  
 0,11247 swaz sie gebüte oder bæte  
 0,11248 swaz sie joch mit mir tæte  
 0,11249 daz wær mir allez liep  
 0,11250 wâ nû bote unde brief"  
 0,11251 dô rief er eineme knappen dare  
 0,11252 unt entbloezete im gare  
 0,11253 sîn leit unde sîne swære  
 0,11254 wie deme dinge wære  
 0,11255 er sprach "vernim daz ich dir sage  
 0,11256 mîne nôt unde mîn klage  
 0,11257 unde hilf mir dâr zuo stille  
 0,11258 iemer durch mînen willen  
 0,11259 ich muoz dir iemer wesen holt  
 0,11260 daz hâs dû harte wole verschult  
 0,11261 dû wære mir ie heimlich  
 0,11262 sô dir got nû sich  
 0,11263 wie ich mîne wîse ane gevâhe  
 0,11264 mir en werde Polixena  
 0,11265 dâ hoeret anders niht zuo  
 0,11266 wan daz ich mir den tôt tuo  
 0,11267 nû kêre hinewec balde  
 0,11268 daz ich den lîp behalte  
 0,11269 als liep als ich dir bin  
 0,11270 rît hin zuo Trôje in

- 0,11271 unde sage der küninginne  
 0,11272 der tohter ich dâ minne  
 0,11273 mînen dienest iemer mère  
 0,11274 ich klage ez harte sêre  
 0,11275 unde wil ez iemer mér klagen  
 0,11276 daz ich Hectorem hân erslagen  
 0,11277 des stên ich ir zuo buoze  
 0,11278 sie tuo mit mir die süeze  
 0,11279 zuo genâden unde zuo rehte  
 0,11280 als mit ireme knehte  
 0,11281 sie mac mich heizen op sie wil  
 0,11282 von der swarten unz an daz swil  
 0,11283 zuohouwen unde zuosnîden  
 0,11284 daz wil ich gerne lîden  
 0,11285 doch daz ich belîbe  
 0,11286 lange in diseme lîbe  
 0,11287 daz sol ir wesen harte guot  
 0,11288 op sie mîne bete tuot  
 0,11289 wil sie mir ire tohter geben  
 0,11290 sô wil ich dâr ane streben  
 0,11291 daz sie behalten ire lant  
 0,11292 sô hânt sie sie wole bewant  
 0,11293 ich vüere sie zuo lande  
 0,11294 unt ziere sie mit gewande  
 0,11295 mit golde unde mit gesteine  
 0,11296 ich gibe ir mîne gemeine  
 0,11297 unde allez daz ich ie gewan  
 0,11298 unde swaz ich geleisten kan  
 0,11299 unde wil sie haben zuo einer ê  
 0,11300 ich en weiz waz ir sagen mêt  
 0,11301 wirp ez sô dû beste kanst  
 0,11302 unde als dû mir quotes ganst  
 0,11303 unde op dû vore der muoter maht  
 0,11304 sô sage der tohter quote naht  
 0,11305 unde mînen dienest dâr mite  
 0,11306 unt lâz sie wizzen wes ich bite  
 0,11307 lîhte hilfet mîn bete"  
 0,11308 der bote leiste unde tete  
 0,11309 als er gebôt unde bat  
 0,11310 er reit hin in die stat  
 0,11311 ungeworben er niht en liez  
 0,11312 alles des in sîn hêrre hiez  
 0,11313 von worte zuo worte  
 0,11314 swaz dâr zuo gehôrte  
 0,11315 er warp sîne mære  
 0,11316 baz denne er wäre  
 0,11317 von hêrren Achillen gelârt  
 0,11318 als dâ geworben wart

- 0,11319 daz dâ zuo werbene geschach  
 0,11320 die küninginne Ecuba sprach  
 0,11321 "daz ir hier geworben hât  
 0,11322 des wil ich gerne suochen rât  
 0,11323 an mînem manne vürebaz  
 0,11324 ir wizzet selbe wole daz  
 0,11325 daz ez übel gezæme  
 0,11326 daz ich mich an næme  
 0,11327 ein solich dinc  
 0,11328 kêret hin wider jungelinc  
 0,11329 unde saget hêrren Achille  
 0,11330 daz mir sîn wille  
 0,11331 unde sîn bete wole behage  
 0,11332 an dem dritten tage  
 0,11333 kumet unde hoeret mîne wort  
 0,11334 unz danne hân ich erhôrt  
 0,11335 wes ich antwürten mac"  
 0,11336 alsô schiere im der tac  
 0,11337 von ir gegeben wart  
 0,11338 der knappe huop sich an die vart  
 0,11339 unde tet dit sîneme hêrren kunt  
 0,11340 dô Achilles die rede verstuont  
 0,11341 daz im tac was gegeben  
 0,11342 der zwîvel gienc im an daz leben  
 0,11343 die vorhte im underwîlen brâhte  
 0,11344 daz er im leide gedâhte  
 0,11345 als danne die hoffenunge nâch quam  
 0,11346 unt im die angst abe nam  
 0,11347 sô viel er wider in daz leit  
 0,11348 dise zwivalticheit  
 0,11349 wîsete in hin unde dare  
 0,11350 des wart der hêrre missevare  
 0,11351 vruo unt späte  
 0,11352 die zeichen er alle hæte  
 0,11353 an lîbe unde an swære  
 0,11354 die der minnære  
 0,11355 an sîner nôt zuo habene pflît  
 0,11356 zuohant bî der selben zît  
 0,11357 daz er qual an minne  
 0,11358 versuochete die küninginne  
 0,11359 Ecuba an Priamô  
 0,11360 op er des wäre vrô  
 0,11361 oder ez im leit wäre  
 0,11362 daz Achilles der gewære  
 0,11363 hette boten zuo ir gesant  
 0,11364 unde büte bürge unde lant  
 0,11365 unde silber mit dem golde  
 0,11366 op man im geben wolte

- |         |                                    |
|---------|------------------------------------|
| 0,11367 | sîne tohter Polixenam              |
| 0,11368 | Priamus des underquam              |
| 0,11369 | an alleme sîneme lîbe              |
| 0,11370 | er sprach zuo sîneme wîbe          |
| 0,11371 | “mîn vleisch unde mîn gebeine      |
| 0,11372 | werde zuo eineme steine            |
| 0,11373 | êr danne daz geschê                |
| 0,11374 | vrouwe en redet ez niht mî         |
| 0,11375 | alsô liep als ich iuch sî          |
| 0,11376 | wende hette er der rîchtuome drî   |
| 0,11377 | der er nû einen hât                |
| 0,11378 | ez geschæhe ân mînen rât           |
| 0,11379 | wen als ich bescheide              |
| 0,11380 | lazze ich von dem leide            |
| 0,11381 | daz er mir hât getân               |
| 0,11382 | sô wil ich gewisheit hân           |
| 0,11383 | daz er gemache                     |
| 0,11384 | ich en ruoche mit welicher sache   |
| 0,11385 | daz ich mit vride belîbe           |
| 0,11386 | ich gibe im zuo wîbe               |
| 0,11387 | mîne tohter an solich gedinge      |
| 0,11388 | daz er ez dâr zuo bringe           |
| 0,11389 | daz diz volc hinnen kère           |
| 0,11390 | verliese ich lant unde êre         |
| 0,11391 | sô verliese ich die tohter dâr zuo |
| 0,11392 | des ist bezzer daz ich tuo         |
| 0,11393 | mînes schaden ein teil             |
| 0,11394 | denne ich an ein unheil            |
| 0,11395 | valle zwirent alsô grôz            |
| 0,11396 | er en ist niht mîn genôz           |
| 0,11397 | noch mir gelîche geboren           |
| 0,11398 | êr mîn lant sî verloren            |
| 0,11399 | unt mîn êre zersliffen             |
| 0,11400 | sô ist bezzer daz ich griffe       |
| 0,11401 | an eine nider geburt”              |
| 0,11402 | die wîle Ecuba sîne wort           |
| 0,11403 | unde sînen willen vernam           |
| 0,11404 | hîrren Achillis bote quam          |
| 0,11405 | als er gebeten was                 |
| 0,11406 | unde als er ûf daz palas           |
| 0,11407 | dô zuo der vrouwen solte gân       |
| 0,11408 | sô vant er Polixenam stân          |
| 0,11409 | hövisch unde wolegetân             |
| 0,11410 | in des sales swibogen              |
| 0,11411 | er grüezete sie stille             |
| 0,11412 | unde sagete ir von Achille         |
| 0,11413 | holde minne unde allez guot        |
| 0,11414 | schoene prêsente unde einen huot   |

- 0,11415 daz ir sîn hêrre hette gesant  
 0,11416 gap er ir stille an ire hant  
 0,11417 der bote gienc vürebaz  
 0,11418 dâ vrouwe Ecuba saz  
 0,11419 harte wole sie in entvienc  
 0,11420 unde sagete im alle die dinc  
 0,11421 als ir vore vernomen hât  
 0,11422 ires mannes wort unde rât  
 0,11423 der bote im liebe gedâhte  
 0,11424 an sînen hêrren er brâhte  
 0,11425 den rât unde daz mære  
 0,11426 daz ez komen wäre  
 0,11427 als er ez ûf hette geleit  
 0,11428 "sie sint alle bereit  
 0,11429 zuo tuone iuwern willen  
 0,11430 op ir müget gestillen  
 0,11431 ire leit unde ire ungemach  
 0,11432 swaz in von iuch ie geschach  
 0,11433 des ist gar vergezzen  
 0,11434 ir hât iuch vermezzen  
 0,11435 ir wollet in vride gewinnen  
 0,11436 dâ werbet nâch mit sinnen  
 0,11437 mac in der vride werden  
 0,11438 sô geschach ûf diser erden  
 0,11439 iuwern vorevarn nie  
 0,11440 soliche êre als iuch hier  
 0,11441 ist erboten unde geschihet  
 0,11442 nû en sûmet iuch niht"  
 0,11443 "gerne" sprach Achilles  
 0,11444 "got der lône dir des  
 0,11445 dû hâst vile wole dâr zuo getân  
 0,11446 ich wil ouch niht dâr abe lân  
 0,11447 ich wolle halten dînen rât  
 0,11448 swie ez mir dâr umbe ergât"  
 0,11449 sîn herze begunde wanken  
 0,11450 von manicvalten danken  
 0,11451 waz er tuon wolte  
 0,11452 oder waz er tuon solte  
 0,11453 waz er tuon mohte  
 0,11454 waz im zuo tuone tohte  
 0,11455 wie er ez ane vienge  
 0,11456 mit wie getânen dingn  
 0,11457 er sîne nôt verwünde  
 0,11458 welichen rât er vünde  
 0,11459 daz sîn wille geschähe  
 0,11460 ez was an der næhe  
 0,11461 daz im zuo gienc die naht  
 0,11462 im was vile nâch der maht

- 0,11463 von gedanken zuogangen  
0,11464 in begunde sêre erlangen  
0,11465 daz ez quæme an den tac  
0,11466 die wîle er an dem bette lac  
0,11467 von minnen hette er soliche nôt  
0,11468 sîn herze briet unde sôt  
0,11469 als ez danne gerne tuot  
0,11470 sô des jungen mannes muot  
0,11471 zuo dem êrsten wirdet geleit  
0,11472 an ein unversuchte arbeit  
0,11473 Achilles lac in quâle  
0,11474 von mâle zuo mâle  
0,11475 von stunde zuo stunde  
0,11476 er mohte noch en kunde  
0,11477 des tages niht erbîten  
0,11478 er hieze bî naht rîten  
0,11479 die Kriechen er besante  
0,11480 eine stat er benante  
0,11481 dar die hêrren quæmen  
0,11482 unt sîne wort vernæmen  
0,11483 sie quâmen alle an die stat  
0,11484 dar sie der hêrre kumen bat  
0,11485 des morgenes vile vruo  
0,11486 Achilles ermannete dô  
0,11487 vile manlîche er sprach  
0,11488 daz im zuo sprechene geschach  
0,11489 "ir hêrren mich dunket guot  
0,11490 daz ir mînen rât tuot  
0,11491 wende ich wole râten tar  
0,11492 ez ist rehte daz sehste jâr  
0,11493 daz ir her kommen sít  
0,11494 dûhte es iuch des ist zít  
0,11495 daz wir hinnen kêren  
0,11496 daz wir hier lenger wâren  
0,11497 daz wâren unsinne  
0,11498 wir hân sie dort inne  
0,11499 sêre benoetet  
0,11500 unde iren houbetman ertoetet  
0,11501 unde manic wunder mit in gestalt  
0,11502 sô tuon wir in gewalt  
0,11503 nam hêrre París Elenam  
0,11504 alsô tet Thelamon Esionam  
0,11505 waz solten wir dâr umbe her  
0,11506 mit schilde unde mit sper  
0,11507 wir kêren heim zuo lande  
0,11508 Menelaus hât es schande  
0,11509 daz er ie her quam  
0,11510 umbe vrouwen Helenam

- 0,11511 die sîn zuo manne niht en wil  
 0,11512 dâ heime ist schoener vrouwen vîle  
 0,11513 die im baz gezæmen  
 0,11514 unde harte rehte bequæmen  
 0,11515 zuo sîneme rehte  
 0,11516 an guote unde an geslehte  
 0,11517 ich wil niht lenger belîben hier  
 0,11518 ez en solte sô manic helt nie  
 0,11519 unt sô manic küene degen  
 0,11520 ump ein niht hier sîn gelegen  
 0,11521 wir lâzen wîp unt kint  
 0,11522 die mit uns ein bluot sint  
 0,11523 dâ heime jâmerlîche  
 0,11524 unde varen in vremede rîche  
 0,11525 in unsern eigen tôt  
 0,11526 des geschihet von mir mîr dechein nôt"  
 0,11527 von Athêne der herzoge  
 0,11528 stiffe zuo eineme gezoge  
 0,11529 mit sôgetânen worten  
 0,11530 die zuo gezoge hörten  
 0,11531 unde mit grôzem unwillen  
 0,11532 sprach er zuo Achille  
 0,11533 "edel helt Achilles  
 0,11534 nû berichte mich des  
 0,11535 tuot ir ez durch jâmer daz ir klaget  
 0,11536 oder sît ir verzaget  
 0,11537 ir hât vîle übel getân  
 0,11538 ir soltet es niht geredet hân  
 0,11539 ich widerrede ez eine  
 0,11540 ich en weiz waz ez meine  
 0,11541 wäre iuch missegangen  
 0,11542 unde wæret ir joch gevangen  
 0,11543 an einer tôtvêhe  
 0,11544 op ich iuch gesæhe  
 0,11545 an solicher gebære  
 0,11546 ich wânte ez zageheit wäre"  
 0,11547 sie begunden aber zuo legen  
 0,11548 beide mit stichen unde mit slegen  
 0,11549 von dem gezelte unz an den graben  
 0,11550 alsus wart die nôt erhaben  
 0,11551 aldâ reit ein Krieche unde  
 0,11552 der zuo rosse wole kunde  
 0,11553 Resus was er genant  
 0,11554 Aresse hiez sîn lant  
 0,11555 der was von rîcher geburt  
 0,11556 der reit vore unt vort  
 0,11557 mit sîneme swerte albare  
 0,11558 Priamis sun nam sîn ware

- 0,11559 der Deiphebus hiez  
 0,11560 sîneme rosse er den zoun liez  
 0,11561 als er im gehangte  
 0,11562 gein Resô er sprangte  
 0,11563 unt spielt in mitten enzwei  
 0,11564 unde begreif daz ros unde schrei  
 0,11565 sîn zeichen lûte überal  
 0,11566 sîn stimme gein der stat schal  
 0,11567 in hörten schiere  
 0,11568 sîne vriunde die Trôiere  
 0,11569 sie ruorten ros unde pfert  
 0,11570 unt versuocheten ire swert  
 0,11571 mit solicher unmâze  
 0,11572 daz velt unde strâze  
 0,11573 von den Kriechen vol lac  
 0,11574 Palimedes erschrac  
 0,11575 der Kriechen rihtære  
 0,11576 unde Diomedes der gewære  
 0,11577 die liezen beide dâr zuo gân  
 0,11578 die Kriechen wæren entân  
 0,11579 beliben in den swæren  
 0,11580 op komen niht en wæren  
 0,11581 von Salemîne Thelamon  
 0,11582 unt Priamus sun  
 0,11583 Sysileus genant  
 0,11584 die quâmen zuosamene gerant  
 0,11585 sie versuocheten beide ire maht  
 0,11586 Thelamon den sige vaht  
 0,11587 an dem bastharte  
 0,11588 sîn bruoder zuo kârte  
 0,11589 Deiphebus der adelsun  
 0,11590 eine bestuont Thelamon  
 0,11591 dise hêrren zwêne  
 0,11592 Menesteus von Athêne  
 0,11593 der brâhte Thelamône  
 0,11594 helfe vile schône  
 0,11595 Menesteus ûf ein ros saz  
 0,11596 daz dâ decheinez baz  
 0,11597 an sprunge unde an gelâze  
 0,11598 hette bezzer mâze  
 0,11599 des warf er ez dar unde her  
 0,11600 mit dem schilde unde mit dem sper  
 0,11601 unde mit deme swerte  
 0,11602 geschuof er des er gerte  
 0,11603 beide zuo stiche unde zuo slage  
 0,11604 dâ vlôch der helt unde der zage  
 0,11605 swâ der hêrre zuo reit  
 0,11606 Troilus der helt gemeit

- 0,11607 unde der hêrre Eneas  
 0,11608 unde der küninc Polidamas  
 0,11609 die riten im engeine  
 0,11610 den widerstuont er eine  
 0,11611 zuo ranten die sîne  
 0,11612 die von Salemîne  
 0,11613 Deiphebus dô benoetet wart  
 0,11614 ir was sô vile zuo gekârt  
 0,11615 daz er sich niht mohte entsagen  
 0,11616 im würde dâ sîn ros erslagen  
 0,11617 iedoch er ûf daz ros quam  
 0,11618 daz er Resô dâ nam  
 0,11619 als ir vore vernomen hât  
 0,11620 doch getet er es guoten rât  
 0,11621 er satzete sich zuo gewere  
 0,11622 daz er under dem here  
 0,11623 mit sînes eines hant  
 0,11624 manigen valte ûf den sant  
 0,11625 beide tôt unde gewundet  
 0,11626 Palimedes in bestuont  
 0,11627 der Kriechen rihtære  
 0,11628 daz was im harte swære  
 0,11629 daz er in torste bestân  
 0,11630 unde liez hin gein im gân  
 0,11631 unde sluoc im einen solichen slac  
 0,11632 daz im sîn helm aller erschrac  
 0,11633 der küene Palimedes  
 0,11634 der erholete sich des  
 0,11635 er treip ûf in sînen schaft  
 0,11636 mit vile sterclîcher kraft  
 0,11637 hie im ûz bî der hant  
 0,11638 der stich im kûme widerwant  
 0,11639 er mohte des stiches niht genesen  
 0,11640 êr was dâ nôt gewesen  
 0,11641 nû wart dâ alsô grôz strît  
 0,11642 daz des volkes in beider sît  
 0,11643 alsô vile dâr nider lac  
 0,11644 unz biz an den tac  
 0,11645 wart dâ nie grôzer nôt  
 0,11646 alsô vile lac ir tôt  
 0,11647 Parîs den sînen begreif  
 0,11648 dô er ûf die erden sleif  
 0,11649 als dô er solte vallen  
 0,11650 er nam in in allen  
 0,11651 als er in hette berattt  
 0,11652 dô vuorte er in gein der stat  
 0,11653 er en wiste op er genas  
 0,11654 vile harte leide im was

- 0,11655 wende er zwîvel hæte  
 0,11656 waz er im tæte  
 0,11657 iedoch er niht en beite  
 0,11658 ûf Deiphebum er sich leite  
 0,11659 unde schriete vile harte  
 0,11660 zuo dem munde er im warte  
 0,11661 unde besach sîne wunden  
 0,11662 bî den selben stunden  
 0,11663 Deiphebus in entsuop  
 0,11664 sîne ougen er ûf huop  
 0,11665 jâmerliche er in ane sach  
 0,11666 mit halben worten er sprach  
 0,11667 "Parîs bruoder lieber man  
 0,11668 ich en mac noch en kan  
 0,11669 des lîbes lenger haben vryst  
 0,11670 op dir mîn sôle liep ist  
 0,11671 sô kêre zuo strîte  
 0,11672 unt rich mich bezîte  
 0,11673 an im der mich gewunt hât  
 0,11674 mîn wirdet deste bezzer rât  
 0,11675 unde lâ dir leit mîne klage"  
 0,11676 "ich erlige hiute an diseme tage  
 0,11677 unde lige bî dir tôt nider"  
 0,11678 sprach Parîs zuo im wider  
 0,11679 "oder ich gereche mîn leit  
 0,11680 eiâ nû unsälichkeit  
 0,11681 wie ist uns nû sus geschêen  
 0,11682 wil unser got niht sehen  
 0,11683 waz haben wir wider got getân  
 0,11684 daz wir gelückes niht en hân  
 0,11685 nû walte es got op ich gesige  
 0,11686 oder tôt hier belige  
 0,11687 got wolle daz ez wole ergê  
 0,11688 ich wil mit Palimedê  
 0,11689 noch hiute zuo ringe  
 0,11690 swie mir dâ gelinge"  
 0,11691 er nam kocher unt bogen  
 0,11692 mit zorne unde mit unhogen  
 0,11693 saz er ûf unde reit  
 0,11694 zuo kreize harte wole bereit  
 0,11695 als er quam under des  
 0,11696 hette Palimedes  
 0,11697 sîner harte vile gevalt  
 0,11698 Parîs der helt balt  
 0,11699 spien sînen bogen unde schôz  
 0,11700 durch man durch schilt durch nôz  
 0,11701 dâ der man ûfe saz  
 0,11702 Sarpedon der gesach daz

- 0,11703 unde reit mit im in den strît  
 0,11704 sie hetten es beide grôzen nît  
 0,11705 unde begunden ez vile hôh wegen  
 0,11706 daz Palimedes der degen  
 0,11707 der Kriechen rihtære  
 0,11708 solich lewe worden wäre  
 0,11709 wande er vreislîche  
 0,11710 eineme lewen gelîche  
 0,11711 sîn leit gienc anden  
 0,11712 swaz im quam zuo handen  
 0,11713 daz was allez verloren  
 0,11714 Sarpedone was die rede zorn  
 0,11715 unde quam ûf in gerant  
 0,11716 des liez er dâ daz bezziste pfant  
 0,11717 daz er geleisten kunde  
 0,11718 im wart ein solich wunde  
 0,11719 êr er ie slac geslüege wider  
 0,11720 sô lac er tôt dâr nider  
 0,11721 Parîs aller erschrac  
 0,11722 dô Sarpedon tôt lac  
 0,11723 unde sîn bruoder was erslagen  
 0,11724 wolte er daz hân vertragen  
 0,11725 unde von dannen wîchen  
 0,11726 sô mochte er gelîchen  
 0,11727 dem boeseksten der ie zuo rosse quam  
 0,11728 sîn ros er mit den sporen nam  
 0,11729 unde quam ûf in geraht  
 0,11730 sîn ros was verdaht  
 0,11731 mit einer kovertiure  
 0,11732 gelîch eineme viure  
 0,11733 schein der rôte zindât  
 0,11734 ûf sîner sarewât  
 0,11735 unde an dem schilde daz golt  
 0,11736 Parîs reit mit ungedult  
 0,11737 mit eineme hûrnînen bogen  
 0,11738 quam er ûf in gevlogen  
 0,11739 êr sîn jener würde geware  
 0,11740 sô hette er geschozzen dare  
 0,11741 tûsent pfile after ein  
 0,11742 in den vuoz unde in daz bein  
 0,11743 in den den arm unde in die hant  
 0,11744 swâ sîn pfil state vant  
 0,11745 ez wäre dâ oder hier  
 0,11746 dâ gelouc im sîn râm nie  
 0,11747 manigen pfil er in in schôz  
 0,11748 daz bluot sô sêre nider gôz  
 0,11749 wär er von zehen lîben  
 0,11750 er muoste tôt belîben

- 0,11751 ez ist iuch allen wole kunt  
0,11752 sô im des bluotes entstuont  
0,11753 sô mohte er genesen niht  
0,11754 des viel er nider unde verschiet  
0,11755 der küene Palimedes  
0,11756 dô schrei Diomedes  
0,11757 Menelaus unde Agomennon  
0,11758 Ulixes unt Thelamon  
0,11759 Ajax unt Thoas  
0,11760 unde swaz der Kriechen dâ was  
0,11761 die rantan zuo alle  
0,11762 ire viânde mit schalle  
0,11763 riten in engeine  
0,11764 mit starchandigen zeinen  
0,11765 harte vrô vile gemeit  
0,11766 gein den Kriechen dô reit  
0,11767 der vile schoene Parîs  
0,11768 wende er êre unde prîs  
0,11769 an dem hêrren hette bejaget  
0,11770 des quâmen die sînen zuo gejaget  
0,11771 ûf ire viânde geriten  
0,11772 der zît wart dâ mî gestritten  
0,11773 denne in allen den jâren  
0,11774 sint sie dar kommen wâren  
0,11775 den Kriechen entstuont ein übel tac  
0,11776 daz ire rihtær tôt lac  
0,11777 des was in missegangen  
0,11778 ir wart dâ vile gevangen  
0,11779 beide erslagen unde ertrat  
0,11780 die von Trôje ûz der stat  
0,11781 gewunnen die obern hant  
0,11782 die Kriechen wichen zuohant  
0,11783 unde die Trôjier in nâch  
0,11784 die dâ vluhen den was gâch  
0,11785 über daz gevilde  
0,11786 hin zuo dem gezelte  
0,11787 dâ wurden sie inne  
0,11788 bestanden mit unminne  
0,11789 ez gienc dâ an ein vehten  
0,11790 mit hêrren unde mit knehten  
0,11791 unde mit den sarjanden  
0,11792 in die herberge sie in ranten  
0,11793 daz sie dâr inne vunden  
0,11794 oder vinden kunden  
0,11795 daz was allez verloren  
0,11796 wîn vleisch unde korn  
0,11797 silber golt unde gewant  
0,11798 unde swaz man joch dâr inne vant

- 0,11799 von schatze oder von spîse  
0,11800 dâ volgete Parîse  
0,11801 ein vile kreftigez here  
0,11802 er kârte hin zuo dem mere  
0,11803 zuo den schiffen sie ranten  
0,11804 mit gewalt sie sie verbrant  
0,11805 al bî dem stade  
0,11806 dâ wäre in geschehen grôz schade  
0,11807 die schif wären in alle verbrant  
0,11808 wan daz dâr zuo quam gerant  
0,11809 Ajax von Salemîne  
0,11810 unde die gesellen sîne  
0,11811 Ajax rief die Kriechen an  
0,11812 "ich en gesach nie sô manigen man  
0,11813 unde sô manigen ritter erwelt  
0,11814 sô manigen ûzerkoren helt  
0,11815 in sô grôzer schumpfentiure  
0,11816 wert helde dem viure  
0,11817 daz uns die schif belîben  
0,11818 wir mügen niht beklîben  
0,11819 op wir sie verliesen  
0,11820 sulen wir den tôt kiesen  
0,11821 sô ist ez alsô wâhe  
0,11822 hier in grôzer næhe  
0,11823 als langer gespart  
0,11824 swelich ritter des gert  
0,11825 daz er guot wort habe  
0,11826 der volge mir an die habe  
0,11827 ich wil noch die schif genern  
0,11828 wollet ir mir sie helfen wern"  
0,11829 êr er gespræche daz wort  
0,11830 sô quam er ûf sie gehurt  
0,11831 ouch wart er bestanden  
0,11832 mit heldes handen  
0,11833 ouch satzten sie sich zuo were  
0,11834 daz er ûf dem mere  
0,11835 der schiffe vile generte  
0,11836 dâ wart der strît sô herte  
0,11837 daz daz mer unde sîn vluot  
0,11838 niht en was denne bluot  
0,11839 mî danne einer mîle breit  
0,11840 der hêrre manlîchen streit  
0,11841 unde hielt sich in hart  
0,11842 unz im ein rûm wart  
0,11843 hin zuo den schiffen  
0,11844 dâ wären sie besliffen  
0,11845 wan daz er aleine  
0,11846 sie trôste alle gemeine

- 0,11847 denne daz Ajax der degen  
 0,11848 sie wären alle tôt gelegen  
 0,11849 in dem ellende  
 0,11850 von ende zuo ende  
 0,11851 die schif er wole bewarte  
 0,11852 swâ er hine kârte  
 0,11853 dâ tet er schaden über schaden  
 0,11854 sie wâren beidersît erladen  
 0,11855 mit vile grôzen leiden  
 0,11856 êr sie begunden scheiden  
 0,11857 Ajax begienc vile grôzen prîs  
 0,11858 noch grôzern bezalte Parîs  
 0,11859 als ich geschriven vunden hân  
 0,11860 die Kriechen wurden sô entân  
 0,11861 daz sie en wisten ware  
 0,11862 sie wurden des wole geware  
 0,11863 wär Achilles dâ gewesen  
 0,11864 ir wäre tûsent dâ genesen  
 0,11865 der nie dechein genas  
 0,11866 wende er dâ niht en was  
 0,11867 Achilles unde sîne diet  
 0,11868 quâmen des tages ûz niht  
 0,11869 in den strît noch ûf daz velt  
 0,11870 er hette och sîn gezelt  
 0,11871 vore dem roube wole behuot  
 0,11872 dâ en was kein ritter sô guot  
 0,11873 der zuo sîneme gezelte quæme  
 0,11874 oder iht dâ næme  
 0,11875 Parîs wunder dâ begienc  
 0,11876 er sluoc unt vienc  
 0,11877 swaz er bereit oder vant  
 0,11878 des küninges sun von Trâcenlande  
 0,11879 ein Krieche harte wolegeboren  
 0,11880 hette den arm dâ verloren  
 0,11881 gewundet von maniger wunden  
 0,11882 der bat sich zuo den stunden  
 0,11883 brengen dâ Achilles was  
 0,11884 er sprach "wie übel dû getân hâs  
 0,11885 an diseme tage hiute  
 0,11886 och hân dîne liute  
 0,11887 an uns untriuwe getân  
 0,11888 ich en kan des niht gelân  
 0,11889 ich en sage dir wârheit  
 0,11890 dû hâst dîne kuonheit  
 0,11891 zuo einen boesen ende brâht  
 0,11892 dir ist übel gedâht  
 0,11893 daz wilt dû vollenbringen  
 0,11894 übel müeze dir gelingen

- 0,11895 nû dû in disen landen  
 0,11896 wirbes unse schande"  
 0,11897 als er sprechen solte vort  
 0,11898 dô zuogiengen im die wort  
 0,11899 mitten in dem munde  
 0,11900 im nähete die stunde  
 0,11901 die mit dem tôde dar quam  
 0,11902 unde im die sprâche benam  
 0,11903 des gesweic der von Trâce  
 0,11904 dô quâmen von Ajâze  
 0,11905 die boten gerant  
 0,11906 sie hette ire hêrre dar gesant  
 0,11907 unde hiez mit vlêhen unde mit siten  
 0,11908 harte guotlîchen biten  
 0,11909 den küenen Achillen  
 0,11910 daz er durch sînen willen  
 0,11911 wolte kommen in den strît  
 0,11912 "Ajax hette übel zît  
 0,11913 unde suochet triuwe an dich  
 0,11914 edel ritter nû sich  
 0,11915 op dû im zuo helfe kommen wilt  
 0,11916 im ist zuohouwen sîn schilt  
 0,11917 unde alle sîne sarewât  
 0,11918 sîn swert er an den knouf hât  
 0,11919 aller zuobrochen unde zuoslagen  
 0,11920 unde heizet dir sîne nôt klagen  
 0,11921 wir sîn alle entân  
 0,11922 dû wollest ez dich erbarmen lân  
 0,11923 wir kumen niemer in unse lant  
 0,11924 uns sint die schif gar verbrant  
 0,11925 dû en wollest denne eine dâr zuo sehen  
 0,11926 uns en kan gelückes niht geschehen"  
 0,11927 swie sie getæten  
 0,11928 oder swie vile sie gebæten  
 0,11929 swie sie geliezen  
 0,11930 swaz sie im gehiezen  
 0,11931 daz was allez ein wint  
 0,11932 er saz rehte als ein kint  
 0,11933 daz er nie dar gesach  
 0,11934 noch ein wort nie gesprach  
 0,11935 die Kriechen wären gar erlegen  
 0,11936 wan daz Ajax der degen  
 0,11937 in behielt ire maht  
 0,11938 ouch half in die naht  
 0,11939 die die von Trôje in treip  
 0,11940 daz in der schiffe ein teil beleip  
 0,11941 die naht treip sie dannen  
 0,11942 Parîs mit sînen mannen

- 0,11943 zuo herbergen kârte  
 0,11944 bî der stat er warte  
 0,11945 waz sîn bruoder tâte  
 0,11946 op er den lîp hæte  
 0,11947 dô vant er in als er in liez  
 0,11948 Deiphebus bat unde hiez  
 0,11949 daz er würde bestatet  
 0,11950 rehte an die selben stat  
 0,11951 dâ sîn bruoder lac Hector  
 0,11952 Parîs als dâ vore  
 0,11953 weinte unde schrîete  
 0,11954 bî der selben zîte  
 0,11955 zôch er im ûz den schaft  
 0,11956 dô zuogienc im der kraft  
 0,11957 als im der schaft ûz quam  
 0,11958 Deiphebus sîn ende nam  
 0,11959 sie vuorten in zuo der stat in  
 0,11960 Priamus quam engein in  
 0,11961 unde sîn muoter Ecubâ  
 0,11962 grôz geschreie wart dâ  
 0,11963 Ecuba unt Priamus  
 0,11964 beide klageten si sus  
 0,11965 "wie solten wir verwinden  
 0,11966 daz leit von unsen kinden  
 0,11967 daz uns alle zít geschihet  
 0,11968 hetten wir anders leides niht  
 0,11969 wir muosten doch von swerden  
 0,11970 zuo leide wole werden"  
 0,11971 sie begunden och dâr mite klagen  
 0,11972 daz Sarpedon was erslagen  
 0,11973 wunderlichen sêre  
 0,11974 waz wollet ir mère  
 0,11975 sie wurden wole zuo rehte  
 0,11976 geklaget von ireme geslehte  
 0,11977 rehte ump die selben zît  
 0,11978 klageten die Kriechen andersît  
 0,11979 daz in zuo klagen geschach  
 0,11980 daz was ein michel ungemach  
 0,11981 sie hetten dechein gewisheit  
 0,11982 daz was ein ander leit  
 0,11983 sie hetten rihtärs niht  
 0,11984 von Pirô Nestor dô riet  
 0,11985 den Kriechen einen guoten rât  
 0,11986 er sprach "swelich man herze hât  
 0,11987 der gedenke dâr an  
 0,11988 wie er sule wesen man  
 0,11989 als ich iuch bescheiden  
 0,11990 in sorgen unde in leiden

0,11991 sol man den küenen man ersehen  
0,11992 ist uns hiute misseschehen  
0,11993 uns geschihet morgene líhte baz  
0,11994 von dem sô ráte ich daz  
0,11995 gehabet iuch zuo iuwer manheit  
0,11996 zuo den êren gehoert arbeit  
0,11997 wollen wir êre bejagen  
0,11998 sô müezen wir arbeit tragen  
0,11999 unser rihtær ist tôt  
0,12000 nû ist uns nihtes sô nôt  
0,12001 als daz man einen andern neme  
0,12002 der uns zuo rihtær gezeme  
0,12003 unde wer gezæme baz dâr zuo  
0,12004 beide spâte unde vruo  
0,12005 denne hîrre Agomennon  
0,12006 wir sîn sîn wole gewon  
0,12007 unde erkennen sîne site  
0,12008 er ist biz her gewesen dâr mite  
0,12009 mit vile grôzen triuwen  
0,12010 erkiesen wir einen niuwen  
0,12011 des wir künde niht en hân  
0,12012 uns mac líhte missegân"  
0,12013 unde als sîne wort wâren gelegen  
0,12014 dô lobeten sie den degen  
0,12015 er hette wole gerâten  
0,12016 sînen rât sie tâten  
0,12017 Agomennon der helt  
0,12018 wart anderwerbe erwelt  
0,12019 mit grôzern êren denne dâ vore  
0,12020 daz geriet der alte Nestor  
0,12021 an dem andern tage vruo  
0,12022 griffen sie aber dâ zuo  
0,12023 an dem dritten alsam  
0,12024 der vierde mit strîte zuo ende quam  
0,12025 an dem vünften dâr nâch  
0,12026 geschach och alsam dâ  
0,12027 an dem sehsten och dâ geschach  
0,12028 leit unt ungemach  
0,12029 beide zuo stiche unde zuo slage  
0,12030 hetten sie die siben tage  
0,12031 binnien der wochen  
0,12032 wurden alle die gerochen  
0,12033 die bî sehs jâren  
0,12034 unz dar geslagen wâren  
0,12035 daz velt daz lac tötten vol  
0,12036 sie bedorften quotes vrides wole  
0,12037 sie begonden nâch dem vride streben  
0,12038 der wart zuo sehs mänden gegeben

- 0,12039 waz sol der rede mère  
0,12040 der Kriechen rihtære  
0,12041 der küene Polidames  
0,12042 genôz in dem tôde des  
0,12043 daz er lebende was ein degen  
0,12044 sîn wart an dem tôde wole gepflegen  
0,12045 man legete sîn vleisch unde sîn gebein  
0,12046 in einen edeln mermelstein  
0,12047 dâ stuont ûfe geschriben  
0,12048 wie er in strîte was beliben  
0,12049 an dem steine man och las  
0,12050 weliches geslehtes er was  
0,12051 geschriben man och dâ vant  
0,12052 sîne bürge unde sîne lant  
0,12053 Deiphebus unde Sarpedon  
0,12054 wurden in der burc zuo Ilion  
0,12055 mit vlîze begangen  
0,12056 dô daz was ergangen  
0,12057 sie schuofen beidersît ire gemach  
0,12058 daz in zuo tuone geschach  
0,12059 die Kriechen in rede hæten  
0,12060 mit wie getânen ræten  
0,12061 sie gerieten oder gedæhten  
0,12062 daz sie Achillen bræhten  
0,12063 zuo schilde unde zuo swerte  
0,12064 daz volc sîn sêre gerte  
0,12065 daz en was wunders niet  
0,12066 wende man in mîr entriet  
0,12067 denne der andern dechein  
0,12068 Agomennon wart in ein  
0,12069 daz man an in versuochete  
0,12070 wes er geruochete  
0,12071 waz man im tuon solte  
0,12072 zuo liebe unde waz er wolte  
0,12073 daz versuocheten zehant  
0,12074 die dâ wurden zuo im gesant  
0,12075 ûf dem velde  
0,12076 in sîneme gezelte  
0,12077 Achillen sie vunden  
0,12078 er gebârte in den stunden  
0,12079 als er hette den zanswern  
0,12080 er en wiste wes er solte gern  
0,12081 oder wes er geren mohte  
0,12082 die minne in sô druhte  
0,12083 unde hette in sô sêre gedruht  
0,12084 læge er an einer suht  
0,12085 im wär vile baz gewesen  
0,12086 er en mohte niet genesen

- 0,12087 wen daz er des genas  
 0,12088 daz im sîn herze starc was  
 0,12089 unde alsô veste unde alsô starc  
 0,12090 daz nie sô vestes niet en wart  
 0,12091 ump daz er alsô leidic saz  
 0,12092 iedoch er niet vergaz  
 0,12093 gegen den hêrren er gienc  
 0,12094 harte wole er sie entvienc  
 0,12095 er sprach "ist hier iht des ich hân  
 0,12096 dâ sulet ir über gebieten lân  
 0,12097 unde gebieten selbe zuo mir"  
 0,12098 sie sprâchen "got lône dir"  
 0,12099 sie viere giengen rûnen  
 0,12100 in den Pavelûnen  
 0,12101 Ulixes der wîse man  
 0,12102 der was der es began  
 0,12103 er sprach "wir sîn zuo dir geriten  
 0,12104 des wir dich sulen biten  
 0,12105 mügen wir des gezwîdet sîn  
 0,12106 sô wirdet des vile wole schîn  
 0,12107 daz dû guot vriunt bist  
 0,12108 daz dir zuo muote nû niet en ist  
 0,12109 als dir wîlen was gewon  
 0,12110 daz klaget Agomennon  
 0,12111 unt ander unse vürsten  
 0,12112 wir solten op wir torsten  
 0,12113 dir râten dîne êre  
 0,12114 der hâst dû noch mère  
 0,12115 denne die andern alle  
 0,12116 dîn êre löufet mit schalle  
 0,12117 dû hâst harte guoten prîs  
 0,12118 unde bist des doch niet wîs  
 0,12119 sint dû daz bezzer teil hâs  
 0,12120 daz dû sô gerne dâr abe lâs  
 0,12121 al bist dû starc dû bist ein kint  
 0,12122 op dir dîne êre liep sint  
 0,12123 grîf zuo unde beherte  
 0,12124 unde wirt unser geverte  
 0,12125 dir en stêt niht wole daz  
 0,12126 daz dû durch einen kranken haz  
 0,12127 dînes swertes hâs verzigen  
 0,12128 solt dû nû stille ligen  
 0,12129 durch eine soliche vêhe  
 0,12130 sô ist ez alsô wæhe  
 0,12131 daz ich dir sage mînen muot  
 0,12132 als vriunt vriunde tuot  
 0,12133 als ich ez dir lenger hele  
 0,12134 die êre zuovert als daz mele

- 0,12135 unde zuostiubet als ein melm  
 0,12136 dû en nemes aber dînen helm  
 0,12137 dînen schilt unde dîn swert  
 0,12138 ez en ist der rede niht wert  
 0,12139 daz dû zürnes wider die  
 0,12140 die dir dîn êre rieten ie"  
 0,12141 Achilles dô antwurte  
 0,12142 "ez en quæme niht mîner gebürte  
 0,12143 unde och mîner stæticheit  
 0,12144 unde och mîner manheit  
 0,12145 daz durch iuwer vlêhe  
 0,12146 iht des geschehe  
 0,12147 daz mir laster wäre  
 0,12148 ir sít sô gewære  
 0,12149 unde sô biderbe unde sô wîs  
 0,12150 ir râtent mir des decheine wîs  
 0,12151 daz ich daz ane gê  
 0,12152 daz mir niht wole stê  
 0,12153 ez wäre wider mînen êren  
 0,12154 solte ich zuo strîte kêren  
 0,12155 sint daz mîn bete unde mîn rât  
 0,12156 niht vervæhet noch verstât  
 0,12157 noch dechein guot ende  
 0,12158 ich was in ellende  
 0,12159 durch iuwer êre her komen  
 0,12160 nû en wollet ir mir des niht gevromen  
 0,12161 des ich gebeten hæte  
 0,12162 op ich iuwer bete tæte  
 0,12163 daz wäre al der liute spot  
 0,12164 ich tuon es niht sam mir got  
 0,12165 ich rede ez niewan dâ bî  
 0,12166 ich wæne es wole ump iuch drî  
 0,12167 daz iuch mîn líp liep ist  
 0,12168 nû gebet mir eine vrïst  
 0,12169 unz ich mich versinne  
 0,12170 wes ich beginne"  
 0,12171 der alte Nestor sprach dâr zuo  
 0,12172 "nû hoere Achilles waz dû tuo  
 0,12173 lâ varen dînen zorn  
 0,12174 wir sîn alle verloren  
 0,12175 wilt dû uns geswîchen  
 0,12176 armen unde rîchen  
 0,12177 uns geschiet dechein êre  
 0,12178 versinne dich unde kêre  
 0,12179 zuo den mit den dû salt wesen  
 0,12180 unser wären tûsent genesen  
 0,12181 op dû bî der zîte  
 0,12182 wærts in dem strîte

- 0,12183 dô uns Parîs übergienc  
 0,12184 unde unser volc uns abe vienc  
 0,12185 unde uns manigen ersluoc"  
 0,12186 Achilles sprach "der rede ist genuoc  
 0,12187 des ich nû gesprochen hân  
 0,12188 des wil ich niht abe stân  
 0,12189 swaz mir joch geschiet  
 0,12190 sô wandele ich mîne wort niet"  
 0,12191 dô er gesprach under des  
 0,12192 sprach ouch Diomedes  
 0,12193 "waz sulen wir vlêhen disen man  
 0,12194 er en weiz noch en kan  
 0,12195 noch daz übel noch daz guot  
 0,12196 hettet ir mînen muot  
 0,12197 ir liezet die rede gare  
 0,12198 er ist bleich unde missevare  
 0,12199 unde vile übel getân  
 0,12200 wie wole ich ez ersehen hân  
 0,12201 an ougen unde an wangen  
 0,12202 der hêrre ist gevangen  
 0,12203 unde gar verzaget  
 0,12204 ump ein wîp oder ump ein maget  
 0,12205 wir biten in niet mère  
 0,12206 op ez Achilles wäre  
 0,12207 wænet ir niht er tæte  
 0,12208 wes in der boeseste bæte  
 0,12209 der ie zuo Kriechen wart geboren  
 0,12210 ez ist mir ûzer mâzen zorn  
 0,12211 daz wir unbescheiden  
 0,12212 hinnen sulen scheiden"  
 0,12213 dô zurnte hêrre Achilles  
 0,12214 unde stiurte sich under des  
 0,12215 daz er niht übeles sprach  
 0,12216 wizzet ir iht wie daz geschach  
 0,12217 er wolte gewis sîn des  
 0,12218 daz hêrre Palimedes  
 0,12219 sîn gewerf hette vernomen  
 0,12220 des was er sêre underkommen  
 0,12221 leide er im gedâhte  
 0,12222 sîn zorn in doch brâhte  
 0,12223 ein teil ûz der vart  
 0,12224 daz er übel sprechende wart  
 0,12225 er sprach "hêrre Diomedes  
 0,12226 wizzet ir iht des  
 0,12227 swie küene sô ir sît  
 0,12228 nû versûmet ir iuch niht in zît  
 0,12229 sô solet ir kêren hinnen  
 0,12230 mit grôzen unminnen

- 0,12231 mit zorne unde mit leiden  
0,12232 sulet ir hinne scheiden  
0,12233 sie wären komen zuo gezoge  
0,12234 wen daz ire unhoge  
0,12235 wart ûf gehalten  
0,12236 von Nestor dem alten  
0,12237 unde von Ulixe dem wîsen manne”  
0,12238 doch schieden sie an ende danne  
0,12239 dô sie wider quâmen  
0,12240 unde die Kriechen vernâmen  
0,12241 Achilles rede unde sîne wort  
0,12242 beide vore unde vort  
0,12243 wart daz mære gebreit  
0,12244 ez was in allen samet leit  
0,12245 sie klageten ez harte sêre  
0,12246 doch sprach ire rihtære  
0,12247 “wir haben Achillen  
0,12248 wir mügen unsern willen  
0,12249 mit decheinen dingen  
0,12250 niemer vollenbringen  
0,12251 sîne wort sint sô veste  
0,12252 mich dunket daz daz bezziste  
0,12253 daz man sînen willen tuo  
0,12254 ez ist uns alsô wæhe vruo  
0,12255 daz man hinnen rîte  
0,12256 als man langer bîte”  
0,12257 sîn bruoder Menelaus  
0,12258 der antwurte der rede alsus  
0,12259 “wære Achilles nie geboren  
0,12260 hier ist sô manic ûzerkoren  
0,12261 helet von unsen landen  
0,12262 wir haben es schande  
0,12263 daz wir hinnen kérten  
0,12264 unde einen des gewerten  
0,12265 daz tûsent zuo laster quæme  
0,12266 Achilli wole gezæme  
0,12267 daz im unser êre  
0,12268 sô leit niht en wäre  
0,12269 solten wir nû kêren wider  
0,12270 nû lít Hector dâr nider  
0,12271 der uns daz leit allez tete  
0,12272 solte Achilles bete  
0,12273 mê danne mîne vüre gân  
0,12274 daz wäre übel getân”  
0,12275 “wâ bî dunket iuch des”  
0,12276 sprach hîrre Ulixes  
0,12277 “ir sît uns liep beide  
0,12278 doch ist dâr underscheide

- 0,12279 under iuch unde ime grôz  
 0,12280 nû wîset wâ ist sîn genôz  
 0,12281 von wem ist uns die êre geschênen  
 0,12282 oder wen hât man gesehen  
 0,12283 alsô dicke zuo kreize  
 0,12284 mit bluote unde mit sweize  
 0,12285 berunnen unde begozzen  
 0,12286 unde gewundet von den schozzen  
 0,12287 mit swerten gehouwen  
 0,12288 durch Helenam die vrouwen  
 0,12289 unde durch Parîsen  
 0,12290 solen wir in verwîsen  
 0,12291 unde von uns schalten  
 0,12292 der uns hât behalten  
 0,12293 wen sîn eines lîp  
 0,12294 weder kint noch wîp  
 0,12295 gesæhen unser niemer dechein  
 0,12296 als an dem tage wole schein  
 0,12297 dô er zuo velde niht reit  
 0,12298 daz was daz grôzeste leit  
 0,12299 unde daz grôzeste ungemach  
 0,12300 daz uns hier ie geschach"  
 0,12301 Diomedes sprach sîne wort  
 0,12302 "als ir hêrren hât gehôrt  
 0,12303 waz Ulixes geredet hât  
 0,12304 daz ist ouch mîn rât  
 0,12305 daz man grîfe dâr zuo  
 0,12306 unde Achillen sînen willen tuo  
 0,12307 wir wollen kêren hinnen  
 0,12308 im zuo liebe unde zuo minnen  
 0,12309 nû er es niht wil entbern  
 0,12310 sô sulen wir in des gewern  
 0,12311 wende sôgetâne sache  
 0,12312 kumet uns zuo gemache  
 0,12313 des en sol decheine widerrede sîn  
 0,12314 dirre rât der ist mîn  
 0,12315 sehet wie er iuch gevalle"  
 0,12316 sie sprâchen wole alle  
 0,12317 unde als sie varen wolten  
 0,12318 unde sich bereiten solten  
 0,12319 als ez vore geredet was  
 0,12320 dô widerredete ez Calcas  
 0,12321 "ir hât ez übel ûf geleit  
 0,12322 ir varet âne wîsheit  
 0,12323 blint unde unversunnen  
 0,12324 unse gote ez uns vergunnen  
 0,12325 op wir hier decheinen prîs bejagen  
 0,12326 wie dicke sol ich wîssagen

- 0,12327 daz ich gewîssaget hân  
0,12328 dises landes en mac niht bestân  
0,12329 wollet ir beherten  
0,12330 die ez uns biz her werten  
0,12331 den ist missegangen  
0,12332 erslagen unde gevangen  
0,12333 ist ir daz bezzer teil  
0,12334 unse gelücke unde unse heil  
0,12335 nähet uns alle tage"  
0,12336 daz in der wîssage  
0,12337 dâ zuo belîbene riet  
0,12338 des widerredeten sie niet  
0,12339 sie en torsten in niht widertrîben  
0,12340 des muosten sie belîben  
0,12341 daz volc zuo reit unde zuo gienc  
0,12342 mannelich schuof sîne dinc  
0,12343 als im dô guot was  
0,12344 unde als sie lârte Calcas  
0,12345 dô sie wâren gescheiden  
0,12346 zuo sorgen unde zuo leiden  
0,12347 bereitten sie aber ire lide  
0,12348 in zuogienc tac unde vride  
0,12349 hin gein der âbentstunde  
0,12350 ir iegelich begunde  
0,12351 sich bereiten zuo ringe  
0,12352 unde êr die naht ergienge  
0,12353 wâren sie alle bereit  
0,12354 zuo der alten arbeit  
0,12355 dô der tac ûf gienc  
0,12356 sie riten wider in den rinc  
0,12357 wole zuo gereche als êr  
0,12358 die hêrren dâ von über sê  
0,12359 gegen den Trôieren  
0,12360 bî zwein bî drîn bî fierer  
0,12361 al einzelnen dare  
0,12362 dâr nâch schare über schare  
0,12363 dô entstuont in der tac  
0,12364 gein dem stiche der slac  
0,12365 nâch dem stiche unde nâch dem slage  
0,12366 grôze riuwe unde klage  
0,12367 umbe töten unde gewundeten  
0,12368 die Kriechen ne kunden  
0,12369 bezalen decheinen prîs  
0,12370 Troilus unde Parîs  
0,12371 mit sper unde mit schilde  
0,12372 nâmien in daz gevilde  
0,12373 beide kreiz unde velt  
0,12374 sie triben sie in die gezelt

- 0,12375 die Kriechen daz kûme beherten  
0,12376 daz sie die gezelt beharten  
0,12377 vore roube unde vore brande  
0,12378 wen daz die von dem lande  
0,12379 vore der naht en mohten  
0,12380 sie hetten dâ gevohten  
0,12381 daz in niemer mère  
0,12382 dechein leit en wäre  
0,12383 von den Kriechen geschên  
0,12384 sie ne liez die naht niet gesên  
0,12385 des kârten sie zuo der burc wider  
0,12386 weder êr noch sider  
0,12387 en wart in alsô kurzer zît  
0,12388 nie gestritten sô grôz strît  
0,12389 noch solich slahte  
0,12390 âne zal unde âne ahte  
0,12391 beleip dâ vile manic man  
0,12392 den ich genennen niht en kan  
0,12393 wende ich es geschriben niht en vant  
0,12394 wie ir decheiner wär genant  
0,12395 sie schuofen ire gemach dô  
0,12396 an dem andern tage vruo  
0,12397 dô der tac begonde schînen  
0,12398 sie bliesen ire busînen  
0,12399 unde ander ire herhorn  
0,12400 ire alte ire niuwe zorn  
0,12401 wîsete sie an die tobeheit  
0,12402 ir iegelich gein dem andern reit  
0,12403 daz er den tôt dâ küre  
0,12404 oder jener den lîp dâ verlûre  
0,12405 der gegen im quam  
0,12406 swer daz wunder ie mê vernam  
0,12407 daz in dem tage geschach  
0,12408 daz jâmer daz ungemach  
0,12409 die sorge die swære  
0,12410 swer sô er wäre  
0,12411 unde er ez gesehen hette  
0,12412 sîneme herzen ez wê tæte  
0,12413 solich was ire nôt  
0,12414 ez was allez sament rôt  
0,12415 dâ der strît bî was  
0,12416 ez wäre velt oder gras  
0,12417 ez wär mer oder sant  
0,12418 oder ros oder gewant  
0,12419 schilt oder swert bare  
0,12420 daz wart allez einvare  
0,12421 dem rôten bluote gelîch  
0,12422 wart der dinge iegelich

- 0,12423 der ich vore gesaget hân  
0,12424 Troilus liez dare gân  
0,12425 Diomedes dâr engein  
0,12426 dâ huop sich under in zwein  
0,12427 der starke zorn unde nît  
0,12428 des ir vore bereitet sît  
0,12429 wie ez under in quam  
0,12430 umbe vrouwen Briseidam  
0,12431 die minneten sie beide  
0,12432 der eine zuo leide  
0,12433 der ander zuo liebe  
0,12434 mit boten unde mit brieve  
0,12435 der eine sie der minne bat  
0,12436 der ander hette sie gehabet  
0,12437 sie giengen sich underhouwen  
0,12438 umbe die selben vrouwen  
0,12439 als ein eber unde ein bere  
0,12440 bîwîlen mit dem spere  
0,12441 under wîlen mit dem swerte  
0,12442 sweder ir baz werte  
0,12443 swertes ecke oder speres ort  
0,12444 daz wart dâ langer geurboret  
0,12445 Troilus von Ilion  
0,12446 des küninges Priamus sun  
0,12447 der sluoc im in rihte  
0,12448 zuo ir aller gesihte  
0,12449 eine wunden sô sêre  
0,12450 op er tôt wäre  
0,12451 daz was den sînen unkunt  
0,12452 sô sêre was er gewundet  
0,12453 als im der slac wart  
0,12454 sîn ougen wâren im verkârt  
0,12455 im was der sprâche zuogân  
0,12456 eineme tôten gelîch getân  
0,12457 dô daz Troilus gesach  
0,12458 nû hoeret wie er zuo im sprach  
0,12459 "wie nû helet küene degen  
0,12460 ir hânt zuo lange hier gelegen  
0,12461 ûf diser erden  
0,12462 waz sol der gewerden  
0,12463 von der minne ir siech sît  
0,12464 entbietet ir daz ir hier lît  
0,12465 ist daz sie iuwer angst weiz  
0,12466 sie kumet her in den kreiz  
0,12467 unde vüeret iuch hinnen  
0,12468 ir müget von irere minne  
0,12469 harte wole noch genesen  
0,12470 lâzet iuch niht leit wesen

- 0,12471 daz ir durch eine vrouwen  
0,12472 hier liget zuohouwen"  
0,12473 dise spæhe rede unde wort  
0,12474 hette Agomennon gehört  
0,12475 der Kriechen rihtære  
0,12476 im en wart nie mère  
0,12477 alsô harte leide  
0,12478 als ime was beide  
0,12479 umbe Diomedis schande  
0,12480 unde umbe daz er wânte  
0,12481 daz der Kriechen vile erslagen lac  
0,12482 er sprach "hiute sî mîn lezzeste tac  
0,12483 ich en gereche diz leit"  
0,12484 als er ez gesprach er reit  
0,12485 dâ er ez mohte gerechen  
0,12486 ich hoere daz buoch sprechen  
0,12487 daz er ez sô wole tâte  
0,12488 op er die helfe hâte  
0,12489 er hette sich harte wole entsaget  
0,12490 sie wâren alle verzaget  
0,12491 sîne gesellen unde sîne geverten  
0,12492 des en mohte er nicht beherten  
0,12493 Troilus im dô abe sluoc  
0,12494 den helm den er ûfe truoc  
0,12495 Diomedes wart betoubet  
0,12496 wende im an sîn houbet  
0,12497 Troilus sluoc einen solichen slac  
0,12498 daz im sîn hirn al zuoschrac  
0,12499 unde im ûz ran daz bluot  
0,12500 des verzagete der helt guot  
0,12501 er muoste harte wole verzagen  
0,12502 im was sîn houbet sô gar zuoslagen  
0,12503 daz im daz blôze hirnbein  
0,12504 in der wunden ûz schein  
0,12505 dô Diomedis missegienç  
0,12506 Troilus im abe vienc  
0,12507 sîner ritter daz mîrre teil  
0,12508 ungelücke unde unheil  
0,12509 unde grôz ungeræte  
0,12510 der Kriechen her hâte  
0,12511 sie lâgen tôt unde gewundet  
0,12512 wen daz der âbent entstuont  
0,12513 sie hetten verloren ire maht  
0,12514 sie kârten heim gein der naht  
0,12515 die Kriechen giengen zuo râte  
0,12516 des âbendes spâte  
0,12517 êr sie gar verdurben  
0,12518 daz sie umbe vride wurben

- 0,12519 sie santen boten die boten riten  
 0,12520 sie hiezen vlêhen unt biten  
 0,12521 daz in vride gegeben wart  
 0,12522 der werte als ich bin gelârt  
 0,12523 unde ez Dares hât gesprochen  
 0,12524 vier unde zweinzig wochen  
 0,12525 waz sol umberede mêt  
 0,12526 sie tâten den tôtēn als êr  
 0,12527 unde heilten ire wunden  
 0,12528 in den selben stunden  
 0,12529 Briseida des wîssagen  
 0,12530 tohter begonde klagen  
 0,12531 von dem sie guotes was gewon  
 0,12532 daz hêren Thideus sun  
 0,12533 Diomedes was gewundet  
 0,12534 daz rienete ire munt  
 0,12535 stille unt tougen  
 0,12536 unde beweinten ire ougen  
 0,12537 wende sie grôzen smerzen  
 0,12538 truoc an ireme herzen  
 0,12539 der starken minne swære  
 0,12540 mochte sie niet mêt  
 0,12541 behalten dâr inne  
 0,12542 die ir von sîner minne  
 0,12543 in ire herzen was geschên  
 0,12544 dô quam die vrouwe gegêñ  
 0,12545 dâ Diomedes lac gewundet  
 0,12546 dô klagete sie in der stunt  
 0,12547 grôzlîche sîn ungemach  
 0,12548 sie ersiufzete unt sprach  
 0,12549 "hêrre ich mac es verswîgen niet  
 0,12550 ich sage wie mir ist geschiet  
 0,12551 swie lange ich ez hân vertragen  
 0,12552 sô muoz ich iuch doch nû sagen  
 0,12553 mir sint durch iuwer minne  
 0,12554 verkêret mîne sinne  
 0,12555 swie ich doch nie bî iuch gelac  
 0,12556 beide naht unde tac  
 0,12557 ist mîn herze mit iuch gewesen  
 0,12558 mohtent ir nû genesen  
 0,12559 des ir lange gebeten hât  
 0,12560 daz wolte ich lâzen an rât  
 0,12561 unde als ich ez an rât gelieze  
 0,12562 ich tæte daz man mich hieze  
 0,12563 daz iuch zuo guote quæme  
 0,12564 unde mir ouch wole gezæme  
 0,12565 ich mac niht swîgen noch en kan  
 0,12566 daz ein wîp ump einen man

- 0,12567 sus getâne rede tuot  
0,12568 daz ist zuo niht guot  
0,12569 nû merket ir vile rehte daz  
0,12570 weder gezimet mir baz  
0,12571 daz ich eines mannes gere  
0,12572 der mit schilde unde mit spere  
0,12573 mit ritterlîcher hövischheit  
0,12574 durch mîne minne swære treit  
0,12575 oder ich âne man sî  
0,12576 unde âne helfe dâ bî  
0,12577 er minnet mich unde ich minne in  
0,12578 unde op ich ime liep bin  
0,12579 unde op er mîner minne gert  
0,12580 unde op er danne des ist wert  
0,12581 daz ich in minne  
0,12582 ez wäre ein unsinne  
0,12583 daz ich niht en tæte  
0,12584 swie gerne ich Troilum hâte  
0,12585 des en mac ich gehaben niet  
0,12586 sint er selbe daz riet  
0,12587 daz ich von im verwîset wart  
0,12588 wäre alle die werlt an in gekârt  
0,12589 unde daz er keiser wäre  
0,12590 er wäre mir unmære  
0,12591 solte ich den liep haben  
0,12592 der mich gerne begraben  
0,12593 sâhe denne an dem lîbe  
0,12594 ich bin zuo einem wîbe  
0,12595 alsô schoene als er zuo manne  
0,12596 des er mir niht en gan  
0,12597 war umbe gunde ich im des  
0,12598 sint mir Diomedes  
0,12599 alles quotes gan wole  
0,12600 ich wæne ich von rehte im sol  
0,12601 alles quotes gunnen  
0,12602 unde vröuweden unt wünnen  
0,12603 unt alle der werlte êre  
0,12604 op die mîn wäre  
0,12605 die wolte ich allesament geben  
0,12606 daz er behielte daz leben”  
0,12607 dem hêrren was deste baz  
0,12608 die wîle die vrouwe bî im saz  
0,12609 unde süeze wort von ime sprach  
0,12610 sie schuof im anders gemach  
0,12611 an sînen wunden  
0,12612 sô sie sie ungebunden  
0,12613 oder zuo ungereche vant  
0,12614 harte wole sie sie ime bant

- 0,12615 Agomennon unde Nestor  
 0,12616 dâhten als dâ bevore  
 0,12617 mit wie getânen dingn  
 0,12618 sie Achillen mohten bringen  
 0,12619 wider zuo dem swerte  
 0,12620 die wîle der vride werte  
 0,12621 quâmen sie zwêne zuo im geriten  
 0,12622 unde begunden in vaste biten  
 0,12623 daz er ez durch got tæte  
 0,12624 unde ir genâde hæte  
 0,12625 sie sprâchen "ir hât wole gesehen  
 0,12626 waz uns leides ist geschehen  
 0,12627 lât uns des geniezen  
 0,12628 daz iuwer dienest ie hiezen  
 0,12629 unde solen heizen iemer mî  
 0,12630 ach ach leider ouwê  
 0,12631 wie tuot ir sus sâliger man  
 0,12632 daz iuch nieman en kan  
 0,12633 wider zuo uns bekêren  
 0,12634 nû tuot ez doch gote zuo êren  
 0,12635 unde lât iuch erbarmen unse ungemach"  
 0,12636 Achilles kurzlîchen sprach  
 0,12637 "iuwer ungemach daz ist mir leit  
 0,12638 ich sage iuch die wârheit  
 0,12639 daz ir harte tump sít  
 0,12640 ir verlieset iuwer zít  
 0,12641 iuwer biten en hilfet niet  
 0,12642 mîn volc unde mîn diet  
 0,12643 op iuch daz zuo staten stât  
 0,12644 swenne der vride ûz gât  
 0,12645 die wil ich iuch lîhen  
 0,12646 ir müezet iuch mîn verzîhen"  
 0,12647 dô en torsten sie Achillen  
 0,12648 wider sînen willen  
 0,12649 biten niht mère  
 0,12650 sie danketen im sêre  
 0,12651 ump sîne volleiste  
 0,12652 Achilles ouch leiste  
 0,12653 als er hette gesprochen  
 0,12654 in der lezzesten wochen  
 0,12655 dô der vride ûz gienc  
 0,12656 schuofen sie aber ire dinc  
 0,12657 ûzene unt innen  
 0,12658 zuo strîte unde zuo unminnen  
 0,12659 dâ stuonden alle die naht  
 0,12660 die ros harte wole bedaht  
 0,12661 ire harnasch al gereit lac  
 0,12662 unde alsô schiere der tac

- 0,12663 schein über die erden  
 0,12664 dô quâmen sie zuo den pferden  
 0,12665 unde riten ûz zuo velde  
 0,12666 ûz den gezelten  
 0,12667 unde ûz der stat von Ilion  
 0,12668 als sie wâren gewon  
 0,12669 sîne ritter sante Achilles dar  
 0,12670 er sprach "ir hêrren nemet war  
 0,12671 ich wil zuo strîte niht sîn  
 0,12672 nû werde an iuch selben schîn  
 0,12673 daz ir alsô getuot  
 0,12674 als ez die Kriechen dunke guot"  
 0,12675 in der selben zîte  
 0,12676 kârten sie zuo strîte  
 0,12677 dô sie zuo kreize quâmen geriten  
 0,12678 dô hette Troilus gestritten  
 0,12679 alsô menlîche  
 0,12680 daz dechein sîn gelîche  
 0,12681 alsô wole dâ gestreit  
 0,12682 Menesteus im engein reit  
 0,12683 der herzoge von Athêne  
 0,12684 dâ sluogen sich die zwêne  
 0,12685 unz Menesteus dâr nider quam  
 0,12686 Troilus sîn ros nam  
 0,12687 zuo reit dô Thoas  
 0,12688 gein ime Polidamas  
 0,12689 Achillis gesellen  
 0,12690 die wîseten dâ ire ellen  
 0,12691 sie giengen sô houwen  
 0,12692 man mohte wole schoouwen  
 0,12693 daz sie wunder tâten  
 0,12694 sie giengen sô schrôten  
 0,12695 daz in die vîande wichen vore  
 0,12696 Troilus unde Nestor  
 0,12697 quâmen zuosamene gerant  
 0,12698 der alte nam die überhant  
 0,12699 unde stach in ûf die erden  
 0,12700 von rossen unde von pferden  
 0,12701 wäre Troilus ertrat  
 0,12702 wen daz er in zîten wart gerattt  
 0,12703 von den bastharten  
 0,12704 gein Nestoren sie kârten  
 0,12705 dâ wart Margariton  
 0,12706 der allertiureste kebessun  
 0,12707 in dem strîte erslagen  
 0,12708 daz begonde Troilus klagen  
 0,12709 der klage er nie vergaz  
 0,12710 biz maniger bekante daz

- 0,12711 daz im sîn tôt leit was  
 0,12712 im quam zuo helfe Polidamas  
 0,12713 unde Philemenîs  
 0,12714 mit in reit och Parîs  
 0,12715 och quam Agomennon  
 0,12716 Ajax unde Thelamon  
 0,12717 unde der wîse Ulixes  
 0,12718 unde hîrre Diomedes  
 0,12719 der was kûme genesen  
 0,12720 ich hân von strîte vile gelesen  
 0,12721 ich en vernam doch soliche nôt nie  
 0,12722 sô ich geschriben vant hier  
 0,12723 Troilus reit under in  
 0,12724 bî zwein unt guot bî drîn  
 0,12725 sluoc er die Kriechen dâr nider  
 0,12726 unde reit her wider  
 0,12727 unde ersluoc ir dâ viere  
 0,12728 daz getete er nie sô schiere  
 0,12729 er hette den vünften erslagen  
 0,12730 ich muoz iuch kurzlîchen sagen  
 0,12731 dô sluoc er alumbe  
 0,12732 die rehte unde die krümbe  
 0,12733 daz ir mê danne hundert was  
 0,12734 die er valte ûf daz gras  
 0,12735 alsô tâten die sîne  
 0,12736 wen der von Salemîne  
 0,12737 Ajax Thelamones sun  
 0,12738 Troilus von Ilion  
 0,12739 hette in den stunden  
 0,12740 die Kriechen überwunden  
 0,12741 verzaget was der Kriechen her  
 0,12742 Ajax satzte sich zuo wer  
 0,12743 ûf der walstat  
 0,12744 er schalt unde bat  
 0,12745 sîne daz sie sich werten  
 0,12746 dô vluhen sîne geverten  
 0,12747 in ire hamîden  
 0,12748 dâ muoste er eine lîden  
 0,12749 des hunderten genuoc wäre  
 0,12750 er behielt sînen die êre  
 0,12751 daz sie niht wurden vertriben  
 0,12752 doch was ir wunder tôt beliben  
 0,12753 die Troilus erslagen hæte  
 0,12754 grôzer ungeræte  
 0,12755 wäre in lîhte dâ geschên  
 0,12756 die naht en liez sie niht gesên  
 0,12757 des kârten sie dannen  
 0,12758 Troilus mit sînen mannen

- 0,12759 unde Ajax von Salemîne  
 0,12760 bî dem mâneschîne  
 0,12761 hette er gerne gestritten  
 0,12762 sie wâren im alle entriten  
 0,12763 grôz unde kleine  
 0,12764 Ecuba die reine  
 0,12765 mit manne mit kinde  
 0,12766 unde mit anderme ireme gesinde  
 0,12767 giengen gein Troilô  
 0,12768 sie wâren sîner künfte vrô  
 0,12769 dô er in den sal quam  
 0,12770 sîn vater sînen schilt nam  
 0,12771 sînen helm nam Ecuba  
 0,12772 sîn swester Polixena  
 0,12773 entvienc sîn swert  
 0,12774 Troilus was êren wole wert  
 0,12775 sînen halsberc zuohouwen  
 0,12776 zugen im ûz die vrouwen  
 0,12777 unde salbeten sîne wunden  
 0,12778 sô sie beste kunden  
 0,12779 daz sie im baz tæten  
 0,12780 sîne swulst sie im bæheten  
 0,12781 Ecuba sîn wole pflac  
 0,12782 "der geschaffen hât den tac"  
 0,12783 sprach sie lieplîche  
 0,12784 "got von himelrîche  
 0,12785 der dâ geschuof die sunnen  
 0,12786 der müeze uns dîn gunnen  
 0,12787 nû wir Hectoren hân verloren  
 0,12788 unde dich got sô hât erkoren  
 0,12789 daz dû nâch im geartet bist  
 0,12790 der gebe dir dînes lîbes vrist"  
 0,12791 sie kuste in mî denne tûsent stunt  
 0,12792 "got lâze dich sîn gesunt"  
 0,12793 die vrouwen sâzen umbe in dâ  
 0,12794 unde spotten daz Briseidâ  
 0,12795 sîne liebe amîe  
 0,12796 von Diomedis vrîe  
 0,12797 zuo grôzeme worte kommen was  
 0,12798 "waz sprichet Calcas  
 0,12799 sie mac sîn tohter wole sîn  
 0,12800 daz ist dâr an guot schîn  
 0,12801 sie sint ungetriuwe beide"  
 0,12802 sie sprâchen ir zuo leide  
 0,12803 beide vore unt vort  
 0,12804 spâhe rede unde scheltwort  
 0,12805 als man danne gerne pflît  
 0,12806 unz an die slâfzît

- 0,12807 daz ire schimpf dô gelac  
0,12808 ir iegelich sîner ruowe pflac  
0,12809 under des andersît  
0,12810 hette Achilles boese zît  
0,12811 sîn sorge was zwivalt  
0,12812 daz in die minne hette gequalt  
0,12813 daz was ein pîne  
0,12814 ein ander daz der sînen  
0,12815 erslagen was daz mîrre teil  
0,12816 diz lezzeste unheil  
0,12817 unde die êrste quâle  
0,12818 hette er zuo mâle  
0,12819 er sprach "ich bin unsælic geboren  
0,12820 mich hât minne unde zorn  
0,12821 beroubet mîner sinne  
0,12822 mir hât genomen die minne  
0,12823 mînen prîs unde mîn êre  
0,12824 swie zorne mir wære  
0,12825 daz ich gereche mîne diet  
0,12826 des en gestate ich der minne niet  
0,12827 man mac wunder schouwen  
0,12828 ich bin ump eine vrouwen  
0,12829 alsô sêre verquolen  
0,12830 daz ich daz muoz dolen  
0,12831 daz mîne ritter sint erslagen  
0,12832 unde sol ich ez vertragen  
0,12833 durch ein getrügenisse  
0,12834 mîn minne ist gewisse  
0,12835 als ich gesprochen hân  
0,12836 ein elbisch vuore unde ein wân  
0,12837 unde mînes herzen broedicheit  
0,12838 mir en hât niht vüre geleit  
0,12839 wenne daz ich selbe broede bin  
0,12840 unde daz ich herze unde sin  
0,12841 an ein wîp hân gekârt  
0,12842 dâ mir nie niht abe wart  
0,12843 noch anders werden mac  
0,12844 wen übel naht unde übel tac  
0,12845 unde übel leben dâr zuo  
0,12846 beide spâte unde vruo  
0,12847 muoz mîn herze wanken  
0,12848 mit solichen gedanken  
0,12849 ich sihe wole waz mir ist  
0,12850 unde hân doch kunst noch list  
0,12851 die mich wider leite  
0,12852 von solicher krancheite  
0,12853 an mîne alten stæte  
0,12854 sehet swaz man mir tæte

- 0,12855 mîn en würde niemer rât  
 0,12856 daz selbe getwâs daz mich hât  
 0,12857 ez sî minne oder waz ez sî  
 0,12858 daz ist mir alzuo vaste bî  
 0,12859 der mich allen zuosnite  
 0,12860 ez wär mir doch iemer mite  
 0,12861 als ez gewesen ist unz her  
 0,12862 mir en werde des ich gere  
 0,12863 ich stirbe in mîn selbes nôt  
 0,12864 die mir wîlen wâren rôt  
 0,12865 mîne wangen die sint mir val  
 0,12866 unde mîn varwe bleichsal  
 0,12867 unde wibelvar mîn munt  
 0,12868 mîn herze vile ungesunt  
 0,12869 verdorret mîn lunge  
 0,12870 zuokloben mîn zunge  
 0,12871 vergangen alle mîn maht"  
 0,12872 sus klagete er alle die lange naht  
 0,12873 Achilles in der klage saz  
 0,12874 unz er der zorne vergaz  
 0,12875 daz sîne ritter wâren erslagen  
 0,12876 ez begunde harte schône tagen  
 0,12877 über al die gezelt  
 0,12878 sie huoben sich aber an daz velt  
 0,12879 ire viande dâ engeine  
 0,12880 des veldes des was kleine  
 0,12881 unde der walstat blôz  
 0,12882 dâ was manic houfe grôz  
 0,12883 ûf dem gevilde  
 0,12884 tôt under den schilden  
 0,12885 der ritter mit dem rosse lac  
 0,12886 dô entstuont in dirre tac  
 0,12887 als in der ander was entstanden  
 0,12888 von Troilis handen  
 0,12889 lac ir alsô vile dâr nider  
 0,12890 hette in die naht niet wider  
 0,12891 mit den sînen in die stat getrieben  
 0,12892 sie wâren alle tôt beliben  
 0,12893 die wochen alle  
 0,12894 vuor Troilus mit schalle  
 0,12895 unde die andern ûz der stat  
 0,12896 wen daz Ajax vrides bat  
 0,12897 hêrren Thelamonis sun  
 0,12898 sich hette Agomennon  
 0,12899 lîbes unde guotes ergeben  
 0,12900 der vride behielt in daz leben  
 0,12901 unde anders ire êre  
 0,12902 waz wollet ir nû mère

- 0,12903 sie tâten den tôten als êr  
0,12904 nâch ireme site nâch irere ê  
0,12905 unt nâch ireme rehte  
0,12906 zuo sturme unde zuo vehte  
0,12907 quâmen sie an den tac  
0,12908 dô der vride gelac  
0,12909 ein tjoste dâ geschach  
0,12910 Menelaus der stach  
0,12911 ûf hêrren Parîsen  
0,12912 ûf Ulixen den wîsen  
0,12913 hurte Polidamas  
0,12914 Menestus dâ bî was  
0,12915 von Athêne der herzoge  
0,12916 der quam zuo dem gezoge  
0,12917 Parîse zuo helfe Anthenor  
0,12918 der quam gevlogen al enbore  
0,12919 der starke Philemenîs  
0,12920 der begienc dâ grôzen prîs  
0,12921 zuo reit Agomennon  
0,12922 wen der küninc Thelamon  
0,12923 als ich daz buoch hoeren sagen  
0,12924 Philemenis hette erslagen  
0,12925 Agomennon den helet guot  
0,12926 harte menlîchen muot  
0,12927 hette Philemenîs  
0,12928 er was starc unde wîs  
0,12929 er machete under den Kriechen  
0,12930 vile manigen siechen  
0,12931 er hette sie benoetet  
0,12932 gewundet unt ertoetet  
0,12933 unde ertrat ûzer mâzen  
0,12934 Thelamon an einer strâzen  
0,12935 quam ûf in geriten  
0,12936 sie begunden unsiten  
0,12937 der sturm wart herte  
0,12938 dar quam an daz geverte  
0,12939 Antilocus vile balde  
0,12940 ouch quam dar der alte  
0,12941 Nestor der sîn vater was  
0,12942 als ich an dem buoche las  
0,12943 Antilocus was vile starc  
0,12944 unde sînen vianden arc  
0,12945 ein wole gewahsen brûn man  
0,12946 er vuorte einen wâpenroc an  
0,12947 von wîzem zindâte  
0,12948 alsô schiere unde alsô drâte  
0,12949 als er zuo sturme quam gejaget  
0,12950 dô quam Emilius unverzaget

- 0,12951 andersît im engein  
0,12952 der was der kebessüne ein  
0,12953 Antilocus stach dare  
0,12954 unde jener nam des stiches ware  
0,12955 unde entwankte sîneme stiche  
0,12956 unde êr er vollen entwiche  
0,12957 sluoc er in mit dem swerte  
0,12958 daz er helfen gerte  
0,12959 unde êr im helfe wäre kommen  
0,12960 sô hette er im den lîp genomen  
0,12961 unde dô die Trôiere  
0,12962 vernâmen dise mære  
0,12963 daz Emilius was erslagen  
0,12964 dô begunden sie dare jagen  
0,12965 mit nîde unde mit zorne  
0,12966 daz blâsen mit dem horne  
0,12967 daz ruofen mit dem munde  
0,12968 nieman en kunde  
0,12969 geahaten zuo rehte  
0,12970 ritter unt knechte  
0,12971 die quâmen alle zuo geraht  
0,12972 mit einer sógetâner maht  
0,12973 daz der Kriechen lützel genas  
0,12974 wende zuo vluht kommen was  
0,12975 daz kriechische here  
0,12976 daz dâ vlôch gein dem mere  
0,12977 waz wollet ir daz ich mîr sage  
0,12978 die Kriechen wurden an dem tage  
0,12979 sigelôs unt verzaget  
0,12980 zuo ireme gezelte gejaget  
0,12981 unde êr sie es iht westen  
0,12982 mit den êrsten unde mit den lezzesten  
0,12983 die Trôjâne mit in wâren  
0,12984 unde zugen sie mit den hâren  
0,12985 her unt darwert  
0,12986 unde nâmen in ros unde pfert  
0,12987 unt anders daz sie vunden  
0,12988 die sie begrîfen kunden  
0,12989 sluogen sie unde viengen  
0,12990 die Kriechen wolten dingen  
0,12991 sie en wisten waz sie solten  
0,12992 dô sie dingen wolten  
0,12993 ein heil geschach in under des  
0,12994 ez gesach Achilles  
0,12995 ire leit unde ire ungemach  
0,12996 unde als er ez rehte gesach  
0,12997 vile zorne im wart  
0,12998 des vergienc im der zart

- 0,12999 den er von minnen hæte  
 0,13000 sîn zorn wart alsô dræte  
 0,13001 daz in der zorn überwant  
 0,13002 unde die minne verswant  
 0,13003 als ez ein niht wäre  
 0,13004 im was joch unmære  
 0,13005 umbe decheine minne  
 0,13006 der zorn was im inne  
 0,13007 dô er von dem zorne entbran  
 0,13008 dô schute er sînen halsberc an  
 0,13009 sînen helm er ûf bant  
 0,13010 ûf daz ros sper an die hant  
 0,13011 zuo sîten schilt unde swert  
 0,13012 sehet wie der lewe gert  
 0,13013 der schâfe als er hungeric ist  
 0,13014 Achilles alsô sunder vrist  
 0,13015 ûf sîne viande reit  
 0,13016 mit sôgetâner giricheit  
 0,13017 als der lewe danne tuot  
 0,13018 Achilles der helet guot  
 0,13019 der quam ûf sie gerant  
 0,13020 swie er den ritter vant  
 0,13021 zuo rosse oder zuo vuoze  
 0,13022 an state unde an muoze  
 0,13023 sluoc er slege über slege  
 0,13024 sie hetten dechein gehege  
 0,13025 swaz er ir überzôch  
 0,13026 der iezunt disen vlôch  
 0,13027 der begunde wider mit jagen  
 0,13028 der disen jagete vüre einen zagen  
 0,13029 der wart selbe gejaget  
 0,13030 sie wâren alle verzaget  
 0,13031 swaz ire küene was gewesen  
 0,13032 ir mohte lützel genesen  
 0,13033 swelichen er der recken  
 0,13034 mit sînen brûnen ecken  
 0,13035 iergen mohte erlangen  
 0,13036 des leben was ergangen  
 0,13037 "waz ist diz" sprach Troilus  
 0,13038 "wie vert dirre man sus  
 0,13039 er veret wole mit schalle  
 0,13040 wir vliehen einen alle  
 0,13041 wir müezen uns es wole schamen  
 0,13042 daz wir hân ritters namen  
 0,13043 oder ie prîs gewunnen  
 0,13044 sint wir niht en kunnen  
 0,13045 einen manne widerstân  
 0,13046 mir is leit daz ich den lîp hân

- 0,13047 unde in niht tar verliesen  
 0,13048 ich wil den tôt kiesen  
 0,13049 oder ich behalte mîne êre  
 0,13050 swer mîn vriunt sî der kêre"  
 0,13051 Troilus dô kârte  
 0,13052 mit im die bastharte  
 0,13053 dô Achilles gewar wart  
 0,13054 daz er umbe was gekârt  
 0,13055 er ahte es harte kleine  
 0,13056 unde kârte im engeine  
 0,13057 sie underhiewen sich  
 0,13058 harte sêre ir iegelich  
 0,13059 dem andern widerstuont  
 0,13060 iedoch wart er êr gewundet  
 0,13061 der es minnere angst hæte  
 0,13062 daz was Achilles der dræte  
 0,13063 im wart ein solich wunde  
 0,13064 daz er niet en kunde  
 0,13065 in dem strîte beliben  
 0,13066 wär er von tûsent lîben  
 0,13067 sîn wunde was sô grôz  
 0,13068 daz bluot im ouch sô nider schôz  
 0,13069 daz er zuo den zîten  
 0,13070 dannen muoste rîten  
 0,13071 ez was ouch an der vesperzît  
 0,13072 sie kârten heim beidersît  
 0,13073 siben tage die wîle er vaht  
 0,13074 von dem morgene biz an die naht  
 0,13075 alle zît unde alle wîs  
 0,13076 behielt Troilus den pris  
 0,13077 unde die mit im ûz der stat  
 0,13078 die tötten wurden bestatet  
 0,13079 unt geruoweten ire lide  
 0,13080 man nam von beidersît vride  
 0,13081 dô heilte sîne wunden  
 0,13082 Achilles bâ den stunden  
 0,13083 dô Priamus hette vernomen  
 0,13084 daz Achilles was zuo strîte kommen  
 0,13085 dô schuldigete er Ecubam  
 0,13086 wende sie Polixenam  
 0,13087 im gelobet hæte  
 0,13088 "Achilles ist unstæte"  
 0,13089 sprach er zornlîche  
 0,13090 "sô mir got der rîche  
 0,13091 sîn gelübde ist ein wint  
 0,13092 wir hetten selben unser kint  
 0,13093 vile nâch verrâten"  
 0,13094 vile manige rede sie tâten

- 0,13095 beide vore unt vort  
0,13096 Polixena hette erhôrt  
0,13097 daz Achilles was gewundet  
0,13098 alsô schiere sie ez verstuont  
0,13099 dô sprach sie harte stille  
0,13100 "got genâde hêrren Achillen  
0,13101 mir muoz wole umbe in leide wesen  
0,13102 mohte der hêrre genesen  
0,13103 ich wolte in gerne liep hân  
0,13104 er ist hövisch unde wolegetân  
0,13105 vore andern rittern ûzerkoren  
0,13106 rîche unde wolegeboren  
0,13107 ein harte küene starc man"  
0,13108 einen boten sie gewan  
0,13109 dem hêrren sie entbôt  
0,13110 ir wäre leit ump sîne nôt  
0,13111 dô er die boteschaft vernam  
0,13112 drîvaltic leide im ane quam  
0,13113 ump sîne wunden daz was ein  
0,13114 daz ander daz er des tages erschein  
0,13115 zuo strîte unde zuo vehte  
0,13116 wider sîneme rehte  
0,13117 die dritte was im wider kumen  
0,13118 von der ir hât vernomen  
0,13119 daz was ump die minne  
0,13120 daz im die küninginne  
0,13121 boten hette gesant  
0,13122 die boteschaft überwant  
0,13123 die andern swære  
0,13124 im half daz liebe mære  
0,13125 daz er schiere genas  
0,13126 von dem er gewundet worden was  
0,13127 dem dröuwete er an den lîp ie  
0,13128 swer mich úz dem werren hier  
0,13129 kunde bescheiden  
0,13130 von den drîn leiden  
0,13131 unt von der liebe dâ mite  
0,13132 unt ouch von dem unsite  
0,13133 daz er dem dröuwete zuo dem lîbe  
0,13134 des swester im zuo wîbe  
0,13135 harte gerne hæte  
0,13136 swer ez wiste oder tæte  
0,13137 der wäre wîser danne ich  
0,13138 doch versinnen ich mich  
0,13139 unz ich ez gelerne  
0,13140 sô berihte ich es iuch gerne  
0,13141 iezunt was die stunde  
0,13142 daz in begunde

- 0,13143 der unvride næhen  
 0,13144 êr sie den tac gesæhen  
 0,13145 daz sie zuo velde solten  
 0,13146 sie en mohten noch en wolten  
 0,13147 lenger niht beiten  
 0,13148 sie begunden sich zuo reiten  
 0,13149 Achilles die sîne scharte  
 0,13150 er wîsete sie unde lârte  
 0,13151 als sie zuo ringe quæmen  
 0,13152 daz sie Troilis war næmen  
 0,13153 alsus er zuo sînen sprach  
 0,13154 wende im sîn zorn sêr wac  
 0,13155 "mîne sêle von mir scheide  
 0,13156 ich getuo im alsô leide  
 0,13157 als er mir hât getân  
 0,13158 mich en triege mîn wân  
 0,13159 ich toete in oder er mich"  
 0,13160 zuo velde huaben sie sich  
 0,13161 dâ stuben schefte unde klungen swert  
 0,13162 unde liefen ros unt pfert  
 0,13163 die dâr ûfe sâzen  
 0,13164 die hetten sich gelâzen  
 0,13165 zuo tôde unde zuo lîbe  
 0,13166 dâr nâch daz die schîbe  
 0,13167 des gelückes löufet unde gêt  
 0,13168 unde übervert unde entstêt  
 0,13169 nâch gelücke unde nâch heile  
 0,13170 dô vuorte sînen lîp veile  
 0,13171 Troilus allen den tac  
 0,13172 entvienc unde gap manigen slac  
 0,13173 dô widerreit im Achilles  
 0,13174 den wunderte wie unde wes  
 0,13175 im wäre zuo muote  
 0,13176 daz er âne huote  
 0,13177 im sô dicke widerreit  
 0,13178 ez dûhte in unwîsheit  
 0,13179 er reit ûf in jener hielt in hart  
 0,13180 von ireme deweder geboten wart  
 0,13181 bezzerunge noch unschult  
 0,13182 sie riten mit ungedult  
 0,13183 ir ietweder dem andern engein  
 0,13184 mit vile ungevüegen slein  
 0,13185 der herte stâl dâ erklanc  
 0,13186 daz viur nâch dem slage ûz spranc  
 0,13187 unde der halsberc zuoreiz  
 0,13188 unde daz bluot unt der sweiz  
 0,13189 vliezen begunde  
 0,13190 ein harte übel stunde

- 0,13191 in beiden samet entstuont  
0,13192 sie wurden sêre gewundet  
0,13193 Achilles hette die kraft  
0,13194 dâr im der helm mit was gehaft  
0,13195 die riemen er im vaste zuoschiet  
0,13196 des en mohte Troilus niet  
0,13197 des helmes enthalten  
0,13198 des wart im zuospalten  
0,13199 sîn houbet mitten enzwei  
0,13200 dâ wart beidersît geschrei  
0,13201 die Kriechen mit schalle  
0,13202 die andern von dem valle  
0,13203 wende Troilus erslagen was  
0,13204 er viel tôt ûf daz gras  
0,13205 aller zuohouwen  
0,13206 des schrieten die vrouwen  
0,13207 obene ûf der zinnen  
0,13208 die dâ sâzen enbinnen  
0,13209 durch warten unde durch kapfen  
0,13210 biben zane klaffen  
0,13211 klage sorge swære  
0,13212 unt jámerlîche gebære  
0,13213 hetten sie in der stat al  
0,13214 andersît vröuwede unde schal  
0,13215 Achilles durch unwerde  
0,13216 hiez in eineme pferde  
0,13217 zuo dem zagele binden  
0,13218 als ich geschriben vinde  
0,13219 der in sîneme pferde zuo dem zogel bant  
0,13220 der was Kalo genant  
0,13221 dô schrei allez daz dâ was  
0,13222 Parîs unde Eneas  
0,13223 Polidamas unde Mennon  
0,13224 Priamus von Ilion  
0,13225 unde sîne wîp unde sîne kint  
0,13226 mohten weinenes werden blint  
0,13227 Mennon der küninc von Persiâ  
0,13228 der volgete mit den sînen nâch  
0,13229 ûf Kalo er hurte  
0,13230 der Troilum vuorte  
0,13231 er sprach dô er in überreit  
0,13232 "Kalo mir ist leit  
0,13233 daz ir in diseme lande  
0,13234 uns sus getâne schande  
0,13235 an unserme vriunde erboten hât  
0,13236 ich wæne ir es mir ein pfant lât"  
0,13237 als er daz wort gesprach  
0,13238 gein dem rücke er in in stach

- 0,13239 durch den bûch andersît  
 0,13240 dô huop sich ein niuwe strît  
 0,13241 Achilles rante aber dar  
 0,13242 Mennon mit sîner schar  
 0,13243 Troilum in werte  
 0,13244 sô daz er in beherte  
 0,13245 grôze arbeit er des gewan  
 0,13246 dâ verlôs Achilles manigen man  
 0,13247 unde wart och selbe gewundet  
 0,13248 der strît eine wochen stuont  
 0,13249 daz sie nahtes nie gelâgen  
 0,13250 noch tages ruowe niht en pflâgen  
 0,13251 Achilles hette grôzen zorn  
 0,13252 daz er Kalon hette verloren  
 0,13253 den Mennon hette erslagen  
 0,13254 er begunde ez sînen volke klagen  
 0,13255 sîne ritter er bat  
 0,13256 daz sie ûf der walstat  
 0,13257 sîn war næmen  
 0,13258 als sie zuo strîte quæmen  
 0,13259 des er bat daz gewart  
 0,13260 dô sie zuo strîte wâren gekârt  
 0,13261 unde Mennon ûf daz velt quam  
 0,13262 Achilles sîn ware nam  
 0,13263 unde beringete in ûf dem ringe  
 0,13264 êr der strît ergienge  
 0,13265 unt zuo ende quæme der tac  
 0,13266 Mennon dâ erslagen lac  
 0,13267 Achilles sluoc in dâr [nidere]  
 0,13268 weder êr noch sider  
 0,13269 wart dâ grôzer riuwe  
 0,13270 der hêrre was getriuwe  
 0,13271 kûene zuo schilde  
 0,13272 rîche unde milte  
 0,13273 unde von edelre geburt  
 0,13274 sîne tât unde sîne wort  
 0,13275 quâmen ie zuo êren  
 0,13276 sînen vriunden swâ sie wâren  
 0,13277 daz er tôt würde beratt  
 0,13278 dâ wart gerant unde getrat  
 0,13279 unde geruofen unde geschrît  
 0,13280 Achilles in zuoscheit  
 0,13281 wole in hundert stücke  
 0,13282 durch sîn ungelücke  
 0,13283 quam zuo strîte Parîs  
 0,13284 unt och Philemenis  
 0,13285 Phion unde Esdras  
 0,13286 Eneas unt Polidamas

- 0,13287 gein in Diomedes  
 0,13288 Menelaus unde Ulixes  
 0,13289 Ajax unde Thelamon  
 0,13290 unt ouch Agomennon  
 0,13291 unt ire volc dâr mite  
 0,13292 ungebære unde unsite  
 0,13293 wart dâ vile gestalt  
 0,13294 die Kriechen jageten sie mit gewalt  
 0,13295 rehte an daz burctor  
 0,13296 dâ striten sie alsô lange vore  
 0,13297 unz sie die naht dannen treip  
 0,13298 der von Trôje dâ beleip  
 0,13299 mê denne der Kriechen tâte  
 0,13300 sie riten harte spâte  
 0,13301 dise in die stat die in die gezelt  
 0,13302 sie mohten kûme über daz velt  
 0,13303 vore tôtten gerîten  
 0,13304 ez wart in manigen zîten  
 0,13305 von mannen von rossen von pfagen  
 0,13306 nie sô vile zuo mâle erslagen  
 0,13307 die zuo Trôje inne  
 0,13308 küninc küninginne  
 0,13309 ire kint ire vürsten ire manne  
 0,13310 unde die sie anders gehörten an  
 0,13311 ritter vrouwen manic kneht  
 0,13312 die klageten daz unreht  
 0,13313 daz in armen was geschên  
 0,13314 man mohte jámer an in sehen  
 0,13315 die naht sie alle sâzen  
 0,13316 sie trunken noch en âzen  
 0,13317 manne noch wîbe  
 0,13318 geschach zuo ireme lîbe  
 0,13319 aller der ruowe dechein  
 0,13320 die die sunne ie beschein  
 0,13321 sie klageten daz ires küninges sun  
 0,13322 unde der küninc Agomennon  
 0,13323 beide erslagen lâgen  
 0,13324 von vriunden unde von mâgen  
 0,13325 was dâ riuwe unde klage  
 0,13326 die naht durch biz zuo den tage  
 0,13327 Ecuba die begunde  
 0,13328 vluochen der stunde  
 0,13329 dâ sie inne was geboren  
 0,13330 sie sprach "ich hân einen sun verloren  
 0,13331 er gezæme gote zuo kinde  
 0,13332 mîn unheil ist zuo swinde  
 0,13333 unde mîn gelücke zuo laz  
 0,13334 mir wäre harte vile baz

- 0,13335 daz ich ein stein wäre  
 0,13336 denne ich soliche swære  
 0,13337 trüge oder soliche leide”  
 0,13338 sie zuovuorte beide  
 0,13339 ire kleider unde ire vahs  
 0,13340 unde anders daz an ir was  
 0,13341 sie sprach “wie ist mir geschê  
 0,13342 leides hân ich sô vile gesên  
 0,13343 an mînen kinden unde geliden  
 0,13344 der mich zuo einzeln liden  
 0,13345 al zuosniten hæte  
 0,13346 senfter mir daz tæte  
 0,13347 ich en ruoche waz mir mî geschê  
 0,13348 vile gerne ich gesæhe  
 0,13349 daz mich daz apgründe  
 0,13350 als lebende verslünde  
 0,13351 unt behielte iemer vort  
 0,13352 daz ich soliche geburt  
 0,13353 ûf der erden ie gewan  
 0,13354 der mir got niht en gan  
 0,13355 mîne gote sehen her  
 0,13356 Pluto Mars Jupiter  
 0,13357 Jupiter der des himels pflît  
 0,13358 unde Mars der bewart den strît  
 0,13359 unde Pluto die helle  
 0,13360 swelicher welle  
 0,13361 der gebe mir die volleist  
 0,13362 daz er neme mînen geist  
 0,13363 die vogele mîn vleisch ezzen  
 0,13364 sint mîn got vergezzen  
 0,13365 in dirre werlte nû hât  
 0,13366 ich en ruoche wirdet mîn niemer rât  
 0,13367 daz ich sus geredet hân  
 0,13368 des en darf nieman haben wân  
 0,13369 daz ich daz tuo von törheit  
 0,13370 ich en kan anders mîn leit  
 0,13371 mit nihte gerechen  
 0,13372 müeste ich den leide sprechen  
 0,13373 die mir guot unde leben  
 0,13374 mit solichen sorgen hânt gegeben  
 0,13375 sô spræche ich daz ich wäre wert  
 0,13376 daz man mich würfe in einen hert  
 0,13377 unt verbrente dârinne”  
 0,13378 dô entgiengen ir die sinne  
 0,13379 unt quam in ire ungewalt  
 0,13380 sie viel nider al verstalt  
 0,13381 al verstürzet al verkårt  
 0,13382 als ein stein alsô hart

- 0,13383 ir was die sprâche entgangen  
 0,13384 bleich als ein wahs ire wangen  
 0,13385 unt eineme tôtēn wole gelîch  
 0,13386 der vrouwen schrîete iegelich  
 0,13387 dô sie ûf die erden sleif  
 0,13388 Helena sie begreif  
 0,13389 unde begunde schrîen unde klagen  
 0,13390 unde hiez sie in ein gadem tragen  
 0,13391 an ein bette sie dô lac  
 0,13392 unz an den dritten tac  
 0,13393 in aller der gebære  
 0,13394 als sie verscheiden wäre  
 0,13395 an werke unde an gelâze  
 0,13396 grôze unmâze  
 0,13397 Parîs dô stalte  
 0,13398 Priamus sich qualte  
 0,13399 sie lägen beide alle die naht  
 0,13400 ûf Troilum gestraht  
 0,13401 vriunde unde mâge schrîeten al  
 0,13402 alsô sêre daz der sal  
 0,13403 dâ Troilus inne lac  
 0,13404 al erbibete unde erschrac  
 0,13405 dô ez tagen began  
 0,13406 Priamus sich versan  
 0,13407 daz der tac ûf gienc  
 0,13408 dô sante er einen jungelinc  
 0,13409 der ump einen vride würbe  
 0,13410 êr dâ ieman mî verdürbe  
 0,13411 der bote tet daz er hiez  
 0,13412 des vrides des er biten liez  
 0,13413 den wolten sie im niet versagen  
 0,13414 sie gâben im zuo drîzic tagen  
 0,13415 dô hiez Priamus vruo  
 0,13416 balde grîfen dâr zuo  
 0,13417 unde einen stein wirken  
 0,13418 daz nieman konde gemerken  
 0,13419 op er ie gesæhe  
 0,13420 einen stein sô wæhe  
 0,13421 dô daz grap was gereit  
 0,13422 Troilus wart dâr in geleit  
 0,13423 mit sôgetânen êren  
 0,13424 solte ich ez iuch lêren  
 0,13425 ich en kunde es niht vollenkommen  
 0,13426 als ir von Hector hât vernomen  
 0,13427 alsô wart hier getân  
 0,13428 dannoch hetten sie alle wân  
 0,13429 daz Ecuba wäre tôt  
 0,13430 iedoch begonde ire nôt

- 0,13431 slîfen unt wanken  
 0,13432 sie lac an den gedanken  
 0,13433 wie sie getæte dem den tôt  
 0,13434 der ir dise grôze nôt  
 0,13435 unde dise herzeleit tete  
 0,13436 mit vluoche oder mit gebete  
 0,13437 oder mit zoubernisse  
 0,13438 oder mit verrættenisse  
 0,13439 oder mit solichen dingen  
 0,13440 sie ez mohte vollenbringen  
 0,13441 dô gedâhte sie daz  
 0,13442 daz sie mit verrættenisse baz  
 0,13443 iren willen mohte verenden  
 0,13444 sie dâhte daz sie senden  
 0,13445 nâch Achille solte  
 0,13446 als sie ime wolte  
 0,13447 Polixenam ire tohter geben  
 0,13448 die wäre im liep sô daz leben  
 0,13449 sie dâhte "wenne er kumen ist  
 0,13450 sô gedenke ich wole die list  
 0,13451 daz mîn wille geschiet"  
 0,13452 dô en sûmete sie niet  
 0,13453 sie sante nâch Parîse  
 0,13454 unt bat in al die wîse  
 0,13455 daz sie mohte unde kunde  
 0,13456 daz er an der stunde  
 0,13457 williclîchen tæte  
 0,13458 swaz sie in bæte  
 0,13459 sie sprach "Parîs liebe sun  
 0,13460 dû en wolles mînen rât tuon  
 0,13461 unt vile genædic wesen  
 0,13462 ich en mac decheine wîs genesen  
 0,13463 sô grôz ist mîn ungemach"  
 0,13464 Parîs in ire wort sprach  
 0,13465 "ich swere dir in triuwen  
 0,13466 solte ez mich joch geriuwen  
 0,13467 unde solte ez mîn tôt sîn  
 0,13468 ich leiste die bete dîn  
 0,13469 ich geswîge der bete dîn gebot  
 0,13470 leiste ich gerne sô mir got"  
 0,13471 sie sprach "ich hân willen  
 0,13472 daz ich Achillen  
 0,13473 von dem lîbe getuo  
 0,13474 dâ salt dû mir helfen zuo  
 0,13475 ich hette im gelobet Polixenam  
 0,13476 wende mir von im ein bote quam  
 0,13477 der gelobete in triuwen daz  
 0,13478 daz er hinnen vürebaz

- 0,13479 en tæte niemer mère  
 0,13480 daz unser schade wäre  
 0,13481 sint hât er Troilum erslagen  
 0,13482 daz ist daz ich klagen  
 0,13483 sint er uns verrâten hât  
 0,13484 sô ist daz mîn rât  
 0,13485 daz wir in och verrâten  
 0,13486 als er unde die sînen uns tâten  
 0,13487 ich wil in sun Parîs  
 0,13488 besenden in soliche wîs  
 0,13489 daz er gewislîchen kume  
 0,13490 ich wil ahnen sînen vrume  
 0,13491 unde Polixenam holen  
 0,13492 ich bedürfe sîn sô wole  
 0,13493 ich wolle sie im gerne geben  
 0,13494 daz wir behalten unse leben  
 0,13495 unser lant unde unser geine  
 0,13496 ich bringe sie im engeine  
 0,13497 bî daz burctor  
 0,13498 dâ bî mîn sun Hector  
 0,13499 bestatet lît unde Troilus  
 0,13500 sô ganc dû in daz betehûs  
 0,13501 dâ dîne bruoder mîne kint  
 0,13502 rehte vore begraben sint  
 0,13503 aldâ nim sîn ware  
 0,13504 ich weiz wole er kumet dare  
 0,13505 dâ salt dû im tuon den tôt”  
 0,13506 daz sie bat unt gebôt  
 0,13507 vile ungerne er ez tete  
 0,13508 doch muoste er leisten ire bete  
 0,13509 er sprach “wie ungerne ich ez tuo  
 0,13510 doch muoz ich grîfen dâr zuo  
 0,13511 ez gê zuo schaden oder zuo vrumen  
 0,13512 ich bin sô verre dâr in kumen  
 0,13513 daz ich ez widerreden niht en sol  
 0,13514 ez en stêt mir doch niht wole  
 0,13515 ez ist och unritterlich  
 0,13516 des muoz ich doch getroesten mich  
 0,13517 ez ist alsô wâhe enzit  
 0,13518 als langer gebitt  
 0,13519 ez geschê noch an dirre naht  
 0,13520 op dû ez vollenkommen maht”  
 0,13521 sîn muoter sprach “daz sî alsô”  
 0,13522 sie was der rede vile vrô  
 0,13523 einen boten sie dô nam  
 0,13524 der zuo der boteschaft gezam  
 0,13525 unde ez gewerben kunde  
 0,13526 rehte an der stunde

- 0,13527 dô der mâne ûf gienc  
 0,13528 unde hiez in werben diz dinc  
 0,13529 der bote reit stille  
 0,13530 unde warp zuo Achille  
 0,13531 daz im zuo werbene geschach  
 0,13532 dem hêrren er zuo sprach  
 0,13533 dâ er in dem bette lac  
 0,13534 Achilles in dem slâfe erschrac  
 0,13535 dô er die boteschaft verstuont  
 0,13536 balde er ûf stuont  
 0,13537 liebe er im gedâhte  
 0,13538 Antilocum er wahte  
 0,13539 daz was Nestores sun  
 0,13540 er sprach "ich bin wole gewon  
 0,13541 dû bist ein guot helvaz"  
 0,13542 er sagete im diz unde daz  
 0,13543 wie dem dinge wäre  
 0,13544 Antilocô daz mære  
 0,13545 harte wole behagete  
 0,13546 zuohant er sagete  
 0,13547 "wir wollen sament darwert"  
 0,13548 sie nâmén beide ire swert  
 0,13549 unde anders decheine were  
 0,13550 unde slichen ûz dem here  
 0,13551 unde quâmen hin bî daz tor  
 0,13552 dâ begraben lac Hector  
 0,13553 unde sîn bruoder Troilus  
 0,13554 unde giengen in daz betehûs  
 0,13555 dar in was bescheiden  
 0,13556 dâ geschach in übel beiden  
 0,13557 des en versâhen sie sich niet  
 0,13558 als manigen geschiet  
 0,13559 der durch minne wirdet betrogen  
 0,13560 dâ lägen bî den swibogen  
 0,13561 unde bî den wenden  
 0,13562 in vier enden  
 0,13563 zweinzic ritter starke manne  
 0,13564 unde hetten ire halsberge an  
 0,13565 wole zuo gereche in alle wîs  
 0,13566 dâ was och inne Parîs  
 0,13567 ez was dâ vinster inne  
 0,13568 als die künninginne  
 0,13569 hette gerâten  
 0,13570 zuoz in dâr in trâten  
 0,13571 die zwêne hêrren under des  
 0,13572 Antilocus unde Achilles  
 0,13573 dô sie wole quâmen dâr in  
 0,13574 jene wâren hinder in

- 0,13575 unde besluzzzen die türe  
 0,13576 unde zukten ire kerzen her vüre  
 0,13577 ûze den kisten  
 0,13578 jene zwêne dô wole wisten  
 0,13579 wes jenen was zuo muote  
 0,13580 unde dô sie úz der huote  
 0,13581 ûf sie geloufen quâmen  
 0,13582 die jene zwêne nâmnen  
 0,13583 ire swert an die rehten hant  
 0,13584 ump die lerzen wunden sie ire gewant  
 0,13585 unde gehielten sich zuo ire manheit  
 0,13586 in en was dâ bereit  
 0,13587 dechein ander were  
 0,13588 die zweinzic wâren zweier her  
 0,13589 zweinzic zwêne bestuonden  
 0,13590 die zwêne widerstuonden  
 0,13591 mit solichen gebären  
 0,13592 op sie gewâfenet wâren  
 0,13593 sie hetten sich in wole entsaget  
 0,13594 sie wâren blôz sô unverzaget  
 0,13595 wâren sie gewarnet dar kumen  
 0,13596 sie hetten in den lîp genomen  
 0,13597 ez was vile unwæne  
 0,13598 daz under zweinzigem zwêne  
 0,13599 der ietweder was blôz  
 0,13600 enthielten sô manigen slac grôz  
 0,13601 sie hetten lenger dechein gehege  
 0,13602 in wart zuo vile der slege  
 0,13603 die sie blôz entviengen  
 0,13604 sie hiezen sie dingem  
 0,13605 daz sie gæben ire swert  
 0,13606 Achilles sprach "des ir gert  
 0,13607 daz sol iuch wole werden"  
 0,13608 er sluoc ir viere zuo der erden  
 0,13609 mit dem selben swerte  
 0,13610 des man zuo im gerte  
 0,13611 den vünften sluoc er dâr nâch  
 0,13612 im was zuo dem sehsten vile gâch  
 0,13613 daz er im samet tæte  
 0,13614 dô was von ungeræte  
 0,13615 Antilocus ervallen  
 0,13616 under den andern allen  
 0,13617 wolte in Achilles hân beratt  
 0,13618 unde als er über in trat  
 0,13619 daz er in generte  
 0,13620 dô starp sîn geverte  
 0,13621 dâ er über im stuont  
 0,13622 wende er was sô gewundet

- 0,13623 daz er muoste wesen tôt  
 0,13624 in der kreftigen nôt  
 0,13625 Parîs dô her vüre lief  
 0,13626 sîne ritter er ane rief  
 0,13627 "slahet balde den man  
 0,13628 nû hât er dechein gewer an  
 0,13629 tretet im zuo alle sît"  
 0,13630 "hêrre Parîs op ir küene sît"  
 0,13631 sprach hêrre Achilles  
 0,13632 "sô erholet iuch des  
 0,13633 des iuch an in werre  
 0,13634 ir stêt mir harte verre  
 0,13635 swie ich hier nû lûze  
 0,13636 hette ich iuch dâ ûze  
 0,13637 ich wolte mîne stille hân  
 0,13638 unde wolte iuch mit den vuozzen bestân  
 0,13639 sol diz ein betehûs sîn  
 0,13640 daz ist übel an mir schîn  
 0,13641 ich quam her durch guot in  
 0,13642 ump daz ich hier verrâten bin"  
 0,13643 sie bestuonden in mit zorne  
 0,13644 hinden unde vorne  
 0,13645 unde ouch gein den sîten  
 0,13646 den hêrren sie zuoschritten  
 0,13647 obene unt unde  
 0,13648 daz nieman en kunde  
 0,13649 sîn gesehen dechein teil  
 0,13650 weder ganz noch geheil  
 0,13651 er wart sô sêre gewundet  
 0,13652 daz er in dem bluote stuont  
 0,13653 als in einen brunnen  
 0,13654 im was der kraft zuorunnen  
 0,13655 er hette der beine deheine gewalt  
 0,13656 er was zuoschîtet unde zuospalt  
 0,13657 sô daz im daz herze entsanc  
 0,13658 Parîs im dô zuo spranc  
 0,13659 unde sluoc im abe eine hant  
 0,13660 Achilles sîn swert ûf want  
 0,13661 unde wolte in slahen wider  
 0,13662 dô viel er mit dem slage nider  
 0,13663 dô sluogen sie alle dare  
 0,13664 unde zuohacketen in gare  
 0,13665 dô nam er sîn ende  
 0,13666 in dem ellende  
 0,13667 mit solicher manheit  
 0,13668 daz ez allen rittern leit  
 0,13669 sî unde iemer müeze wesen  
 0,13670 die diz hoerent lesen

- 0,13671 daz von sô manigen boesen zagen  
 0,13672 ein solich helt wirdet erslagen  
 0,13673 ir was ocht nie dechein  
 0,13674 den sîn swert ie berein  
 0,13675 er mochte ez wole gewîsen  
 0,13676 ocht wunte er Parîsen  
 0,13677 sînes swertes spitz  
 0,13678 hette sîn antlitze  
 0,13679 sô garwe zuohouwen  
 0,13680 daz er sîne vrouwen  
 0,13681 mit ganzem munde niemer mêt  
 0,13682 en kunde geküssen als êr  
 0,13683 er muoste den narwen haben  
 0,13684 Parîs hiez sîne begraben  
 0,13685 der wâren vünve beliben tôt  
 0,13686 Parîs sînen knehten gebôt  
 0,13687 er en wolte sie es niht erlâzen  
 0,13688 sie en wurfen sie an die strâze  
 0,13689 Antilocum unt Achillen  
 0,13690 sie tâten sînen willen  
 0,13691 sie wurfen sie ûzer der türe  
 0,13692 bî die sûle hin vüre  
 0,13693 dâ hêrre Hector ûfe lac  
 0,13694 dô begunde der tac  
 0,13695 harte schône schînen  
 0,13696 Parîs mit den sînen  
 0,13697 mit rittern unt mannen  
 0,13698 huop sich dô dannen  
 0,13699 dirre tôt unt dirre mort  
 0,13700 was iezunt komen ein teil vort  
 0,13701 danne in die stat zuo Ilion  
 0,13702 ez weste Agomennon  
 0,13703 unde allez sîn her  
 0,13704 dô vlouc daz mære über mere  
 0,13705 harte wîten in die lant  
 0,13706 wende Achilles was wole bekant  
 0,13707 von sterke unde von manheit  
 0,13708 des wart daz mære vile breit  
 0,13709 daz jâmer unde die leide  
 0,13710 ump die hêrren beide  
 0,13711 was in dem her alsô grôz  
 0,13712 daz ire ruof unde ire dôz  
 0,13713 erhal unde ire geschreie  
 0,13714 unde ire klage maniger leie  
 0,13715 mochte erbarmen einen stein  
 0,13716 sie wolten alle überein  
 0,13717 Achillen holen mit gewalt  
 0,13718 ir iegelich Parîsen schalt

- 0,13719 durch die untriuwe  
 0,13720 "got wolle daz ez in geriuwe  
 0,13721 in vile kurzen zîten"  
 0,13722 Agomennon hiez boten rîten  
 0,13723 hin zuo Priamô in die stat  
 0,13724 unde hiez in biten unde bat  
 0,13725 mit grôzer vlêhe  
 0,13726 daz er an gute sâhe  
 0,13727 unde hieze in die hêrren wider geben  
 0,13728 die alsô jâmerlîche ire leben  
 0,13729 in dem betehûse hetten verloren  
 0,13730 Parîse was die rede zorn  
 0,13731 daz er es gedâhte  
 0,13732 sîn bruoder in dâr zuo brâhte  
 0,13733 Helenus der wîssage  
 0,13734 beide mit bete unde mit klage  
 0,13735 daz man sie wider geben hiez  
 0,13736 dô man sie brâhte daz volc geliez  
 0,13737 als ez unsinnic wäre  
 0,13738 Nestor von sîner swære  
 0,13739 wande er den sun tôt sach  
 0,13740 sîne hende zuobrach  
 0,13741 unde vervluochete sîne jâr  
 0,13742 er zuoroufete sîne hâr  
 0,13743 unde zuoreiz sîn gewant  
 0,13744 unde sprach daz er in sîn lant  
 0,13745 Antilocum senden solte  
 0,13746 dô geschach daz als er wolte  
 0,13747 in sîneme lande wart er begraben  
 0,13748 dô hette Agomennon ûf erhaben  
 0,13749 ein werc unde ûf geleit  
 0,13750 von sôgetâner zierheit  
 0,13751 daz nieman soliches niht vant  
 0,13752 op er durchvüere tûsent lant  
 0,13753 er hiez wirken einen stein  
 0,13754 dâ von golde inne schein  
 0,13755 vile manic schoene biled  
 0,13756 daz in walde noch in gevilde  
 0,13757 in der luft noch in dem mer was  
 0,13758 an dem steine man ez las  
 0,13759 als Dares hât gelârt  
 0,13760 ûf den stein geworht wart  
 0,13761 ein biled gelîch einer maget  
 0,13762 von der iuch vore ist gesaget  
 0,13763 sie was Polixena genant  
 0,13764 sie hette ein vaz an der hant  
 0,13765 von eineme rubîne  
 0,13766 gelîch der sunnen schîne

- 0,13767 als ein bluot alsô rôt  
 0,13768 daz vaz bezeichenete sînen tôt  
 0,13769 wende er hette sîn bluot unde sîn leben  
 0,13770 ump ire minne gegeben  
 0,13771 die ander hant hette daz vaz  
 0,13772 der wercman des niht vergaz  
 0,13773 er hette dâr ane geschriven  
 0,13774 wie er zuo Trôje was beliben  
 0,13775 von wîbe verrâten  
 0,13776 in den sarc sie tâten  
 0,13777 wurze maniger hande  
 0,13778 in pfellînen gewande  
 0,13779 den hêren sie bewunden  
 0,13780 unde balsemeten sîne wunden  
 0,13781 dô der stein was bereit  
 0,13782 Achilles wart dâr in geleit  
 0,13783 sie rihten ûf viere  
 0,13784 sûle von grôzer ziere  
 0,13785 dâr ûf wart der sarc erhaben  
 0,13786 daz dâr ane was ergraben  
 0,13787 daz golt schein überal  
 0,13788 über velt unde über tal  
 0,13789 über wazzer über berc  
 0,13790 ez en wart nie schoener werc  
 0,13791 die von Trôje jâhen  
 0,13792 als sie ez gesâhen  
 0,13793 ez wäre daz bezziste  
 0,13794 daz ieman iergen weste  
 0,13795 als er gesprochen hette vore  
 0,13796 dô hiez der alte Nestor  
 0,13797 sînen sun bären  
 0,13798 unde sante in mit êren  
 0,13799 hin heim in sîn lant  
 0,13800 daz was Pirô genant  
 0,13801 unde hiez in under den mâgen  
 0,13802 die dâ bestatet lâgen  
 0,13803 mit anderme sîneme geslehete  
 0,13804 begraben nâch sîneme rehte  
 0,13805 under des die kriechische diet  
 0,13806 gienc zuo râte unde riet  
 0,13807 waz sie ane giengen  
 0,13808 op sie mit decheinen dingen  
 0,13809 ieman kunde gelêren  
 0,13810 op sie zuo lande kêren  
 0,13811 mohten oder wolten  
 0,13812 oder wen sie kiesen solten  
 0,13813 der Achillen ræche  
 0,13814 dirre rât unde diz gespræche

- 0,13815 drî tage werte  
 0,13816 dirre disses gerte  
 0,13817 jener gerte anders wes  
 0,13818 dô vereinten sie sich des  
 0,13819 an dem vierden tage  
 0,13820 daz Calcas ire wîssage  
 0,13821 an ireme gote vernæme  
 0,13822 waz in zuo rehte quæme  
 0,13823 âne beite unde âne vrïst  
 0,13824 Calcas üebete sîne list  
 0,13825 er gesprach sînen got  
 0,13826 dô vernam er daz gebot  
 0,13827 unt ein antwûrte sus getân  
 0,13828 die Kriechen sulen hier bestân  
 0,13829 schiere geschiet ire wille  
 0,13830 er ist geboren von Achillese  
 0,13831 der iuch zuo helfen kumen sol  
 0,13832 die Kriechen verstuonden sich niht wole  
 0,13833 wer der selbe wäre  
 0,13834 der got sprach niht mère  
 0,13835 sie begunden vrâgen  
 0,13836 under Achilles mâgen  
 0,13837 stille unde offenbâre  
 0,13838 op dâ ieman wäre  
 0,13839 der Achilles kint erkente  
 0,13840 daz er sie nente  
 0,13841 dô wart ir vile dâ genant  
 0,13842 Ajax ir einen dô vant  
 0,13843 der ez wole sîn mochte  
 0,13844 unt dâr zuo tohte  
 0,13845 nû hoeret wie Ajax sprach  
 0,13846 "ich weiz wole waz wîlen geschach  
 0,13847 in Licomedis lande  
 0,13848 sîne tohter ich wole erkante  
 0,13849 von der Achilles ein kint gewan  
 0,13850 als ich mich versinnen kan  
 0,13851 Licomedes hât daz kint  
 0,13852 vünvzehen jâr ez sint  
 0,13853 daz ez sîn muoter gebar  
 0,13854 ez ist rehte gevar  
 0,13855 unt als Achilles gestalt  
 0,13856 unde ist vünvzehen jâr alt  
 0,13857 starc unt draete  
 0,13858 swer nû boten hæte  
 0,13859 der dar kumen kunde  
 0,13860 ich weiz wole daz er ez vündde  
 0,13861 er ist Pirrus genant"  
 0,13862 Agomennon erdâhte zehant

- 0,13863 wer zuo boten dar gezam  
0,13864 sînen bruoder er dâr zuo nam  
0,13865 Menelaô wart bevolhen  
0,13866 daz er den knappen solte holen  
0,13867 er sprach er wäre es gerende  
0,13868 daz im guot ærende  
0,13869 zuo werbende geschæhe  
0,13870 ez was an der næhe  
0,13871 daz der vride ûz gienc  
0,13872 sie rihten sich aber ûf den rinc  
0,13873 sô die wurz entspringet  
0,13874 unt der vogel singet  
0,13875 unde langet der tac  
0,13876 unt ruch unt smac  
0,13877 süezet ûf der ouwe  
0,13878 sô daz gras von dem touwe  
0,13879 nazzet hin gein morgene  
0,13880 sô die werlt von sorgen  
0,13881 in die vröuwede kêret  
0,13882 dô wart ire leit gemêret  
0,13883 die süeze zît in sûre wart  
0,13884 sie wâren zuo velde gekârt  
0,13885 hier zuo dort zuo  
0,13886 an dem morgene harte vruo  
0,13887 mit der sunnen schîne  
0,13888 Ajax von Salemîne  
0,13889 vore den andern reit  
0,13890 harte schoene unt gemeit  
0,13891 Parîs gein im quam  
0,13892 manic ritter lobesam  
0,13893 volgeten beidersît in  
0,13894 daz was ire êrste begin  
0,13895 der sluoc den jener jenen  
0,13896 gein den ougen gein den zenen  
0,13897 swâ er in treffen mohte  
0,13898 Ajax sîn swert ruhte  
0,13899 alsô tet och Parîs  
0,13900 unt Philomenîs  
0,13901 an dem selben willen was  
0,13902 Eneas unde Esdras  
0,13903 andersît Agomennon  
0,13904 Diomedes unde Thelamon  
0,13905 unt Ulixes der wîse  
0,13906 zuo gufte unde zuo prîse  
0,13907 beide zuo bejage unde zuo lobe  
0,13908 eine nider ein ander obe  
0,13909 eine wider ûf ein ander nider  
0,13910 here dare vort wider

- 0,13911 nâch sterke unde nâch krancheit  
 0,13912 dirre baz jener wirs streit  
 0,13913 der kranke behagel man  
 0,13914 an dem starken den prîs wan  
 0,13915 dem starken trægen missegienç  
 0,13916 ump sus getâne dinc  
 0,13917 klagete zuo strîte der zage  
 0,13918 daz sîn hinkender pfage  
 0,13919 wäre harte træge  
 0,13920 unt dâr zuo vorewäge  
 0,13921 sô er was wole gesunt  
 0,13922 unde was des küenen ros gewundet  
 0,13923 an houbete oder an beine  
 0,13924 der klagete harte kleine  
 0,13925 ez was im leit daz ez hanc  
 0,13926 iedoch er vaste zuo dranc  
 0,13927 unde klagete ez niet  
 0,13928 op im sîn strîten misseriet  
 0,13929 sô klagete der bloede  
 0,13930 sîn halsberc wär snoede  
 0,13931 er wäre niht guot zuo gereche  
 0,13932 er en ruochete mit welicher hande zech  
 0,13933 er ûz dem strîte quam  
 0,13934 der küene nihtesniet war nam  
 0,13935 op sîn halsberc zuoreiz  
 0,13936 er en wolte strît noch kreiz  
 0,13937 schiuhen durch sînen halsberc  
 0,13938 er üebete ritterlîche werc  
 0,13939 mit heldes handen  
 0,13940 von sus getânen schanden  
 0,13941 dem boesen zagen ie war  
 0,13942 daz der küene iht tuon tar  
 0,13943 von solichen dingen ez geschach  
 0,13944 daz Ajax zuo Parîse sprach  
 0,13945 "ir hât Achillen erslagen  
 0,13946 gelîche eineme dietzagen  
 0,13947 an dem helde boesez âs  
 0,13948 den mort den dû begangen hâs  
 0,13949 dû en würde reht ritter nie  
 0,13950 daz wil ich bereden alhier  
 0,13951 mit schilde unde mit spere  
 0,13952 bist dû küene sô rît here"  
 0,13953 "gern" sprach Parîs  
 0,13954 "man saget daz dû mîn mâc sîs  
 0,13955 Esionen mîner wasen sun  
 0,13956 des bin ich ungewon  
 0,13957 daz mich der schelte  
 0,13958 wole her zuo velde

- 0,13959 ich wil als dû wilt"  
 0,13960 sie ebeneten sich under ire schilt  
 0,13961 beide dirre unde der  
 0,13962 unde zuobrâchen die sper  
 0,13963 zuo den swerten sie griffen  
 0,13964 scharpfes gesliffen  
 0,13965 von stahel vile herte  
 0,13966 Ajax sich wole werte  
 0,13967 er sluoc sîn brûn îsen  
 0,13968 hine gein Parîsen  
 0,13969 einen slac er im gap  
 0,13970 unde sluoc im den arm ap  
 0,13971 er sluoc anderwerbe dare  
 0,13972 unde zuospield im daz houbet gare  
 0,13973 Parîs viel zuo der erden  
 0,13974 dâ muoste jámer werden  
 0,13975 dâ verlös Parîs den lîp  
 0,13976 daz klageten meide unde wîp  
 0,13977 ez was im ein unsælic tac  
 0,13978 des tages dô er tôt lac  
 0,13979 der schoene in der schoenen zît  
 0,13980 wart zuohouwen unt zuoschîtet  
 0,13981 ûf dem grünen grase  
 0,13982 sîn schoene munt sîn nase  
 0,13983 sîne ougen sîne wangen  
 0,13984 lâgen dâ behangen  
 0,13985 mit bluomen mit krûte  
 0,13986 daz gezam dem vrouwendrûte  
 0,13987 êr Ajax kârte dannen  
 0,13988 von Parîses mannen  
 0,13989 wart er umberinget  
 0,13990 er hette übel gedinget  
 0,13991 wen daz in sîn vater Thelamon  
 0,13992 lôste unt Agomennon  
 0,13993 Ajax unt Diomedes  
 0,13994 Menesteus unde Ulixes  
 0,13995 unde die Kriechen alle gemeine  
 0,13996 huaben sich in engeine  
 0,13997 unde liezen sô dar gân  
 0,13998 in kunde niht vore bestân  
 0,13999 iren slegen noch iren stichen  
 0,14000 die von Trôje wichen  
 0,14001 an der vluht sie nâmnen  
 0,14002 Parîses lîchnamen  
 0,14003 die Kriechen jageten nâch  
 0,14004 jenen was zuo der vluht gâch  
 0,14005 dise volgeten deste baz  
 0,14006 sie en wâren wedersît laz

- 0,14007 eine wîs noch ander wîs  
0,14008 tôt wart hîrre Parîs  
0,14009 in die stat heim gevuoert  
0,14010 die Kriechen quâmen nâch geruort  
0,14011 unz an daz burctor  
0,14012 dâ hielten sie vore  
0,14013 sie besâzen dâ binnen  
0,14014 swie vaste man von den zinnen  
0,14015 unde von den türnen werte  
0,14016 daz kriechische her beharte  
0,14017 sie konden sie niht vertrîben  
0,14018 von mannenn unt von wîben  
0,14019 was in der stat grôze nôt  
0,14020 umb daz Parîs was tôt  
0,14021 unde sie ouch wâren besezzen  
0,14022 des sitzes wart vergezzen  
0,14023 ez was in der âbentzît  
0,14024 sie besluzzen alle sît  
0,14025 tor unde porten  
0,14026 Parîsen sie dô vuorten  
0,14027 dâ man in begraben solte  
0,14028 als sîn vater wolte  
0,14029 in daz betehûs man in truoc  
0,14030 dâ er Achillen inne sluoc  
0,14031 Helena dâr in quam  
0,14032 als schiere sie vernam  
0,14033 daz er dâr in getragen was  
0,14034 sie zuoroufete ire vahs  
0,14035 unt zuoreiz ire gebende  
0,14036 unde want ire hende  
0,14037 unde klagete ire ellende  
0,14038 unt sprach "hiute sî mîn ende  
0,14039 daz mich mîn muoter ie gebar  
0,14040 stirp lîp sêle var  
0,14041 ich en ruoche rehte war  
0,14042 daz dû ouch kumes dar  
0,14043 dâ Parîses ist  
0,14044 var balde âne vryst  
0,14045 mir ist leit daz dû hier bist  
0,14046 eiâ herze nû brist  
0,14047 lâ mîne sêle hinnen varn  
0,14048 wenne wäre ich arme vervarn  
0,14049 dô ich was ein westebarn  
0,14050 ich kan mich doch niht bewarn  
0,14051 ich en müeze verscheiden  
0,14052 von sorgen unde von leiden  
0,14053 waz ist uns beiden  
0,14054 beschert unt bescheiden

- 0,14055 müesten wir ensament sîn  
 0,14056 sô wolte ich durch die liebe dîn  
 0,14057 mîden iemer sunnenschîn  
 0,14058 unde trinken wazzer vüre den wîn  
 0,14059 vüre brôt kaf unde vesen  
 0,14060 unser en kan decheiner genesen  
 0,14061 daz Cassandra hât gelesen  
 0,14062 daz mac nû wole wâr wesen  
 0,14063 daz sie mir vore hât gesehen  
 0,14064 daz ist daz mîrre teil geschehen  
 0,14065 daz ich mit den ougen sehen  
 0,14066 des muoz ich nû mite jehen  
 0,14067 des landes bluome Parîs  
 0,14068 sæliger man süeze amîs  
 0,14069 vrouwen êre ritter prîs  
 0,14070 daz dû hier sus verwandelt lîs  
 0,14071 waz sol mîn gewerden”  
 0,14072 von sorgen unde von swerden  
 0,14073 von grôzen unwerden  
 0,14074 viel sie zuo der erden  
 0,14075 ir entgienc der sin sie niht sprach  
 0,14076 sie en hörte noch en sach  
 0,14077 sie en weste waz ir geschach  
 0,14078 sô grôz was ire ungemach  
 0,14079 Ecuba die tet alsame  
 0,14080 “waz sol ich arme wîbes name  
 0,14081 ich weiz wole wes ich den lîp hân  
 0,14082 ich bin des leides durchgân  
 0,14083 als daz vel der beize  
 0,14084 kalte unt heize  
 0,14085 beide bleich unde rôt  
 0,14086 sorge swære leit nôt  
 0,14087 die vüerent mich ûz unde in  
 0,14088 in mîn herze in mînen sin  
 0,14089 alsô gereit unde alsô gerat  
 0,14090 als dâ man einen pfat  
 0,14091 alle tage bûwet  
 0,14092 mîn leit wirdet verniuwet  
 0,14093 ie von tage zuo tage  
 0,14094 des verdriuzet mich der klage  
 0,14095 des bin ich zuo ungeverte  
 0,14096 starc unt herte”  
 0,14097 Priamus ouch in klage was  
 0,14098 unde dâr mite Eneas  
 0,14099 die ritter wâren alle sô  
 0,14100 die knappen wâren unvrô  
 0,14101 die vrouwen sâzen dâr inne  
 0,14102 unde klageten sîne minne

- 0,14103 sie sprâchen daz er wäre  
0,14104 der bezziste minnære  
0,14105 der ie geschuohete sînen vuoz  
0,14106 sie lobeten sînen gruoz  
0,14107 sîne gelâz unde sînen ganc  
0,14108 wäre die naht eines jâres lanc  
0,14109 sô redeten sie anders niet  
0,14110 wen daz im von minnen was geschiet  
0,14111 zuo wâne unde zuo wâre  
0,14112 stille unt offenbâre  
0,14113 dâ was bereitet ein sarc  
0,14114 bezzer denne tûsent marc  
0,14115 dâ wart Parîs in geleit  
0,14116 mit harte grôzer zierheit  
0,14117 rîche was sîn gewant  
0,14118 ein vingerlîn an sîner hant  
0,14119 von edelme golde  
0,14120 als ez sîn vater wolte  
0,14121 ûf sîn houbet eine krône  
0,14122 mit gesteine harte schoene  
0,14123 guot ruch guot smac  
0,14124 von wurzen vile dâr inne lac  
0,14125 zuo êren unde zuo minnen  
0,14126 irere gotinnen  
0,14127 die dâ heizet Pallas  
0,14128 ein betehûs geworht was  
0,14129 dâr ûf huoben sie den stein  
0,14130 über alle die lant er dâ schein  
0,14131 zuo ruome unde zuo gufte  
0,14132 hôhe in der lufte  
0,14133 als iuch vore gesaget ist  
0,14134 die Kriechen hetten manige list  
0,14135 zuo dem gesezze erdâht  
0,14136 unde hetten vore die stat brâht  
0,14137 an den grunden unde an der hoehe  
0,14138 mangen unde ebenhoehe  
0,14139 geschütze pfetelâre  
0,14140 gein die erkâre  
0,14141 gedillete hamîden  
0,14142 gein den türnen unde den bervriden  
0,14143 maniger hande gewere  
0,14144 gehüetet hette daz her  
0,14145 gein müren unde gein zinnen  
0,14146 unde hetten sie dâ enbinnen  
0,14147 besezzen alsô harte  
0,14148 daz jene von der warte  
0,14149 kûme kumen kunden  
0,14150 hier hân ich ein rede vunden

- 0,14151 der man hier wole entbære  
 0,14152 unde och ein teil swære  
 0,14153 sint ez aber vore geschriben ist  
 0,14154 würde ir an mir brist  
 0,14155 man spræche ich hette gelâzen  
 0,14156 vore vorhte die strâze  
 0,14157 ich en törste niht vollenvarn  
 0,14158 op ich kan ich wil ez bewarn  
 0,14159 sint im gerâten hât sîn sin  
 0,14160 des volger ich bin  
 0,14161 daz im des zuo muote was  
 0,14162 daz er hier hôhe rede las  
 0,14163 ich hân noch jungers namen  
 0,14164 ich wolte mich des iedoch schamen  
 0,14165 daz ich ungesaget lieze  
 0,14166 daz er mich sprechen hieze  
 0,14167 Occeanus ist daz mer genant  
 0,14168 daz alle die werlt unde alle die lant  
 0,14169 umbevliuzet unde umbegât  
 0,14170 vier ûzvlüzze ez hât  
 0,14171 der ir iegelîche  
 0,14172 sîn lant unde sîn rîche  
 0,14173 sunderlîchen beslozzen  
 0,14174 ein teil ist gevlozzen  
 0,14175 engegen dâ uns die sunne entstât  
 0,14176 daz ander gein dâ sie under gât  
 0,14177 dâ sie ûf gêt daz ist oriêns  
 0,14178 dâ sie under gêt dâ ist occidêns  
 0,14179 daz dritte teil dâ engein  
 0,14180 dâ der mittetac entschein  
 0,14181 daz ist in meridiê  
 0,14182 sô vliuzet der vierde sê  
 0,14183 dâ engein rehte andersît  
 0,14184 dâ ist kelten alle zît  
 0,14185 daz teil heizet septemtriô  
 0,14186 wie nider wie hôh  
 0,14187 wie lanc wie breit  
 0,14188 der teilunge der ir sît bereitt  
 0,14189 ir iegelich ûf der erden ist  
 0,14190 mit grôzer kunst mit grôzer list  
 0,14191 liez ez Julius mezzen  
 0,14192 ein keiser vermezzen  
 0,14193 Julius niht en vergaz  
 0,14194 die werlt er alle übermaz  
 0,14195 die lant aller hande  
 0,14196 die wazzer in dem lande  
 0,14197 ire rihte ire krümbe  
 0,14198 die gesezzen wâren dâr umbe

- 0,14199 ire wunder unt ire ziere  
 0,14200 âne die vlüzze viere  
 0,14201 die ich vore habe genant  
 0,14202 sô sîn ir drîzic nochdant  
 0,14203 die von den fierien vliezent  
 0,14204 vünvzic wazzer schiezent  
 0,14205 her in unde kumen von in  
 0,14206 von disen ich gelârt bin  
 0,14207 daz sie sint die grôzesten  
 0,14208 die minnesten unde die boesesten  
 0,14209 reine unde unreine  
 0,14210 grôz unt kleine  
 0,14211 beide starc unde kranc  
 0,14212 die hânt von disen iren ganc  
 0,14213 Julius der ez mezzen liez  
 0,14214 wîse boten er hiez  
 0,14215 versuochen mit schiffen  
 0,14216 waz die erde hette begriffen  
 0,14217 dâ die wazzer ûfe varen  
 0,14218 innwendic drîzic jâren  
 0,14219 die boten bevunden  
 0,14220 wie die lant stuonden  
 0,14221 unde wie die wazzer giengen  
 0,14222 sie sageten von manigen dingn  
 0,14223 die sie hetten gesehen  
 0,14224 unde waz in wunders was geschehen  
 0,14225 Julius hiez schrîben  
 0,14226 beide mannen unde wîben  
 0,14227 unde von den buochen künden  
 0,14228 unde von des meres ünden  
 0,14229 waz dâ wunders ûfe sî  
 0,14230 unde waz ûf der erden dâ bî  
 0,14231 der daz zuo sagene dæhte  
 0,14232 êr er daz vollenbræhte  
 0,14233 sîn selbes ende würde êr  
 0,14234 hin gein meridiem  
 0,14235 dâ der mittetac entstât  
 0,14236 daz lant soliche hitze hât  
 0,14237 daz dâ nie mennische ne quam  
 0,14238 noch rehte vernam  
 0,14239 waz dâr inne müge wesen  
 0,14240 dâ en kunde och nieman genesen  
 0,14241 mit decheiner slahte sinne  
 0,14242 zuo der sunnen anebeginne  
 0,14243 dâ wir sie des morgenes sehen  
 0,14244 des in dâ was geschehen  
 0,14245 ein teil ich es geschrieben vant  
 0,14246 dâ sint die mere alsus genant

- 0,14247 ein arm heizet Caspion  
0,14248 unde der ander Persion  
0,14249 der dritte Tiberiadis  
0,14250 Alfatones der vierde ist  
0,14251 daz vünfte mare rubrum  
0,14252 daz sechste arabicum  
0,14253 daz sibende Caforte  
0,14254 von dem ahten ich hörte  
0,14255 daz ez daz tôte mer sî  
0,14256 waz dâr inne unde dâr bî  
0,14257 wunders wäre zuo komen  
0,14258 dâ hân ich hier alsus vernomen  
0,14259 dâ ist wunderes gewes  
0,14260 ein volc heizet Hippopedes  
0,14261 unde ein Lomnine  
0,14262 unde ein Elefantine  
0,14263 die andern heizent alsus  
0,14264 Kypre Rodes Ereus  
0,14265 Crête unt Citherus  
0,14266 Caffata unde Karkasus  
0,14267 Sinai Libanus  
0,14268 Armenius Bodian  
0,14269 Carmetes unde Cassian  
0,14270 diz buoch mir alsus beschiet  
0,14271 berge lant unde diet  
0,14272 des volkes gelâz unde iren ganc  
0,14273 solte ich den sagen ez wär zuo lanc  
0,14274 ich en vant es ouch niht geschriben  
0,14275 des ist ez ungesaget beliben  
0,14276 ungeschriben sie niht en liezen  
0,14277 wie die wazzer hiezen  
0,14278 Ganges unde Theriodes  
0,14279 Heros unde Kanrestes  
0,14280 Sygoton Sygota  
0,14281 Eufrates unt Karmenta  
0,14282 Hyspades unde Kortazê  
0,14283 Armodius unde Susê  
0,14284 Diopargite Crisora  
0,14285 Pactolus unde Alibata  
0,14286 Taxius unde Azonis  
0,14287 Crisos Jordan Tygris  
0,14288 dise wazzer vluzzen alle dâ  
0,14289 mir nennet daz buoch her nâch  
0,14290 die gebiurede in der geine  
0,14291 grôz unde kleine  
0,14292 Azonis von Persia  
0,14293 Taure unde India  
0,14294 Syria Appamena

- 0,14295 unde Mesopotamia  
0,14296 Fenice Komanzine  
0,14297 Fice Palatine  
0,14298 Syre unde Mêde  
0,14299 die hânt hitze bêde  
0,14300 sie ligent bî der sunnen  
0,14301 dirre rede wart begunnen  
0,14302 oht durch daz eine  
0,14303 daz Azoma die geine  
0,14304 von der ir vore beredet sît  
0,14305 bî der sunnen nähe lît  
0,14306 in dem ôriende  
0,14307 daz man erkente  
0,14308 wâ daz lant wäre  
0,14309 durch ein guot mære  
0,14310 daz ich her nâch sagen wil  
0,14311 von wîben wunderlich spil  
0,14312 unde wunderlîche dinc  
0,14313 dâ en ist dechein jungelinc  
0,14314 in dem lande noch man  
0,14315 wen als ich iuch gesagen kan  
0,14316 dâ sint wîpinne  
0,14317 die pflegen decheiner minne  
0,14318 noch decheiner manne  
0,14319 wenne kûme eteswenne  
0,14320 swelich man quæme in ire lant  
0,14321 die wîp erslüegen in zehant  
0,14322 Amazones heizent die wîp  
0,14323 unde zierent iren lîp  
0,14324 mit sîdîn gewande  
0,14325 unde rîtent in ireme lande  
0,14326 nâch der mannesnamen site  
0,14327 unde vuerent ire harnasch mite  
0,14328 sie bezalent zuo rosse grôzen prîs  
0,14329 ire lant ist alle wîs  
0,14330 rîche unde wole gelegen  
0,14331 nû hoeret wie sie manne pflegen  
0,14332 als der sumer entstât  
0,14333 swelich ritter wort hât  
0,14334 daz er guot ritter sî  
0,14335 der kumet in ein lant dâ bî  
0,14336 ireme lande vile næhe  
0,14337 daz lant ist harte wâhe  
0,14338 dâr koment in die vrouwen  
0,14339 ûf wisen unde ûf ouwen  
0,14340 vliuzet dâ manic bach  
0,14341 dâ ist zuo minnen guot gemach  
0,14342 lûter brunne grüene walt

0,14343	forest harte wole gestalt
0,14344	boume breit unde lanc
0,14345	bluomenschîn vogelsanc
0,14346	unde wurze maniger leie
0,14347	dar kument in dem meie
0,14348	die wîp alle gemeine
0,14349	unde in kumet engeine
0,14350	ritter wole vermezzen
0,14351	ireme lande bî gesezzen
0,14352	drî mânôde sint sie dâr inne
0,14353	unt pflegent irere minne
0,14354	ein iegelich wîp mit dem manne
0,14355	von dem sie vore kint gewan
0,14356	sie bringent dar ire kint
0,14357	die in dem andern jâre geboren sint
0,14358	swenne sie kêrent dannen
0,14359	mannesname mit mannen
0,14360	sô müezen dâ belîben
0,14361	wîbesname mit wîben
0,14362	von sus getâner wünne
0,14363	wirdet dâ wîbes künne
0,14364	unde ziehent ire geslehte
0,14365	zuo strîte unde zuo vehte
0,14366	zuo ritterlîcher êre
0,14367	durch diz selbe mære
0,14368	ein teil ich úz gegangen bin
0,14369	nû kêre ich aber wider in
0,14370	in den selben jâren
0,14371	dô die von Trôje wâren
0,14372	besezzen daz mære überal
0,14373	in daz lant úz schal
0,14374	dô daz mære úz quam
0,14375	unde diz Pendesilea vernam
0,14376	des landes küninginne
0,14377	sie hette holde minne
0,14378	zuo hêrren Hectore getragen
0,14379	sie en wiste niht daz er erslagen
0,14380	vore manigeme tage lac
0,14381	dô si ez vernam sie erschrac
0,14382	dô sante die vrouwe
0,14383	mit vlêhe unde mit drouwe
0,14384	nâch iren wîben allen
0,14385	daz Parîs was ervallen
0,14386	dô ir daz wart gesaget
0,14387	dô muoste wîp unde maget
0,14388	sweren eine hervart
0,14389	als ir daz gesaget wart
0,14390	daz Troilus och was tôt

- 0,14391 über al ire lant sie gebôt  
0,14392 swelich vrouwe  
0,14393 erheben mohte ein swert  
0,14394 daz sie vüere zuo Trôje wert  
0,14395 als sie nochdant  
0,14396 Deiphebus tôt ervant  
0,14397 dô was dâ beitenes niht  
0,14398 úz ireme lande sie schiet  
0,14399 harte wole werhaft  
0,14400 unde vuor mit einer grôzen kraft  
0,14401 mit eineme micheln wîbes here  
0,14402 zuo hülfe unde zuo gewere  
0,14403 den zuo Trôje inne  
0,14404 des wart die küninginne  
0,14405 vrouwe Pendesilea  
0,14406 harte wole entvangen dâ  
0,14407 mit andern iren vrouwen  
0,14408 swer wunder wolte schouwen  
0,14409 der mohte sehen wunder  
0,14410 dechein wîp was dâr under  
0,14411 sie wäre sô wole gare  
0,14412 daz in ritterlicher schare  
0,14413 noch nie dechein man  
0,14414 schoener harnasch gewan  
0,14415 dô sie quâmen in die stat  
0,14416 die vrouwe Priamum bat  
0,14417 daz er sich reitte in den strît  
0,14418 sie sprach "nû Hector tôt lît  
0,14419 nû hoeret anders niht dâr zuo  
0,14420 wen ritter gelîch sîne kolzen schuohe  
0,14421 helm ûf houbet halsberge an  
0,14422 bereitet iuch balde ir manne  
0,14423 wir wîp sîn ouch gereit  
0,14424 mir ist Hectoris tôt leit  
0,14425 wir müezen ûf daz gevilde"  
0,14426 an iren wîzen schilden  
0,14427 was ein güldîn rant  
0,14428 ouch man dâr ane vant  
0,14429 edel gesteine  
0,14430 grôz unde kleine  
0,14431 ich en weiz waz mîr spreche  
0,14432 wen sie was wole zuo gereche  
0,14433 unt ire wîbe alle  
0,14434 zuo ruome unde zuo schalle  
0,14435 dô bereitte sich Philomenis  
0,14436 zuo strîte wole in alle wîs  
0,14437 dô er was bereite  
0,14438 dô wart er ire geleite

- 0,14439 rehte an daz burctor  
 0,14440 dâ die Kriechen lâgen vore  
 0,14441 Dardanides hiez die porte  
 0,14442 dô der Kriechen volc gehörte  
 0,14443 daz sie ûf tâten  
 0,14444 sumelîche dâr vüre trâten  
 0,14445 sumelîche zuo rosse sprungen  
 0,14446 dâ wart gedrungen  
 0,14447 mit grôzer unminne  
 0,14448 die dâ wâren inne  
 0,14449 gerne sie úz wolten  
 0,14450 die dâr ûze wesen solten  
 0,14451 die wolten gerne dâr in  
 0,14452 des wart gezoc under in  
 0,14453 der quam úz in ein teil  
 0,14454 sumelîchen geschach daz heil  
 0,14455 sumelîchen unsælichkeit  
 0,14456 daz kriechische volc sige streit  
 0,14457 unt bezalte dâ den prîs  
 0,14458 der küene Philomenis  
 0,14459 der was úz der stat kumen  
 0,14460 des hette er grôzen schaden genomen  
 0,14461 wen daz im Polidamas  
 0,14462 zuo guoten staten bî was  
 0,14463 Polidamas sluoc umbe sich  
 0,14464 unde sîner gesellen ir iegelich  
 0,14465 einen küninc er nider sluoc  
 0,14466 der ire baniere truoc  
 0,14467 den erbâten die von Trôje  
 0,14468 unde die von Pafagôje  
 0,14469 die wâren mit Philomène  
 0,14470 ez was ouch unwæne  
 0,14471 daz die Kriechen solten kêren  
 0,14472 zuo der vluht mit unêren  
 0,14473 ir was ouch ein teil gekârt  
 0,14474 iedoch in des trôst wart  
 0,14475 Diomedes zuo reit  
 0,14476 unt Menesteus der helet gemeit  
 0,14477 Ulixes unde Agomennon  
 0,14478 Ajax unde Thelamon  
 0,14479 quâmen sô zuo geruort  
 0,14480 als sie dar gevuort  
 0,14481 der starke wint hette  
 0,14482 irere gesellen ungerâete  
 0,14483 wandelte sich schiere  
 0,14484 sie triben die Trôiere  
 0,14485 rehte ûf die graft  
 0,14486 wen die innere kraft

- 0,14487 geschütze unt steine  
0,14488 ir wäre genesen kleine  
0,14489 ez riten under des  
0,14490 die vrouwen Amazones  
0,14491 von Amazonienlande  
0,14492 ez en dûhte decheine schande  
0,14493 als ez hier zuo lande wäre  
0,14494 daz sie mit ungebære  
0,14495 mit schilden unde mit swerten  
0,14496 starkes sturmes gerten  
0,14497 sie en kunden hier niht dâr mite  
0,14498 sint ez aber dô was site  
0,14499 sie begiengen die site dâ alsô  
0,14500 daz sie es alle wurden unvrô  
0,14501 die vore manigen jâren  
0,14502 zuo strîte gewesen wâren  
0,14503 sie volgeten irere vrouwen  
0,14504 unde giengen vaste houwen  
0,14505 swâ irere vrouwen ros spranc  
0,14506 ire gereite als von schellen klanc  
0,14507 unde ander ire gesmîde  
0,14508 mit zorne unt mit nîde  
0,14509 Diomedes sie bestuont  
0,14510 des wart er sêre gewundet  
0,14511 dâr umbe zurnte Thelamon  
0,14512 er sprach "ich bin ungewon  
0,14513 daz ein wîp einen man  
0,14514 mit sper unde mit schilder rîte an  
0,14515 iuch gezæme vile baz  
0,14516 op ir zuo manne hettet haz  
0,14517 daz ir ez anders an im ræchet  
0,14518 denne ir in mit sper stæchet"  
0,14519 des quam er ûf sie gevlogen  
0,14520 unde begreif sie mit dem satelbogen  
0,14521 unde wolte sie nider ziehen  
0,14522 "ir en müget mir niht entvlihen  
0,14523 daz iuwer der tiuvel walte  
0,14524 nû gebet daz swert balde"  
0,14525 sie sprach "ir heischet mîn swert  
0,14526 des werdet ir harte wole gewert"  
0,14527 sie sluoc mit dem swerte dare  
0,14528 daz er viel under die schare  
0,14529 dâ wart er geslagen unde getrat  
0,14530 doch wart er kûme berat  
0,14531 unde êr er quæme dannen  
0,14532 sô geschach sînen mannen  
0,14533 unde im schade sô grôz  
0,14534 daz ez alle die verdrôz

- 0,14535 die den hêrren solten retten  
0,14536 man mohte in dem bluote weten  
0,14537 sô vile hette sie erslagen  
0,14538 ire wîp begunden zuo jagen  
0,14539 die Kriechen wichen in vore  
0,14540 dâ wart Hector  
0,14541 gerochen von wîben  
0,14542 swer ez solte schrîben  
0,14543 er quæme es niemer zuo ende  
0,14544 sie besprangten ire hende  
0,14545 mit zornigeme muote  
0,14546 in der Kriechen bluote  
0,14547 der Kriechen lac dâ vile erslagen  
0,14548 sie wâren vile nâch verzagen  
0,14549 wende sie hetten dechein gehege  
0,14550 si ne kunden irre slege  
0,14551 lenger niht erlîden  
0,14552 sie vluhen in ire hamîden  
0,14553 dâ wurden sie úz gejaget  
0,14554 beide wîp unde maget  
0,14555 sluogen swaz sie ir begriffen  
0,14556 jene vluhen zuo den schiffen  
0,14557 die vrouwen volgeten in nâch  
0,14558 unde tâten in einen schâch  
0,14559 ûf unde nider ump den stat  
0,14560 sie wâren vile nâch worden mat  
0,14561 dâ mohte der vuozgenge  
0,14562 genesen niht die lenge  
0,14563 sich en kunden die alten  
0,14564 niergen behalten  
0,14565 die schif sie in entbranten  
0,14566 swaz sie ir beranten  
0,14567 die ritter mohten niht genesen  
0,14568 der küninc wäre mat gewesen  
0,14569 wen daz er vaste vore vlôch  
0,14570 swâ die küninginne nâch zôch  
0,14571 von den schiffen unz an die gezelt  
0,14572 dâ ne was dechein velt  
0,14573 ez en wäre von warte vol  
0,14574 wen daz er die züge kunde wole  
0,14575 er müeste mat sîn beliben  
0,14576 unde hette die naht och niht vertriben  
0,14577 die küninginne dannen  
0,14578 im unde sînen mannen  
0,14579 wäre zuogangen der maht  
0,14580 dô gehalf im die naht  
0,14581 der sie von dem schâche treip  
0,14582 daz er ûf dem velde beleip

- 0,14583 dô sie dannen schieden  
0,14584 brâten unde sieden  
0,14585 Priamus harte vile hiez  
0,14586 den vrouwen er bereiten hiez  
0,14587 beide wilt unt zam  
0,14588 dô die vrouwe in die stat quam  
0,14589 er pflac ir zuo danke  
0,14590 mit ezzene unde mit tranke  
0,14591 er vuorte ouch mit minnen  
0,14592 ire gesellinnen  
0,14593 die wîchaften Amazones  
0,14594 unde genâdete in des  
0,14595 daz sie mit êren  
0,14596 zuo velde gewesen wären  
0,14597 die Kriechen wâren sô hin dannen  
0,14598 sie en westen niht waz ane gân  
0,14599 doch was ez alsô wæhe  
0,14600 daz man balde sæhe  
0,14601 waz man tuon mohte  
0,14602 als man ez vüre zuhte  
0,14603 sie kârten an ire alte behalt  
0,14604 dâ was die hertstat kalt  
0,14605 unt die spîse dünne  
0,14606 man gewünne swaz man gewünne  
0,14607 oder tæte swaz man tæte  
0,14608 sô was dâ ungeræte  
0,14609 gemaches in wênic geschach  
0,14610 sie hetten in der stat gemach  
0,14611 an dem andern tage vruo  
0,14612 die wîp reitten sich aber zuo  
0,14613 unde vunden gein morgene  
0,14614 die Kriechen mit sorgen  
0,14615 dannoch in dem gezelte  
0,14616 unde ladeten sie zuo velde  
0,14617 dô geschach in dem tage  
0,14618 rehte alsô grôz klage  
0,14619 als in vore geschên was  
0,14620 des tages ir wênic genas  
0,14621 an dem dritten tage alsame  
0,14622 von wîben manic mannesname  
0,14623 an dem tage tôt lac  
0,14624 dô ergangen was der tac  
0,14625 unde velt unde gras  
0,14626 von rittern allez vol was  
0,14627 tôt wunt unde lam  
0,14628 den Kriechen ein boteschaft quam  
0,14629 des wart gevrôuwet ire muot  
0,14630 wende die boteschaft was in guot

- 0,14631 daz mit sînen schiffen  
 0,14632 den stat hette begriffen  
 0,14633 der küninc Menelaus  
 0,14634 unde mit im Pirrus  
 0,14635 hêren Achilles sun  
 0,14636 des vröuwete sich Agomennon  
 0,14637 unde daz her algemeine  
 0,14638 unde riten in engeine  
 0,14639 die hêrren sie entviengen  
 0,14640 mit allen den dingen  
 0,14641 daz dâ nihtes ane gebrast  
 0,14642 als man einen lieben gast  
 0,14643 von rehte solte entvâhen  
 0,14644 wende sie in liebe gesâhen  
 0,14645 unde joch nie sô liebe mî  
 0,14646 weder nâch noch êr  
 0,14647 des nahtes dô sie geâzen  
 0,14648 Achilles sie niht vergâzen  
 0,14649 dâr klageten Mirmidones  
 0,14650 daz ire hêrre Achilles  
 0,14651 von eineme mordære  
 0,14652 zuo Trôje ermordet wäre  
 0,14653 dô antwurte in Pirrus  
 0,14654 "waz hilfet daz ir klaget sus  
 0,14655 op iuch sîn tôt leit sî  
 0,14656 swîget unde gedenket dâr bî  
 0,14657 daz ir in gerechet  
 0,14658 nû ir sus sprechet  
 0,14659 lâzet rede unde klage  
 0,14660 unde weset vruo vore tage  
 0,14661 ûf" vore der mittenahrt  
 0,14662 hette sie Pirrus ûf gewaht  
 0,14663 unde sprach "gebet mir balde her  
 0,14664 mînes vaters schilt unde sîn sper  
 0,14665 sînen halsberc unde den helm dâr mite  
 0,14666 den der úzerwellte smit  
 0,14667 Volcanus gesmidet hât  
 0,14668 wîset mir wâ sîn ros stât  
 0,14669 sîn swert wil ich ouch hân"  
 0,14670 daz er hiez daz was getân  
 0,14671 im was sîn ros dare brâht  
 0,14672 mit kovertiuren wole bedaht  
 0,14673 dâr ûf ein gereite  
 0,14674 von grôzer schoenheite  
 0,14675 Pirrus der edel jungelinc  
 0,14676 uobete ritterlîche dinc  
 0,14677 er begunde sîne kolzen schuohen  
 0,14678 unde sînen halsberc ane tuon

- 0,14679 dâr ûf ein sîdîn gewant  
 0,14680 sînen helm er ûf bant  
 0,14681 unde daz swert umbe die sîten  
 0,14682 sie en gesâhen bî den zîten  
 0,14683 nie sô rehtes vaters sun  
 0,14684 unde als Agomennon  
 0,14685 unde daz her was gereit  
 0,14686 Pirrus ûf daz ros schreit  
 0,14687 unde als er den stegereif  
 0,14688 mit den vuoze begreif  
 0,14689 zuo halse er den schilt hienc  
 0,14690 unde schutte ûf unde vienc  
 0,14691 den schaft daz er gesâhe  
 0,14692 op er wære zâhe  
 0,14693 vorne an dem satelbogen  
 0,14694 hiez er hâhen einen bogen  
 0,14695 kocher unt pfîle  
 0,14696 bî der selben wîle  
 0,14697 was bî ireme gezelte nâch  
 0,14698 komen Pendesilea  
 0,14699 dô Pirrus gehörte  
 0,14700 die wîp er dare ruorte  
 0,14701 unde quam gevlogen ûf sie  
 0,14702 êr er dem rosse enthielte ie  
 0,14703 sô tet er der wîbe  
 0,14704 mî denne hundert von dem lîbe  
 0,14705 vürebaz er ruorte  
 0,14706 sîn ros in dô vuorte  
 0,14707 ûf Polidamam  
 0,14708 sîn scharpf eglevîe im quam  
 0,14709 mitten an den schenkel  
 0,14710 unde vürebaz durch enkel  
 0,14711 ump daz er gewundet was  
 0,14712 doch koberte sich Polidamas  
 0,14713 unde sluoc im vaste engeine  
 0,14714 des ahte Pirrus kleine  
 0,14715 er sluoc under sînen slegen  
 0,14716 einen slac im engegen  
 0,14717 daz sîn bluot ûz pfeif  
 0,14718 unde er ûf die erden sleif  
 0,14719 dâ wære der hîerre tôt beliben  
 0,14720 wen daz dâr zuo quam getriben  
 0,14721 der wîse Philemenis  
 0,14722 doch en was er niet sô wîs  
 0,14723 im geschähe vile leide dâ  
 0,14724 wende im was Pirrus nâch  
 0,14725 der sich an ime rach  
 0,14726 daz im als deme geschach

- 0,14727 den er wolte hân berat  
 0,14728 sie lâgen beide an einer stat  
 0,14729 zuo ranten ire manne  
 0,14730 daz sie in gehulfen dannen  
 0,14731 Pirrus en statete des niet  
 0,14732 iedoch Ajax entriet  
 0,14733 daz Pirrô missegienge  
 0,14734 des quam er zuo ringe  
 0,14735 zuo staten hêrren Pirrô  
 0,14736 sie zwêne hielten dâ sô  
 0,14737 über Philomène  
 0,14738 daz tûsent durch sie zwêne  
 0,14739 muosten in ligen lâzen  
 0,14740 ire ros begunden grâzen  
 0,14741 sie begunden sêre houwen  
 0,14742 des erzurnten die vrouwen  
 0,14743 die dâ hielten in dem strîte  
 0,14744 iegelich ire zeichen schrîte  
 0,14745 mit wîplicher stimme  
 0,14746 lûte unt grimme  
 0,14747 der vrouwen stimme erschal  
 0,14748 die wîp die ranten zuo al  
 0,14749 dô sie zuo wâren gekârt  
 0,14750 die hêrren hielten in hart  
 0,14751 unde ire geverten  
 0,14752 den wîben sie sich werten  
 0,14753 dâ verlös den lîp  
 0,14754 manic man unde wîp  
 0,14755 Ajax Pendesileam  
 0,14756 in dem sturme ane quam  
 0,14757 unde hurte sie dâr nider  
 0,14758 zuo rosse spranc sie balde wider  
 0,14759 einen manne ez gezæme  
 0,14760 daz er sô zuo rosse quæme  
 0,14761 des quam sie gerant  
 0,14762 dâ sie Philemenem vant  
 0,14763 under den pferden  
 0,14764 ligende ûf der erden  
 0,14765 dô rief sie ire wîp an  
 0,14766 daz sie hulfen dem manne  
 0,14767 daz geschach als sie gebôt  
 0,14768 dâ beleip manic ritter tôt  
 0,14769 iedoch ez alsô geschach  
 0,14770 als die vrouwe vore sprach  
 0,14771 Philemenis wart berat  
 0,14772 er hette lange nôt gehat  
 0,14773 "wie nû" sprach Pirrus  
 0,14774 "wie tuont dise wîp sus

- 0,14775 wie sulen wir sie gestillen  
 0,14776 mit nälden unde mit spillen  
 0,14777 solten wîp umbe gên  
 0,14778 nû kan in niht vore bestên  
 0,14779 der tiuel ist dâr inne"  
 0,14780 dô sprach die küniginne  
 0,14781 "hêrre guote kneht wie wir wîp sîn  
 0,14782 wole her nâch nû werde schîn  
 0,14783 waz iuch von wîben  
 0,14784 müge hier belîben  
 0,14785 nû ir Achilles sun sît  
 0,14786 von dem Hector erslagen lît  
 0,14787 den iuwer vater hât erslagen  
 0,14788 nû mohte ich übel vertragen  
 0,14789 iuwer stolzlîchen wort  
 0,14790 alsô müget ir ouch den mort  
 0,14791 der an iuwerme vater geschach"  
 0,14792 Pirrus dâr engein niht sprach  
 0,14793 dô stach daz wîp ûf den man  
 0,14794 der man sich ouch des versan  
 0,14795 daz ire gebære  
 0,14796 doch wîplich wäre  
 0,14797 unt entvienc den stich  
 0,14798 ûf den schilt vüre sich  
 0,14799 den schaft er under den arm sluoc  
 0,14800 daz ros daz in truoc  
 0,14801 daz manete er mit den sporen  
 0,14802 er stach wende in twanc zorn  
 0,14803 ûf die vrouwen mit solicher kraft  
 0,14804 daz sîn vile starker schaft  
 0,14805 êr bræche oder wiche  
 0,14806 êr sie vore dem stiche  
 0,14807 mochte besezzen sîn  
 0,14808 daz wart dâ wole schîn  
 0,14809 wende dô sie zuo vuoze quam  
 0,14810 sie begreif unde nam  
 0,14811 mit unmuote ire swert  
 0,14812 unde lief gein Pirrô wert  
 0,14813 dô satzete sich Pirrus zuo gewere  
 0,14814 under ire beider here  
 0,14815 huop sich die nôt vile mêt  
 0,14816 denne sie erhaben wäre êr  
 0,14817 zuo reit Agomennon  
 0,14818 Ajax unt Thelamon  
 0,14819 Menelaus unde Diomedes  
 0,14820 Menesteus unde Ulixes  
 0,14821 dise mîrten den strît  
 0,14822 alsô tet in andersît

- 0,14823 Philemenis unde Esdras  
 0,14824 Priamus unde Polidamas  
 0,14825 unde Remus von Zizonie  
 0,14826 mit den von Lankonie  
 0,14827 quam Eneas zuo gevarn  
 0,14828 dar quam maniger muoter barn  
 0,14829 dô mohte die erde  
 0,14830 durch brechen von der swerde  
 0,14831 die sie ûf ir truoc  
 0,14832 Pirrus manigen dâ ersluoc  
 0,14833 och entvienc er dâ manigen slac  
 0,14834 iedoch allez daz erschrac  
 0,14835 daz in mit den ougen gesach  
 0,14836 sînen vater er rach  
 0,14837 mit sôgetânen vreisen  
 0,14838 daz witewen unde weisen  
 0,14839 dâr nâch klageten manic jâr  
 0,14840 sîne viânde hetten sîn alle vâr  
 0,14841 dô widerreit im Glancon  
 0,14842 hêrren Andenoris sun  
 0,14843 vaterhalben sîn bruoder was  
 0,14844 der küene Polidamas  
 0,14845 den sluoc er mit eineme slage  
 0,14846 daz er tôt unde sîn pfage  
 0,14847 aldâ beliben beide  
 0,14848 sîn bruoder im leide  
 0,14849 Polidamas gedâhte  
 0,14850 zuo helfe er ime gâhete  
 0,14851 doch en was im nie sô gâch  
 0,14852 ne wäre Pendesilea  
 0,14853 unde ander manic wîbesname  
 0,14854 ime wäre geschehen alsame  
 0,14855 dâ wart solich slahte  
 0,14856 der ez sach unt ahte  
 0,14857 unde ez selbe schreip  
 0,14858 der saget daz beleip  
 0,14859 zehen tûsent liute  
 0,14860 nihtes wen rosse hiute  
 0,14861 ein arm betelære  
 0,14862 zuo eineme hêrren worden wäre  
 0,14863 die starke nôt werte  
 0,14864 daz nieman vrides gerte  
 0,14865 doch einen mânot umbe  
 0,14866 dâ en mohte man en swümme  
 0,14867 nieman gerîten  
 0,14868 daz bluot in den zîten  
 0,14869 vlôz alsô starke  
 0,14870 mit hirne unde mit marke

- 0,14871 mit trôre unde mit sweize  
 0,14872 op dâ ûf dem kreize  
 0,14873 ein ebenwahsen man stuont  
 0,14874 im gienc daz bluot in den munt  
 0,14875 Pirrus stalte wunder dâ  
 0,14876 unde Pendesilea  
 0,14877 zuosamene sie quâmen  
 0,14878 sie begunden râmen  
 0,14879 daz sie im den tôt getæte  
 0,14880 des selben er ouch hæte  
 0,14881 in der selben zít gedâht  
 0,14882 daz wart ouch vollenbrâht  
 0,14883 beide sie unde er  
 0,14884 sluogen zuo arme die sper  
 0,14885 die stuben ûf als ein wint  
 0,14886 sie griffen zuo den swerten sint  
 0,14887 die teilten sie alsô lange  
 0,14888 daz in munt unde wange  
 0,14889 unde der stirne dâr mite  
 0,14890 entgulten irere unsite  
 0,14891 die vrouwe wart sêre gewundet  
 0,14892 daz was reht dô sie bestuont  
 0,14893 einen alsô starken man  
 0,14894 daz er ir sige væhte an  
 0,14895 daz wîp en hette dechein gehege  
 0,14896 der man sluoc ir soliche slege  
 0,14897 daz ir der lîp aller erschrac  
 0,14898 ich en weiz waz ich anders sprechen mac  
 0,14899 ez was des wole wert  
 0,14900 sint sie genomen hette swert  
 0,14901 daz sie den man vant  
 0,14902 der ir sîn swert zuohant  
 0,14903 alsô manlîchen gap  
 0,14904 daz er ir sluoc daz houbet ap  
 0,14905 dô sie verlös den lîp  
 0,14906 dô vluhen alle ire wîp  
 0,14907 die dar kumen wâren  
 0,14908 got wolle daz in unsen jâren  
 0,14909 solich dinc niet geschê  
 0,14910 daz man wîp zuo strîte sê  
 0,14911 bezzer ist dirre site  
 0,14912 daz sie mannen sîn mite  
 0,14913 mit wîplîcheme gelâze  
 0,14914 denne sie mit unmâze  
 0,14915 den mannen mit swerte widerstân  
 0,14916 als ich vore gesaget hân  
 0,14917 man sach dâ von vrouwen  
 0,14918 manigen man zuohouwen

- 0,14919 unde manic wîp von mannen  
 0,14920 doch vluhen die wîp dannen  
 0,14921 sie muosten dannen kêren  
 0,14922 swie küene sie wâren  
 0,14923 doch gesigeten die manne  
 0,14924 Pirrus vaht in sige an  
 0,14925 dâ beleip manic küene degen  
 0,14926 der mit den wîben was belegen  
 0,14927 manic man dare vlôch  
 0,14928 swelichen Pirrus bezôch  
 0,14929 der beleip tôt oder gewundet  
 0,14930 ir dechein im widerstuont  
 0,14931 die Kriechen volgeten nâch  
 0,14932 den von Trôje den was gâch  
 0,14933 dô geschach in als dâ vore  
 0,14934 sie vluhen in daz burctor  
 0,14935 unde in die stat vürebaz  
 0,14936 Pirrus sie dâr inne besaz  
 0,14937 sus bezalte er den prîs  
 0,14938 hier saget uns Ytis  
 0,14939 ein ritter harte wole gelârt  
 0,14940 daz Trôje dô besezzen wart  
 0,14941 als sie muoste sîn verloren  
 0,14942 daz geschach durch zorn  
 0,14943 durch übermuot unde nît  
 0,14944 als ir wole gehoeret sît  
 0,14945 Ytis unde Dares  
 0,14946 die zwêne vereinten sich des  
 0,14947 daz sie tihten unde schriben  
 0,14948 welche vürsten zuo Trôje beliben  
 0,14949 unde wie die stat wart verbrant  
 0,14950 unde wie sie verluren daz lant  
 0,14951 sie wâren beide dâr mite gewesen  
 0,14952 als ich ez von in hân gelesen  
 0,14953 alsô müget iz hier verstân  
 0,14954 hier muoz ich hin wider gân  
 0,14955 dâ ich die rede êr liez  
 0,14956 Priamus der geliez  
 0,14957 sich harte jâmerlîche  
 0,14958 dô im unsæliclîche  
 0,14959 allez daz in hant gienc  
 0,14960 swaz er ie ane gevienç  
 0,14961 er mohte harte wole klagen  
 0,14962 daz die vrouwe was erslagen  
 0,14963 ouch klagete er daz dâ lâgen  
 0,14964 erslagen mit sînen mâgen  
 0,14965 sîne manne unde sîne kint  
 0,14966 unde doch besezzen wart sint

- 0,14967 dô bat er Pirrum sêre  
 0,14968 daz er durch vrouwen êre  
 0,14969 unde durch gotes minne  
 0,14970 im die küninginne  
 0,14971 wolte senden in die stat  
 0,14972 er hette sie gerne bestatet  
 0,14973 dô en wolte Diomedes  
 0,14974 decheine wîs gestaten des  
 0,14975 er sprach "ich bin ir sô gram  
 0,14976 ich wil daz Pendesileam  
 0,14977 vrezzen die hunde  
 0,14978 oder in einen vûlen grunde  
 0,14979 werde gesenket als ein hunt"  
 0,14980 daz geschach aldâ zuo stunt  
 0,14981 in ein wazzer man sie schôz  
 0,14982 daz dâ nâhe bî vlôz  
 0,14983 Trôje wart besezzen sô  
 0,14984 von hêrren Pirrô  
 0,14985 daz Priamus en weste  
 0,14986 waz ime wäre daz bezziste  
 0,14987 Anchises unde Polidamas  
 0,14988 Andenor unde Eneas  
 0,14989 dise viere giengen zuo râte  
 0,14990 des âbendes vile spâte  
 0,14991 iegelich zuo dem andern rât nam  
 0,14992 "wie lange sulen wir durch Helenam  
 0,14993 mit solichen ungenâden leben  
 0,14994 wolte sie Priamus wider geben  
 0,14995 wir mohten ez gerne râten"  
 0,14996 Priatum sie bâten  
 0,14997 daz er ire wort vernæme  
 0,14998 "wie wole ez uns quæme  
 0,14999 daz wir uns versünnen  
 0,15000 wie wir vride gewunnen  
 0,15001 wende uns genâde nie geschach  
 0,15002 sint Cassandra daz sprach  
 0,15003 unde Helenus dîn sun  
 0,15004 daz die êre von Ilion  
 0,15005 als ein wint solte zuovarn  
 0,15006 daz mohten wir noch bewarn"  
 0,15007 Andenor dô ûf stuont  
 0,15008 dem was die zunge unde der munt  
 0,15009 gerade zuo dem worte  
 0,15010 unde swaz zuo rede hörte  
 0,15011 er sprach "hêrre ir sehet wole  
 0,15012 hier en ist venster noch hol  
 0,15013 porte noch burctor  
 0,15014 dâ en sî solich gewer vore

- 0,15015 daz wir unser ougen  
 0,15016 überlût noch tougen  
 0,15017 dar turren gekêren  
 0,15018 op wir joch wären  
 0,15019 als wir vore wâren  
 0,15020 dô in den jären  
 0,15021 dô wir Deiphebum hæten  
 0,15022 unde Troilum den stäten  
 0,15023 unde den schoenen Parîsen  
 0,15024 unt Hectorem den wîsen  
 0,15025 wir mohten mit êren haben getân  
 0,15026 daz ich zuo redene erhaben hân  
 0,15027 daz en ist anders niet  
 0,15028 wen von den wir uns haben geniet  
 0,15029 übelre tage unde übler naht  
 0,15030 sint sie here wart brâht  
 0,15031 daz wir wider geben Helenam  
 0,15032 die uns zuo unsâlden in diz lant quam"  
 0,15033 Anfimacus dâ bî saz  
 0,15034 unt widerredete daz  
 0,15035 den hêrren er antwurte  
 0,15036 unde sprach mit disen worte  
 0,15037 "ez en geschiet niemer  
 0,15038 die wîle daz mir iemer  
 0,15039 die sèle in dem lîbe ist  
 0,15040 wê dem râte wê der list  
 0,15041 tuot hin die rede schiere  
 0,15042 wir ne wollen durch iuch viere  
 0,15043 zuo Trôje tuon alle  
 0,15044 iht des uns missevalle  
 0,15045 ez ist übel bestatet  
 0,15046 daz iuch die zunge ist sô gerat  
 0,15047 liebe hêrre Andenor  
 0,15048 sint ir vüre daz burctor  
 0,15049 en turret niht geluogen  
 0,15050 die iuch die vriunde ersluogen  
 0,15051 an der worte sît ir hier  
 0,15052 ez ist noch unde was ie  
 0,15053 swer ez an der rede hât  
 0,15054 daz er geswîchet an der tât"  
 0,15055 von zorne sprach Eneas  
 0,15056 "waz dû hôhe rede hâs  
 0,15057 wâ was dîn manheit  
 0,15058 dô man ûf dem velde streit  
 0,15059 wâ was dîn tât hier hâs dû wort  
 0,15060 ich hân joch selten gehört  
 0,15061 ich swîge der tât dînen namen  
 0,15062 wir wollen uns des râtes niht schamen"

- 0,15063 von zorne Priamus zuo dranc  
 0,15064 sîn zorn in sô überwant  
 0,15065 daz er sînen munde  
 0,15066 gestiuren niht en kunde  
 0,15067 er sprach "Andenor ich was iuch holt  
 0,15068 nû hât iuwer rât an mir verschult  
 0,15069 daz ich iuch muoz wesen gram  
 0,15070 ir wâret ump Esionam  
 0,15071 hin zuo Kriechen geriten  
 0,15072 unde wurdet dâ mit unsiten  
 0,15073 entvangen unde gelâzen  
 0,15074 gêt iuwer strâzen  
 0,15075 daz iuch mîn ouge ie gesach  
 0,15076 wande iuch dâ leide geschach  
 0,15077 des hân ich mîne kint verloren  
 0,15078 ich hette Eneam erkoren  
 0,15079 zuo einen wîsen manne  
 0,15080 des sante ich in wîlen wanne  
 0,15081 zuo Kriechen mit Parîse  
 0,15082 sîner lêre unde sîner wîse  
 0,15083 brâhte er here Helenam  
 0,15084 hin abe mir allez leit quam  
 0,15085 ich en weiz wâ mite ir vart  
 0,15086 mîn leit wäre allez wole bewart  
 0,15087 wen daz ir beide  
 0,15088 mich brâht hât zuo leide  
 0,15089 unde wollet mir noch schaden mî  
 0,15090 got gebe daz ez iuch übel ergê"  
 0,15091 Eneas sprach zuo jenen drîn  
 0,15092 "wole ûf ir hêrren unde kêren hin  
 0,15093 dirre hêrre zürnet sêre  
 0,15094 daz ist mir unmære  
 0,15095 ich kume doch wole hinnen  
 0,15096 er wirdet es noch wole innen  
 0,15097 in einer harte kurzen vryst  
 0,15098 daz uns sîn rede daz minneste ist  
 0,15099 er zürne mit sîneme knechte  
 0,15100 er denket unrehte  
 0,15101 wænet er daz ich sîn eigen sî"  
 0,15102 ûf stuonden jene drî  
 0,15103 Anchises unde Polidamas  
 0,15104 Anthenor der dritte was  
 0,15105 sie en ahnen sîner zorne niet  
 0,15106 iedoch Priamus entriet  
 0,15107 sint dô er sich versan  
 0,15108 daz er die viere wîse manne  
 0,15109 sô erzürnet hæte  
 0,15110 des dâhte er waz er tæte

- 0,15111 Anfimachum nam er sint  
 0,15112 der was sîn sun sîn jungestez kint  
 0,15113 der was junc unde unbekant  
 0,15114 von dem ich wênic vant  
 0,15115 an disem buoche geschriben  
 0,15116 êr die viere tôt beliben  
 0,15117 Parîs unde Deiphebus  
 0,15118 Hector unt Troilus  
 0,15119 zuo Anfimachô sprach er dise wort  
 0,15120 "sun dû hâst wole gehört  
 0,15121 wie Andenor unde Eneas  
 0,15122 Anchises unde Polidamas  
 0,15123 mit zorne unde mit leide  
 0,15124 hinnen sint gescheiden  
 0,15125 nû weiz ich daz harte wole  
 0,15126 niemanne ich ez doch en sol  
 0,15127 wen dir aleine sagen  
 0,15128 sie sint sô boese unde soliche zagen  
 0,15129 unde sô ungetriwe  
 0,15130 unse lant unde unser gebiuwe  
 0,15131 wirdet von in verrâten  
 0,15132 ich mac sie wole entrâten  
 0,15133 ouch vürhte ich sie von rehte  
 0,15134 sie sint von starkeme geslehte  
 0,15135 unde sint ouch selben sô starc  
 0,15136 unde alsô übel unt alsô arc  
 0,15137 daz sie râten unsern tôt  
 0,15138 oder sie bringen uns in nôt  
 0,15139 daz wir verliesen unser êre  
 0,15140 unde op daz nû wäre  
 0,15141 als ich vore geredet hân  
 0,15142 sô ist uns bezzer getân  
 0,15143 daz sie den tôt kiesen  
 0,15144 denne wir die stat verliesen  
 0,15145 sus hân ich under zwein  
 0,15146 zweier übel daz ein  
 0,15147 daz minnre uns erkoren  
 0,15148 sie sint vile baz verloren  
 0,15149 denne wir verloren sîn  
 0,15150 morgene swenne der sunnenschîn  
 0,15151 under gêt spâte  
 0,15152 sô wil ich sie zuo râte  
 0,15153 vile heimelîche laden  
 0,15154 alher in dit selbe gadem  
 0,15155 sô salt dû mit dînen gesellen  
 0,15156 zuo ireme tôde stellen  
 0,15157 sô gelônen wir in der arbeit"  
 0,15158 Anphimachus sprach "ich bin bereit

- 0,15159 rehte ump die selben zît  
0,15160 als liep als ir mir sît  
0,15161 sô habet dâr zuo sanften muot  
0,15162 mich dunket iuwer rede guot  
0,15163 ouch behaget mir der rât  
0,15164 den ir nû getân hât"  
0,15165 daz Priamus hier riet  
0,15166 des en vinden ich hier niet  
0,15167 wie ez ûz quæme  
0,15168 unde ez Eneas vernæme  
0,15169 doch weiz ich wole daz ez ûz quam  
0,15170 lihte dûhte es Eneam  
0,15171 von sîn selbes sinnen  
0,15172 wende sie mit unsinnen  
0,15173 wæren gescheiden dâ vore  
0,15174 Eneas unde Andenor  
0,15175 Polidamas unde Anchises  
0,15176 die vereinten sich des  
0,15177 daz sie die stat wolten geben  
0,15178 ûf solich gedinge daz sie daz leben  
0,15179 behielten unde daz guot dâ mite  
0,15180 durch die selben unsite  
0,15181 disen rât sie tâten  
0,15182 wende Priamus hette gerâten  
0,15183 mit sîneme sune disen mort  
0,15184 daz ire rât unde ire wort  
0,15185 geschæhe unde ire wille  
0,15186 verholen unde stille  
0,15187 zuo den Kriechen dô vuoren  
0,15188 unde vriuntschaft dar swuoren  
0,15189 Eneas mit den drîn  
0,15190 unde Encalegon mit in  
0,15191 êr si dâ schieden sich  
0,15192 sô versan sich des ir iegelich  
0,15193 daz sie wole werhaft  
0,15194 wolten mit solicher kraft  
0,15195 in Priames râte wesen  
0,15196 als sie mohten genesen  
0,15197 vore sîneme sune Anphimacô  
0,15198 daz geschach ouch alsô  
0,15199 waz wollet ir daz ich mî sage  
0,15200 sie quâmen an dem andern tage  
0,15201 dô sie besante Priamus  
0,15202 daz in Anphimacus  
0,15203 niht mohte geschaden  
0,15204 sie quâmen in sîn gadem  
0,15205 mit sôgetâner gewer  
0,15206 in en mohte ein her

- 0,15207 dâ niet geschadet hân  
 0,15208 dô hette Priamus entstân  
 0,15209 unde an ireme gelâze vernomen  
 0,15210 daz sie gewarnet wâren kumen  
 0,15211 im anete vile sêre  
 0,15212 daz ez vermeldet wäre  
 0,15213 des en wart dâ niet vollenbrâht  
 0,15214 des er hette gedâht  
 0,15215 ez was im doch harte leit  
 0,15216 daz er ez ûf hette geleit  
 0,15217 sie schieden dannen bî der zît  
 0,15218 ân übel rede unde ân strît  
 0,15219 er en weste waz er tæte  
 0,15220 sint er es begunnen hæte  
 0,15221 sô mohte er niet vollenvarn  
 0,15222 wie sollte er sich bewarn  
 0,15223 sint sie wurden geware  
 0,15224 daz er sie geladet hette dare  
 0,15225 durch verrættenisse  
 0,15226 er en weste gewisse  
 0,15227 waz er ane gienge  
 0,15228 des muoste deme dinge  
 0,15229 wider sînen willen geschên  
 0,15230 er muoste daz hette er versehen  
 0,15231 willen daz sie wolten  
 0,15232 des hette er entgolten  
 0,15233 daz er sie zuo vriunde hette verloren  
 0,15234 durch den andern zorn  
 0,15235 wende er sie gemordet wolte hân  
 0,15236 des muoste er daz ane gân  
 0,15237 daz im lieber wær der tôt  
 0,15238 ein gespræche er gebôt  
 0,15239 die vürsten dare quâmen  
 0,15240 sîne wort sie vernâmen  
 0,15241 des stuont er ûf unde sprach  
 0,15242 daz im zuo sprechene geschach  
 0,15243 "nû sehet ir hêrren alle  
 0,15244 waz iuch gevalle  
 0,15245 grôz unde kleine  
 0,15246 ich en mac niht eine  
 0,15247 danne als ein ander man  
 0,15248 ich en sol noch en kan  
 0,15249 niet tuon ân iuwern rât  
 0,15250 ir sehet wole alle wie ez gât  
 0,15251 erslagen sint uns die jungen  
 0,15252 mit setze betwungen  
 0,15253 sîn wir armen alten  
 0,15254 wie sulen wir uns enthalten

0,15255 uns gêt abe den Kriechen zuo  
 0,15256 ich en weiz rehte waz man tuo  
 0,15257 daz ist doch ein ende  
 0,15258 daz man boten sende  
 0,15259 unde gehoere an den Kriechen wes sie gern  
 0,15260 op wir sie mügen gewern  
 0,15261 mit decheiner sache  
 0,15262 daz uns zuo gemache  
 0,15263 kume unde zuo êren  
 0,15264 daz riete ich êr wir wären  
 0,15265 iemer mîr mit leide  
 0,15266 wen ich zuo boten bescheide  
 0,15267 daz lâze ich an Eneam"  
 0,15268 Eneas zuo boten nam  
 0,15269 Andenorem der alte  
 0,15270 reit dâr hine balde  
 0,15271 dô behagete der ritterschaft  
 0,15272 der rât der bote die boteschaft  
 0,15273 des truoc hîerre Andenor  
 0,15274 einen zelgen ûf daz burctor  
 0,15275 als grüene als ein gras  
 0,15276 einer olîven der zelge was  
 0,15277 er stuont ûf der gewere  
 0,15278 unde wîsete in dem kriechischen here  
 0,15279 er bezeichenete dâ mite  
 0,15280 vride nâch dem site  
 0,15281 unde nâch der alten gewonheit  
 0,15282 vride unde gewisheit  
 0,15283 wart dâ beidersît getân  
 0,15284 Andenor huop sich sân  
 0,15285 dâ er die Kriechen ensament vant  
 0,15286 er sprach "ich bin zuo iuch gesant  
 0,15287 ir sulet mir des gunnen wole  
 0,15288 daz ich hier werben sol  
 0,15289 iuwer grôze arbeit  
 0,15290 unde unser unsælichkeit  
 0,15291 hânt lange gewert  
 0,15292 op ir nû vrides gert  
 0,15293 iemer unt êwiclîche  
 0,15294 sô sprechet endelîche  
 0,15295 wie getâne suone man neme  
 0,15296 daz ez beidersît gezeme  
 0,15297 wollet ir wider Elenam  
 0,15298 durch die doch dise vêhe quam  
 0,15299 daz wir mit vride müezen leben  
 0,15300 die wollen wir gerne wider geben"  
 0,15301 dise rede sprach er überal  
 0,15302 dô wart dâ ruof unde schal

- 0,15303 unde manic rede getân  
 0,15304 iegelich sprach sînen wân  
 0,15305 Agomennon unde Ulixes  
 0,15306 unde och Diomedes  
 0,15307 dirre rede sie sich underwunden  
 0,15308 dô sie der rede begunden  
 0,15309 dô gienc dâr zuo Andenor  
 0,15310 unde leite in ein ander rede vüre  
 0,15311 er sprach "ich unde Eneas  
 0,15312 Anchises unde Polidamas  
 0,15313 wollen geben an iuwer hant  
 0,15314 dise stat unde diz lant  
 0,15315 daz wir behalten den lîp  
 0,15316 unde unse kint unde unse wîp  
 0,15317 unse gesezze unde unse guot  
 0,15318 op man des uns tuot  
 0,15319 stæte gewisheit  
 0,15320 sô sîn wir dâr zuo bereit  
 0,15321 wir viere hân diz gesworen  
 0,15322 durch einen haz unde einen zorn  
 0,15323 unt umbe unminne  
 0,15324 wir hân gewalt dârinne  
 0,15325 Priamus mac ân uns niet  
 0,15326 einen mort er ûf uns riet  
 0,15327 des haben wir disen eit getân  
 0,15328 op ir die stat wollet hân  
 0,15329 sô sehet daz diz verholen sî  
 0,15330 unde gebet mir einen boten ir drî  
 0,15331 der gewerben kunne  
 0,15332 zuo Priamô unde zuo sîneme künne  
 0,15333 daz er wider gebe Helenam  
 0,15334 unt swaz Parîs mit ir nam  
 0,15335 er gebe oder gebe niet wider  
 0,15336 sô tuon wir einen andern rât sider"  
 0,15337 einen boten als er bat  
 0,15338 gâben sie in in die stat  
 0,15339 einen küninc wole bekant  
 0,15340 der was Taltibius genant  
 0,15341 unde tâten im des gewisheit  
 0,15342 des er ûf in hette geleit  
 0,15343 êr er dô dannen kérte  
 0,15344 eines vrides er gerte  
 0,15345 daz sie iren tötten getäten  
 0,15346 als sie dâ vore hæten  
 0,15347 daz geschach och alsus  
 0,15348 Andenor unde Taltibius  
 0,15349 schieden dâ von in drîn  
 0,15350 unde kârten hin zuo Trôje ïn

- 0,15351 die ritter gein in giengen  
 0,15352 Taltibium sie entviengen  
 0,15353 ez was âbentstunde  
 0,15354 ir dechein en kunde  
 0,15355 vernemen ire boteschaft  
 0,15356 des schiet sich die ritterschaft  
 0,15357 unz an den andern tac  
 0,15358 des nahtes Andenor pflac  
 0,15359 Taltibiun mit êren  
 0,15360 mit maniger hande mæren  
 0,15361 wart der âbent hine brâht  
 0,15362 Andenor hæte och erdâht  
 0,15363 daz an den vorderen tagen  
 0,15364 sîn sun Glaucus was erslagen  
 0,15365 des sagete er sîneme gesinde  
 0,15366 wîbe unt kinde  
 0,15367 daz sie vride hatten  
 0,15368 unz sie die tôten bestateten  
 0,15369 unde hiez sie vrûo ûf stân  
 0,15370 unt hin an daz velt gân  
 0,15371 unde suocheten wâ er lâge  
 0,15372 er hiez daz man sîn pflæge  
 0,15373 als ez wole gezæme  
 0,15374 unde im zuo rehte quæme  
 0,15375 dô die naht ergangen was  
 0,15376 ûf des küninges palas  
 0,15377 die vürsten alle quâmen  
 0,15378 von Andenore sie vernâmen  
 0,15379 mit wie getânem mære  
 0,15380 er wider kumen wäre  
 0,15381 Andenor dô ûf stuont  
 0,15382 "ez ist iuch allen wole kunt  
 0,15383 jungen unde alten  
 0,15384 wir hân uns enthalten  
 0,15385 unz hiute an disen tac  
 0,15386 daz unser dechein mac  
 0,15387 rehte dem andern gesagen  
 0,15388 wâr umbe wir dise nôt tragen  
 0,15389 die Kriechen hânt iuch daz entboten  
 0,15390 bî mir unde mit iren boten  
 0,15391 hêrren Taltibiô  
 0,15392 daz die müezen wesen vrô  
 0,15393 die decheine rehte rede verstânt  
 0,15394 unde hier hûs unde hof hânt  
 0,15395 unde mâge unde kint  
 0,15396 oder mit triuwen hier inne sint  
 0,15397 daz en ist anders niet  
 0,15398 von der uns leide ist geschiet

- 0,15399 daz wir die vrouwen wider geben  
0,15400 wer solte iemer mîr leben  
0,15401 mit leide ump vrouwen Helenam  
0,15402 wir en durfen ump Esionam  
0,15403 decheine boese rede hân  
0,15404 mit ir hât vile wole getân  
0,15405 der herzoge Thelamon  
0,15406 durch hîrren Ajacem iren sun  
0,15407 dunket mich daz harte guot  
0,15408 daz ir der Kriechen willen tuot  
0,15409 geschiet ires willen niet  
0,15410 waz sol denne unse diet  
0,15411 sô sîn wir unsælic geboren  
0,15412 unse stat die ist verloren  
0,15413 unse lant unde unse geine  
0,15414 unser êre wirdet sô kleine  
0,15415 op man sie verkoufen wolte  
0,15416 der sie denne koufen solte  
0,15417 den vûnde man leider niergen  
0,15418 got genâde uns Trôieren  
0,15419 eiâ Trôje schoene stat  
0,15420 dîn strâze dîn pfat  
0,15421 unde dîn schoene zuovart  
0,15422 daz sie ie sus besezzen wart  
0,15423 durch eines wîbes namen  
0,15424 daz wir zuo spotte unde zuo schamen  
0,15425 vremeden landen nû müezen sîn  
0,15426 an uns selben ist wole schîn  
0,15427 ungelücke unde unheil  
0,15428 von uns selben daz mîrre teil  
0,15429 kumet unde kumen ist"  
0,15430 mit diser rede mit dirre list  
0,15431 rief er sô daz daz palas  
0,15432 von geschreie vol was  
0,15433 alle die dâ wâren innen  
0,15434 mit grôzen unsinnen  
0,15435 weinten unde schrîeten  
0,15436 unde sprâchen zuo den zîten  
0,15437 stille unde offenbâre  
0,15438 daz sîn rede alsô wære  
0,15439 unde quâmen an sînen rât  
0,15440 swenne der man in munde hât  
0,15441 unt sîn ouge weinet  
0,15442 unde ez sîn herze niht meinet  
0,15443 sô ist er als die want  
0,15444 die man ûzen ganz vant  
0,15445 unde wormæzic ist innen  
0,15446 mit unküstigen sinnen

- 0,15447 mit sînen süezen worten  
 0,15448 schuof er daz sie hörten  
 0,15449 der valsche bote Andenor  
 0,15450 swaz sô er in legete vore  
 0,15451 "eiâ" sprach Priamus  
 0,15452 "wie hât mîn got vergezzen sus  
 0,15453 daz mir wachende geschiet  
 0,15454 wäre mir ez getroumet ich en wânte es niht  
 0,15455 vore eineme halben järe"  
 0,15456 er zohte ûz sîneme hâre  
 0,15457 dô manigen schoenen grâwen loc  
 0,15458 unde zuoreiz sînen roc  
 0,15459 sîne hende er zuosamene sluoc  
 0,15460 unde hette solicher gebære genuoc  
 0,15461 als man zuo habende pflît  
 0,15462 swenne im die sorge bî lît  
 0,15463 dô sprach jâmerlîche  
 0,15464 der küninc von Trôjær rîche  
 0,15465 "eiâ gelücke eiâ heil  
 0,15466 nû hâst dû mir daz swarze teil  
 0,15467 allenthalben zuo gekârt  
 0,15468 mir sint die wîzen wege verspart  
 0,15469 dâ ich wîlen ane gienc  
 0,15470 nû stânt leider mîne dinc  
 0,15471 harte ungewisse  
 0,15472 mich blendet vinsternisse  
 0,15473 die trüeben zît ich meine  
 0,15474 nû bin ich leider eine  
 0,15475 dô ich hette der sâlden schîn  
 0,15476 dô was alle die werlt mîn  
 0,15477 nû hinket mîn êre  
 0,15478 waz mac ich sprechen mère  
 0,15479 tuot ir hêren alle  
 0,15480 swaz iuch gevalle  
 0,15481 ez sî übel oder guot  
 0,15482 mir ist liep swaz ir tuot  
 0,15483 got lâze iuwerme gewerbe wole geschên  
 0,15484 ich wil ez hoeren noch sehen"  
 0,15485 des gienc er dannen  
 0,15486 mit unmanigen mannenn  
 0,15487 als er ûz dem râte quam  
 0,15488 Andenorem unde Eneam  
 0,15489 daz volc algemeine bat  
 0,15490 daz sie sich des landes unde der stat  
 0,15491 zuo gedinge underwunden  
 0,15492 unde swelich gedinge sie vunden  
 0,15493 daz mohte sîn mit êren  
 0,15494 daz sie dâr ane wären

- 0,15495 sie gelobeten alsô  
 0,15496 unde riten mit Taltibiô  
 0,15497 unde sprâchen zuo den Kriechen daz  
 0,15498 "wir en wollen niht vürebaz  
 0,15499 belîben in den leiden  
 0,15500 wir wollen ez gerne scheiden  
 0,15501 ûzen unde innen  
 0,15502 mit liebe unt mit minnen"  
 0,15503 dâ en mohte ander rede niht sîn  
 0,15504 ergangen was der sunnenschîn  
 0,15505 ire rede des ân ende beleip  
 0,15506 daz sie die naht wider treip  
 0,15507 unde dô sie heim quâmen  
 0,15508 der tôten lîchnamen  
 0,15509 wâren in die stat brâht  
 0,15510 Andenor wachete alle die naht  
 0,15511 beide mit riuwen unde mit klage  
 0,15512 des morgenes vruo mit dem tage  
 0,15513 die hêrren sich ûf huaben  
 0,15514 ire tôten sie begruaben  
 0,15515 dô die von Ilion  
 0,15516 Andenor Glaucum sînen sun  
 0,15517 bestatete harte reine  
 0,15518 in eineme mermelsteine  
 0,15519 Philemenis zuo im nam  
 0,15520 die küningîn Pendesileam  
 0,15521 die hette man gesuochet allen den tac  
 0,15522 in dem wazzer dâ sie inne lac  
 0,15523 der vrouwen er sich underwant  
 0,15524 er wolte sie vüeren in ire lant  
 0,15525 daz was bî sîneme lande  
 0,15526 in eineme gewande  
 0,15527 sô man es bezzist konde vinden  
 0,15528 hiez er sie bewinden  
 0,15529 unz er gesæhe  
 0,15530 waz den Trôirern geschæhe  
 0,15531 unde wie ez in ergienge  
 0,15532 zuo suone oder zuo gedinge  
 0,15533 unde als die tôten wâren begraben  
 0,15534 des tages wart dechein rede erhaben  
 0,15535 mit gedinge noch mit suone  
 0,15536 sie hetten genuoc zuo tuone  
 0,15537 daz sie den tôten die sie hæten  
 0,15538 ire reht gar getæten  
 0,15539 Helena gehörte  
 0,15540 daz daz was in worte  
 0,15541 daz man sie solte wider geben  
 0,15542 sie begunde sêre widerstreben

- 0,15543 daz ez niet geschæhe  
 0,15544 doch was ez alsô wæhe  
 0,15545 sint sie es wandel niet en hæte  
 0,15546 daz sie ez williclîche tæte  
 0,15547 swenne dû niht en maht daz dû wilt  
 0,15548 sô kêre umbe den schilt  
 0,15549 des gienc die vrouwe bî der naht  
 0,15550 mit trûrigem muote  
 0,15551 zuo Andenoris heimuote  
 0,15552 unde bat in durch gotes êre  
 0,15553 daz er ir guot wäre  
 0,15554 wie sie zuo hulden quæme  
 0,15555 daz in den lîp niht næme  
 0,15556 Menelaus ire man  
 0,15557 er sprach "ich tuon op ich kan  
 0,15558 beitent unz morgene an den tac  
 0,15559 swaz dâr ûz werden mac  
 0,15560 als ich in doch sprechen sol  
 0,15561 daz geschiet danne wole"  
 0,15562 dô die naht ergangen was  
 0,15563 Andenor unde Eneas  
 0,15564 riten ûz râten  
 0,15565 ump Helenam sie bâten  
 0,15566 daz sie die hulde gewan  
 0,15567 sint huoben sie disen rât an  
 0,15568 "gît man Elenam wider  
 0,15569 daz wäre vile bezzer sider  
 0,15570 als die stat wær gewunnen  
 0,15571 Priamô wir es niht gunnen  
 0,15572 daz ez im sô sanfte ergê  
 0,15573 man sol zuo im muoten êr  
 0,15574 daz Anphimacus sîn sun  
 0,15575 verswere die stat unde Ilion  
 0,15576 op er widerredet daz  
 0,15577 sô mügen wir harte vile baz  
 0,15578 vinden rât unde list  
 0,15579 dâ die stat mit verloren ist"  
 0,15580 daz geschach alsô  
 0,15581 die Kriechen wâren der rede vrô  
 0,15582 des wurden boten mit im gesant  
 0,15583 sô man sie allerwîsest vant  
 0,15584 daz was Diomedes  
 0,15585 unde der wîse Ulixes  
 0,15586 dô die Trôjanâ vrieschen  
 0,15587 daz die Kriechen mîr hieschen  
 0,15588 denne die vrouwen Elenam  
 0,15589 ir iegelich sô underquam  
 0,15590 unde zurnte sô sêre

- 0,15591 daz jenen lieber wäre  
 0,15592 daz sie wären anderswâ  
 0,15593 solich ruof was dâ  
 0,15594 Priamus unde sîne diet  
 0,15595 von zorne ûz dem râte schiet  
 0,15596 ire rede beleip ân ende gar  
 0,15597 durch die sie wâren kumen dar  
 0,15598 Andenor mit in zwein gienc  
 0,15599 einen andern rât er ane vienc  
 0,15600 der was sus getân  
 0,15601 er sprach "ir hêrren ich hân  
 0,15602 eine rede vore gedâht  
 0,15603 die en werde vollenbrâht  
 0,15604 sô ne mügen wir vollenbringen  
 0,15605 unse dinc mit decheinen dingn  
 0,15606 Ilus ein küninc hiez  
 0,15607 der Ilion stiftten liez  
 0,15608 von Ilô heizet ez Ilion  
 0,15609 von im was man des gewon  
 0,15610 daz er naht unde tac  
 0,15611 an sîneme gebete gerne lac  
 0,15612 von grôzer schoenheite  
 0,15613 ein betehûs er ûf leite  
 0,15614 zuo êren unde zuo minnen  
 0,15615 der selben gotinnen  
 0,15616 die dâ heizet Pallas  
 0,15617 als ez vile nâch geworht was  
 0,15618 ein zeichen dâr inne geschach  
 0,15619 daz nieman soliches niet gesach  
 0,15620 ein biled e dâr in gevlogen quam  
 0,15621 schoene unde lobesam  
 0,15622 gelîch einer vrouwen  
 0,15623 wie ez wäre gehouwen  
 0,15624 oder wie ez gesniten wäre  
 0,15625 des wunderte sie iemer mîre  
 0,15626 die ez en gesâhen nie  
 0,15627 die wîle wir daz biled hân hier  
 0,15628 innewendic in unsen graben  
 0,15629 sô wollen wir daz vüre wâr haben  
 0,15630 daz unser stat niet missegê  
 0,15631 ich en weiz niet waz sagen mî  
 0,15632 Pallas hât ez her gesant  
 0,15633 ez ist Palladium genant  
 0,15634 daz ane beten wir hierinne  
 0,15635 mit liebe unde mit minne  
 0,15636 unde mit grôzen êren  
 0,15637 op wir gevangen wâren  
 0,15638 die wîle diz biled hierinne ist

- 0,15639 sô en hoeret dâr zuo decheine list  
 0,15640 dâ die stat mite sî gewunnen  
 0,15641 nû hân es mich versunnen  
 0,15642 mohten wir ez ûz bringen  
 0,15643 sô solte uns gelingen  
 0,15644 ez ist in grôzer huote  
 0,15645 Theanus der guote  
 0,15646 der ist alle zît dâr bî  
 0,15647 swie sêre ez doch behüetet sî  
 0,15648 sô gedenke ich gerne einen rât  
 0,15649 daz unser wille vüre gât”  
 0,15650 “got gemane iuch des”  
 0,15651 sprach hêrre Ulixes  
 0,15652 “ez sol iuch niet geriuwen  
 0,15653 sint wir iuch getriuwen  
 0,15654 daz ir denket an iuwern muot  
 0,15655 wie ir alsô getuot  
 0,15656 als ir uns gelobet hât”  
 0,15657 Andenor sprach “esa wirdet rât  
 0,15658 ir müget wole wider rîten  
 0,15659 ich gedenke in kurzen zîten  
 0,15660 daz mîn wille geschihet  
 0,15661 Priamus en weiz niet  
 0,15662 waz im sorgen nâhet  
 0,15663 sint er daz gedinge smâhet  
 0,15664 daz Anphimacus sîn sîn sun  
 0,15665 verswere die stat zuo Ilion  
 0,15666 nû lâzet ez an den rât mîn  
 0,15667 ich wil der Kriechen bote sîn  
 0,15668 unde wil von ime heischen daz  
 0,15669 als im got ergaz  
 0,15670 op er ez leisten niht en wil”  
 0,15671 dô er geredet hette vile  
 0,15672 sie zwêne liezen ez an in  
 0,15673 daz dâ was von in drîn  
 0,15674 gerûnet unde gerâten  
 0,15675 daz bevâlen sie im unde bâten  
 0,15676 daz er dâr ane dæhte  
 0,15677 unde ez vollenbræhte  
 0,15678 dâr nâch schieden sie sich  
 0,15679 an sînen wec ir iegelich  
 0,15680 Andenor zuo ime nam  
 0,15681 sînen gesellen Eneam  
 0,15682 Priarium er besante  
 0,15683 unde die vürsten die er bekante  
 0,15684 daz sie vernæmen sîne wort  
 0,15685 beide vore unde vort  
 0,15686 quâmen die vürsten alle dare

- 0,15687 unde nāmen sîner rede ware  
 0,15688 des stuont er ūf unde sprach  
 0,15689 "ir hērren iuch ist daz ungemach  
 0,15690 ump Anphimacô leit  
 0,15691 daz die Kriechen hetten ūf geleit  
 0,15692 daz er verswüere diz lant  
 0,15693 nû hânt sie mich zuo boten gesant  
 0,15694 die en turren ander boten senden  
 0,15695 wollet ir ez nû enden  
 0,15696 daz unser unde ire belibe guot  
 0,15697 des uns gestern wart gemuot  
 0,15698 daz mohten wir gerne hân getân  
 0,15699 si wollen von Priamô nû hân  
 0,15700 ein dinc daz ist niht kleine  
 0,15701 ich en weiz waz ez meine  
 0,15702 sie hânt sêre ūf geslagen  
 0,15703 wollet ir ez hoeren ich wil ez iuch sagen"  
 0,15704 Andenor dâ nante  
 0,15705 vünf tûsent bîsande  
 0,15706 vünvzehn tûsent marke wert  
 0,15707 was dâ silbers gegert  
 0,15708 unde zuo drîzic járen  
 0,15709 hundert tûsent malder in wâren  
 0,15710 weizes geheischet unde genant  
 0,15711 "her umbe hât here gesant  
 0,15712 Nestor unde Agomennon  
 0,15713 Ulixes unde Thelamon  
 0,15714 Pirrus unde Diomedes  
 0,15715 nû versinnet iuch des  
 0,15716 op des niht geschiet  
 0,15717 uns mac vrides werden niet"  
 0,15718 Priamus sprach dâr zuo  
 0,15719 "wil man daz ich daz tuo  
 0,15720 nû man habe nemen sol  
 0,15721 sô gescheiden wir uns wole  
 0,15722 mit guoten minnen"  
 0,15723 des hiez er gewinnen  
 0,15724 als ez ūf geleget was  
 0,15725 Andenor unde Eneas  
 0,15726 nâch Ulike santen  
 0,15727 Diomedem sie mite nanten  
 0,15728 daz sie dare quæmen  
 0,15729 unt ire gelübede nãmen  
 0,15730 des quâmen sie vile schiere  
 0,15731 die râtgeben viere  
 0,15732 in ein betehûs giengen  
 0,15733 râten mit welichen dingn  
 0,15734 sie volenten des in was gedâht

0,15735	die wîle was dâr in brâcht
0,15736	opfer maniger hande
0,15737	als man in dem lande
0,15738	bî der alten zît pflac
0,15739	ûf dem lectere dâ lac
0,15740	manic schâf unde rint
0,15741	nider geslagen unde beschindet
0,15742	daz daz bluot dâr ûz trouf
0,15743	des lac dâ ein vile michel houf
0,15744	dar quâmen alle gemeine
0,15745	grôz unde kleine
0,15746	wîp unde manne ûz der stat
0,15747	ir iegelich vlêhete unde bat
0,15748	nâch irere gewonheit
0,15749	ire opfer daz dâ was geleit
0,15750	daz ez irem gote wär anenæme
0,15751	unde in zuo guote quæme
0,15752	dâr under hiezen sie machen
0,15753	viur von dürren spachen
0,15754	unde wolten daz opfer brinnen
0,15755	Pallade der gotinnen
0,15756	beide zuo êren unde zuo lobe
0,15757	dô en wolte ez unden noch obe
0,15758	brinnen nâch ireme alten site
0,15759	sie wâren im vile vaste mite
0,15760	daz sie ez entbliesen
0,15761	dô en konden sie dâr ane erkiesen
0,15762	noch ganeistern noch lohen
0,15763	etelîche vore leiden dannen vluhen
0,15764	ez was in vile ungemach
0,15765	daz ire opfer niet geschach
0,15766	als im von rehte solte geschên
0,15767	daz hetten sie in leide gesehen
0,15768	daz mîrre teil beleip ir dâ
0,15769	die rieten daz man anderswâ
0,15770	ire opfer versuochete
0,15771	nû es Pallas niht en ruochete
0,15772	ez næme lihte Apollô
0,15773	der rât geschach alsô
0,15774	als ez dar brâht was
0,15775	ir iegelich betete unde las
0,15776	mit grôzer vlêhe
0,15777	daz ireme opfer reht geschæhe
0,15778	sie nâmnen des viures alle war
0,15779	die wîle quam ein engel dar
0,15780	oder der tiuvel an der gebære
0,15781	als er ein engel wäre
0,15782	daz volc allez erschrac

- 0,15783 er nam daz opfer dâ ez lac  
0,15784 unde schrei mit einer stimme  
0,15785 harte heizgrimme  
0,15786 im was dannen vile gâch  
0,15787 daz volc sach im allez nâch  
0,15788 er vuorte daz opfer zuo dem mer  
0,15789 under daz kriechische her  
0,15790 dâ wart geschreie  
0,15791 unt klage maniger leie  
0,15792 sie wânten sîn verrâten  
0,15793 iren got sie bâten  
0,15794 daz er in helfe tâte  
0,15795 zuo solicheme ungeræte  
0,15796 den Kriechen sagete Calcas  
0,15797 wie dem dinge was  
0,15798 "soliche bezeichenunge  
0,15799 diz ist wandelunge  
0,15800 unde anders niht mère  
0,15801 unser viande êre  
0,15802 wirdet schiere an uns gewant  
0,15803 dise stat unde diz lant  
0,15804 unde diz künincrîche  
0,15805 wirdet uns kurzlîche"  
0,15806 daz geschach ouch alsô  
0,15807 Ecuba was unvrô  
0,15808 wende in sô was geschênen  
0,15809 sie wolte baz ire gelücke sehen  
0,15810 ein opfer sie bereite  
0,15811 von grôzer zierheite  
0,15812 als man daz viur dâr ane stach  
0,15813 als in dâ vore geschach  
0,15814 alsô geschach in aber hier  
0,15815 sie en kunden ez nie  
0,15816 erquicken noch entzünden  
0,15817 "ez kumet von iuwern sünden"  
0,15818 sprach Cassandrâ  
0,15819 "wir entbrinnen diz opfer anderswâ  
0,15820 diz zürnet Phebus  
0,15821 daz in disem betehûse  
0,15822 ist geschehen ein mort"  
0,15823 als ir wole hât gehört  
0,15824 hier wart Achilles inne erslagen  
0,15825 sie hiez daz opfer ûz tragen  
0,15826 ûz der türe hin vüre  
0,15827 dâ bestatet was Hector  
0,15828 dô man ez dâ bereite  
0,15829 êr man vollen viur geeite  
0,15830 sô was daz opfer gar verbrant

- 0,15831 dâr bî hetten sie bekant  
 0,15832 daz Cassandra die wîse maget  
 0,15833 in hette vile wâr gesaget  
 0,15834 sie wurfen die schult ûf Ecubam  
 0,15835 von der der mort ûz quam  
 0,15836 sie giengen mit vrôen muote  
 0,15837 zuo irere heimuote  
 0,15838 unde hetten des alle wân  
 0,15839 daz ez wole solte gân  
 0,15840 des nahtes harte spâte  
 0,15841 dô man sich geleget hæte  
 0,15842 Andenor gienc in daz betehûs  
 0,15843 dâ der priester Theanus  
 0,15844 behuotte ire heilictuom  
 0,15845 daz dâ hiez Palladium  
 0,15846 doch mohte ez baz der tiuvel wesen  
 0,15847 wir hân vile dâr abe gelesen  
 0,15848 waz dâ wunders abe geschach  
 0,15849 Andenor zuo dem priester sprach  
 0,15850 "dû hâst hiute wole gesehen  
 0,15851 wie unserme opfer ist geschên  
 0,15852 wie ez ûz der stat gevuoert wart  
 0,15853 daz weiz ich wole ich n bin gelârt  
 0,15854 diz biled e wil dâr nâch kumen  
 0,15855 joch hân ich daz wole vernomen  
 0,15856 en kumet ez dâr nâch niet  
 0,15857 daz uns niemer guot geschiet  
 0,15858 sô heilic ist diz biled  
 0,15859 kumet ez ûf daz gevilde  
 0,15860 nâch dem opfer bî daz mer  
 0,15861 dâ getar daz kriechische her  
 0,15862 lenger niht belîben  
 0,15863 wilt dû sie vertrîben  
 0,15864 sô lâz mich ez dâr ûz tragen  
 0,15865 ich wil dir êre mite bejagen  
 0,15866 sô die Kriechen vliehent hinnen  
 0,15867 unde wil dich wole minnen  
 0,15868 sô belîbet mir eine ire habe  
 0,15869 dâ mache ich dich rîche abe"  
 0,15870 der priester was mietegern  
 0,15871 er wolte der habe niht entbern  
 0,15872 daz biled e in nemen liez  
 0,15873 wende er ime miete gehiez  
 0,15874 dô der priester was betrogen  
 0,15875 dô wart ez niet lenger verzogen  
 0,15876 Andenor sich genante  
 0,15877 daz biled e hin ûz sante  
 0,15878 Ulixes daz biled e entvienc

- 0,15879 harte wole er ez behienc  
 0,15880 nâch sîneme rehte er sîn pflac  
 0,15881 beide naht unde tac  
 0,15882 dô merkete Theanus  
 0,15883 daz er betrogen was alsus  
 0,15884 er en torste niht jehen  
 0,15885 wie im zuo dem biledē was geschêñ  
 0,15886 als der tac gienc zuo  
 0,15887 Andenor huop sich harte vruo  
 0,15888 zuo den Kriechen ûz der stat  
 0,15889 Ulixem er bat  
 0,15890 unt Thideus sun  
 0,15891 swenne sie Ilion  
 0,15892 mit sîneme râte gewunnen  
 0,15893 daz sie sich versunnen  
 0,15894 waz sie im gelobet hâten  
 0,15895 unde wole zuo im tæten  
 0,15896 unde zuo sînen kinden  
 0,15897 "ich en mac ez niht erwinden  
 0,15898 op iuwer wille hier geschiet  
 0,15899 en leistet ir mîne gelübede niht"  
 0,15900 dô sprach hêrre Ulixes  
 0,15901 "wâr umbe zwîvelt ir des  
 0,15902 ist ez übel getân  
 0,15903 daz ir des hât wân  
 0,15904 daz wir mit untriuwen varn  
 0,15905 wir sulen ez harte wole bewarn  
 0,15906 ir unde Eneas  
 0,15907 unde Anchises der an dem râte was  
 0,15908 sulet iuwers gelübedes sîn gewert  
 0,15909 drîzic tûsent marke wert  
 0,15910 goldes sulet ir von uns haben  
 0,15911 daz wir ûf hân erhaben  
 0,15912 denket wie wir ez geenden  
 0,15913 ir sulet ez wole bewenden"  
 0,15914 dannen schiet Andenor  
 0,15915 Ulixes truoc diz biledē vüre  
 0,15916 die Kriechen vröuweten sich des  
 0,15917 Calcas unde Crises  
 0,15918 des biledes sich underwunden  
 0,15919 die von Trôje en kunden  
 0,15920 gevâgen noch gewisten  
 0,15921 mit wie getânen listen  
 0,15922 Palladium wär verstolen  
 0,15923 Theanus hette ez verholen  
 0,15924 unde torste ez niemanne sagen  
 0,15925 wer ez ûz hette getragen  
 0,15926 Crises eine list vant

- 0,15927 dâ mit er stat unde lant  
0,15928 den von Trôje ane gewan  
0,15929 er hiez Epium einen zimberman  
0,15930 eines werkes beginnen  
0,15931 mit grôzen sinnen  
0,15932 wart daz werc vollenbrâht  
0,15933 als er vore hette erdâht  
0,15934 daz gezimberde was hêrlich  
0,15935 eineme rosse gelîch  
0,15936 ûzen gevestenet vile wole  
0,15937 innen wît unde hol  
0,15938 geworht von grôzer wîsheit  
0,15939 dô daz werc was gereit  
0,15940 Crises in die stat entbôt  
0,15941 den Kriechen wär ires râtes nôt  
0,15942 sie westen wole daz Pallas  
0,15943 in harte grôzeme zorne was  
0,15944 wende sie ire biled e hette verloren  
0,15945 sie vorhten sêre iren zorn  
0,15946 unde hetten sô sêre gevorht  
0,15947 daz daz ros wäre geworht  
0,15948 swenne sô ergienge  
0,15949 ire gelübde unde ire gedinge  
0,15950 unde zuo lande solten kêren  
0,15951 sô wolten si ez ir zuo êren  
0,15952 in die stat trîben  
0,15953 daz sie mohten belîben  
0,15954 in der vrouwen hulden  
0,15955 sie en wolten niht dulten  
0,15956 iren zorn unde ire unminne  
0,15957 dâ was vile ritterinne  
0,15958 die wânten daz diz mære  
0,15959 in harte guot wäre  
0,15960 ouch was ir dâ inne ein michel teil  
0,15961 die merketen daz unheil  
0,15962 die zuo lande kârten  
0,15963 unde unheiles bewarten  
0,15964 der küninc Filemenîs  
0,15965 der was merke unde wîs  
0,15966 zuo Trôje er urloup nam  
0,15967 unde vuorte Pendesileam  
0,15968 mit im zuo lande  
0,15969 ire vriunde er wole bekante  
0,15970 dô liez er sie begraben  
0,15971 Andenor der hette die wîl erhaben  
0,15972 mit Priamô den alten rât  
0,15973 den ir dicke gehôrt hât  
0,15974 an dem andern tage vruo

- 0,15975 griffen sie beidersît zuo  
 0,15976 zuo gelübede unde zuo gedinge  
 0,15977 die Kriechen daz vollengienge  
 0,15978 ire verrætennisse  
 0,15979 die andern daz sie gewisse  
 0,15980 unde mit vride muosten belîben  
 0,15981 diz begunde Andenor trîben  
 0,15982 der ez lange getriben hette  
 0,15983 Priamus durch sîn geräte  
 0,15984 quam dâr ûz ûf daz velt  
 0,15985 unde brâhte golt unde gelt  
 0,15986 daz von im geheischet was  
 0,15987 Anchises unde Eneas  
 0,15988 als wir hoeren sagen  
 0,15989 hiezen ire grote ûz tragen  
 0,15990 êr die Kriechen dannen vuoren  
 0,15991 daz sie mit triuwen swuoren  
 0,15992 daz solich gedinge  
 0,15993 alsô vollengienge  
 0,15994 alse sie zwêne unde Andenor  
 0,15995 lange hetten gerâten vore  
 0,15996 ûf solich underscheide  
 0,15997 bôt sich zuo dem eide  
 0,15998 zuo êrste Diomedes  
 0,15999 dâr nâch Ulixes  
 0,16000 dâr nâch Idomeus  
 0,16001 Thoas unde Menesteus  
 0,16002 Menelaus unde Thelamon  
 0,16003 unde Pirrus Anchilles sun  
 0,16004 als dâ was begunnen  
 0,16005 sie swuoren bî der sunne  
 0,16006 bî himele unde bî der erden  
 0,16007 daz daz wâr sollte werden  
 0,16008 daz von in vieren  
 0,16009 von den Trôieren  
 0,16010 lange was ûf geleit  
 0,16011 sie viere nâmenvüre guot den eit  
 0,16012 dô was dâ anders niht gesworen  
 0,16013 wen daz sie muosten sîn verloren  
 0,16014 sint daz dâ gesworen was  
 0,16015 daz der Trôjâne dechein genas  
 0,16016 wie solten sie dô genesen  
 0,16017 daz mohte ouch wole mit êren weser  
 0,16018 daz der in den stric begleit  
 0,16019 der in eineme andern hette geleit  
 0,16020 dô sie gesworen hetten sô  
 0,16021 Priamus was vile vrô  
 0,16022 den eit er vüre guot entvienc

- 0,16023 swie er doch übel ûz gienc  
0,16024 wunders was dâ vile geschiet  
0,16025 ir iegelich ûf den andern riet  
0,16026 daz verwunden sie spâte  
0,16027 von manicvalten râte  
0,16028 die hêrren verworhten sich  
0,16029 des wart verworht ir iegelich  
0,16030 Priamus wânte vride hân  
0,16031 dô der eit was getân  
0,16032 êr denne er kârte in die stat  
0,16033 ump Helenam er bat  
0,16034 Menelaum iren man  
0,16035 daz er ir die hulde gewan  
0,16036 Menelaus bat ouch in  
0,16037 "als ich von dir gebeten bin  
0,16038 unde ich dînen willen tete  
0,16039 nû leiste ouch dû mîne bete  
0,16040 ich hân ein gezimber hier  
0,16041 dû gesæhe schoener werc nie  
0,16042 daz wil ich zuo minnen  
0,16043 geben dîner gotinnen  
0,16044 die dâ Pallas ist genant  
0,16045 êr ich rûme diz lant  
0,16046 des hât dîn stat êre  
0,16047 ich en bite dich niht mère  
0,16048 wan daz dû mir helfes dâr zuo  
0,16049 wie ich wole dâr mite getuo  
0,16050 nû ich ez dâr in trîben sol  
0,16051 sô bedarf ich dîner hülfe wole"  
0,16052 Eneas sô vile dâr zuo sprach  
0,16053 daz sîn bete geschach  
0,16054 Priamus heim kârte  
0,16055 sie liefen von der warte  
0,16056 alle daz ir dâr ûfe was  
0,16057 unde volgeten im ûf sîn palas  
0,16058 dô quâmen die von Trôje  
0,16059 mit vröuweden unde mit joie  
0,16060 wâren alle die naht  
0,16061 wende in der vride was brâht  
0,16062 Epius der zimberman  
0,16063 manigen starken helt gewan  
0,16064 die im hulfen sîn werc  
0,16065 über tal unt über berc  
0,16066 trîben gein der stat wert  
0,16067 daz hûlzîne pfert  
0,16068 wart sêre gezogen  
0,16069 si ne kunden niergen genüegen  
0,16070 in was zuo der arbeit sô gâch

- 0,16071 sie zugen vore unde schürgeten nāch  
0,16072 biz daz ez quam hin vüre  
0,16073 dō en was dechein burctor  
0,16074 sô hôhe noch sô wît  
0,16075 noch dechein bervrît  
0,16076 noch erkære  
0,16077 der im gelîch wäre  
0,16078 ez was den türmen gelîche hôh  
0,16079 die von Trôje wâren vrô  
0,16080 daz dâ vrouwe Pallas  
0,16081 sô wole mite geêret was  
0,16082 sie zuobrâchen unde zuovuorten  
0,16083 ire mûren in den worten  
0,16084 daz ez dâr in quæme  
0,16085 wende ez dâr in wole gezæme  
0,16086 dô sie ez dâr in brâhten  
0,16087 die Kriechen gedâhten  
0,16088 sint zuobrochen wart ire gewer  
0,16089 daz die von Trôje ireme her  
0,16090 niht en mohten widerstân  
0,16091 des wolten sie den schatz hân  
0,16092 als ez ûf was geleit  
0,16093 der schatz wart in bereitet  
0,16094 unde kornes ein unmâze  
0,16095 daz liezen sie ire strâze  
0,16096 vüeren mit schiffen  
0,16097 sus wart die stat begriffen  
0,16098 von viänden unde von vriunden  
0,16099 sie mohten noch en kunden  
0,16100 sich niht wole hân behuot  
0,16101 sint in die niht wâren guot  
0,16102 die in guot solten wesen  
0,16103 hier hân ich von Kriechen gelesen  
0,16104 sie nâmén zuo Priamô urloup  
0,16105 unde über al sînen hof  
0,16106 unde bâten daz er Helenam  
0,16107 zuo einer stunt zuo im nam  
0,16108 unz sie zuo lande quämen wider  
0,16109 sie wolten boten senden sider  
0,16110 die sie gemechlîche  
0,16111 vuorten in ire rîche  
0,16112 hetten sie sie zuohant genomen  
0,16113 unde wâren sint wider kumen  
0,16114 unde hetten die stat zuobrochen  
0,16115 sô wär in gesprochen  
0,16116 wîten in dem lande  
0,16117 unêre unt schande  
0,16118 dâr umbe tâten sie daz

- 0,16119 wende ez lütte vile baz  
 0,16120 swenne man die stat zuovuorte  
 0,16121 daz man sie danne hine vuorte  
 0,16122 wan daz ez durch sie eine geschach  
 0,16123 daz man Trôje zuobrach  
 0,16124 sie hiezen ire schif reiten  
 0,16125 von grôzen zierheiten  
 0,16126 ire segel sie ûf hiengen  
 0,16127 von Trôje sie dô giengen  
 0,16128 unde riten unde ranten  
 0,16129 ire herberge sie branten  
 0,16130 daz viur vaste ûf stoup  
 0,16131 dâ lohete holz unde schoup  
 0,16132 beide hütte unde stal  
 0,16133 wart zuo aschen überal  
 0,16134 dô kârten sie gein Sigeon  
 0,16135 des wânten die von Ilion  
 0,16136 daz sie ledic wâren  
 0,16137 von sorgen unde von swâren  
 0,16138 als ez vinster naht wart  
 0,16139 dô hetten sie ire segel umbe gekârt  
 0,16140 in einer kurzen wîle  
 0,16141 kârten sie wider die mîle  
 0,16142 die sie hetten über gerüeret  
 0,16143 ire schif wurden gevüeret  
 0,16144 aber an die alten habe  
 0,16145 dâ sie gevaren wâren abe  
 0,16146 dâ en was nieman  
 0,16147 er schutte sînen halsberc an  
 0,16148 sich wâpenete ir iegelich  
 0,16149 unde bereitten sich  
 0,16150 als sie bî der naht  
 0,16151 mit gewalt unde mit maht  
 0,16152 die stat zuo Trôje wolten hân  
 0,16153 sie hetten es dâr inne keinen wân  
 0,16154 ir dechein ne wiste  
 0,16155 der Kriechen arge liste  
 0,16156 dô sie begunden nâhen  
 0,16157 ein grôz viur sie sâhen  
 0,16158 vore dem rosse brinnen  
 0,16159 dâ wâren drîzic inne  
 0,16160 rittere verborgen unde verholen  
 0,16161 den daz ros was bevolhen  
 0,16162 der was Sinon genant  
 0,16163 der hette daz viur durch daz entbrant  
 0,16164 daz sie quâmen dâ engein  
 0,16165 dâ daz viur ûz schein  
 0,16166 dâ was die mûre zuobrochen

- 0,16167 ez was alsô versprochen  
 0,16168 ire volc hier zuo kârte  
 0,16169 dô en was ûf der warte  
 0,16170 noch ûf den erkære  
 0,16171 dechein wahtære  
 0,16172 des riten sie ân sorge dâr in  
 0,16173 Sinon der lûhte in  
 0,16174 dô sie in wâren kumen  
 0,16175 unde ez die drîzic vernomen  
 0,16176 in dem rosse hetten  
 0,16177 waz wollet ir daz sie tæten  
 0,16178 ûz dem rosse sie trâten  
 0,16179 als ez was gerâten  
 0,16180 dâ wart lenger niht gebeit  
 0,16181 als ez ûf was geleit  
 0,16182 besatzten sie die porten  
 0,16183 ot in den worten  
 0,16184 daz ir dechein dâ enbinnen  
 0,16185 dâr ûz mohte entrinnen  
 0,16186 sie hetten die gazzen gezalt  
 0,16187 unde lägen gestalt  
 0,16188 beide ûf unde nider  
 0,16189 unde vort unt wider  
 0,16190 sie hetten huote überal  
 0,16191 dâ en was hûs noch sal  
 0,16192 noch dechein kemenâte  
 0,16193 sie wâren alle verrâten  
 0,16194 dâ wart gerant unde getrat  
 0,16195 sie sliefen alle in der stat  
 0,16196 aldâ sie sliefen  
 0,16197 mit swerten sie über sie liefen  
 0,16198 sie sluogen unde stiezen  
 0,16199 êr sie dâr abe liezen  
 0,16200 sô verlös man unde wîp  
 0,16201 unde ire kint dâr zuo den lîp  
 0,16202 dâ wart gestalt soliche nôt  
 0,16203 sie lägen alle samet tôt  
 0,16204 die in der stat wâren  
 0,16205 sie zugen sie mit den hâren  
 0,16206 dâ wâren zuohouwen  
 0,16207 ritter unde vrouwen  
 0,16208 mit vriunden unde mit mâgen  
 0,16209 die edeln vürsten lägen  
 0,16210 tôt dâ jámerlichen  
 0,16211 unde die armen mit den rîchen  
 0,16212 ez mohte got erbarmen  
 0,16213 den wîben an den armen  
 0,16214 dâ sie die kint truogen

- 0,16215 zuo tôde sie sie sluogen  
 0,16216 hûs unde palas  
 0,16217 unde swaz dâ gesæzes was  
 0,16218 von bluote ez allez vol vlôz  
 0,16219 dechein mennische es genôz  
 0,16220 op ez zuo dem betehûse vlôch  
 0,16221 swer in dâr inne bezôch  
 0,16222 dem muoste er den lîp lâzen  
 0,16223 gazzen unde strâzen  
 0,16224 vluzzzen alle von bluote  
 0,16225 sie en mohten vore huote  
 0,16226 zuo decheiner vluht kumen  
 0,16227 des wart in allen der lîp genomen  
 0,16228 die stat tôten vol lac  
 0,16229 unde als ez quam an den tac  
 0,16230 ir iegelich roubete unde nam  
 0,16231 allez daz im zuo quam  
 0,16232 in welichen enden man ez vant  
 0,16233 silber gesteine golt gewant  
 0,16234 an golde unde an gewande  
 0,16235 zierheit maniger hande  
 0,16236 Priamus vlôch in daz betehûs  
 0,16237 dô konde im sîn got Phebus  
 0,16238 zuo decheinen staten gestân  
 0,16239 er muoste dâ den lîp lân  
 0,16240 sîn tohter Cassandra  
 0,16241 lief im alles schriende nâch  
 0,16242 in ein betehûs dâ bî  
 0,16243 dâ klagete sie Palladi  
 0,16244 ire nôt unde ire swære  
 0,16245 daz ez sô kumen wäre  
 0,16246 nû en weiz ich waz mî sagen  
 0,16247 wan dâ was nôt unde klagen  
 0,16248 von mannen unde von wîben  
 0,16249 sie en wisten wâ belîben  
 0,16250 sie liefen her unt dare  
 0,16251 swâ man ir iergen wart geware  
 0,16252 dô en mohten sie niht des gegeben  
 0,16253 si muosten lâzen daz leben  
 0,16254 sie liefen zuo dem oberesten hove  
 0,16255 dâ man unden unden oben  
 0,16256 maniger kameren was gewon  
 0,16257 daz was in dem gesezze zuo Ilion  
 0,16258 dâ liefen die vrouweninne  
 0,16259 unde die küninginne  
 0,16260 Eneas unde Anchises  
 0,16261 volgeten in under des  
 0,16262 unde Andenor der alte

- 0,16263 unde hiezen in daz sie balde  
 0,16264 her vüre giengen  
 0,16265 sie solten wole gedingen  
 0,16266 sâñ bî disen worte  
 0,16267 Ecuba gehörte  
 0,16268 daz die stat verrâten was  
 0,16269 sie sprach "pfî dich Eneas  
 0,16270 pfî dîn êre pfî dîn leben  
 0,16271 dû hâst mâgen unde neven  
 0,16272 vile übel mit gevarn  
 0,16273 wê wie manic muoterbarn  
 0,16274 von dînen schulden tôt lít  
 0,16275 wê der unsæligen zît  
 0,16276 dâ dû inne würde geboren  
 0,16277 dû hâst alle die verloren  
 0,16278 die dû behalten soltes hân  
 0,16279 wie hâst dû armer sus getân  
 0,16280 eiâ Trôje reine  
 0,16281 wer ist der dich nû weine  
 0,16282 sint dîne liute  
 0,16283 hier ligent hiute  
 0,16284 alsus jámerlîche erslagen  
 0,16285 die dîne êre solten tragen  
 0,16286 die hânt dich leider gevalt"  
 0,16287 sie klagete vile unde schalt  
 0,16288 iedoch bat sie Eneam  
 0,16289 daz er Polixenam  
 0,16290 næme an sîne huote  
 0,16291 Polixena die guote  
 0,16292 die was sêre verzaget  
 0,16293 Eneas trôste die maget  
 0,16294 under des ersluoc Pirrus  
 0,16295 Priamum in dem betehûse  
 0,16296 daz daz bluot ûf den lector spranc  
 0,16297 dâ man iren goten ûfe sanc  
 0,16298 Menelaus ouch quam  
 0,16299 dâ er vant vrouwen Helenam  
 0,16300 wäre er schiere niht kommen  
 0,16301 sie hetten ir den lîp genomen  
 0,16302 Andromache unde Cassandra  
 0,16303 die wurden wole behuot dâ  
 0,16304 von Ajaxe Orleô  
 0,16305 der behuotte sie sô  
 0,16306 daz ir deweder hâte  
 0,16307 dechein ungerâte  
 0,16308 grôzen schaden sie tâten  
 0,16309 in den kemenâten  
 0,16310 brâchen sie die zierde abe

- 0,16311 unde nāmen die habe  
 0,16312 swâ si sie vunden  
 0,16313 dâ die gote stuonden  
 0,16314 gezieret harte reine  
 0,16315 mit golde unde mit gesteine  
 0,16316 den nāmen sie ire zierheit  
 0,16317 unde liezen in ire goteheit  
 0,16318 sie liezen den got unde nāmen daz golt  
 0,16319 unde daz gesteine dâr in gevult  
 0,16320 betehûs unde palas  
 0,16321 unde allez daz dâr inne was  
 0,16322 daz wart allez verkârt  
 0,16323 unz in der schatz aller wart  
 0,16324 als ich Itim hoere sagen  
 0,16325 zuosamene hiezen sie ez tragen  
 0,16326 beide schatz unde gewant  
 0,16327 unde swaz man zierden iergen vant  
 0,16328 daz hiezen die behalten  
 0,16329 die es von rehte solten walten  
 0,16330 an eineme houfen ez allez lac  
 0,16331 ire gewin unde ire bejac  
 0,16332 daz teilten sie gelîche  
 0,16333 dâ nam ir iegelîche  
 0,16334 weder minner noch vort  
 0,16335 denne nâch dem werde unde nâch der geburt  
 0,16336 ouch wurden sie in ein  
 0,16337 daz von den vieren was dechein  
 0,16338 Andenor noch Polidamas  
 0,16339 Anchises noch Eneas  
 0,16340 sie en behielten daz leben  
 0,16341 ouch wart in gegeben  
 0,16342 als ez gesworen hâte  
 0,16343 Diomedes der stâte  
 0,16344 unde der wîse Ulixes  
 0,16345 Ajax zurnte under des  
 0,16346 ûzer mâzen sâre  
 0,16347 daz Helena genesen wâre  
 0,16348 er wolte sie gerne hân erslagen  
 0,16349 kûme binnen drîn tagen  
 0,16350 Ulixes daz zuosamene treip  
 0,16351 daz er mit gemache beleip  
 0,16352 Cassandra quam gâhende  
 0,16353 Agomennon wânte  
 0,16354 daz im der klâren sunnen schîn  
 0,16355 blickete under die ougen sîn  
 0,16356 sô wole was sie getân  
 0,16357 er wolte sie zuo wîbe hân  
 0,16358 mit ir gienc Dimena

- 0,16359 unde ire gesellin Ethra  
0,16360 ir ietweder harte schoene was  
0,16361 die eine nam Achamas  
0,16362 die andern Demophon  
0,16363 hêren Priamis sun  
0,16364 Helenus der wîssage  
0,16365 der was zuo strîte ein zage  
0,16366 des genôz er dâ der zageheit  
0,16367 daz im nie geschach leit  
0,16368 Adromacha Hectoris wîp  
0,16369 die behuotte ouch iren lîp  
0,16370 sie wâren guot beide  
0,16371 des beliben sie âne leide  
0,16372 von Cassandren unde Helenô  
0,16373 wurden die Kriechen gebeten sô  
0,16374 daz ire muoter Ecubâ  
0,16375 iren lîp behielt dâ  
0,16376 unt Hectoris süne zwêne  
0,16377 daz was unwæne  
0,16378 daz ez sô geschæhe  
0,16379 wan daz mit grôzer vlêhe  
0,16380 der Cassandren hæte behabet  
0,16381 Agomennon dâr umbe bat  
0,16382 durch Cassandren eine  
0,16383 genâsen alle gemeine  
0,16384 die vrouwen von Ilion  
0,16385 des half Agomennon  
0,16386 wende man durch sîne bete  
0,16387 harte gerne dâ tete  
0,16388 den vrouwen wart vride gegeben  
0,16389 unde was allez worden eben  
0,16390 sie wolten zuo lande kêren  
0,16391 êr sie kumen wâren  
0,16392 ûz der porten  
0,16393 sie sâhen unt hörten  
0,16394 ein weter harte swinde  
0,16395 daz mer von dem winde  
0,16396 sluoc ûf unt nider  
0,16397 sie kârten in die stat wider  
0,16398 in eineme mânde ez nie gelac  
0,16399 beide naht unde tac  
0,16400 tegelîche starc ez was  
0,16401 dô sagete Calcas  
0,16402 ire priester unde ire wîssage  
0,16403 daz in der helle hæten klage  
0,16404 Megera unde Allecto  
0,16405 dise furiae zwô  
0,16406 unde Thesifone dâr mite

- 0,16407 durch ir drîer unsite  
 0,16408 was von winde unde von wâze  
 0,16409 ûf dem mere die unmâze  
 0,16410 daz ich ez iuch gesagen niht en kan  
 0,16411 weder wîp noch man  
 0,16412 sie haben dâr umbe zorn  
 0,16413 daz Achilles hette verloren  
 0,16414 den lîp durch Polixenam  
 0,16415 unde ir nieman den lîp nam  
 0,16416 ne wäre des niht geschêen  
 0,16417 sie en hetten niemer mîr gesehen  
 0,16418 schoene weter zuo irere vart  
 0,16419 dô Pirrô daz zuo wizzen wart  
 0,16420 durch sînen vater Achillen  
 0,16421 unde durch der vrouwen willen  
 0,16422 suochete er die maget sân  
 0,16423 sie hetten bî der zît wân  
 0,16424 daz sie hæten solichen gewalt  
 0,16425 wen sie quelten der wär gequalt  
 0,16426 sie mohten och ruowe geben  
 0,16427 die Kriechen begunden dâr ane streben  
 0,16428 als in Calcas hette gesaget  
 0,16429 daz in würde die maget  
 0,16430 sie suocheten her unde dare  
 0,16431 in eineme gademe wart ir gewar  
 0,16432 der ungetriuwe Andenor  
 0,16433 der zôch sie mit dem arme her vüre  
 0,16434 Agomennon zuo im nam  
 0,16435 die schoenen Polixenam  
 0,16436 unde antwurte sie Pirrô  
 0,16437 Ulixes riet im dô  
 0,16438 daz er sie hinewec trüege  
 0,16439 unde zuo tôde slüege  
 0,16440 ûf sînes vateres grabe  
 0,16441 "wir müezen dirre rede kumen abe  
 0,16442 daz ist alsô guot bezîte  
 0,16443 als man lenger bîte"  
 0,16444 sîn rât der geschach  
 0,16445 dâ von quam grôz ungemach  
 0,16446 unde grôz leide  
 0,16447 als ich dâr nâch bescheide  
 0,16448 dô leitte sie Pirrus hine  
 0,16449 swie sie schrige oder grine  
 0,16450 des nam er decheine war  
 0,16451 sie sprach dô er sie leitte dar  
 0,16452 "edel man Pirrus  
 0,16453 wie leitet ir mich sus  
 0,16454 wâ mite hân ich dit verschult

- 0,16455 ich was iuwerme vater vile holt  
0,16456 hât in mîn bruoder erslagen  
0,16457 lebete ich iemer ich wolte in klagen  
0,16458 ez en tuo denne mîn sünde  
0,16459 ich en wiste noch en kunde  
0,16460 von wârheite wizzen  
0,16461 waz mir sî gewizzen  
0,16462 ach ich arme sündærin  
0,16463 daz ich mit unêren  
0,16464 alsus wirde geleitt  
0,16465 ich en tet in mê dechein leit  
0,16466 an werken noch an worten"  
0,16467 die ire rede gehörten  
0,16468 unde ire nôt sâhen  
0,16469 die muosten entvâhen  
0,16470 jámer unt riuwe  
0,16471 die vrische rôse niuwe  
0,16472 unde ire varwe die von ir schein  
0,16473 die wâren gelîch unde ein  
0,16474 sô schoene maget sô schoene kint  
0,16475 bewæjete nie der wint  
0,16476 noch en belûhte nie die sunnenschîn  
0,16477 Pirrus liez alle rede sîn  
0,16478 er leite sie zuo dem grabe wert  
0,16479 unde zückete sîn swert  
0,16480 unde sluoc ir daz houbet abe  
0,16481 ûf sînes vateres grabe  
0,16482 daz grap wart von bluote rôt  
0,16483 dô die maget was tôt  
0,16484 ire muoter Ecubâ  
0,16485 stalte grôz wunder dâ  
0,16486 sie beiz unde kram  
0,16487 allez daz ir zuo quam  
0,16488 zuo handen oder zuo munde  
0,16489 der Kriechen dechein en kunde  
0,16490 vore ir niergen bestân  
0,16491 sie liez under si gân  
0,16492 mit einen mezzer daz sie truoc  
0,16493 einen küninc si zuo tôde sluoc  
0,16494 unt zwêne græven dâr mite  
0,16495 ouch entgalt sie irere unsite  
0,16496 man mohte wunder schouwen  
0,16497 sie begriffen die vrouwen  
0,16498 unde bunden si zuo einen pfâle  
0,16499 unde wurfen alle zuo mâle  
0,16500 ûf sie mit steinen  
0,16501 ire vleisch mit ireme gebeine  
0,16502 wart sô gar zerslagen

- 0,16503 man sol lange dâr abe sagen  
 0,16504 daz sie den lîp alsô verlôs  
 0,16505 unde sô bittern tôt kôs  
 0,16506 noch wart sie bestatet  
 0,16507 ein teil verre von der stat  
 0,16508 in eineme harte schoenen grabe  
 0,16509 noch hât die stat namen dâr abe  
 0,16510 unsælic stat alle verkârt  
 0,16511 wende dâ begraben wart  
 0,16512 die edel künninginne  
 0,16513 verkârt ûz iren sinne  
 0,16514 alsô verlôs sie den lîp  
 0,16515 sie was iedoch ein vrümic wîp  
 0,16516 ir was ire leit alzuo leit  
 0,16517 des gewan sie soliche tobeheit  
 0,16518 von anders decheiner schande  
 0,16519 des geschach in dem lande  
 0,16520 wunderliche geschihte  
 0,16521 als ich iuch berihte  
 0,16522 sich huop ein harte grôz strît  
 0,16523 Ajax sprach zuo der zît  
 0,16524 von Salemîne  
 0,16525 "ich unde die mîne  
 0,16526 wollen hân Palladium  
 0,16527 ich hân prîs unde ruom  
 0,16528 unde ritterliche êre  
 0,16529 hier begangen mîre  
 0,16530 danne ein ander habe getân  
 0,16531 des wil ich diz biledê hân"  
 0,16532 dô sprach Diomedes  
 0,16533 "wer statet iuch des  
 0,16534 ez ist iuch allen wole kunt  
 0,16535 ich bin dicke worden wunt  
 0,16536 zuo sturme unde zuo vehte  
 0,16537 ist ez iemannes von rehte  
 0,16538 nâch sîneme werde  
 0,16539 ich wæne ez mir werde"  
 0,16540 Thelamon sprach sîne wort  
 0,16541 "iuwer rede ist ungehôrt  
 0,16542 sol ez iemannes sîn  
 0,16543 nâch sînen werde sô ist ez mîn"  
 0,16544 dô sprach under des  
 0,16545 der wîse Ulixes  
 0,16546 "mir ist vile ungemach  
 0,16547 daz iuwer hiute dechein bejach  
 0,16548 daz ez sîn wesen solte  
 0,16549 op ich es niht en wolte  
 0,16550 sô tet er affehte

- 0,16551 swelich iuwer es gedæhte  
0,16552 ich sage iuch war umbe ez mîn ist  
0,16553 ich hân mit mîner list  
0,16554 daz biledē gewunnen  
0,16555 man mac es mir wole gunnen  
0,16556 ez wart mir gesant ûz der stat  
0,16557 dô hette ich ez wole behabet  
0,16558 wan daz ich ez durch triuwe tete  
0,16559 mit râte unde mit mîner bete  
0,16560 unde mit mîner lêre  
0,16561 hât ir dise êre  
0,16562 hier zuo Trôje bejaget  
0,16563 daz golt daz ir hêrren traget  
0,16564 die güldînen vingerlîn an der hant  
0,16565 unde daz schoene sîdîn gewant  
0,16566 unde daz edel gesteine  
0,16567 unde die lînwât kleine  
0,16568 unde daz silber daz ir hât  
0,16569 daz gap iuch allez mîn rât  
0,16570 ich en verwîze es iuch niht  
0,16571 ich weiz wole daz ich eine riet  
0,16572 des wir alle rîche sîn  
0,16573 dâr umbe ist diz biledē mîn"  
0,16574 Ajax sprach "ich wil iuch wern  
0,16575 swer sich den tôren læzet schern  
0,16576 der ist selber ein tôre  
0,16577 ez hörte mîn ôre  
0,16578 unde ez hânt mîn ougen gesehen  
0,16579 des mîn munt wil jehen  
0,16580 wir kumen alle  
0,16581 von iuwerme râte zuo schalle  
0,16582 unde zuo boeseme worte  
0,16583 mîn ôre daz hörte  
0,16584 daz wir swuoren meineit  
0,16585 ez ist mir ouch vile leit  
0,16586 daz ez mîn ouge ie gesach  
0,16587 unde mîn munt ie gesprach  
0,16588 daz ir mich hiezet sprechen  
0,16589 mac ich ez gerechen  
0,16590 sô sol ez iuch geriuwen  
0,16591 daz ir mit untriuwen  
0,16592 mit decheiner ander wîsheit  
0,16593 mich alsô verre hât verleit  
0,16594 mir hât ein tôre des geschoren  
0,16595 daz ich durch in hân gesworen  
0,16596 daz ich meineidic bin  
0,16597 hât ir kunst oder sin  
0,16598 daz ist übel an uns schîn

- 0,16599 sint wir triuwelôs sîn  
 0,16600 des en lâze ich mich niht an  
 0,16601 wende ich baz dienen kan  
 0,16602 mit mîner massenîe  
 0,16603 was ich zuo Cornancîe  
 0,16604 unde zuo Trâce gesant  
 0,16605 dâ nam ich allez daz ich vant  
 0,16606 Polimestor wole entsuop  
 0,16607 daz ich im ûf huop  
 0,16608 allez daz er hæte  
 0,16609 sîne spîse sîn geræte  
 0,16610 der küninc von Frixenlande  
 0,16611 harte wole erkante  
 0,16612 die stæticheit mîn  
 0,16613 er weste wole daz ich sîn  
 0,16614 dechein genâde ne wolte hân  
 0,16615 er en mohte mir niht widerstân  
 0,16616 ân sînen danc ich ûf las  
 0,16617 swaz in sîneme lande was  
 0,16618 Gargarie unt Arisan  
 0,16619 Copsinum Arisban  
 0,16620 dise künincrîche  
 0,16621 twanc ich gewalticlîche  
 0,16622 manige êre ich dâ nam  
 0,16623 swaz sô mir zuo quam  
 0,16624 daz was allez verloren  
 0,16625 ich brâhte iuch dannen daz korn  
 0,16626 unde kuoe unde swîn  
 0,16627 unde vleisch unde wîn  
 0,16628 erweize unde bônen  
 0,16629 des sol man mir nû lônen  
 0,16630 âne diz hân ich vile getân  
 0,16631 des wil ich diz biledé hân  
 0,16632 wil ez mir Ulixes nemen  
 0,16633 sô lâze man uns bezemen  
 0,16634 ûf dem kreize  
 0,16635 nû zuo ageleize  
 0,16636 behertet er es dâ sô vüere ez hin  
 0,16637 sehet wâ ich gereit bin  
 0,16638 hette Achilles daz leben  
 0,16639 dem solte man ez von rehte geben  
 0,16640 der brach die bürge unde twanc die lant  
 0,16641 die küninge er dâr inne überwant  
 0,16642 die stete er verbrante  
 0,16643 der küninc Forbande  
 0,16644 von sînen henden tôt lac  
 0,16645 ân anders guot bejac  
 0,16646 sîne tohter er nam

- 0,16647 Diomedeam  
 0,16648 unde anders manige schoene maget  
 0,16649 der priester Crises noch klaget  
 0,16650 ump die tohter sîn  
 0,16651 Syre unde Iherapolin  
 0,16652 die wuoste er eine  
 0,16653 wir genuzzen es alle gemeine  
 0,16654 daz Enelyacas  
 0,16655 unser geleite her was  
 0,16656 ez wär im liep oder leit  
 0,16657 ouch quam sîn in arbeit  
 0,16658 ein stat heizet Pedason  
 0,16659 die gewan er von Erion  
 0,16660 dannen was Brises  
 0,16661 Itis bereitet mich des  
 0,16662 daz sich der vore leiden hienc  
 0,16663 dô er im die liute abe vienc  
 0,16664 unde im sîne tohter nam  
 0,16665 Ipodomiam  
 0,16666 manic êre uns von ime wart  
 0,16667 dô wir wâren ûf der vart  
 0,16668 dô wir her quâmen  
 0,16669 den sic wir hier nâmnen  
 0,16670 von sîner manheit  
 0,16671 Ulixes sprichet wîsheit  
 0,16672 der wil ich geswîgen  
 0,16673 ich wil dâ hin nîgen  
 0,16674 dâ Achilles ist begraben  
 0,16675 von dem wir alle sîn erhaben  
 0,16676 an guote unde an êre  
 0,16677 op er in lîbe wäre  
 0,16678 diz Palladium wäre sîn  
 0,16679 nû ist des niht nû ist ez mîn"  
 0,16680 manige rede unde manic wort  
 0,16681 wart dâ von in zwein gehört  
 0,16682 die niuwet ne verstiez  
 0,16683 Agomennon dô enthiez  
 0,16684 Ulixî er solte ez hân  
 0,16685 des wolte er ime bî stân  
 0,16686 dâ en wäre dechein vürste  
 0,16687 der ez widerreden törste  
 0,16688 sint daz er wäre  
 0,16689 ir aller rihtære  
 0,16690 daz en tet er ump anders niht  
 0,16691 wan daz er Pirrô daz riet  
 0,16692 daz Helena sînes bruoderes wîp  
 0,16693 vore im behielte iren lîp  
 0,16694 hier huop sich maniger leie

- 0,16695 ruof unde geschreie  
0,16696 den Kriechen was allen leit  
0,16697 daz Agomennon dâr ane streit  
0,16698 daz Ulixes daz biledē hæte  
0,16699 sie sprâchen wâr umbe er daz tæte  
0,16700 wende ez baz gezæme  
0,16701 daz ez Ajax næme  
0,16702 des wäre er harte wole wert  
0,16703 dô begreif Ajax sîn swert  
0,16704 mit beiden sînen handen  
0,16705 unde sprach ich wil diz anden  
0,16706 eine wîs oder ander wîs  
0,16707 er sî tump oder wîs  
0,16708 swer durch ritterlîchen ruom  
0,16709 wolle diz heilictuom  
0,16710 beherten oder behalten  
0,16711 der lâze es heil walten  
0,16712 er trete her unde berede ez hier  
0,16713 dô en lac sîn arm nie  
0,16714 unz er einen rûm gewan  
0,16715 dâ en was nie dechein sô küene man  
0,16716 der sîn torste erbîten  
0,16717 sô gienc er umbe schîten  
0,16718 mit sus getânen leiden  
0,16719 wart die rede gescheiden  
0,16720 daz ir iegelich vore vlôch  
0,16721 swâ sô Ajax nâch zôch  
0,16722 des gewan er grôze viântschaft  
0,16723 von Ulike unde sîner ritterschaft  
0,16724 unde von Agomennonê  
0,16725 vile grôzer unde och mî  
0,16726 hier en hoere ich Itim niht mî sagen  
0,16727 des morgenes dô ez begunde tagen  
0,16728 was Ajax vunden  
0,16729 wole mit tûsent wunden  
0,16730 aller zuohouwen unde zuoschîtet  
0,16731 dô ne kunde bî der zît  
0,16732 nieman rehte verstân  
0,16733 wer daz hette getân  
0,16734 doch en wart ez sô niht verswigen  
0,16735 des wart Ulixes gezigen  
0,16736 unde och Menelaus  
0,16737 dâr umbe vêhete si Pirrus  
0,16738 als ez quam ûf den tac  
0,16739 bî einzeln stücke dâ er lac  
0,16740 Pirrus in zuosamene las  
0,16741 dô weinte allez daz dâ was  
0,16742 Pirrus niht en weste

- 0,16743 wie er getæte daz bezziste  
 0,16744 ouch en weste er waz sprechen  
 0,16745 er wolte in gerne rechen  
 0,16746 op er weste an weme  
 0,16747 er mohte an diseme noch an deme  
 0,16748 decheine rehte schult haben  
 0,16749 doch liez er in begraben  
 0,16750 alsô hêrlîche  
 0,16751 daz dechein sîn gelîche  
 0,16752 nie ne wart bestatet baz  
 0,16753 in ein güldîn vaz  
 0,16754 wart Ajax geleit  
 0,16755 daz was Priamô bereit  
 0,16756 der solte dâr inne sîn gelegen  
 0,16757 dâr in legete man den degen  
 0,16758 Ulixes binnen vier tagen  
 0,16759 sint daz Ajax was erslagen  
 0,16760 en torste mî zuo liehte kumen  
 0,16761 im hette gerne den lîp genomen  
 0,16762 Pirrus unde sîn her  
 0,16763 des huop er sich bî naht ûf daz mer  
 0,16764 mit allen sînen mannern  
 0,16765 alsus quam er dannen  
 0,16766 Diomedî er daz biledie liez  
 0,16767 daz dâ Palladium hiez  
 0,16768 des nâmnen hundert ritter ware  
 0,16769 wole gewâpenet unde wole gare  
 0,16770 beide naht unde tac  
 0,16771 aldâ ez behalten lac  
 0,16772 bî der selben stunde  
 0,16773 Cassandra klagen begunde  
 0,16774 unde hette daz geweinat  
 0,16775 daz ire muoter was gesteinat  
 0,16776 unde ireme vater daz houbet abe  
 0,16777 unde ire swester erslagen ûf dem grabe  
 0,16778 ouch hette sie mîre vore gesehen  
 0,16779 daz Agomennon solte geschehen  
 0,16780 zuo Agomennone sie sprach  
 0,16781 "iuch nâhet grôz ungemach  
 0,16782 op ich ez sprechen torste  
 0,16783 ez ist sumelich vürste  
 0,16784 dem ir getriuwet harte wole  
 0,16785 als vriunt vriunde sol  
 0,16786 swie ir in zuo vriunde hât erkoren  
 0,16787 ir hât sîn den lîp verloren  
 0,16788 in iuwers selbes hûse  
 0,16789 daz mîn vater in dem betehûse  
 0,16790 vore dem altâre wart erslagen

- 0,16791 daz wil Phebus niht vertragen  
 0,16792 er richet in harte schiere  
 0,16793 die armen Trôiere  
 0,16794 die werdent alle gerochen  
 0,16795 diz hânt unse gone gesprochen  
 0,16796 Pallas unde Apollo  
 0,16797 des werden die alle unvrô  
 0,16798 die ez hânt gerâten  
 0,16799 als die selbe tâten"  
 0,16800 die Kriechen erbibeten überal  
 0,16801 ir iegelich ervorhte sînen val  
 0,16802 sie wunderten sich sêre  
 0,16803 von wem ire rihtære  
 0,16804 den lîp solte verliesen  
 0,16805 sie kunden es niht erkiesen  
 0,16806 noch wizzen von rehte  
 0,16807 an wen sie des dæhte  
 0,16808 Andenor bat mit vlêhen  
 0,16809 die Kriechen umbe die vêhen  
 0,16810 die sie under in hæten  
 0,16811 daz si ez durch got tæten  
 0,16812 unde liezen sie zuogân  
 0,16813 als er es sich hæte understân  
 0,16814 diz dinc er alsô lange treip  
 0,16815 unz ez in guoten beleip  
 0,16816 unde als ez zuo guote quam  
 0,16817 mit im er sie heim nam  
 0,16818 unde gap in alles des genuoc  
 0,16819 des die erde ie getruoc  
 0,16820 spîse maniger hande  
 0,16821 sîne schüzzelen er umbesante  
 0,16822 zam unt wiltbrât  
 0,16823 als ir dicke gesehen hât  
 0,16824 in der grôzen hêrren hove  
 0,16825 beide zuo ruome unde zuo lobe  
 0,16826 als er in genuoc hette gegeben  
 0,16827 unde ez allez was ebene  
 0,16828 under den Kriechen in rede was  
 0,16829 daz hêrre Eneas  
 0,16830 Polixenam die schoene maget  
 0,16831 in des tages hette versaget  
 0,16832 dô sie Andenor  
 0,16833 úz der kameren züge her vüre  
 0,16834 dâ sie was inne  
 0,16835 diz dûhte sie unminne  
 0,16836 dô sie gewunnen die stat  
 0,16837 des tages in Ecuba bat  
 0,16838 daz er sie näher ime nam

- 0,16839 des barc er Polixenam  
 0,16840 des schuldigete in Agomennon  
 0,16841 unde Pirrus Achilles sun  
 0,16842 ez was in beiden vile zorn  
 0,16843 sie zigen in er hæte gesworen  
 0,16844 daz er niemer mère  
 0,16845 decheiner hande swære  
 0,16846 den Kriechen mê getæte  
 0,16847 daz er die maget hæte  
 0,16848 vore in verborgen  
 0,16849 ez solte im kumen zuo sorgen  
 0,16850 ir iegelich im zuo rehte vant  
 0,16851 er solte rûmen daz lant  
 0,16852 er hette gesworen meineit  
 0,16853 des wart im dâ ûf geleit  
 0,16854 sie wolten es in niht erlâzen  
 0,16855 er vüere sîne strâze  
 0,16856 er wäre meineidic  
 0,16857 des wart er vile leidic  
 0,16858 iedoch im ein vryst wart  
 0,16859 unz er sich bereitte zuo der vart  
 0,16860 unde sîne schif dâr mite  
 0,16861 noch danne kunde sîner unsite  
 0,16862 Pirrus niht vergezzen  
 0,16863 daz der helt vermezzen  
 0,16864 Ajax alsô ermordet lac  
 0,16865 sîne ritter unz an den dritten tac  
 0,16866 mit andern sînen mâgen  
 0,16867 ûf ime lâgen  
 0,16868 unde hetten ûf sîneme grabe  
 0,16869 ire hâr geschoren allez abe  
 0,16870 von den grôzen leiden  
 0,16871 wende er sô was verscheiden  
 0,16872 hetten sie sich gequalt  
 0,16873 unde sô sêre verstalt  
 0,16874 daz ir iegelich  
 0,16875 eineme tôren was gelîch  
 0,16876 ir dechein sîn vergaz  
 0,16877 sie klageten baz unde baz  
 0,16878 sie westen wole âne wân  
 0,16879 ez hette Agomennon getân  
 0,16880 unde sîn bruoder Menelaus  
 0,16881 diz klagete Pirrus  
 0,16882 unde allez daz volc daz dâ was  
 0,16883 sie hiezen sie Plistenidas  
 0,16884 daz was ein ungetriuwe diet  
 0,16885 die daz ergeste gerne riet  
 0,16886 Agomennon wole sach

- 0,16887 daz im zuo rûmen geschach  
0,16888 sîne schif er reitte  
0,16889 kûme er ir erbeitte  
0,16890 daz er in daz schif quam  
0,16891 sînen bruoder er mit ime nam  
0,16892 unde dô sie mit den schiffen  
0,16893 die hinevart begriffen  
0,16894 ump allez daz dâ ie gewart  
0,16895 wären sie niht umbekârt  
0,16896 von zwein küninginnen  
0,16897 an witzen unde an sinnen  
0,16898 biderbe unde stæte  
0,16899 Ajax zwêne süne hæte  
0,16900 junc unde kleine  
0,16901 Antides hiez der eine  
0,16902 unde sîn muoter Glauca  
0,16903 die ander vrouwe hiez Themisa  
0,16904 unde ire sun Eustatis  
0,16905 zuo ireme alter wole wîs  
0,16906 ouch was ir iegelich  
0,16907 sîneme vater wole gelîch  
0,16908 dise zôch Theucer  
0,16909 unz sie schilt unde sper  
0,16910 mohten wole geurboren  
0,16911 daz sie iren vater hetten verloren  
0,16912 swie junc sie wären  
0,16913 ez begunde in vermære  
0,16914 an den die daz hetten getân  
0,16915 hier muoz ich dise rede lân  
0,16916 unde grîfen an die alte  
0,16917 die Kriechen begunden sich balde  
0,16918 bereiten zuo der heimvart  
0,16919 der winter was in zuo gekârt  
0,16920 die sumerwünne was gelegen  
0,16921 starc wint sûr regen  
0,16922 übel zît in allen enden  
0,16923 treip die ellenden  
0,16924 in ire lant zuo Kriechen wider  
0,16925 Eneas beleip dâ noch sider  
0,16926 die Kriechen kârten dannen  
0,16927 mit sînen mannen  
0,16928 was in kurzen tagen dâ vore  
0,16929 von Trôje gekârt Andenor  
0,16930 ich en weiz rehte in welich lant  
0,16931 wende ich es geschriben niht vant  
0,16932 wie daz lant geheizen was  
0,16933 iezunt hette Eneas  
0,16934 sich bereit harte wole

- 0,16935 sîne schif wâren spîse vol  
 0,16936 des begunde er vrâgen  
 0,16937 zuo vriunden unde zuo mâgen  
 0,16938 welich ir varen wolte  
 0,16939 er en mohte noch en solte  
 0,16940 dâ niht mî belîben  
 0,16941 "wie solte ich hier beklîben"  
 0,16942 sprach hîrre Eneas  
 0,16943 "dâ vröuwede unde wünne was  
 0,16944 dâ en ist dechein veste  
 0,16945 Ilion was die bezziste  
 0,16946 die hânt die Kriechen zuovuort  
 0,16947 quæmen her mordær in geruort  
 0,16948 ich en kunde decheiner noete  
 0,16949 in diseme einoete  
 0,16950 entsitzen des wil ich varn  
 0,16951 ich wil ez harte wole bewarn  
 0,16952 daz ich eine hier bestê  
 0,16953 ir hîrren ich en weiz niht mî  
 0,16954 swer sô varen wolle  
 0,16955 der werde mîn geselle"  
 0,16956 die wile hette er gesant  
 0,16957 boten hin in daz lant  
 0,16958 dâ Anthenor was inne  
 0,16959 unde entbôt im holde minne  
 0,16960 unde hiez in vile sîre biten  
 0,16961 sint die Kriechen wâren geriten  
 0,16962 daz er zuo ime quæme  
 0,16963 unde sîne wort vernæme  
 0,16964 waz sie wolten ane gîn  
 0,16965 op sie zuo Trôje solten bestên  
 0,16966 oder dannen kêren  
 0,16967 sint die Kriechen hinewec wâren  
 0,16968 als er die boteschaft vernam  
 0,16969 er îlte daz er dare quam  
 0,16970 doch en dorfte es in niht erlangen  
 0,16971 er wart wirs entvangen  
 0,16972 denne im gelobet wäre  
 0,16973 Eneas schuldigete in sîre  
 0,16974 daz er wäre triuwelôs  
 0,16975 "daz ich die Kriechen zuo vriunde verlôs  
 0,16976 daz was allez iuwer schult  
 0,16977 wâ mite hette ich daz verschult  
 0,16978 daz in von iuch zuo ôren quam  
 0,16979 daz ich Polixenam  
 0,16980 hette behalten  
 0,16981 der tiuvel müeze walten  
 0,16982 iuwer untriuwe

- 0,16983 nû saget ungetriuwe  
 0,16984 sint ich die stat hân  
 0,16985 wâ turret ir bestân  
 0,16986 kêret ûz dem lande  
 0,16987 hette ich es decheine schande  
 0,16988 ir gesæhet niemer mîr sunnenschîn  
 0,16989 ir müezet ellende sîn"  
 0,16990 Anthenor ervorhte harte  
 0,16991 mit den sînen er dannen kârte  
 0,16992 alsô jâmerlîche  
 0,16993 rûmete er daz rîche  
 0,16994 er huop sich ûf den sê  
 0,16995 dô en weste er niht mî  
 0,16996 als daz daz nie gewart  
 0,16997 wâ er sich lieze an die vart  
 0,16998 dô volgete er dem winde  
 0,16999 unde ouch sîn gesinde  
 0,17000 sie en wisten rehte wâ engein  
 0,17001 sie vuoren über manigen stein  
 0,17002 über berc unt grunt  
 0,17003 daz ire schif nie bestuont  
 0,17004 êr sie quâmen in ein lant  
 0,17005 dâ daz mer was genant  
 0,17006 Adriaticum mare  
 0,17007 dâ wurden si mit dem hâre  
 0,17008 alle begriffen  
 0,17009 unde beroubet in den schiffen  
 0,17010 ir wart dâ harte vile erslagen  
 0,17011 daz westen sie weme klagen  
 0,17012 vile grôz was ire schade  
 0,17013 iedoch quâmen sie zuo stade  
 0,17014 leidic unde unvrô  
 0,17015 dâ gesâhen sie einen vels hôh  
 0,17016 eben breit gelîche grôz  
 0,17017 in drîn enden daz mer dâr umbe schôz  
 0,17018 in ander sît Tigris  
 0,17019 man saget daz daz paradîs  
 0,17020 dem wazzer wäre harte nâch  
 0,17021 die hêrren beliben aldâ  
 0,17022 unde begriffen den berc  
 0,17023 unde üebeten alle zimberwerc  
 0,17024 unde bûweten in einen mânde  
 0,17025 daz Anthenor sich verwânte  
 0,17026 daz alle werltkünne  
 0,17027 die burc niemer gewünne  
 0,17028 des vorhte er ime kleine  
 0,17029 dâ was ein rîche geine  
 0,17030 Jerboin hiez daz lant

- 0,17031 Mendeus was der küninc genant  
0,17032 der des landes wielt  
0,17033 Anthenorem er wole hielt  
0,17034 er hette in kurzer zît verschult  
0,17035 daz er ime was sô holt  
0,17036 mit gevogen unde mit heimelîchheit  
0,17037 daz mære hette sich gebreit  
0,17038 man hette ez ze Trôje wole vernomen  
0,17039 wie ez Andenor was kumen  
0,17040 als ez Itis hât geschriben  
0,17041 die ze Trôje wâren beliben  
0,17042 an den rât sie vielen  
0,17043 daz sie mit zwein kielen  
0,17044 rüejeten schnellîche  
0,17045 in daz selbe rîche  
0,17046 dâ sie Anthenorem vunden  
0,17047 bûwen sie dâ begunden  
0,17048 dâ gewunnen sie inne  
0,17049 an habe unde an gewinne  
0,17050 daz sie in kurzen jâren  
0,17051 wole gerîchet wâren  
0,17052 hier kêre ich an die strâzen  
0,17053 die ich hân gelâzen  
0,17054 von der Kriechen widervart  
0,17055 als mich Itis hât gelârt  
0,17056 waz den Kriechen geschach  
0,17057 weme gemach wem ungemach  
0,17058 wer in dem mere beleip  
0,17059 unde wen daz ungewiter treip  
0,17060 unde des meres ünde  
0,17061 in die unkünde  
0,17062 wer dâ starp oder genas  
0,17063 wie diseme unt deme was  
0,17064 beide vore unde vort  
0,17065 unt hier unt dort  
0,17066 als ich es vore bereitet bin  
0,17067 alsô sage ich von in  
0,17068 sie vuoren ûf dem hôhen mere  
0,17069 ire marnære unde ire vere  
0,17070 hetten sie brâht gein ein lant  
0,17071 dâ was daz mer genant  
0,17072 Egeum mare  
0,17073 die sunne schein klâre  
0,17074 der wint was harte guot  
0,17075 sie wâren des weters wole gemuot  
0,17076 unde des quotes gemeit  
0,17077 sie vuoren mit grôzer rîchheit  
0,17078 von Trôirer rîche

- 0,17079 alle gelîche  
0,17080 als daz swarze bâ dem wîzen ist  
0,17081 alsô wart in kurzer vrist  
0,17082 ire süeze weter ire vröuwedevart  
0,17083 umbe gewant unde gekârt  
0,17084 in ein ungeverte  
0,17085 daz weter wart herte  
0,17086 unde die swarzen wolken  
0,17087 nider ze der erden sulken  
0,17088 der himel wart trüebe  
0,17089 êr sich der wint erhüebe  
0,17090 sô was der sunnenschîn ergân  
0,17091 der wint liez och dare gân  
0,17092 unde warf sie vort unde wider  
0,17093 die ünde sluoc sie ûf unde nider  
0,17094 och schûmete der sê  
0,17095 in wart von starken regene wê  
0,17096 die donerslege wâren grôz  
0,17097 der blic in under die ougen schôz  
0,17098 sô daz in daz hâr verbran  
0,17099 dâ ne was dechein man  
0,17100 in hette der regen nâch ertrankt  
0,17101 unde der blic gar besangt  
0,17102 der doner erværet  
0,17103 unde der wint verkêret  
0,17104 unde daz mer ire schif al zuotriben  
0,17105 ir was dâ vile tôt beliben  
0,17106 och quam ir ûz ein teil  
0,17107 die selben hetten unheil  
0,17108 mir saget Itis alsus  
0,17109 daz Ajax Orleus  
0,17110 sîne schif gar verlös  
0,17111 arm unde genâdenlôs  
0,17112 ûf einer dile er ûz swam  
0,17113 unz er doch ze stade quam  
0,17114 dâ lac er eine unde schrei  
0,17115 daz mer er ûz dem munde spei  
0,17116 zuoswollen unde zuodrunden  
0,17117 sîne gesellen in dâ vunden  
0,17118 daz selbe daz ir genas  
0,17119 daz mîrre teil ertrunken was  
0,17120 die dâ genâsen  
0,17121 die wâren zuoblâsen  
0,17122 zuodrunden unde zuoswalt  
0,17123 unde alsô sêre verstalt  
0,17124 houbet bûch unde bein  
0,17125 sô daz ir dechein  
0,17126 den andern bekante

- 0,17127 êr er sich nante  
 0,17128 dannoch en kante er in niet wole  
 0,17129 im was wazzers vol  
 0,17130 ougen ôren nase munt  
 0,17131 diz weter drî tage stuont  
 0,17132 an dem vierden umbe mittentac  
 0,17133 harte kûme ez gelac  
 0,17134 hier ziuhet ein ander rede in  
 0,17135 als ich dâr an geleitet bin  
 0,17136 alsô leite ich iuch vort  
 0,17137 ein vürste hæte gehört  
 0,17138 ein lügenlich mære  
 0,17139 wie Palimedes wäre  
 0,17140 von Ulixe erslagen  
 0,17141 alsô hörte er sagen  
 0,17142 durch haz unde nît  
 0,17143 als ir vore berichtet sît  
 0,17144 Parîs hette im den lîp genomen  
 0,17145 sîneme vater was daz mære kumen  
 0,17146 ez hetten die Kriechen getân  
 0,17147 des betrouc in sîn wân  
 0,17148 Pamplus was er genant  
 0,17149 er hette über al sîn lant  
 0,17150 den Kriechen lâge gestalt  
 0,17151 sô grôz was sîn gewalt  
 0,17152 sie mohten sich des niht bewarn  
 0,17153 sie müesten durch sîn lant varn  
 0,17154 Pamplus hæte gehört  
 0,17155 daz Trôje wäre zuostôrt  
 0,17156 unde die Kriechen wider kârten  
 0,17157 des liez er in warten  
 0,17158 beide tac unde naht  
 0,17159 ouch hette er daz vore bedâht  
 0,17160 daz er wolte wachen  
 0,17161 dô liez er viur machen  
 0,17162 swenne sie begunden næhen  
 0,17163 daz sie daz viur sâhen  
 0,17164 unde sich dâr nâch berichten  
 0,17165 dô quam ez von geschihten  
 0,17166 daz in den selben stunden  
 0,17167 die Kriechen kunden  
 0,17168 niergen kommen ûz dem mere  
 0,17169 dô gesach der vere  
 0,17170 daz ûf einen berge ein viur bran  
 0,17171 der berc hiez Eboean  
 0,17172 dâ berichten sie sich nâch  
 0,17173 in was ze dem berge harte gâch  
 0,17174 dô was Pamplus dâ bereit

- 0,17175 daz er geræche sîn leit  
 0,17176 dô sie quâmen zuo geracht  
 0,17177 sie mohten vore der vinster naht  
 0,17178 einen stîc niht gesehen  
 0,17179 des muoste in leide geschên  
 0,17180 dô sie quâmen ze stade  
 0,17181 sie wânten daz ire schade  
 0,17182 gar wäre ergangen  
 0,17183 ein vels hette gehangen  
 0,17184 über den stat manic jâr  
 0,17185 vile grôz unde swâr  
 0,17186 mit den sînen Pamplus ûf huop  
 0,17187 als er ir dâr under entsuop  
 0,17188 er stiez den vels daz er viel  
 0,17189 dô en was dâ niergen dechein kiel  
 0,17190 noch mennische dâr unde  
 0,17191 er slüege in ze grunde  
 0,17192 die vordersten beliben alle tôt  
 0,17193 die hindersten hörten dise nôt  
 0,17194 mit schiffen unde mit schifmannen  
 0,17195 kârten sie dannen  
 0,17196 Pamplus hæte einen sun  
 0,17197 von dem was man gewon  
 0,17198 übeler tæte  
 0,17199 übel wort er hæte  
 0,17200 in dem lande überal  
 0,17201 der quam zuo einer vrouwen die hiez Egial  
 0,17202 er sprach "waz tuos dû des  
 0,17203 daz dîn man Diomedes  
 0,17204 ein ander wîp genomen hât  
 0,17205 dîn wirdet nie dechein rât  
 0,17206 er hât ir triuwe gesworen  
 0,17207 dû hâst dîn lant gar verloren  
 0,17208 er bringet Briseidam  
 0,17209 die er ze Trôje ze wîbe nam  
 0,17210 er vert her mit einer grôzen schar  
 0,17211 vrouwe nû nim war  
 0,17212 daz dir iht missegê"  
 0,17213 vrouwen Clitemestrê  
 0,17214 Agomennonis wîbe  
 0,17215 swuor er ouch bî sîneme lîbe  
 0,17216 daz er ein ander wîp brähte  
 0,17217 unde ir übel ze tuone gedæhte  
 0,17218 daz sie sich vüre sâhe  
 0,17219 êr ir übel geschæhe  
 0,17220 vrouwe Egial besante  
 0,17221 ire vriunde die sie bekante  
 0,17222 unde sagete in diz mære

- 0,17223 daz ez in leit wäre  
 0,17224 sprâchen ire mâge  
 0,17225 des stalten sie lâge  
 0,17226 gein dem berge Eboean  
 0,17227 dâ quâmen sie Thelefum an  
 0,17228 Thelefus setzete sich ze gewer  
 0,17229 Egial mit ireme here  
 0,17230 tet den Kriechen grôze nôt  
 0,17231 ouch beleip ire bruoder dâ tôt  
 0,17232 der edele Assandrus  
 0,17233 den ersluoc Theseus  
 0,17234 als Diomedes vernam  
 0,17235 wie Assandrus dâr zuo quam  
 0,17236 daz er tôt was beliben  
 0,17237 er quam ûf in getriben  
 0,17238 unde sluoc im slac über slac  
 0,17239 aldâ er tôt lac  
 0,17240 die liute des jâhen  
 0,17241 die diz von ime sâhen  
 0,17242 daz im daz liep was  
 0,17243 daz sîn swâger niht genas  
 0,17244 er wolte sîne swester ze kebese hân  
 0,17245 des werten sie im daz lant sân  
 0,17246 des wart er zuo leiden  
 0,17247 als ez was gescheiden  
 0,17248 sie triben in ûz dem lande  
 0,17249 er en wiste noch erkante  
 0,17250 dechein bezzer ende  
 0,17251 des wart er ellende  
 0,17252 Clitemestra Agomennonis wîp  
 0,17253 die verriet im den lîp  
 0,17254 harte unwîplîche  
 0,17255 sie hette boeslîche  
 0,17256 mit eineme ritter getân  
 0,17257 den wolte sie ze adel hân  
 0,17258 Egistus was er genant  
 0,17259 er en hette burc noch lant  
 0,17260 Clitemestra von disem manne  
 0,17261 Esionam ein tohter gewan  
 0,17262 mit Egistô sie riet  
 0,17263 dô sich tac unde naht schiet  
 0,17264 daz er gienc ûf den stat  
 0,17265 dô Agomennon ûz dem schiffe trat  
 0,17266 dâ mordete er in ûf dem stade  
 0,17267 daz was schande unde schade  
 0,17268 daz ein küninc wolegeboren  
 0,17269 von solicheme ritter was verloren  
 0,17270 ouch was daz jámer harte grôz

- 0,17271 daz ein vrouwe iren genôz  
 0,17272 durch einen boesen verkôs  
 0,17273 unde dâr zuo wart triuwelôs  
 0,17274 der küninc Agomennon  
 0,17275 hette von ir einen sun  
 0,17276 der hiez Orestes  
 0,17277 Taltibius versan sich des  
 0,17278 op er mit der muoter belibe  
 0,17279 daz er niemer mî beklibe  
 0,17280 des brâhte er in Idomeneô  
 0,17281 leidic unde unvrô  
 0,17282 daz sîn hîerre was erslagen  
 0,17283 unde begunde ez im klagen  
 0,17284 Idomeneô was leit  
 0,17285 daz von sînes wîbes bôsheit  
 0,17286 Agomennon tôt lac  
 0,17287 sîn herze es allez erschrac  
 0,17288 Orestem er ze ime nam  
 0,17289 unz er ze Korintien heim quam  
 0,17290 sîn wîp sie beide wole entvienc  
 0,17291 mit armen sie in umbevienc  
 0,17292 ouch wurden sie wole entvangen dâ  
 0,17293 von sîner tohter Climonâ  
 0,17294 Idomeneis wîp Thesarîs  
 0,17295 zôch Orestem alle wîs  
 0,17296 ze Korindenlande iemer sint  
 0,17297 als er wäre ire kint  
 0,17298 alsus beleip Agomennon  
 0,17299 Diomedes Thideusis sun  
 0,17300 der ne wiste wâ er solte  
 0,17301 zuo Salemîne er kêren wolte  
 0,17302 daz im Thelamon riete  
 0,17303 op er mit bete oder mit miete  
 0,17304 sîn lant mohte wider hân  
 0,17305 dô wart er von Theucrô bestân  
 0,17306 vore im er kûme genas  
 0,17307 Theucus Ajax bruoder was  
 0,17308 der zêch in er hette gerâten  
 0,17309 daz sîneme bruoder den tôt tâten  
 0,17310 Agomennon unde Ulixes  
 0,17311 des kârte Diomedes  
 0,17312 mit sorge unde mit triurede  
 0,17313 úz der gebiurede  
 0,17314 Demophon unde Achamas  
 0,17315 der hîerre Agomennon was  
 0,17316 die en wisten wie gebâren  
 0,17317 dô sie an im gehoenet wâren  
 0,17318 sie dûhte daz schande

- 0,17319 kérten sie úz dem lande  
 0,17320 âne kampf unde âne strít  
 0,17321 doch en mohten sie ze der zít  
 0,17322 Egistô niht widerstân  
 0,17323 swie gerne si ez wolten hân getân  
 0,17324 dô riet in Nestor  
 0,17325 daz sie sich wole versunnen vore  
 0,17326 waz in guot wäre  
 0,17327 mit leide unde mit swære  
 0,17328 kárten sie in daz lant  
 0,17329 daz Corintia was genant  
 0,17330 ze Tröje dannoch beliben was  
 0,17331 mit sîneme her Eneas  
 0,17332 er wäre gerne dannen gekârt  
 0,17333 dô werten im die úzvart  
 0,17334 die vürsten vermezzen  
 0,17335 die umb in wâren gesezzen  
 0,17336 die hæten gerne im den lîp genomen  
 0,17337 sie sprâchen ez wäre von im kumen  
 0,17338 daz Tröje wäre verrâten  
 0,17339 manig leit sie im tâten  
 0,17340 er hette gehört under des  
 0,17341 daz Diomedes  
 0,17342 hæte gerûmet sîn lant  
 0,17343 des hæte er ze im gesant  
 0,17344 boten unde brieve  
 0,17345 unde bat in durch sîne liebe  
 0,17346 daz er im hülfe dannen  
 0,17347 er wolte ime mit sînen mannen  
 0,17348 helfen sîn lant beherten  
 0,17349 gein den die ez im werten  
 0,17350 daz geschach alsô  
 0,17351 Diomedes was vrô  
 0,17352 vile balde er dar quam  
 0,17353 daz er Eneam  
 0,17354 brächte úz dem lande  
 0,17355 an laster unde an schande  
 0,17356 geschach in beiden grôz schade  
 0,17357 ire viânde bestuonden sie úf dem stade  
 0,17358 sie satzten sich ze gewer  
 0,17359 unde behielten daz mer  
 0,17360 vile manlîche  
 0,17361 jene von dem rîche  
 0,17362 die wurden sigelôs  
 0,17363 ir deweder der sînen vile verlôs  
 0,17364 swie schadehaft sie wären  
 0,17365 sie kárten dannen mit êren  
 0,17366 diz mære hin ze Kriechen schal

- 0,17367 ez vernam vrouwe Egiäl  
 0,17368 hêrren Diomedes wîp  
 0,17369 sie dâhte êr sie lant unde lîp  
 0,17370 von ire zweier maht verlüre  
 0,17371 sie wolte daz bewaren vore  
 0,17372 des sante si boten in engein  
 0,17373 sie dâhte sie mohte in zwein  
 0,17374 niht vore gesitzen  
 0,17375 des wart ez mit witzen  
 0,17376 wole zuosamene getriben  
 0,17377 daz er unde sie mit genâden beliben  
 0,17378 sus gewan er sîn lant wider  
 0,17379 Eneas vuor dannoch sider  
 0,17380 manigen tac vüre sich  
 0,17381 von Veldeke meister Heinrich  
 0,17382 hât an sîneme buoche gelârt  
 0,17383 von Eneas vart  
 0,17384 wâ er unde die sînen hin kârten  
 0,17385 sie beliben ze Lamparten  
 0,17386 Idomeneus von Krête  
 0,17387 Orestî gesaget hæte  
 0,17388 dô er ze sînen tagen was kommen  
 0,17389 wie Egiste hæte genomen  
 0,17390 sîneme vater den lîp  
 0,17391 sîn muoter wäre ein übel wîp  
 0,17392 sie hæte gerâten den mort  
 0,17393 dô Orestes hæte erhôrt  
 0,17394 wie sîn vater was beliben  
 0,17395 sîn herze erschrac er begunde biben  
 0,17396 niht lenger er beitte  
 0,17397 er samenete sich bezîte  
 0,17398 zwei tûsent er gewan  
 0,17399 unde siben hundert manne  
 0,17400 brâhte im Forenses  
 0,17401 der hêrre unde Orestes  
 0,17402 dâ wâren Egistô beide gram  
 0,17403 der eine daz er im den vater nam  
 0,17404 der ander wolte in durch daz bestân  
 0,17405 er hæte sîne tohter gelân  
 0,17406 des kârten sie von Athêne  
 0,17407 hine ze Micêne  
 0,17408 dâ was die küninginne  
 0,17409 Klitemestra inne  
 0,17410 Egistus was dâ heime nieht  
 0,17411 Klitemestra sâre entriet  
 0,17412 doch setzete sich ze were  
 0,17413 ire sun mit sîneme here  
 0,17414 sîner muoter sige ane vaht

- 0,17415 er gewan die stat mit maht  
0,17416 sîne muoter er vienc  
0,17417 an einen boum er sie hienc  
0,17418 als sie was erhangen  
0,17419 er zôch ir mit einer zangen  
0,17420 ire lide von ireme lîbe  
0,17421 ez en geschach nie wîbe  
0,17422 von sune soliche quâle  
0,17423 ze dem selben mâle  
0,17424 êr sie vollen wære tôt  
0,17425 sînen knehten er gebôt  
0,17426 daz sie sie zugten in die graben  
0,17427 die vogel solten ire vleisch haben  
0,17428 ire gebeine die hunde  
0,17429 in der selben stunde  
0,17430 quam Egistus zuo gerant  
0,17431 daz er berette daz lant  
0,17432 des wart der arme sigelôs  
0,17433 er wart gevangen unde verlôs  
0,17434 sîne unrehten êre  
0,17435 unde leit grôze sêre  
0,17436 êr er die ougen verlûre  
0,17437 im wart ein tôt geleget vüre  
0,17438 den er wole muoste klagen  
0,17439 man bant in nacket ze einen pfagen  
0,17440 unde sleifete in durch die strâzen  
0,17441 dô en wart er niht gelâzen  
0,17442 êr im zuovielen die lide  
0,17443 sint hienc man in mit der wide  
0,17444 dâ er mite gebunden was  
0,17445 bî die stat Micenas  
0,17446 diz mære wart gemeine  
0,17447 über al die geine  
0,17448 beide ze hûse unde ze hove  
0,17449 eteswâ quam er es ze lobe  
0,17450 eteswâ ze übeln worte  
0,17451 ze schaden unde zuo vorhte  
0,17452 sîn veter under des quam  
0,17453 unde brâhte mit im Helenam  
0,17454 er quam arm ze lande  
0,17455 von habe unde von gewande  
0,17456 in maniger nôt er sint beleip  
0,17457 sint sie daz weter zuotreip  
0,17458 er quam rehte ze stade  
0,17459 dâ Agomennonî der schade  
0,17460 sîneme bruoder was geschêñ  
0,17461 daz volc lief ûz durch besehen  
0,17462 durch kapfen durch schouwen

- 0,17463 Helenam die vrouwen  
 0,17464 ir ieglich sie gerne sach  
 0,17465 durch die die nôt alle geschach  
 0,17466 Menelaô was zorn  
 0,17467 daz er den bruoder hæte verloren  
 0,17468 daz klagete er vile sâre  
 0,17469 ouch sagete er ze mære  
 0,17470 daz Theucer ze Kypre was beliben  
 0,17471 unde wäre dâ wole bekliben  
 0,17472 an lande unde an gesæze  
 0,17473 unde wie ein slange vræze  
 0,17474 Canopum sînen schifman  
 0,17475 dâ sagete er harte vile von  
 0,17476 ander mære er niht vergaz  
 0,17477 sint vuor er vürebaz  
 0,17478 hine gein Micenas  
 0,17479 dâ sîn lant bî was  
 0,17480 dâ entvienc man in ze sîneme rehte  
 0,17481 beide sîn geslehte  
 0,17482 sîne vriunde unde sîne manne  
 0,17483 unz er guot gemach gewan  
 0,17484 von maniger hande sache  
 0,17485 nâch sîneme ungemache  
 0,17486 sint wart grôz rede erhaben  
 0,17487 daz Orestes in dem graben  
 0,17488 sîne muoter gesleifet hæte  
 0,17489 daz man im den tôt tæte  
 0,17490 rieten sie alle gemeine  
 0,17491 dô widerredete ez eine  
 0,17492 Menesteus der herzoge  
 0,17493 er sprach ez en solte nieman ze gezoge  
 0,17494 kumen ump soliche tât  
 0,17495 durch sîner muoter rât  
 0,17496 wäre sîn vater tôt beliben  
 0,17497 unde hæte in selben vertriben  
 0,17498 sie hette von rehte iren lîp verloren  
 0,17499 des wart er ze küninge erkoren  
 0,17500 über al sînes vateres lant  
 0,17501 Menesteus wart mit im gesant  
 0,17502 daz er sîn geleite wäre  
 0,17503 an sînes vateres êre  
 0,17504 des vuorte er in gewalticlîche  
 0,17505 in sînes vateres rîche  
 0,17506 hin zuo Micenas  
 0,17507 dâ sîn houbetstat was  
 0,17508 Orestis swester Erigenâ  
 0,17509 Egistis tohter die was dâ  
 0,17510 der was alsô vile leit

- 0,17511 daz Orestes zuo reit  
 0,17512 unde daz rîche entvienc  
 0,17513 daz sie sich vore leiden hienc  
 0,17514 Idomeneus von Crête  
 0,17515 der Orestem gezogen hæte  
 0,17516 der geschuof daz er ze wîbe nam  
 0,17517 Menelais tohter Ermionam  
 0,17518 die er von Helenam gewan  
 0,17519 sînes vetern tohterman  
 0,17520 wart hîrre Orestes  
 0,17521 bî den gezîten pflac man des  
 0,17522 bî der zît quam von Crête  
 0,17523 mit grôzeme ungerâte  
 0,17524 Ulixes der wîse  
 0,17525 von winden von îse  
 0,17526 von hitze von meres vluot  
 0,17527 swarz unde unbehuot  
 0,17528 bleich unde missevare  
 0,17529 ime selben ungelîch gare  
 0,17530 nacket als ein westerbarn  
 0,17531 er hæte tûsent lant ervarn  
 0,17532 in maniger nôt besliffen  
 0,17533 in zweier koufmanne schiffen  
 0,17534 quam er dâ ze lande  
 0,17535 Idomeneus wânde  
 0,17536 dô er in zuo êrst gesach  
 0,17537 êr er im zuo sprach  
 0,17538 daz er ez niht wäre  
 0,17539 er vrâgete von ime mære  
 0,17540 er leitte in heim unde pflac sîn wole  
 0,17541 op ich von ime sagen sol  
 0,17542 waz im ûf dem wege geschach  
 0,17543 sô hoeret wie Ulixes sprach  
 0,17544 "Ajaxis mâge  
 0,17545 hæten mir lâge  
 0,17546 ûf der strâze gestalt  
 0,17547 unde nâmén mir mit gewalt  
 0,17548 allez daz ich ie gewan  
 0,17549 mit dem lîbe ich kûme entran  
 0,17550 sie sprâchen wâr umbe si ez tâten  
 0,17551 ich hæte in verrâten  
 0,17552 Pamplus ouch mich bezôch  
 0,17553 wen daz ich ime kûme entvlôch  
 0,17554 ich wäre gewislîchen tôt  
 0,17555 sint hette ich mîne nôt  
 0,17556 garwe verwunden  
 0,17557 unde mîne gesellen vunden  
 0,17558 des schiffete ich nider in ein lant

0,17559 daz was Smirna genant  
0,17560 dâ geschach mir dechein leit  
0,17561 wen daz ich durch tôrheit  
0,17562 durch spîse daz lant verkôs  
0,17563 hin ze Lotofagôs  
0,17564 von Smirna ich kârte  
0,17565 daz koste mich harte  
0,17566 dannen wurfen mich die winde  
0,17567 unde weter swinde  
0,17568 ze Sizilien an eine habe  
0,17569 ich mac iemer sîn dâr abe  
0,17570 leidic unde unvrô  
0,17571 Cicrops unde Lestugo  
0,17572 zwei bruoder mich begriffen  
0,17573 unde nâmén mir in den schiffen  
0,17574 daz bezziste daz sie vunden  
0,17575 daz mohte ich haben verwunden  
0,17576 wen daz ire süne quâmen  
0,17577 unde daz ander teil nâmén  
0,17578 daz was Olifeus  
0,17579 unt Polifemus  
0,17580 mich unde die mînen sie viengen  
0,17581 unde hiezen uns dingen  
0,17582 unde hielten uns in vengnisse  
0,17583 in karkær unde in vinsternisse  
0,17584 wir en hæten silber noch golt  
0,17585 ouch en hæten sie an uns decheine schult  
0,17586 des en hielten sie uns niht mère  
0,17587 in dem karkære  
0,17588 dô wir quâmen dâr vore  
0,17589 dô gesach mîn geselle Alfenor  
0,17590 Polifemis swester eine  
0,17591 die lûhte im sô engeine  
0,17592 daz er des wânte  
0,17593 die wîle er in einem mânde  
0,17594 dâ gevangen was gewesen  
0,17595 von ire schoene was genesen  
0,17596 die vrouwe nam ouch sîn ware  
0,17597 er treip ez her unt dare  
0,17598 mit gelübede unde mit bete  
0,17599 daz sie sînen willen tete  
0,17600 ez en wart nie sô schiere getân  
0,17601 wir en huoben uns dannen sâñ  
0,17602 wir vuoren dannen bî der naht  
0,17603 die vrouwe hæte ûz brâht  
0,17604 mit ir vile varnder habe  
0,17605 êr wir quæmen ze der habe  
0,17606 dâ wir schiffen solten

- 0,17607 dô wart ez uns vergolten  
0,17608 Polifemus was starc  
0,17609 unde übel unde arc  
0,17610 er sluoc der mînen vile dâr nider  
0,17611 sîn swester wart im wider  
0,17612 sie was vile schoene  
0,17613 doch wart ir daz ze lône  
0,17614 daz sie entvangen hæte ein kint  
0,17615 dâ wart Polifemus blint  
0,17616 den hêrren ich blante  
0,17617 dâ er mir nâch rante  
0,17618 daz der hêrre blint was  
0,17619 daz half mir daz ich genas  
0,17620 sint warf mich des meres ünde  
0,17621 in eine unkünde  
0,17622 in des küninges Eolis lant  
0,17623 eine vrouwen ich dâ vant  
0,17624 Circe geheizen  
0,17625 die hæte mir entheizen  
0,17626 quæme ich iemer dannen  
0,17627 ich wäre vore andern mannenn  
0,17628 der säligeste der ie gewart  
0,17629 sie hæte ein sunderlichen art  
0,17630 unde vore andern wîben ein ander leben  
0,17631 Circe kunde trenke gegeben  
0,17632 solich zouber soliche spîse  
0,17633 ez en wart nieman sô wîse  
0,17634 der ires dinges enbeiz  
0,17635 ich hân ez versuochet biz ich ez weiz  
0,17636 daz spriche ich von der wârheit  
0,17637 er wart in solichen stric geleit  
0,17638 daz er in muoste beliben  
0,17639 sie kunde wunder trîben  
0,17640 noch mîr ich von ir sagen muoz  
0,17641 sie hæte solichen gruoz  
0,17642 solich gelâz soliche wort  
0,17643 swer ez hæte gehört  
0,17644 als ich ez gehört hân  
0,17645 der muoste iemer dâ bestân  
0,17646 ich geswîge aller zouberlist  
0,17647 Circe sô geartet ist  
0,17648 si wil man über man  
0,17649 nieman sich behüeten kan  
0,17650 er en müeze dâ beliben  
0,17651 mit ir unde mit iren wîben  
0,17652 sie gap mir trinken als ich getranc  
0,17653 ich muoste ân mînen danc  
0,17654 gedenken an ire minne

- 0,17655 mir stuonden mîne sinne  
0,17656 sint ze allen gezîten an sie  
0,17657 ich en mohte ir vergezzen nie  
0,17658 als ich ire spîse geaz  
0,17659 aller der wîbe ich vergaz  
0,17660 der ich dâ vore künde ie gewan  
0,17661 sô ich sie dicker sach an  
0,17662 sô ich mir lieber gesach  
0,17663 waz sol es mîr mir geschach  
0,17664 als manigen was geschênen  
0,17665 ich wil ir och des jehen  
0,17666 ez en wart nie süezer wîp geboren  
0,17667 sie hæte och mich dâr zuo erkoren  
0,17668 unde sagete daz ich wäre  
0,17669 der beziste minnære  
0,17670 der ie bî ir gelac  
0,17671 ich beleip dâ manigen tac  
0,17672 vernemet wie ich dannen quam  
0,17673 mîn herze mich mir selben nam  
0,17674 des weiz ich wole daz zouberlist  
0,17675 gein mannes herzen ein wint ist  
0,17676 ich gehielt mich zuo mîner manheit  
0,17677 unde liez von der weichheit  
0,17678 die mich verleit hæte  
0,17679 swie ungerne ich ez tæte  
0,17680 mîn herze herte dinc tete  
0,17681 zoubert gift noch bete  
0,17682 mohten mich niht enthalten  
0,17683 ich liez es got walten  
0,17684 unde kârte dannen vürebaz  
0,17685 unde quam dâ Calipsa saz  
0,17686 ich hæte mich gar des ergeben  
0,17687 ich wolte iemer mit ir leben  
0,17688 sie was och sôgetân  
0,17689 ich wolte iemer nôt hân  
0,17690 durch ire minne süezicheit  
0,17691 hæte sie stæticheit  
0,17692 an wîplicher êre  
0,17693 sie wart mir unmære  
0,17694 wende sie was valschaft  
0,17695 des beleip ich dâ unbehافت  
0,17696 dô vuor ich vürebaz in dem mere  
0,17697 dô sagete mir der vere  
0,17698 Sirenes waren mir nâhe bî  
0,17699 vreget ir waz Sirenes sî  
0,17700 daz wil ich iuch bediuten  
0,17701 als ich ez von den liuten  
0,17702 in dem lande vernam

- 0,17703 den ich dô zuo quam  
 0,17704 Sirenes hânt soliche gewalt  
 0,17705 ire stimme ist vile manicvalt  
 0,17706 unt ire klanc sô süeze  
 0,17707 man saget dâ müeze  
 0,17708 kêren ze ire stimme  
 0,17709 ez vlieze oder swimme  
 0,17710 ez sî verre oder nâch  
 0,17711 swaz iren gesanc gehoeret dâ  
 0,17712 wizzet ir wes ich dâ genas  
 0,17713 ich stiez vüre mîne ôren wahs  
 0,17714 daz ich des sanges niht vernam  
 0,17715 Karibdim unde Skillam  
 0,17716 dô ich Sirenes überwant  
 0,17717 zuo grôzen sorgen ich vant  
 0,17718 ez en wart nieman sô wîs  
 0,17719 der weste waz Karibdis  
 0,17720 unde skilla wäre  
 0,17721 des en stê iemer mîre  
 0,17722 mir wart in dem lande kunt  
 0,17723 ez sî daz mer âne grunt  
 0,17724 in eineme kreize ez umbe gât  
 0,17725 daz ez niemer bestât  
 0,17726 einen starken kiel ez næme  
 0,17727 op er dar quæme  
 0,17728 nâch bî zehen mîlen  
 0,17729 in einer kurzen wîlen  
 0,17730 hæte ez den kiel in sich gezogen  
 0,17731 als von eineme snellen bogen  
 0,17732 ein pfîl mohte gevarn  
 0,17733 mich wolte got dâ bewarn  
 0,17734 ich kunde dannen kumen niet  
 0,17735 ân übel ich doch dannen schiet  
 0,17736 an mînen gesellen mir leit geschach  
 0,17737 dâ ich ez mit den ougen sach  
 0,17738 êr ich es rehte wart geware  
 0,17739 schôz ir daz mîrre teil dare  
 0,17740 die mit iren schiffen  
 0,17741 wurden sô begriffen  
 0,17742 daz ir niemer mîr dechein  
 0,17743 ûf dem mere mî geschein  
 0,17744 unde als daz was ergangen  
 0,17745 sint wart ich gevangen  
 0,17746 in Fenicen lande  
 0,17747 an habe unde an gewande  
 0,17748 beleip mir anders niet  
 0,17749 wen als ir an mir hier gesiet"  
 0,17750 dô er diz gesaget hæte

- 0,17751 der küninc dâ von Crête  
 0,17752 gap im harte guote gewant  
 0,17753 unde sante in in sîn lant  
 0,17754 harte hövischlîche  
 0,17755 dô vuor er durch ein rîche  
 0,17756 dâ Alteon inne saz  
 0,17757 der entvienc in vile baz  
 0,17758 denne er dort entvangen wäre  
 0,17759 dô vernam er daz mære  
 0,17760 daz manic ritter gemeit  
 0,17761 mit grôzer zierheit  
 0,17762 an spîse unde an gewande  
 0,17763 lâge in sîneme lande  
 0,17764 die gerne ze wîbe hæten  
 0,17765 Penelopen die stæten  
 0,17766 die vrouwe Ulixis wîp  
 0,17767 hæte behalten iren lîp  
 0,17768 alsô kiuschlîche  
 0,17769 daz nieman in dem rîche  
 0,17770 nie bî eineme worte  
 0,17771 übel von ir gehörte  
 0,17772 Alteonen dô Ulixes bat  
 0,17773 daz er mit im in sîne stat  
 0,17774 sîner ritter ein teil sente  
 0,17775 daz er jene berente  
 0,17776 in der herberge  
 0,17777 die durch ire erge  
 0,17778 umbe sîn wîp wâren kumen  
 0,17779 als er daz hæte vernomen  
 0,17780 daz geschach alsô  
 0,17781 Ulixes heim ze lande zôch  
 0,17782 er sluoc unde vienc  
 0,17783 swaz er der ie begjenc  
 0,17784 die durch sînes wîbes schande  
 0,17785 lâgen in sîneme lande  
 0,17786 sint geschuof er daz Nausicam  
 0,17787 Alteonis tohter ze wîbe nam  
 0,17788 Thelemacus sîn sun  
 0,17789 durch die liebe daz Alteon  
 0,17790 sîne ritter hæte gesant  
 0,17791 im ze hülfe in sîn lant  
 0,17792 dô erholete sich des  
 0,17793 der wîse Ulixes  
 0,17794 an guoteme gemache  
 0,17795 daz im ze ungemache  
 0,17796 was geschê manigen tac  
 0,17797 Nausica eines kindes gelac  
 0,17798 einen sun sie gewan

- 0,17799 Thelemacus ire man  
 0,17800 hiez daz kint Porporius  
 0,17801 Ulixis geslehte wuhs alsus  
 0,17802 hier muoz ich dise rede lân  
 0,17803 unde an die alten grêde gân  
 0,17804 sagen gemach unde ungemach  
 0,17805 waz Achilles sune geschach  
 0,17806 in welichen landen er beleip  
 0,17807 sint sie daz weter zuotreib  
 0,17808 unde von einander wurden zuovuort  
 0,17809 Pirrus quam an einen vurt  
 0,17810 dâ daz lant Moloses hiez  
 0,17811 ze stade er sich dâ liez  
 0,17812 sîne schif wâren zuosliffen  
 0,17813 unde was in den schiffen  
 0,17814 der mastboum zuoslizzen  
 0,17815 die segel zuorizzen  
 0,17816 die ruoder zuovallen  
 0,17817 sînen gesellen allen  
 0,17818 was nôt grôzer ruowe  
 0,17819 nâch irere unruowe  
 0,17820 dô quam im ein mære  
 0,17821 daz müejete in alsô sêre  
 0,17822 als sîn ungeræte  
 0,17823 einen eltervater er hæte  
 0,17824 der selbe hiez Peleus  
 0,17825 sîn ane Acastus  
 0,17826 hêrren Peleum vienc  
 0,17827 unde nam im al sîn dinc  
 0,17828 stete bürge unde lant  
 0,17829 unde swaz er dâr inne vant  
 0,17830 als diz Pirrus vernam  
 0,17831 dô wart er sîneme anen gram  
 0,17832 der daz übel hæte getân  
 0,17833 des sante er zwêne boten sân  
 0,17834 ze Tessalie in die geine  
 0,17835 Krispus was der eine  
 0,17836 Adrastus der ander bote  
 0,17837 die wâren gereit ze sîneme gebote  
 0,17838 unde riten ûz vrâgen  
 0,17839 ze vriunden unde ze mâgen  
 0,17840 wie dise unêre  
 0,17841 under in kumen wäre  
 0,17842 ze Assandrô sie quâmen  
 0,17843 an dem sie vernâmen  
 0,17844 wie dise vêhe  
 0,17845 under in geschæhe  
 0,17846 Assandrus sagete unde sprach

- 0,17847 wie die vêhe geschach  
 0,17848 Peleus bat ze einen gezîten  
 0,17849 Acastum mit im rîten  
 0,17850 unde sîne ritterschaft  
 0,17851 ze einer wirtschaft  
 0,17852 in ein gebirge dâ Chyron  
 0,17853 zôch Achillem Peleuses sun  
 0,17854 Acastis tohter Thetis  
 0,17855 Peleusis wîp die was sô wîs  
 0,17856 daz sie durch ire sinne  
 0,17857 hiez ein gotinne  
 0,17858 durch Achillen  
 0,17859 durch sîner muoter willen  
 0,17860 unde durch Peleum iren man  
 0,17861 Chyron sô vile spîse gewan  
 0,17862 wär im alle die werlt kumen  
 0,17863 er mochte ir an spîse wole gevrumen  
 0,17864 die wirtschaft alsô grôz was  
 0,17865 dô ladete Chyron Musas  
 0,17866 daz wâren sengære  
 0,17867 die quâmen dar mit êren  
 0,17868 dar quâmen pôête  
 0,17869 die man ze guotem werde hæte  
 0,17870 daz wâren tihtære  
 0,17871 bî der zît was ire lêre  
 0,17872 vile liep unde ire list  
 0,17873 als ez hiute des tages ist  
 0,17874 nemelîche dem manne  
 0,17875 die ire kunst erkennen kan  
 0,17876 Musæ dâ sô sungen  
 0,17877 daz ire stimme erklungen  
 0,17878 über manige mîle  
 0,17879 dâ kvrzeten die wîle  
 0,17880 die edeln tihtære  
 0,17881 mit maniger hande mære  
 0,17882 dâ was kurzewile vile  
 0,17883 von maniger hande seitenspile  
 0,17884 was die hôchzît alsô guot  
 0,17885 daz Acastus dâhte in sînen muote  
 0,17886 Peleus quæme es ze solicheme lobe  
 0,17887 daz er heime unde ze hove  
 0,17888 solte kumen an grôzen wert  
 0,17889 iemer sint herwert  
 0,17890 nâch der selben hôchzît  
 0,17891 truoc er zuo Peleô nît  
 0,17892 dâr umbe hazzet er in noch  
 0,17893 dô wiste er ein loch  
 0,17894 ûf eineme holen steine

- 0,17895 dâ wäre Peleus eine  
 0,17896 iemer sintinne  
 0,17897 sint die unminne  
 0,17898 under in was geschêne  
 0,17899 dô sie die stat hæten besêne  
 0,17900 unde diz mære gehört  
 0,17901 dô riten sie wider an den vurt  
 0,17902 ze dem hêrren Pirrô  
 0,17903 unde sageten im alsô  
 0,17904 als in vore was gesaget  
 0,17905 Pirrus sprach "daz sî geklaget  
 0,17906 allen den die hier sint  
 0,17907 bereitet die segele an den wint  
 0,17908 mîne schif sint bereit  
 0,17909 wir hoeren ze einer arbeit"  
 0,17910 des vuor er naht unde tac  
 0,17911 daz er ruowe nie gepflac  
 0,17912 êr er quam dâ engein  
 0,17913 ûf den stat bî den steine  
 0,17914 dâ er Peleum ûfe vant  
 0,17915 des gienc er eine zuohant  
 0,17916 unde steic unde klam  
 0,17917 unz er ûf den stein quam  
 0,17918 dâ vant er ein hol  
 0,17919 mosic unde busche vol  
 0,17920 stille unde eislich  
 0,17921 vinster unde vreislich  
 0,17922 dâ ûfe vant er einen man  
 0,17923 der hæte boese placken an  
 0,17924 unde gevertelæhe  
 0,17925 kranc unde unwæhe  
 0,17926 sîn hâr bestrûbet unde verkârt  
 0,17927 lanc unde dicke sîn bart  
 0,17928 unde was allez verstalt  
 0,17929 er was doch niht als alt  
 0,17930 als in gealtet hæte  
 0,17931 sorge unde ungeræte  
 0,17932 als im Pirrus zuo sprach  
 0,17933 Peleus in ane sach  
 0,17934 dô ersach er in rihte  
 0,17935 an sîneme anegesihte  
 0,17936 unde an sîneme gelâze  
 0,17937 an lîbe unde an mâze  
 0,17938 daz er was sînes kindes kint  
 0,17939 deweder êr noch sint  
 0,17940 en wart er nie mî sô vrô  
 0,17941 des sagete er Pirrô  
 0,17942 wie ez im was kommen

- 0,17943 als er ez och vore hæte vernomen  
 0,17944 Pirrus sprach "des wirdet rât  
 0,17945 sint ir noch den lîp hât  
 0,17946 iuwer lant wirdet iuch wole  
 0,17947 daz iuch von rehte werden sol"  
 0,17948 sie redeten vile under des  
 0,17949 Manalippus unde Plastenes  
 0,17950 Acastis süne beide  
 0,17951 riten ûf der heide  
 0,17952 unde wolten birsen unde jagen  
 0,17953 Peleus begunde im sagen  
 0,17954 ez wären sîne mâge  
 0,17955 Pirrus sunder træge  
 0,17956 spranc von deme steine nider  
 0,17957 unde gienc ze sînen gesellen wider  
 0,17958 unde schürzete ûf sîn gewant  
 0,17959 unde nam ein sper an die hant  
 0,17960 Pirrus lief balde  
 0,17961 hine gein dem walde  
 0,17962 sîne gesellen volgeten im nâch  
 0,17963 er hiez daz sie sîn dâ  
 0,17964 alle sament beitten  
 0,17965 und sich sô bereitten  
 0,17966 daz sie im zuo helfe quæmen  
 0,17967 op sie dehein übel vernæmen  
 0,17968 aleine er dô kârte  
 0,17969 hine gein der warte  
 0,17970 dâ er sich verwânte  
 0,17971 unde als er quam gânde  
 0,17972 dô wolten sie beschinden  
 0,17973 einen hirz oder ein hinden  
 0,17974 ir ietweder ûf der hinden lac  
 0,17975 Pirrus bôt in guoten tac  
 0,17976 sie sageten im genâde  
 0,17977 "sô iuch got genâde  
 0,17978 wennen gêt ir sus"  
 0,17979 dô sprach hêrre Pirrus  
 0,17980 "ich gên dâ here von dem stade  
 0,17981 mir ist geschên grôz schade  
 0,17982 ich hân mîne schif alle verloren  
 0,17983 dô ich gehörte iuwer horn  
 0,17984 wäre mir noch wirs geschên  
 0,17985 ich wolte iuwer vröuwede sehen"  
 0,17986 unt als sie lâgen  
 0,17987 unde mîr begunden vrâgen  
 0,17988 dô vernâmen sie übel mære  
 0,17989 êr ein wîle wäre  
 0,17990 sô hæte er sie erstochen

- 0,17991 unde hæte sich gerochen  
 0,17992 unde sînen eltervater  
 0,17993 an in unde an ireme vater  
 0,17994 als er dannen gienc  
 0,17995 dô bequam im ein jungelinc  
 0,17996 der was geheizen Cyneras  
 0,17997 Acastis bote er was  
 0,17998 unde gienc von Acastô  
 0,17999 unde vrâgete umbe Pirrô  
 0,18000 op er iergen an decheiner næhe  
 0,18001 zwêne hêrren sæhe  
 0,18002 mit iren jagenden hunden  
 0,18003 "sie hânt einen hirz vunden  
 0,18004 unde sint hier vore uns ûf der vart  
 0,18005 des bin ich nâch in gekârt"  
 0,18006 "nû sage mir" sprach Pirrus  
 0,18007 "wâ ist Acastus"  
 0,18008 der ander sprach "er ist hier bî  
 0,18009 ich wæne er vile nâhe sî  
 0,18010 ich wæne er kumet iezuo"  
 0,18011 er gesprach daz wort nie sô vruo  
 0,18012 sô gâhens er in in sîn herze stach  
 0,18013 daz er niemer mîr wort gesprach  
 0,18014 harte snel unde gerat  
 0,18015 lief er wider ûf den stat  
 0,18016 unde zôch ane daz bezziste gewant  
 0,18017 daz er in dem schiffe vant  
 0,18018 von pfellel unde zindâte  
 0,18019 unde lief vile drâte  
 0,18020 ân gewere unde âne swert  
 0,18021 wider ze dem holze wert  
 0,18022 dâ was Acastus sîn ane  
 0,18023 daz gewant daz er truoc ane  
 0,18024 harte verre ez im engein  
 0,18025 in daz buschæhe schein  
 0,18026 des kârte Acastus ûz den holze  
 0,18027 in dûhte wole er wäre stolz  
 0,18028 der ritter oder jungelinc  
 0,18029 der dâ vore dem walde gienc  
 0,18030 sie gruozen sich mit worten  
 0,18031 die dâr zuo gehörten  
 0,18032 Acastus vrâgete mære  
 0,18033 wenne oder wer er wäre  
 0,18034 er sprach "ich bin von Ilion  
 0,18035 hêrren Priamus sun  
 0,18036 mir ist missegangen  
 0,18037 Pirrus hât mich gevangen  
 0,18038 unde brâht in dise geine

- 0,18039 er liget dort eine  
0,18040 hier bî an eineme pfade  
0,18041 sîne schif stânt an deme stade  
0,18042 hine über eine mîle  
0,18043 wir wâren durch kurzewîle  
0,18044 sament kumen ûz dem mer  
0,18045 des giengen wir beide âne gewer  
0,18046 unde âne wâfen  
0,18047 nû ist er entsläfen  
0,18048 ich hörte hunde loufen hier  
0,18049 ouch jagete ich gerne selbe ie  
0,18050 des dûhte mich alsô wæhe  
0,18051 daz ich hier sâhe  
0,18052 wie die hunde liefen  
0,18053 als wir beide sliefen  
0,18054 uns hât der wint her getriben  
0,18055 wir en wizzen wâ wir sîn beliben  
0,18056 ouch en wizzen wir war kêren  
0,18057 wen daz wir gerne waren  
0,18058 ûz dirre unkünde  
0,18059 uns hât des meres ünde  
0,18060 alsô sâre übergân  
0,18061 daz wir der spîse niht en hân"  
0,18062 Acastus in sâre bat  
0,18063 wîsen hin an den pfat  
0,18064 dâ hêrre Pirrus lît  
0,18065 "mir ist gesaget manige zît  
0,18066 von sîner grôzen vrümicheit  
0,18067 mir ist leider vile leit  
0,18068 daz ich im gevrumen niet en kan  
0,18069 ich bin ein armman  
0,18070 unde hân anders dechein gewin  
0,18071 wen daz ich ein jeger bin  
0,18072 lihte kumet daz mîn rât  
0,18073 im ze guoten staten stât"  
0,18074 er gienc vore unde jener nâch  
0,18075 in was beiden vile gâch  
0,18076 dô wûchzete Pirrus  
0,18077 des wânte Acastus  
0,18078 daz er Pirrô riefe  
0,18079 dâ er lâge unde sliefe  
0,18080 dô rief er hin in daz mer  
0,18081 des lief ein michel her  
0,18082 ûzer den schiffen  
0,18083 Acastum sie begriffen  
0,18084 sus wart er gevangen  
0,18085 dô quam Thetis gegangen  
0,18086 die quam wunderlîchen dar

- 0,18087 die solte Peleô die lîpnar  
 0,18088 ûf den stein hân getragen  
 0,18089 dô vant sie ire bruoder erslagen  
 0,18090 unde hæte och anders vernomen  
 0,18091 wie ez dâr zuo was kommen  
 0,18092 Pirrum bat dô Thetis  
 0,18093 rehte alle die wîs  
 0,18094 daz sie gebiten kunde  
 0,18095 daz er in der stunde  
 0,18096 iren vater lieze leben  
 0,18097 "er mac dir harte wole gegeben  
 0,18098 beide silber unde golt  
 0,18099 ich en hân es niht umb dich verschult  
 0,18100 dû bist liebes von mir niht gewon  
 0,18101 doch was dîn vater mîn sun  
 0,18102 ich en wart nie mennischen noch en bin  
 0,18103 sô holt sô dir ân in  
 0,18104 alsô liep sô dû mir bist  
 0,18105 sô gip im sînes lîbes vrist"  
 0,18106 Pirrus sprach "daz sî alsô  
 0,18107 sendet nâch Peleô  
 0,18108 der mac ez wole gestillen  
 0,18109 daz ich durch sînen willen  
 0,18110 in diseme lande hân getân  
 0,18111 daz wil ich an sînen rât lân"  
 0,18112 dô Peleus dar quam  
 0,18113 Pirrus sîne ritter nam  
 0,18114 die wîsesten die dâ wâren  
 0,18115 an witzen unde an jâren  
 0,18116 under einander sie ez triben  
 0,18117 daz sie gevriunt alle beliben  
 0,18118 Acastus den lîp behielt  
 0,18119 Peleus sint sînes landes wielt  
 0,18120 Pirrô wart sô vile gegeben  
 0,18121 daz ez allez wart eben  
 0,18122 waz sol ich mère  
 0,18123 wen daz Acastis êre  
 0,18124 sîn rîche unde sîn lant  
 0,18125 wart an Pirrum sint gewant  
 0,18126 Hectoris wîp Adromacham  
 0,18127 er in sîn rîche mit im nam  
 0,18128 die hæte er von Trôje gevuort  
 0,18129 dô Priamis gesezze wart zuovuort  
 0,18130 daz hæten sie alsô zuotriben  
 0,18131 daz dâ niergen was beliben  
 0,18132 stein ûf steine  
 0,18133 grôz noch kleine  
 0,18134 in der zît Pirrus Orestî nam

- 0,18135 Helenen tohter Ermionam  
 0,18136 mit kraft unde mit gewalt  
 0,18137 unde hæte sie bräht in sîn behalt  
 0,18138 daz klagete Orestes alle tage  
 0,18139 in half sîn drouwe noch sîn klage  
 0,18140 swaz sô Orestes tæte  
 0,18141 Pirrus sie vaste hæte  
 0,18142 dô vuor ze Delphos Pirrus  
 0,18143 dâ was sîn got Phebus  
 0,18144 dâ wolte er sich ervrâgen  
 0,18145 von sînen vater unde von sînen mâgen  
 0,18146 die ze Trôje wâren erslagen  
 0,18147 wie er sie solte klagen  
 0,18148 als ez guot wäre  
 0,18149 Ermiona weinte sêre  
 0,18150 daz er sie mit im niht en nam  
 0,18151 her hæte sie unde Adromacham  
 0,18152 dâ heime gelâzen beide  
 0,18153 Ermiona gedâhte ir leide  
 0,18154 sie truoc ze Andromachen grôzen haz  
 0,18155 die vrouwe die vertruoc daz  
 0,18156 Ermiona die sante dô  
 0,18157 nâch ireme vater Menelaô  
 0,18158 unde vrâgete in waz sie es tæte  
 0,18159 daz sie Pirrus gelâzen hæte  
 0,18160 mit Hectoris wîbe  
 0,18161 die dröuwete ir ze dem lîbe  
 0,18162 ouch wäre Hectoris sun dâ  
 0,18163 daz kint Laomedontâ  
 0,18164 der tæte ir dicke grôze nôt  
 0,18165 “er en lige von dînen handen tôt  
 0,18166 ich en werde dir niemer mîr holt  
 0,18167 er hât den tôt an mir verschult”  
 0,18168 Menelaus wolte ze stete  
 0,18169 leisten sîner tohter bete  
 0,18170 des wart Andromacha geware  
 0,18171 sie schrei sô lûte daz dare  
 0,18172 die liute alle quâmen  
 0,18173 unde sie von den sorgen nâmien  
 0,18174 Ermionen was ungemach  
 0,18175 daz ire wille niht geschach  
 0,18176 dô was dar kumen under des  
 0,18177 ire êrste man Orestes  
 0,18178 der hæte vernomen  
 0,18179 wâr umbe ire vater dar was kumen  
 0,18180 dô gelobete er der vrouwen  
 0,18181 er löste sie von den riuwen  
 0,18182 op sie mit ime wolte kêren

- 0,18183 er wolte sie wole êren  
 0,18184 daz geschach alsô  
 0,18185 Orestes lâgete Pirrô  
 0,18186 eine stat er kôs  
 0,18187 dâ er reit von Delphos  
 0,18188 sîn wec in vüre in truoc  
 0,18189 Pirrum er ze tôde sluoc  
 0,18190 harte mortlîche  
 0,18191 unde vuorte in sîn rîche  
 0,18192 Ermionen ir beider wîp  
 0,18193 dô Pirrus verloren hæte den líp  
 0,18194 dô wart er ze Delphos begraben  
 0,18195 sint wart sîn künne von im erhaben  
 0,18196 Andromacha von im gewan  
 0,18197 einen sun der wart ein strenger man  
 0,18198 der wart wîten bekant  
 0,18199 sîneme bruoder gewan er sîn lant  
 0,18200 dâ ze Trôjenrîche  
 0,18201 harte manlîche  
 0,18202 diz was Hectoris sun  
 0,18203 den Andromacha von Ilion  
 0,18204 zuo Kriechen hæte mit ir gevuort  
 0,18205 dô ire lant wart zuostôrt  
 0,18206 nû hoeret wunderlîche dinc  
 0,18207 wie ez Ulike ergienc sint  
 0,18208 unde wie er sîn ende nam  
 0,18209 eines nahtes im zuo quam  
 0,18210 in dem vinsternisse  
 0,18211 sînes gotes gestelt«en»nisse  
 0,18212 niht vollen gotelîche  
 0,18213 wen ein teil mennischlîche  
 0,18214 benider der goteheit  
 0,18215 über der mennischheit  
 0,18216 dâ enzwischen was ez ein  
 0,18217 als ez von disen zwein  
 0,18218 weder got noch man  
 0,18219 hæte ein sunderen gescheffede an  
 0,18220 Ulixes selbe jach  
 0,18221 des nahtes dô er ez gesach  
 0,18222 daz in daz dûhte  
 0,18223 daz ez sô lûhte  
 0,18224 als ez wäre mitter tac  
 0,18225 dô er an dem bette lac  
 0,18226 dô wolte er ez begriffen hân  
 0,18227 er sprach "Ulixes lâ stân  
 0,18228 dû salt dîn grîfen gar lân  
 0,18229 wende dû maht mîn niht gevâhen"  
 0,18230 ez sweimete dare unde here

- 0,18231 mit eineme vile schoenen spere  
 0,18232 ez vuor vort unt vüre  
 0,18233 von der want ze der türe  
 0,18234 ein mervisch an sînem schafte  
 0,18235 obene ane hafte  
 0,18236 "mit decheiner liste  
 0,18237 ich daz rehte wiste  
 0,18238 waz daz wäre  
 0,18239 ich vrâgete harte sêre  
 0,18240 waz wunders daz mohte sîn"  
 0,18241 ez sprach "ez wirdet dir wole schîn  
 0,18242 ich bezeichene scheidunge  
 0,18243 unde wandelunge  
 0,18244 in dîneme lande"  
 0,18245 Ulixes der wânte  
 0,18246 daz ez ime niet übel solte wesen  
 0,18247 doch hiez er vrâgen unt lesen  
 0,18248 under sîner pfaffeheit  
 0,18249 op sich solicher wîsheit  
 0,18250 ir decheiner ane zuhte  
 0,18251 der ime gesagen mohte  
 0,18252 waz daz dinc wäre  
 0,18253 waz sol der rede mère  
 0,18254 die wîsesten rieten im daz  
 0,18255 daz er sich huotte baz  
 0,18256 denne er vore hæte  
 0,18257 im næhete ungeræte  
 0,18258 an vriunden oder an kinden  
 0,18259 daz er ez niht wole verwinden  
 0,18260 in decheine wîs mohte  
 0,18261 sô daz ez ime tohte  
 0,18262 er hæte ze kinden decheinen wân  
 0,18263 von den ime mohte missegân  
 0,18264 er was übels niht von in gewon  
 0,18265 er hæte ouch niht wen einen sun  
 0,18266 der Thelemacus hiez  
 0,18267 den selben er vüeren liez  
 0,18268 harte verre in daz mer  
 0,18269 unde hiez in halten in einer gewer  
 0,18270 mit solicher huote  
 0,18271 daz er in niet en muote  
 0,18272 dô machete er eine veste  
 0,18273 daz er wole weste  
 0,18274 wäre alle die werlt dar kommen  
 0,18275 sie en mohten sîn dâ niet hân genomen  
 0,18276 dâ obene gesaget ist  
 0,18277 mit welicher nôt mit welicher list  
 0,18278 Ulixes von Circen schiet

- 0,18279 des en wiste er niet  
 0,18280 sint er von ir kommen was  
 0,18281 daz sie eines kindes von im genas  
 0,18282 eines sunes sie gelac  
 0,18283 dâr zuo hörte manic tac  
 0,18284 êr er quæme ze sînen tagen  
 0,18285 unde er hörte sagen  
 0,18286 von sîneme vater Ulixê  
 0,18287 er en beite niet mî  
 0,18288 er wolte nâch im in sîn lant  
 0,18289 Thelogonus was er genant  
 0,18290 unde was ein wole geschaffen man  
 0,18291 er hâte einen guoten mandel an  
 0,18292 unde einen harte schoenen roc  
 0,18293 wole gewunden was sîn loc  
 0,18294 gelevarre krûsp hâr  
 0,18295 er was alt vünvzehen jâr  
 0,18296 unde eineme risen gelîch  
 0,18297 er gurte ein swert umbe sich  
 0,18298 unde nam an die hant einen schaft  
 0,18299 dâ was von pfellel ûf gehaft  
 0,18300 ein harte vrisch vane  
 0,18301 dâ was ein mervisch ane  
 0,18302 mitten dâr in gesniten  
 0,18303 unde mit golde wole underbriten  
 0,18304 der visch tet daz kunt  
 0,18305 daz sîn lant in dem mere stuont  
 0,18306 Thelogonus der helt gemeit  
 0,18307 saz ûf unde reit  
 0,18308 Circe stalte grôze nôt  
 0,18309 sie bat unde gebôt  
 0,18310 daz er geselleschaft næme  
 0,18311 die ime wole gezæme  
 0,18312 ez wäre krump oder reht  
 0,18313 er en wolte ritter noch kneht  
 0,18314 er huop sich eine an die vart  
 0,18315 decheine ruowe ime wart  
 0,18316 êr er an die stat quam  
 0,18317 dâ er Ulixem vernam  
 0,18318 in einer burc er in vant  
 0,18319 dâ was er vile unbekant  
 0,18320 als er quam vüre daz tor  
 0,18321 dô klopfete er dâ vüre  
 0,18322 unde sprach "tuot ûf die porten"  
 0,18323 die in dâ vore hörten  
 0,18324 die wolten in niht in lâzen  
 0,18325 "rîtent iuwer strâzen"  
 0,18326 sprach der torwarte dâr in

- 0,18327 er sprach "wizzet ir wer ich bin  
0,18328 ich bin Ulixes sun"  
0,18329 "ir sít mir vile ungewon"  
0,18330 "tuot úf balde"  
0,18331 "daz iuwer der tiuel walte"  
0,18332 "êr ich hinnen scheide  
0,18333 ez wirdet iuch ze leide  
0,18334 op ir niht gerne úf tuot  
0,18335 tuot úf balde ez dunket mich guot"  
0,18336 dô sprach der dâinne  
0,18337 "habet iuwer sinne  
0,18338 ir gebietet uns ân nôt  
0,18339 iuwer vorevarn gebôt  
0,18340 an dirre stat nie dechein  
0,18341 mir ist die rede als ein stein"  
0,18342 Thelogen erzurnte daz  
0,18343 er trat ze der porten baz  
0,18344 unde stiez unde dranc  
0,18345 daz der torwart her vüre spranc  
0,18346 unde wolte in abe trîben  
0,18347 des muoste er tôt belîben  
0,18348 er sluoc in zuohant dâr nider  
0,18349 unde spranc ze der porten wider  
0,18350 die dâ wâren binnen  
0,18351 dô sie des wurden innen  
0,18352 unde solicher unlust geware  
0,18353 dô huoben sie sich dare  
0,18354 ir en was dechein sô starc  
0,18355 noch sô übel noch sô arc  
0,18356 getraf er in mit dem swerte  
0,18357 daz er sîn niht mî gerte  
0,18358 dâ dranc er eine  
0,18359 wider sie alle gemeine  
0,18360 unz er quam an die gewer  
0,18361 dô bestuont in ein her  
0,18362 den er allen widerstuont  
0,18363 ouch wart er sêre gewundet  
0,18364 swie gewundet sô er was  
0,18365 vile lützel ir genas  
0,18366 sweliche ir ime zuo quam  
0,18367 er en belibe gewundet oder lam  
0,18368 sîn vater Ulixes  
0,18369 underquam sêre des  
0,18370 dô er daz hôrte sagen  
0,18371 daz sîn sun sie hâlte erslagen  
0,18372 unde gewundt sêre  
0,18373 er wânte ez Thelemacus wäre  
0,18374 den er hâlte versant

- 0,18375 er nam eine glevien in die hant  
 0,18376 unde umbe sich sîn swert  
 0,18377 er lief gein der porten wert  
 0,18378 in ein rippe er in stach  
 0,18379 daz daz sper vore dem stiche brach  
 0,18380 Thelegonus denete och sînen schaft  
 0,18381 ûf sînen vater mit solicher kraft  
 0,18382 daz er an der erden beleip  
 0,18383 den schaft er alsô sêre treip  
 0,18384 daz er andersit ûz swanc  
 0,18385 mē denne einer ellen lanc  
 0,18386 daz bluot im beidersit ûz wiel  
 0,18387 Ulixes aber dâr nider viel  
 0,18388 als er vore hâte gesehen  
 0,18389 alsô was ime geschehen  
 0,18390 Ulixes dô ze den sînen sprach  
 0,18391 dô er sînen tôt sach  
 0,18392 nû allerêrste sê ich wole  
 0,18393 daz ez mir kumen sol  
 0,18394 als mir vüre was kommen  
 0,18395 mir hât ein man den lîp genomen  
 0,18396 daz nie schoener man en wart  
 0,18397 von sîner geburt unde von sîner art  
 0,18398 unde von sînen mâgen  
 0,18399 begunde er vrâgen  
 0,18400 dô berihte in Thelgonus  
 0,18401 beide sô unde sus  
 0,18402 von mâgen unde von vriunden  
 0,18403 dô redeten sie ze künden  
 0,18404 unz ir ietweder vernam  
 0,18405 wie sîn unsælde quam  
 0,18406 Thelgonus weinen begunde  
 0,18407 unde sprach "ouwê der stunde  
 0,18408 in der ich armer wart geboren  
 0,18409 wie hân ich dem den lîp verloren  
 0,18410 von dem mîn lîp kumen ist  
 0,18411 liebe vater daz dû bist  
 0,18412 von mir alsus erslagen"  
 0,18413 Ulixes sprach "liebez kint  
 0,18414 die unse gote sîn  
 0,18415 die wolten daz ez geschæhe  
 0,18416 êr ich Circen sâhe  
 0,18417 von der ich dich gewunnen hân  
 0,18418 sun ez was in teile uns getân"  
 0,18419 dô sante er nâch Thelemacô  
 0,18420 der wolte Thelgonô  
 0,18421 den lîp gerne hân genomen  
 0,18422 dô wart ez kûme underkumen

- 0,18423 under in beiden  
0,18424 wart ez doch gescheiden  
0,18425 Ulixes der en statete es niet  
0,18426 mit guoten worten er ez schiet  
0,18427 ouch verschiet er alzuohant  
0,18428 daz mære quam in daz lant  
0,18429 alle die ez vernâmen  
0,18430 leidic sie dare quâmen  
0,18431 Ulixes wart sô wole bestatet  
0,18432 in einer sîner houbetstat  
0,18433 unde alsô hêrlîche  
0,18434 daz nie dechein sîn gelîche  
0,18435 mochte âf der erden  
0,18436 baz bestatet werden  
0,18437 Thelemacus behielt sîn lant  
0,18438 Thelogonus wart gesant  
0,18439 wider ze sîner muoter lande  
0,18440 mit golde unde mit gewande  
0,18441 unde mit grôzer rîchheit  
0,18442 heim er in sîn lant reit  
0,18443 alsus hât ir vernomen  
0,18444 wie ez den von Trôje ist kumen  
0,18445 unde wie ez den Kriechen quam  
0,18446 wie ir iegelich sîn ende nam  
0,18447 dâ heime unde in ellende  
0,18448 hier ist des buoches ende  
0,18449 ir hât diz getihte wole gehôrt  
0,18450 ez tihte von Fritzlar Herbort  
0,18451 ein gelârter schuolâre  
0,18452 ez en ist niht ahtbâre  
0,18453 daz er iht tihten kan  
0,18454 doch sô nimet er sich es an  
0,18455 mit andern tihtären  
0,18456 der schar wil er mîren  
0,18457 er gert anders lobes niet  
0,18458 alsus endet sich diz liet